



**MALAYSIA**

**PENYATA RASMI PARLIMEN  
DEWAN RAKYAT**

**PARLIMEN KESEBELAS  
PENGKAL KEDUA  
MESYUARAT PERTAMA**



## K A N D U N G A N

<b>JAWAPAN-JAWAPAN LISAN BAGI PERTANYAAN-PERTANYAAN</b>	(Halaman 1)
<b>USUL:</b>	
Waktu Mesyuarat Dan Urusan Dibebaskan Daripada Peraturan Mesyuarat	(Halaman 15)
Menjunjung Kasih Titah Ucapan Seri Paduka Baginda Yang Di-Pertuan Agong	(Halaman 15)



**AHLI-AHLI DEWAN RAKYAT**

- Yang Berhormat Tuan Yang di-Pertua, Tan Sri Dato' Seri Diraja Ramli bin Ngah Talib, PSM., SPCM., AMN., JP. (Pasir Salak) - UMNO
- “ Timbalan Yang di-Pertua, Datuk Lim Si Cheng, P.J.N., PIS. (Kulai) - MCA
- “ Timbalan Yang di-Pertua, Datuk Dr. Yusof bin Yacob, PGDK., ADK. (Sipitang) - UMNO

**MENTERI**

1. Yang Amat Berhormat Perdana Menteri, Menteri Kewangan dan Menteri Keselamatan Dalam Negeri, Dato' Seri Abdullah bin Haji Ahmad Badawi, S.P.M.S., S.S.S.J., S.P.S.A., S.S.A.P., S.P.D.K., D.P., S.P.N.S., D.G.P.N., D.S.S.A., D.M.P.N., D.J.N., K.M.N., A.M.N. (Kepala Batas) - UMNO
2. “ Timbalan Perdana Menteri dan Menteri Pertahanan, Dato' Sri Mohd. Najib bin Tun Haji Abdul Razak, S.S.A.P, S.I.M.P., D.P.M.S., D.S.A.P., P.N.B.S., D.U.B.C.(T). (Pekan) - UMNO
3. Yang Berhormat Menteri Perumahan dan Kerajaan Tempatan, Dato' Seri Ong Ka Ting, S.P.M.P., D.P.M.P. (Tanjong Piai) - MCA
4. “ Menteri Kerja Raya, Dato' Seri S. Samy Vellu, S.P.M.J., S.P.M.P., D.P.M.S., P.C.M., A.M.N. (Sungai Siput) - MIC
5. “ Menteri Tenaga, Air dan Komunikasi, Dato' Seri Dr. Lim Keng Yaik, S.P.M.P., D.G.P.N., D.P.C.M. (Beruas) - GERAKAN
6. “ Menteri di Jabatan Perdana Menteri, Tan Sri Bernard Giluk Dompok, P.S.M., S.P.D.K. (Ranau) - UPKO
7. “ Menteri Perdagangan Antarabangsa dan Industri, Dato' Seri Rafidah binti Abd. Aziz, S.P.M.T., S.P.M.P., D.P.M.S., A.M.N. (Kuala Kangsar) - UMNO
8. “ Menteri Luar Negeri, Datuk Seri Syed Hamid bin Syed Jaafar Albar, S.P.M.J., S.P.D.K., D.P.M.J., S.M.J., A.M.N. (Kota Tinggi) - UMNO
9. “ Menteri Pertanian dan Industri Asas Tani, Tan Sri Dato' Haji Muhyiddin bin Haji Mohd. Yassin, P.S.M., S.P.M.J., S.M.J., P.I.S., B.S.I. (Pagoh) - UMNO
10. “ Menteri Penerangan, Datuk Paduka Abdul Kadir bin Haji Sheikh Fadzir, D.H.M.S., P.G.D.K., D.S.D.K., A.M.K. (Kulim-Bandar Baharu) – UMNO
11. “ Menteri Sumber Manusia, Datuk Wira Dr. Fong Chan Onn, D.C.S.M., D.M.S.M. (Alor Gajah) - MCA
12. “ Menteri di Jabatan Perdana Menteri, Dato' Seri Mohamed Nazri bin Abdul Aziz, S.P.M.P., D.M.S.M., A.M.P., B.K.T. (Padang Rengas) - UMNO
13. “ Menteri Hal Ehwal Dalam Negeri, Dato' Azmi bin Khalid, D.P.M.P., S.M.P., P.J.K. (Padang Besar) – UMNO
14. “ Menteri Pelajaran, Dato' Hishammuddin bin Tun Hussein, S.I.M.P., D.S.A.P., D.P.M.J. (Sembrong) - UMNO
15. “ Menteri Kebudayaan, Kesenian dan Warisan, Datuk Seri Utama Dr. Rais Yatim, S.J.M.K., S.P.N.S., D.S.N.S. (Jelebu) - UMNO

16. Yang Berhormat Menteri Pembangunan Wanita, Keluarga dan Masyarakat, Dato' Seri Hajah Shahrizat binti Abdul Jalil, D.G.P.N., D.I.M.P. (Lembah Pantai) - UMNO
17. “ Menteri Sains, Teknologi dan Inovasi, Dato' Dr. Haji Jamaludin bin Dato' Mohd. Jarjis, S.I.M.P., D.I.M.P., S.A.P. (Rompin) - UMNO
18. “ Menteri Pengangkutan, Dato' Sri Chan Kong Choy, S.S.A.P., D.S.A.P., D.P.M.S., (Selayang) – MCA.
19. “ Menteri Kewangan Kedua, Senator Tan Sri Datuk Seri Nor Mohamed bin Yakcop
20. “ Menteri Wilayah Persekutuan, Tan Sri Dato' Seri Utama Mohd. Isa bin Abdul Samad, P.S.M., S.P.N.S., D.S.N.S., P.M.C. (Jempol) – UMNO
21. “ Menteri Pelancongan, Datuk Dr. Leo Michael Toyad, P.G.D.K., J.B.S. (Mukah) - PBB
22. “ Menteri Perusahaan Perladangan dan Komoditi, Datuk Peter Chin Fah Kui, P.G.B.K., P.B.S., A.B.S. (Miri) – SUPP
23. “ Menteri Perdagangan Dalam Negeri dan Hal Ehwal Pengguna, Datuk Mohd. Shafie bin Haji Apdal, D.S.A.P., P.G.D.K., D.M.S.M. (Semporna) - UMNO
24. “ Menteri Pengajian Tinggi, Dato' Dr. Haji Shafie bin Haji Mohd. Salleh, D.S.S.A., S.M.S., S.S.A., K.M.N. (Kuala Langat) – UMNO
25. “ Menteri Kemajuan Luar Bandar dan Wilayah, Dato' Abdul Aziz bin Shamsuddin, D.P.M.S., D.S.A.P., P.G.D.K., D.M.S.M., D.P.M.P., D.S.D.K. (Shah Alam) - UMNO
26. “ Menteri Pembangunan Usahawan dan Koperasi, Dato' Mohamed Khaled bin Nordin, D.S.P.N., S.M.J., P.I.S. (Pasir Gudang) - UMNO
27. “ Menteri di Jabatan Perdana Menteri, Dato' Mustapa bin Mohamed (Jeli) - UMNO
28. “ Menteri di Jabatan Perdana Menteri, Dato' Mohd Radzi bin Sheikh Ahmad (Kangar) - UMNO
29. “ Menteri Sumber Asli dan Alam Sekitar, Dato' Sri Adenan bin Satem (Batang Sadong) – PBB
30. “ Menteri di Jabatan Perdana Menteri, Datuk Dr. Maximus Johnity Ongkili, A.S.D.K., J.P. (Kota Marudu) - PBS
31. “ Menteri Kesihatan, Datuk Dr. Chua Soi Lek (Labis) - MCA
32. “ Menteri Belia dan Sukan, Datuk Azalina binti Othman Said (Pengerang) - UMNO
33. “ Menteri di Jabatan Perdana Menteri, Prof. Dato' Dr. Abdullah bin Md. Zin (Besut) - UMNO

#### **TIMBALAN MENTERI**

1. Yang Berhormat Timbalan Menteri Pertanian dan Industri Asas Tani, Dato' Seri Kerk Choo Ting (Simpang Renggam) – GERAKAN
2. “ Timbalan Menteri Pengangkutan, Datuk Douglas Uggah Embas (Betong) - PBB

3. Yang Berhormat Timbalan Menteri Hal Ehwal Dalam Negeri, Datuk Tan Chai Ho, P.J.N., K.M.N., A.M.N. (Bandar Tun Razak) - MCA
4. “ Timbalan Menteri Pembangunan Wanita, Keluarga dan Masyarakat, Datuk G. Palanivel, D.S.S.A., S.S.A., P.J.K. (Hulu Selangor) - MIC
5. “ Timbalan Menteri Belia dan Sukan, Datuk Ong Tee Keat, P.J.N., S.M.S. (Pandan) - MCA
6. “ Timbalan Menteri Pertanian dan Industri Asas Tani, Dato' Seri Mohd. Shariff bin Omar, D.G.P.N., D.M.P.N., P.P.T. (Tasek Gelugor) – UMNO
7. “ Timbalan Menteri Pertahanan, Dato' Zainal Abidin bin Zin, D.P.M.P., P.M.P. (Bagan Serai) - UMNO
8. “ Timbalan Menteri Pengangkutan, Dato' Seri Tengku Azlan ibni Sultan Abu Bakar, S.P.T.J., D.S.A.S. (Jerantut) - UMNO
9. “ Timbalan Menteri Perusahaan Perladangan dan Komoditi, Datuk Anifah bin Haji Aman (Kimanis) - UMNO
10. “ Timbalan Menteri Kemajuan Luar Bandar dan Wilayah, Datuk Dr. Tiki anak Lafe (Mas Gading) - SPDP
11. “ Timbalan Menteri Kewangan, Dato' Dr. Ng Yen Yen, D.I.M.P., D.S.A.P. (Raub) - MCA
12. “ Timbalan Menteri Kesihatan, Datuk Dr. Abdul Latiff bin Ahmad (Mersing) - UMNO
13. “ Timbalan Menteri Pelajaran, Dato' Hon Choon Kim (Seremban) - MCA
14. “ Timbalan Menteri di Jabatan Perdana Menteri, Datuk M. Kayveas, P.J.N. (Taiping) - PPP
15. “ Timbalan Menteri Penerangan, Dato' Donald Lim Siang Chai (Petaling Jaya Selatan) - MCA
16. “ Timbalan Menteri Pengajian Tinggi, Dato' Fu Ah Kiow (Kuantan) – MCA
17. “ Timbalan Menteri Penerangan, Datuk Zainudin bin Maidin (Merbok) – UMNO
18. “ Timbalan Menteri Keselamatan Dalam Negeri, Dato' Haji Noh bin Haji Omar, D.P.M.S., D.M.S.M., K.M.N., A.S.A., P.J.K., J.P. (Tanjong Karang) - UMNO
19. “ Timbalan Menteri Pembangunan Usahawan dan Koperasi, Dato' Khamsiyah binti Yeop, P.P.T., A.M.N., A.M.P., P.M.P. (Lenggong) – UMNO
20. “ Timbalan Menteri Keselamatan Dalam Negeri, Tuan Chia Kwang Chye (Bukit Bendera) - GERAKAN
21. “ Timbalan Menteri Sumber Asli dan Alam Sekitar, Dato' S. G. Sothinathan (Telok Kemang) - MIC
22. “ Timbalan Menteri Perdagangan Dalam Negeri dan Hal Ehwal Pengguna, Dato' S. Veerasingam, P.M.P., A.M.P, A.M.N. (Tapah) - MIC
23. “ Yang Berhormat Timbalan Menteri Kebudayaan, Kesenian dan Warisan, Dato' Wong Kam Hoong, K.M.N. (Bayan Baru) - MCA
24. “ Timbalan Menteri Pelajaran, Dato' Mahadzir bin Mohd. Khir (Sungai Petani) - UMNO

25. Yang Berhormat Timbalan Menteri Perdagangan Antarabangsa dan Industri, Dato' Haji Ahmad Husni bin Mohd. Hanadzlah, P.P.T., A.M.P. (Tambun) - UMNO
26. " Timbalan Menteri Pelancongan, Datuk Ahmad Zahid bin Hamidi, D.M.S.M., P.P.T., P.J.K. (Bagan Datok) – UMNO
27. " Timbalan Menteri Perumahan dan Kerajaan Tempatan, Datuk Robert Lau Hoi Chew, J.B.S. (Sibu) - SUPP
28. " Timbalan Menteri Luar Negeri, Dato' Joseph Salang Gandum (Julau) - PBDS
29. " Timbalan Menteri Sains, Teknologi dan Inovasi, Dato' Kong Cho Ha (Lumut) - MCA
30. " Timbalan Menteri Perdagangan Antarabangsa dan Industri, Dato' Mah Siew Keong, (Telok Intan) - GERAKAN
31. " Timbalan Menteri Kerja Raya, Dato' Ir. Mohd. Zin bin Mohamed, D.P.T.J., J.P. (Sepang) – UMNO
32. " Timbalan Menteri Tenaga, Air dan Komunikasi, Dato' Shaziman bin Abu Mansor, A.N.S. (Tampin) – UMNO
33. " Timbalan Menteri Wilayah Persekutuan, Dato' Zulhasnan bin Rafique, D.I.M.P., A.M.N. (Setiawangsa) - UMNO
34. " Timbalan Menteri Perumahan dan Kerajaan Tempatan, Datuk Azizah binti Mohd. Dun (Beaufort) – UMNO
35. " Timbalan Menteri Sumber Manusia, Datuk Abdul Rahman bin Bakar (Marang) - UMNO
36. " Timbalan Menteri Kemajuan Luar Bandar dan Wilayah, Dato' Dr. Awang Adek bin Hussin (Bachok) – UMNO
37. " Timbalan Menteri di Jabatan Perdana Menteri, Tuan Joseph Entulu anak Belaun (Selangau) - PBDS
38. " Mulia Timbalan Menteri Kewangan, Datuk Tengku Putera bin Tengku Awang (Hulu Terengganu) – UMNO

#### **SETIAUSAHA PARLIMEN**

1. Yang Berhormat Setiausaha Parlimen di Jabatan Perdana Menteri, Dato' Mohd Johari bin Baharum (Kubang Pasu) - UMNO
2. " Setiausaha Parlimen di Jabatan Perdana Menteri, Dato' Dr. Mashitah binti Ibrahim (Baling) - UMNO
3. " Setiausaha Parlimen Kementerian Kewangan, Dato' Seri Dr. Hilmi bin Yahaya (Balik Pulau) - UMNO
4. " Setiausaha Parlimen Kementerian Keselamatan Dalam Negeri, Datuk Wira Abu Seman Yusop (Masjid Tanah) - UMNO
5. " Setiausaha Parlimen Kementerian Perumahan dan Kerajaan Tempatan, Dr S. Subramaniam (Segamat) - MIC
6. " Yang Berhormat Setiausaha Parlimen Kementerian Kerja Raya, Dato' Yong Khoo Seng (Stampin) - SUPP
7. " Setiausaha Parlimen Kementerian Perdagangan Antarabangsa dan Industri, Datin Paduka Dr. Tan Yee Kew (Klang) – MCA

8. Yang Berhormat Setiausaha Parlimen Kementerian Luar Negeri, Dato' Zainal Abidin bin Osman (Nibong Tebal) - UMNO
8. “ Setiausaha Parlimen Kementerian Pertanian dan Industri Asas Tani, Datuk Hajah Rohani binti Haji Abdul Karim (Batang Lupar) - PBB
9. ” Setiausaha Parlimen Kementerian Penerangan, Puan Noriah binti Kasnon (Sungai Besar) - UMNO
10. “ Setiausaha Parlimen Kementerian Hal Ehwal Dalam Negeri, Dato' Paduka Haji Abdul Rahman bin Ibrahim (Pokok Sena) - UMNO
11. “ Setiausaha Parlimen Kementerian Pelajaran, Puan Komala Devi (Kapar) – MIC
12. “ Setiausaha Parlimen Kementerian Pembangunan Wanita, Keluarga dan Masyarakat, Puan Chew Mei Fun (Petaling Jaya Utara) - MCA
13. “ Setiausaha Parlimen Kementerian Sains, Teknologi dan Inovasi, Profesor Datuk Dr. Mohd. Ruddin bin Ab. Ghani (Bukit Katil) – UMNO
14. “ Setiausaha Parlimen Kementerian Perdagangan Dalam Negeri dan Hal Ehwal Pengguna, Tuan Hoo Seong Chang (Kluang) - MCA
15. “ Setiausaha Parlimen Kementerian Wilayah Persekutuan, Tuan Yew Teong Look (Wangsa Maju) - MCA
16. “ Setiausaha Parlimen Kementerian Perusahaan Perladangan dan Komoditi, Tuan Ng Lip Yong @ Ng Lip Sat (Batu) - GERAKAN
17. ” Setiausaha Parlimen Kementerian Pengajian Tinggi, Datuk Dr. Adham bin Baba (Tenggara) - UMNO
18. “ Setiausaha Parlimen Kementerian Pembangunan Usahawan dan Koperasi, Tuan Samsu Baharun bin Haji Abdul Rahman (Silam) - UMNO
19. “ Setiausaha Parlimen Kementerian Sumber Asli dan Alam Sekitar, Tuan Sazmi bin Miah (Machang) - UMNO
20. “ Setiausaha Parlimen Kementerian Kesihatan, Tuan Lee Kah Choon (Jelutong) - GERAKAN
21. “ Setiausaha Parlimen Kementerian Belia dan Sukan, Tuan Sa. Vigneswaran (Kota Raja) - MIC

#### **AHLI-AHLI**

1. Yang Berhormat Tuan Aaron Ago Dagang (Kanowit) - PBDS
2. “ Brig. Jen. (B) Dato' Seri Abdul Hamid bin Haji Zainal Abidin (Parit Buntar) - UMNO
3. “ Tuan Haji Abdul Fatah bin Haji Haron (Rantau Panjang) - PAS
4. “ Datuk Abdul Ghapur bin Salleh (Kalabakan) - UMNO
5. “ Dato' Haji Ab. Halim bin Ab. Rahman (Pengkalan Chepa) - PAS
6. “ Datuk Abdul Rahim bin Bakri (Kudat) - UMNO
7. “ Dato' Abdul Rahman bin Ariffin (Jerlun) - UMNO
8. “ Datuk Patinggi Tan Sri Abdul Taib bin Mahmud (Kota Samarahan) - PBB
9. “ Dato' Abu Bakar bin Taib (Langkawi) - UMNO

10. Yang Berhormat Tuan Ahmad Shabery Cheek (Kemaman) - UMNO
11. " Tuan Alexander Nanta Linggi (Kapit) - PBB
12. " Datuk Haji Astaman bin Abdul Aziz (Titiwangsa) - UMNO
13. " Dato' Paduka Haji Badruddin bin Amiruldin (Jerai) - UMNO
14. " Tuan Baharum bin Mohamed (Sekijang) - UMNO
15. " Tuan Bernard S. Maraat @ Ben (Pensiangan) - PBRS
16. " Tuan Billy Abit Joo, K.M.N. (Hulu Rajang) - PBDS
17. " Datuk Bung Moktar bin Radin (Kinabatangan) - UMNO
18. " Tuan Che Azmi bin Hj. A. Rahman (Kuala Nerus) – UMNO
19. " Dato Haji Che Min bin Che Ahmad (Pasir Puteh) - PAS
20. " Tuan Chong Chieng Jen (Bandar Kuching) - DAP
21. " Puan Chong Eng (Bukit Mertajam) - DAP
22. " Tuan Chong Hon Min (Sandakan) - BEBAS
23. " Dato' Chor Chee Heung (Alor Star) - MCA
24. " Tuan Chow Kon Yeow (Tanjong) - DAP
25. " Dato' Chua Jui Meng (Bakri) – MCA
26. " Tuan Devamany a/l S. Krishnasamy (Cameron Highlands) - MIC
27. " Tuan Donald Peter Mojuntin (Penampang) – UPKO
28. " Ir. Edmund Chong Ket Wah (Batu Sapi) - PBS
29. " Tuan Eric Enchin Majimbun (Sepanggar) - SAPP
30. " Tuan Haji Fadillah bin Yusof (Petra Jaya) - PBB
31. " Dato' Firdaus bin Harun (Rembau) - UMNO
32. " Tuan Fong Kui Lun (Bukit Bintang) - DAP
33. " Cik Fong Po Kuan (Batu Gajah) - DAP
34. " Dato' Ghazali bin Ibrahim (Padang Terap) - UMNO
35. " Dato' Goh Siow Huat (Rasah) - MCA
36. " Ir. Haji Hamim bin Samuri (Ledang) - UMNO
37. " Datuk Haji Hasan bin Malek (Kuala Pilah) - UMNO
38. " Tuan Hashim bin Jahaya (Kuala Kedah) - UMNO
39. " Ir. Hasni bin Haji Mohammad (Pontian) - UMNO
40. " Tuan Henry Sum Agong (Bukit Mas) - PBB
41. " Tan Sri Dato' Hew See Tong (Kampar) - MCA
42. " Tuan Huan Cheng Guan (Batu Kawan) - GERAKAN
43. " Tuan Haji Idris bin Haji Haron (Tangga Batu) - UMNO
44. " Tuan Haji Ismail bin Haji Abd. Muttalib (Maran) - UMNO
45. " Tuan Haji Ismail bin Haji Mohamed Said (Kuala Krau) - UMNO
46. " Tuan Haji Ismail bin Noh (Pasir Mas) - PAS
47. " Datuk Ismail Sabri bin Yaakob (Bera) - UMNO

48. Yang Berhormat Dato' Jacob Dungau Sagan (Baram) - SPDP
49. " Dr. James Dawos Mamit (Mambong) - PBB
50. " Tuan Jawah anak Gerang (Lubok Antu) - PBDS
51. " Tuan Jelaing anak Mersat (Saratok) - SPDP
52. " Tuan Jimmy Donald (Sri Aman) - PBDS
53. " Datu Seri Joseph Pairin Kitingan (Keningau) - PBS
54. " Dr. Junaidy bin Abdul Wahab (Batu Pahat) - UMNO
55. " Datuk Juslie Ajirol (Libaran) - UMNO
56. " Tan Sri Dato' K.S. Nijhar (Subang) - MIC
57. " Dato' Kamarudin bin Jaffar (Tumpat) - PAS
58. " Tuan R. Karpal Singh (Bukit Gelugor) - DAP
59. " Tuan Lau Yeng Peng (Puchong) - GERAKAN
60. " Dato' Seri Law Hieng Ding (Sarikei) - SUPP
61. " Yang Berhormat Puan Lim Bee Kau, A.M.K., B.K.M., P.J.K., J.P. (Padang Serai) - MCA
62. " Tuan Lim Hock Seng (Bagan) - DAP
63. " Tuan Lim Kit Siang (Ipoh Timor) - DAP
64. " Tuan Liow Tiong Lai (Bentong) - MCA
65. " Tuan Loh Seng Kok (Kelana Jaya) - MCA
66. " Dato' Loke Yuen Yow (Tanjong Malim) - MCA
67. " Tuan M. Kula Segaran (Ipoh Barat) - DAP
68. " Datuk Dr. Marcus Makin Mojigoh (Putatan) - UPKO
69. " Tuan Markiman bin Kobiran (Hulu Langat) - UMNO
70. " Dato' Haji Mat Yasir bin Haji Ikhsan (Sabak Bernam) – UMNO
71. " Tuan Haji Md. Alwi bin Che Ahmad (Ketereh) – UMNO
72. " Datuk Haji Mohamad bin Haji Aziz (Sri Gading) - UMNO
73. " Tuan Mohamad Shahrudin bin Osman (Lipis) - UMNO
74. " Tuan Mohamed Razali bin Che Mamat, J. P. (Kuala Krai) - UMNO
75. " Datuk Mohd. Zaid bin Ibrahim (Kota Bharu) - UMNO
76. " Tuan Mohd. Daud bin Tarihep (Kuala Selangor) - UMNO
77. " Dr. Mohd. Hayati bin Othman (Pendang) - PAS
78. " Datuk Haji Mohd. Said bin Yusof (Jasin) - UMNO
79. " Dato' Mohd. Sarit bin Haji Yusoh (Temerloh) - UMNO
80. " Tuan Mohd. Yusop bin Majid (Setiu) - UMNO
81. " Tuan Nasaruddin bin Hashim (Parit) - UMNO
82. " Yang Berhormat Datuk Nur Jazlan bin Mohamed (Pulai) - UMNO
83. " Datuk Dr. Rahman bin Ismail (Gombak) - UMNO
84. " Tuan Raimi Unggi (Tenom) – UMNO

85. Yang Berhormat Dato' Raja Ahmad Zainuddin bin Raja Haji Omar (Larut) - UMNO
86. " Tan Sri Dato' Seri Diraja Ramli bin Ngah Talib (Pasir Salak) - UMNO
87. " Tuan Razali bin Ibrahim (Muar) - UMNO
88. " Dato' Razali bin Ismail (Kuala Terengganu) – UMNO
89. " Tuan Richard Riot anak Jaem (Serian) - SUPP
90. " Datuk Ronald Kiandee (Beluran) – UMNO
91. " Datuk Rosli bin Mat Hassan (Dungun) - UMNO
92. " Puan Rosnah bte. Haji Abd. Rashid Shirlin (Papar) – UMNO
93. " Dr. Rozaidah binti Talib (Ampang) - UMNO
94. " Tuan Salahuddin bin Ayub (Kubang Kerian) - PAS
95. " Datuk Salleh bin Tun Said (Kota Belud) – UMNO
96. " Ir. Shaari bin Hassan (Tanah Merah) – UMNO
97. " Dato' Shahrir Abdul Samad (Johor Bahru) – UMNO
98. " Tuan Shim Paw Fatt (Tawau) - SAPP
99. " Datuk Seri Dr. Siti Zaharah binti Sulaiman (Paya Besar) – UMNO
100. " Dato' Suhaili bin Abdul Rahman (Labuan) – UMNO
101. " Yang Berhormat Tuan Syed Hood bin Syed Edros (Parit Sulung) – UMNO
102. " Dato' Seri Diraja Syed Razlan ibni Syed Putra Jamalullail (Arau) – UMNO
103. " Puan Tan Ah Eng (Gelang Patah) - MCA
104. " Dato' Dr. Tan Kee Kwong (Segambut) - GERAKAN
105. " Tuan Tan Kok Wai (Cheras) - DAP
106. " Cik Tan Lian Hoe (Bukit Gantang) - GERAKAN
107. " Dr. Tan Seng Giaw (Kepong) – DAP
108. " Tuan Teng Boon Soon (Tebrau) - MCA
109. " Datuk Tengku Adnan bin Tengku Mansor (Putrajaya) - UMNO
110. " Mulia Tengku Razaleigh Hamzah, D.K., P.S.M., S.P.M.K., S.S.A.P., S.P.M.S. (Gua Musang) – UMNO
111. " Puan Teresa Kok Suh Sim (Seputeh) – DAP
112. " Tan Sri Dato' Seri Dr. Ting Chew Peh (Gopeng) - MCA
113. " Dato' Seri Tiong King Sing (Bintulu) - SPDP
114. " Tuan Tiong Thai King (Lanang) - SUPP
115. " Datuk Wahab bin Haji Dollah (Kuala Rajang) - PBB
116. " Dato' Wan Adnan bin Wan Mamat (Indera Mahkota) - UMNO
117. " Datin Seri Dr. Wan Azizah binti Wan Ismail (Permatang Pauh) - KEADILAN
118. " Dato' Dr. Wan Azmi bin Wan Ariffin (Sik) – UMNO
119. " Dato' Dr. Wan Hashim bin Wan Teh (Gerik) – UMNO

- 
- 120 Yang Berhormat Datuk Haji Wan Junaidi bin Tuanku Jaafar (Santubong) - PBB  
121 “ Ir. Dr. Wee Ka Siong (Ayer Hitam) - MCA  
122 “ Tuan Wilfred Madius Tangau (Tuaran) - UPKO  
123 “ Tuan Wong Nai Chee (Kota Melaka) - MCA  
124 “ Dato' Yap Pian Hon (Serdang) - MCA  
125 “ Datuk Dr. Yee Moh Chai (Kota Kinabalu) - PBS

**DEWAN RAKYAT****Setiausaha Dewan Rakyat**

Dato' Abdullah bin Abdul Wahab

**Ketua Penolong Setiausaha**Roosme binti Hamzah  
Ruhana binti Abdullah  
Riduan bin Rahmat**Pegawai Undang-Undang**

Muzalni bin Soid

**Penolong Setiausaha**Muhd Sujairi bin Abdullah  
Lavinia a/p Vyveganathan  
Bazlinda binti Bahrin  
Farah Nurdiana binti Azhar**PETUGAS-PETUGAS****CAWANGAN DOKUMENTASI**Azhari bin Hamzah  
Hajah Paizah binti Haji Salehuddin  
Hajah Supiah binti Dewak  
Mohamed bin Osman  
Abd. Talip bin Hasim  
Hadzirah binti Ibrahim  
Saadiyah binti Jamaludin  
Syed Azuddin bin Syed Othman  
Hairan bin Mohtar  
Jamilah Intan binti Haji Bohari  
Nurziana binti Ismail  
Nik Elyana binti Ahyat  
Marzila binti Muslim  
Habibunisah binti Mohd. Azir  
Aisyah binti Razki  
Yoogeswari a/p Muniandy  
Nor Liyana binti Ahmad  
Mohd. Izhar bin Hashim**PETUGAS-PETUGAS UNIT CETAK**Kamaroddin bin Mohd. YusofMohamed  
Shahrizan bin Sarif  
Alias bin Mohd. Nor**JURUBAHASA SERENTAK**Ungku Fauzie bin Ungku A. Rahman  
Mazidah binti Mohamed  
Cik Lee Jing Jing**BENTARA MESYUARAT**Lt. Kol (B) Mohamed Nor bin Mohd. Darus  
Mejar (B) Mohd Azimi bin Arifin**PETUGAS-PETUGAS****CAWANGAN KOMPUTER**Mohd Shah bin Rahman  
Sulaiman bin Sirad**PETUGAS-PETUGAS****CAWANGAN PERUNDANGAN**Mohd. Shariff bin Hussein  
Azmi bin Othman  
Zafniza binti Zakaria  
Hindun binti Wahari  
Rozaimah binti Mohamad Ariffin  
Mohd. Sidek bin Mohd. Sani  
Mazlina binti Ali  
Norlaila binti Abdullah Sidi  
Ropiah binti Tambi  
Suhairi bin Othman

**MALAYSIA**  
**DEWAN RAKYAT**  
**Isnin, 28 Mac 2005**

**Mesyuarat dimulakan pada pukul 10.00 pagi**

**DOA**

[Tuan Yang di-Pertua *mempengerusikan Mesyuarat*]

**JAWAPAN-JAWAPAN LISAN BAGI PERTANYAAN-PERTANYAAN**

*[Soalan No. 1 – Y.B. Ir. Haji Hamim bin Samsuri (Ledang) tidak hadir]*

**2. Tuan Jawah anak Gerang [Lubok Antu]** minta Menteri Keselamatan Dalam Negeri menyatakan bilangan kes tangkapan mengikut negeri oleh pihak polis terhadap mereka yang melanggar undang-undang pengharaman pembakaran mercun semasa perayaan Chap Goh Meh dan Tahun Baru Cina tahun ini dan sebab-sebab mengapa undang-undang tersebut tidak dapat dikuat kuasa dengan sepenuhnya.

**Timbalan Menteri Keselamatan Dalam Negeri [Tuan Chia Kwang Chye]:** Tuan Yang di-Pertua bilangan tangkapan mengikut negeri oleh pihak polis terhadap mereka yang melanggar undang-undang pengharaman pembakaran mercun semasa perayaan Chap Goh Meh dan Tahun Baru Cina tahun ini adalah seperti berikut:

<b>Negeri</b>	<b>Tangkapan</b>
Perlis	0
Kedah	13
Pulau Pinang	61
Perak	40
Selangor	0
Kuala Lumpur	4
Negeri Sembilan	2
Melaka	2
Johor	158
Pahang	42
Terengganu	8
Kelantan	9
Sabah	0
Sarawak	<u>14</u>
Jumlah:	<u>353</u>

Berikut adalah di antara sebab-sebab mengapa undang-undang tersebut tidak dapat dikuatkuasakan dengan sepenuhnya:

- (i) undang-undang sedia ada adalah mencukupi tetapi kekurangan maklumat di atas kegiatan dan penjualan pembakaran mercun;

- (ii) pembakaran mercun dilakukan sekali-sekala dan secara curi-curi menyebabkan sukar untuk dikesan;
- (iii) kurangnya maklumat yang disalurkan oleh orang awam kepada pihak polis;
- (iv) pembakaran mercun berlaku di tempat-tempat terpencil dan semasa ketibaan polis di tempat berkenaan, pembakar mercun itu telah pun larikan diri; dan
- (v) kesukaran untuk mengesan penjualan mercun, bunga api kerana ianya dijual secara haram, tersembunyi dan para penjual amat licik menjalankan kegiatan mereka.

Sekian, terima kasih.

**Datuk Rosli bin Mat Hassan:** Terima kasih Tuan Yang di-Pertua. Soalan tambahan saya, apakah kategori kerana kebanyakan di sebelah pedalaman di negara kita ini kadang-kadang anak-anak muda kita membuat meriam buatan sendiri daripada buluh ataupun daripada besi paip yang besar-besar yang mana kita dapati dalam media massa apabila ada perayaan sama ada perayaan Tahun Baru Cina, Hari Raya Puasa ataupun Hari Raya Haji kita nampak yang putus tangan, putus jari kaki, mata dan sebagainya. Apakah kategori meriam buatan sendiri seperti daripada buluh daripada paip yang sekira-kira termasuk di dalam akta kita ataupun tidak kerana ini banyak membahayakan kepada anak-anak muda kita yang tidak ada wang tetapi mereka sendiri bagaimana hendak buat *entertainment*, dengan izin tentang meriam daripada buluh dan paip buatan sendiri ini. Terima kasih.

**Tuan Chia Kwang Chye:** Tuan Yang di-Pertua, mengikut kalau mengilang atau memiliki ataupun mengimport mercun dan bunga api boleh dikatakan melakukan kesalahan, dan jika didakwa mengikut seksyen 42 yang di bawah Akta Bahan Letupan 1957 ini dan sekiranya disabit salah mereka boleh dihukum penjara selama lima tahun ataupun denda RM10,000 atau kedua-duanya. Inilah di bawah Akta Bahan Letupan. Jadi, kalau mereka yang menggunakan bahan-bahan letupan untuk mengubah atau membuat daripada buluh dan menggunakan sebagai bunga api dan sebagainya ini boleh dikatakan salah dari segi undang-undang. Tetapi masalahnya ialah biasanya maklumat tidak diperolehi atau diberi oleh orang awam dan biasanya diketahui selepas kejadian letupan di mana terdapat orang luka dan sebagainya.

**Tuan Fong Kui Lun:** Terima kasih Tuan Yang di-Pertua, soalan tambahan. Pembakaran mercun dan bunga api bukan sahaja berlaku semasa perayaan Tahun Baru Cina, tetapi juga perayaan-perayaan yang lain seperti Hari Raya Aidil-Fitri dan Deepavali. Nampaknya acara pembakaran mercun sudah menjadi semacam budaya Malaysia. Walaupun kerajaan mengharamkannya, secara positif bolehkah permainan mercun ini diterima sebagai salah satu kebudayaan tradisi Malaysia dan dimainkan secara kecil atau sederhana dan tidak membahayakan serta dalam kawalan di tempat tertentu. Terima kasih.

**Tuan Chia Kwang Chye:** Tuan Yang di-Pertua, memang tidak dinafikan bahawa permainan mercun dan bunga api bukan sahaja pada Tahun Baru Cina tetapi pada musim Hari Raya dan Deepavali dan sebagainya. Jawapan ini adalah mengikut soalan yang ditanya mengenai dengan Chap Goh Meh dan Tahun Baru Cina. Walaupun permainan mercun dan bunga api diharamkan tetapi memang ada orang yang bermain. Oleh sebab itu, kalau diluluskan untuk permainan mungkin lebih ramai orang akan bermain dengan secara besar-besaran. Walau bagaimanapun, kalau perlu dimainkan dalam pertunjukan, permit boleh diberi kepada pihak-pihak yang tertentu dan biasanya kepada organisasi atau syarikat yang pakar untuk bermain, untuk pertunjukan dan secara pemegang rasmi sahaja, bukan kepada orang ramai. Sekian, terima kasih.

**3. Tuan Lau Yeng Peng [Puchong]** minta Menteri Kesihatan menyatakan:-

- (a) langkah-langkah keselamatan dan pencegahan yang berkesan untuk mengurangkan kes-kes nyamuk aedes atau demam denggi dalam jangka masa ini; dan

- (b) jumlah kematian yang disebabkan demam denggi dan kes-kes yang sedang dirawat bermula 01/01/2004 sehingga 28/02/2005.

**Setiausaha Parlimen Kementerian Kesihatan [Tuan Lee Kah Choon]:** Tuan Yang di-Pertua, untuk menjawab soalan bahagian;

- (a) Langkah-langkah pencegahan dan kawalan yang paling berkesan untuk mengurangkan demam denggi adalah dengan penghapusan semua tempat pembiakan untuk nyamuk aedes. Tindakan ini akan hanya tercapai sekiranya semua anggota masyarakat mengambil bahagian dengan memeriksa premis masing-masing dan melupuskan semua tempat yang ditemui agar tiada lagi bekas-bekas yang boleh menakung air berada di persekitaran kita. Bagi tempat-tempat yang tidak boleh dihapuskan, orang ramai perlu memasukkan ubat jenis aedes bagi memastikan bekas yang menakung air tersebut tidak menjadi tempat pembiakan nyamuk aedes dan langkah ini dapat menghapuskan sumber pembiakan secara berkesan.
- (b) Jumlah kes demam denggi yang 'dnotifasikan' pada tahun 2004 adalah sebanyak 33,895 kes dan jumlah kematian yang dilaporkan pula adalah sebanyak 102 kes. Untuk tahun 2005 pula sehingga 28 Februari 2005 jumlah kes terkumpul (*cumulative*) adalah sebanyak 9,602 kes demam denggi dan kematian terkumpul (*cumulative*) adalah sebanyak 25 kes.

Sekian, terima kasih.

**Tuan Lim Kit Siang:** Tuan Yang di-Pertua, adakah Yang Berhormat bersetuju bahawa antara satu sebab dalam masalah kenapa demam denggi begitu serius ialah kegagalan pihak kerajaan tempatan untuk menjalankan tugas dalam mencegah masalah ini dan adakah pihak kerajaan tempatan disaman oleh Kementerian Kesihatan atau jabatan yang berkenaan kegagalan mereka dan apa jaminan bahawa kerajaan tempatan akan menunaikan tanggungjawab dalam bidang ini?

**Tuan Lee Kah Choon:** Terima kasih Yang Berhormat. Kita tidak menafikan bahawa di antara tempat-tempat yang dikompaun oleh Kementerian Kesihatan termasuklah juga kawasan-kawasan di bawah jagaan pihak berkuasa tempatan. Tetapi kita juga tidak dapat menafikan bahawa ada banyak lagi tempat-tempat seperti perumahan dan juga kilang dan sekolah yang bukan di bawah jagaan pihak berkuasa tempatan juga didapati tempat pembiakan nyamuk aedes ini dalam kawasan mereka.

Bagi kita, kita rasa tidak boleh salahkan hanya pihak berkuasa tempatan walaupun kita rasa kerja-kerja pembersihan itu patut ditingkatkan tetapi tanggungjawab untuk menghapuskan demam denggi ini adalah dipikul oleh kita semua iaitu segenap masyarakat yang kita ada supaya tempat pembiakan nyamuk aedes ini dapat dihapuskan. Sekian.

**Tuan Lau Yeng Peng:** Terima kasih, Tuan Yang di-Pertua. Penyakit yang dibawa oleh nyamuk aedes ini memang suatu penyakit yang kadang-kadang kita anggap sebagai *seasonal* atau bermusim. Tetapi setiap kali berlakunya wabak demam denggi, maka ramai yang terkorban ataupun mati.

Soalan tambahan saya ialah adakah kementerian sanggup mewujudkan satu *task force* yang khusus untuk *tackle* ataupun menangani masalah ini secara *long-term* ataupun dalam jangka masa yang panjang supaya tindakan-tindakan *ad-hoc* yang seperti ini kalau satu kematian dilaporkan, maka *fogging* akan dilakukan di tempat yang sedemikian juga *claim* mengatakan PBT yang bersalah dan sebagainya.

Bagi saya adakah satu *task force* akan ditubuhkan di bawah kementerian untuk menangani masalah ini secara jangka panjang. Terima kasih.

**Tuan Lee Kah Choon:** Terima kasih Yang Berhormat. Sebenarnya demam denggi ini bukanlah satu demam yang *seasonal*. Ia memang sentiasa berada dengan kita semua selagi tempat pembiakan nyamuk itu wujud.

Bagi *task force* yang dikatakan itu, kita di bawah Kementerian Kesihatan ada satu bahagian iaitu Bahagian Kawalan Penyakit Berjangkit yang berfungsi sepanjang tahun dan kita rasa kita memang sudah ada mekanisme untuk menangani masalah ini. Selalunya apabila kita dapat laporan berkaitan dengan penyakit demam denggi ini kita akan zonkan kawasan itu dalam lingkungan 500 meter persegi sebagai kawasan wabak dan kita akan menghantar pekerja-pekerja untuk menyembur atau *fogging* di dalam kawasan itu dalam masa 24 jam dari masa kes penyakit itu dilaporkan.

Kita akan membuat satu lagi *fogging* dalam masa tujuh hari. Mengapa kita terpaksa buat seperti itu adalah, yang pertama kita mesti menghapuskan nyamuk denggi ini tetapi kita tidak dapat menghapuskan jentik-jentik kalau terdapat dalam air dan kita membuat satu *fogging* lagi dalam masa tujuh hari adalah untuk menghapuskan jentik-jentik yang telah menjadi nyamuk.

*Task force* ini tidak akan berkesan selagi kita mempunyai banyak tempat pembiakan nyamuk aedes dan kita rasa cara yang paling berkesan adalah supaya kita semua yang tinggal di dalam bandar ini menjaga kawasan kita sebersih-bersih yang mungkin, supaya tempat pembiakan nyamuk aedes ini tidak terdapat di sekeliling kita. Ini adalah cara yang terbaik sekali dan kita tidak dapat membuat *fogging* atau tidak dapat menangani masalah ini dengan *task force* sahaja. Sekian, terima kasih.

**4. Dato' Seri Law Hieng Ding [Sarikei]** minta Menteri Kewangan menyatakan dengan sistem pengangkutan LRT kini begitu popular di kalangan setiap masyarakat adakah sebarang rancangan untuk memperluaskan lagi rangkaian LRT Putra/STAR yang sedia ada sekurang-kurangnya kepada kawasan-kawasan yang pesat membangun seperti di Subang, Shah Alam dan Damansara.

**Setiausaha Parlimen Kementerian Kewangan [Datuk Seri Dr. Hilmi bin Yahaya]:** Tuan Yang di-Pertua, kerajaan amat menyedari akan keperluan untuk memperluaskan lagi sistem pengangkutan LRT di kawasan Lembah Klang. Bagi tujuan ini, kerajaan kini dalam proses mengkaji berbagai-bagai alternatif untuk memperluaskan rangkaian perkhidmatan LRT yang sedia ada kepada kawasan-kawasan lain yang pesat membangun seperti di Subang, Shah Alam, Damansara, Selayang dan Puchong. Kajian yang sedang dibuat akan merangkumi berbagai-bagai aspek termasuk kepadatan penduduk, jajaran tanah sedia ada dan implikasi kos yang tinggi.

Objektif kerajaan secara keseluruhan adalah untuk mewujudkan rangkaian LRT yang lebih meluas, cekap dan berkesan. Dalam usaha untuk menyediakan rangkaian sistem pengangkutan awam yang lebih bersepadu, kerajaan telah mula melaksanakan projek integrasi dan penyusunan semula Sistem Pengangkutan Awam Lembah Klang (INSPEK).

Program ini akan melibatkan peningkatan keupayaan semua aspek pengangkutan awam termasuk *railbus* dan sistem tiket bagi mengurangkan lagi kesesakan jalan raya di Lembah Klang.

Tuan Yang di-Pertua, struktur yang wujud di bawah INSPEK adalah penubuhan dua syarikat iaitu pemilik aset utama ataupun *main asset owner* dan pengusaha utama ataupun *master operator* yang dimiliki penuh oleh kerajaan. Syarikat Prasarana Negara Berhad (SPNB) merupakan pemilik aset utama Syarikat Rangkaian Pengangkutan Integrasi Deras Sendirian Berhad (RAPID KL) memainkan peranan sebagai pengusaha utama perkhidmatan LRT termasuk bas milikan SPNB.

Perkhidmatan RAPID KL merangkumi hampir 70% daripada perjalanan pengguna sistem pengangkutan awam. Sistem pengangkutan awam bagi *rail* iaitu Putra dan juga STAR termasuk bas Intrakota dan City Liner telah diambil alih oleh Syarikat RAPID KL pada 1 November 2004 dengan tujuan untuk meningkatkan lagi tahap integrasi sistem sedia ada.

**Ir. Hasni bin Haji Mohammad:** Terima kasih Tuan Yang di-Pertua. Yang Berhormat Setiausaha Parlimen, adakah benar kenyataan bahawa sistem pengangkutan LRT ini begitu popular? Kalau popular sebenarnya apakah faktor yang menjadikan ia sistem yang popular dan kalau tidak popular ataupun ada yang menghadapi masalah, apakah faktor-faktor yang menyumbang kepada timbulnya masalah dalam hendak mencapai matlamat pewujudan sistem pengangkutan LRT di sesetengah tempat.

**Tuan Yang di-Pertua:** Yang Berhormat kalau ada angka *ridership* ataupun *passengers* sila berikan.

**Datuk Seri Dr. Hilmi bin Yahaya:** Tuan Yang di-Pertua, pada peringkat awal memang LRT Putra dan STAR ini memang tidak popular. Kalau kita lihat angkanya, kalau ikut unjuran pada tahun 2000 contohnya cuma 12% sahaja daripada jangkakan atau *projectionnya* yang menaiki STAR dan lebih kurang 48% pada tahun 2000 yang menaiki PUTRA.

Tetapi sekarang ini sudah pun meningkat hingga 50% bagi kedua-duanya. Ini bermakna sudah pun menjadi lebih popular sedikit daripada peringkat mula. Memang saya akui sistem ini belum lagi popular yang sepatutnya, kerana sistem ini belum lagi meluas. Masih lagi terdapat kekurangan dari segi laluan. Sebab itu pihak kerajaan sedang meneliti tentang hendak menyambung laluan ini kepada kawasan-kawasan yang mendesak.

Selain daripada itu masalahnya ialah masalah yang dipanggil *feeder service*. *Feeder service* ini adalah dijalankan oleh syarikat bas. Dahulunya syarikat bas ini dijalankan oleh pihak swasta, tetapi sekarang telah diambil alih oleh RAPID KL dan masalahnya ialah sepatutnya ada 1,000 buah bas yang menjalani seluruh laluan di Kuala Lumpur dan Lembah Klang, tetapi setakat ini cuma ada 450 buah bas. Oleh kerana pada peringkat awal bila pengambilan balik oleh RAPID KL ini terdapat bas-bas yang memang dalam keadaan yang teruk sekali dan kebanyakan dengan izin kena *write-off*.

Pada peringkat sekarang pihak RAPID KL akan membeli 200 buah bas yang baru dan akan cuba membaiki 80 buah bas lagi dan saya yakin dalam bulan September, mereka akan beroperasi yang mana 200 buah bas ini campur 80 buah yang akan dibaik pulih dan dijangka pada hujung tahun akan dapat memenuhi 1,000 buah bas itu.

**Ir. Shaari bin Hassan:** Terima kasih Tuan Yang di-Pertua. Saya menyokong penuh pelaksanaan kerajaan untuk mempercepatkan lagi perkhidmatan pengangkutan awam di Kuala Lumpur dan kita percaya dengan wujudnya RAPID KL ini, ataupun Sistem Rangkaian Trafik Aliran Deras Sendirian Berhad, saya percaya kesesakan jalan raya dapat dikurangkan dan perkara ini dapat menarik pengguna kepada pengangkutan awam.

Soalan saya adalah, adakah RAPID KL ini bercadang untuk mewujudkan satu *ticketing* yang bersepadu. Maksudnya satu tiket boleh digunakan untuk semua rangkaian perkhidmatan di bawah RAPID KL. Sekian, terima kasih.

**Dato' Seri Dr. Hilmi bin Yahaya:** Tuan Yang di-Pertua, tadi saya telah menyebutkan bahawa cadangan untuk mengintegrasikan perkhidmatan pengangkutan ini termasuk juga mewujudkan suatu *ticketing system*, dengan izin untuk keseluruhan semua iaitu LRT dan juga bas.

**5. Datin Seri Dr. Wan Azizah binti Wan Ismail [Permatang Pauh]** minta Perdana Menteri menyatakan penjelasan terhadap penutupan Paya Indah Wetland atas alasan gagal menarik pelancong. Pada tahun 2001 Dewan ini telah dimaklumkan bahawa sejumlah RM33.4 juta telah dilaburkan. Berapakah jumlah sebenar yang telah dilaburkan dan apakah tindakan kerajaan bagi mengatasi satu lagi projek pembaziran yang gagal ini.

**Menteri di Jabatan Perdana Menteri [Dato' Mustapa bin Mohamed]:** Tuan Yang di-Pertua, projek Paya Indah Wetland adalah suatu kawasan tanah bekas lombong bijih timah yang terletak kira-kira 15 kilometer daripada pekan Dengkel. Ia merangkumi kawasan kira-kira 451 hektar dan diwartakan oleh Kerajaan Negeri Selangor pada Februari 1998 sebagai Rizab Perlindungan Tanah Lembap di bawah Kanun Tanah Negara.

Setakat ini Kerajaan Pusat telah membelanjakan kira-kira RM75 juta untuk memajukan projek ini iaitu RM42 juta pada tahun 1998, dan pada tahun 2003 sebanyak RM33.4 juta lagi telah diluluskan menjadikan jumlah semuanya RM75 juta. Perbelanjaan ini ialah untuk kerja-kerja tanah, menyediakan struktur seperti jalan, tempat *parking*, pusat pameran, membina *chalet* umpamanya dan beberapa kemudahan yang berkaitan.

Tuan Yang di-Pertua, projek ini ditadbirkan oleh Yayasan Tanah Lembap Malaysia iaitu sebuah pertubuhan yang tidak berasaskan keuntungan ataupun *non-profit organization* dan oleh kerana badan ini menghadapi masalah aliran tunai ataupun *cash flow* kira-kira RM80,000 sebulan sepanjang tahun lepas. Perbelanjaan kira-kira RM200,000, hasil cuma RM100,000 lebih sedikit, defisitnya RM85,000 sebulan. Oleh itu, Paya Indah ataupun Malaysia Wetlands Foundation iaitu pertubuhan yang tidak berasaskan keuntungan ini mengalami masalah *cash flow* dan pada 1 Mac 2005, kerajaan telah buat keputusan untuk mengambil alih pengurusan projek ini di bawah Jabatan PERHILITAN ataupun Jabatan Perlindungan Hidupan Liar dan Taman Negara.

Pada pandangan kerajaan, projek ini adalah sebuah projek yang amat berfaedah dan tidak merupakan suatu pembaziran. Ia telah berjaya memulihkan sebuah tanah bekas lombong yang tandus dan berpasir kepada sebuah kawasan hijau yang terpelihara. Ia menggunakan konsep kaedah penanaman semula dan usaha *rehabilitation* untuk mengembalikan kehijauan dan lebih 70,000 anak pokok telah ditanam daripada pelbagai spesies, 100 jenis pokok palma telah juga ditanam. Terdapat lebih 120 jenis burung termasuk daripada spesies burung berhijrah, 20 spesies ikan, 35 spesies mamalia, kita ada juga di sini empat ekor badak air daripada Botswana, 15 ekor buaya daripada Langkawi dan lebih 10 ekor kerbau, ini di antara hidupan liar yang terdapat di kawasan ini.

Tuan Yang di-Pertua, Jabatan PERHILITAN sekarang ini sedang menguruskan kawasan ini bertujuan untuk memulihkan keadaan dengan kos tambahan kira-kira RM65,000 sebulan dan kita menjangkakan pada awal tahun hadapan, kawasan ini akan dapat dibuka semula kepada orang ramai. Terima kasih.

**Datin Seri Dr. Wan Azizah binti Wan Ismail:** Terima kasih Tuan Yang di-Pertua. Terima kasih Yang Berhormat Menteri yang telah memberikan jawapan yang begitu indah sekali, begitu terpulih dan begitu menarik sekali tempat Paya Wetland ini. Tetapi kenapakah tidak mempunyai daya tarikan yang saya kira itulah keinginan dan hasrat kerajaan apabila hendak memulakan projek, dan apakah selepas Jabatan PERHILITAN mengambil alih, berapakah jangka masa yang boleh mendapatkan pulangan balik dengan sekarang ini RM65,000 sebulan kos pengendalian dan RM80,000 sebulan yang telah menjadi defisit persatuan yang telah mengendalikan sebelum daripada ini. Bilakah jangka masa yang boleh memulihkan semua ini. Terima kasih.

**Dato' Mustapa bin Mohamed:** Tuan Yang di-Pertua, pada tahun 2003, projek ini telah berjaya menarik kira-kira 5,000 orang pengunjung. Tahun 2004 oleh kerana badan ini menghadapi masalah maka dibuka cuma pada hujung minggu, pengunjungnya kira-kira 2,000 orang sebulan.

Pengurangan daripada 5,000 sebulan dalam tahun 2003 kepada 2,000 pada tahun 2004. Daya tarikan itu memanglah kita perlu membuat sesuatu untuk memastikan ada promosi yang agresif dan langkah-langkah sedang diambil oleh kerajaan untuk memastikan bahawa kawasan ini mampu menarik lebih ramai pengunjung termasuklah pelajar-pelajar universiti, pelajar-pelajar sekolah dan lain-lain lagi.

Berkaitan dengan pulangan, ia tidak boleh diasaskan kepada pulangan kewangan semata-mata. Ini merupakan satu *national asset*, dengan izin, satu *national treasure*. Yang pentingnya satu kawasan yang dulunya tandus, kawasan lombong, antara syarikat yang beroperasi di sini ialah Petaling Tin, tahun 1996. Syarikat ini berhenti daripada beroperasi. Di sana, sekarang ini ada sebuah kapal korek yang bernilai kira-kira RM5 juta, yang berhenti beroperasi pada tahun 1996. Sekarang ini kalau hendak tengok kapal korek, tidak ada lagi sudah. Ini satu-satunya kapal korek yang ada di Malaysia, yang dalam keadaan yang begitu baik sekali.

Jadi, pulangnya bukan terhad kepada hal-hal kewangan semata-mata. Bagi kerajaan, yang lebih penting ialah isu-isu *conservation*, pemuliharaan untuk generasi masa

depan dan apabila kerajaan menilai projek ini, insya-Allah kerajaan akan melihat kesannya kepada alam sekitar, kepada generasi masa depan dan dengan kita berjaya untuk memulihara beberapa mamalia dan spesies burung serta kawasan hijau ini, ia merupakan satu pulangan yang amat besar untuk negara.

**6. Dato' Mohd Sarit bin Haji Yusoh [Temerloh]** minta Menteri Belia dan Sukan menyatakan memandangkan Perdana Menteri telah melancarkan Pelan Tindakan Pembangunan Belia Nasional, apakah bentuk dan program pelaksanaan pelan tersebut, terutamanya di peringkat akar umbi, iaitu di daerah-daerah dan kawasan-kawasan Parlimen.

**Timbalan Menteri Belia dan Sukan [Datuk Ong Tee Keat]:** Tuan Yang di-Pertua, Kementerian Belia dan Sukan telah memperkenalkan Pelan Tindakan Pembangunan Belia Nasional atau pendeknya (PTPBN) dengan matlamat ke arah melahirkan masyarakat belia Malaysia yang cemerlang, gemilang dan terbilang.

Pelan yang berasaskan 11 teras pembangunan utama gender pembangunan belia di negara ini mempunyai dua objektif utama, iaitu:

- (i) menyediakan satu Pelan Pembangunan Belia Nasional yang menyeluruh dan berjangka panjang sehingga tahun 2020;
- (ii) menyediakan pelan tindakan jangka pendek dengan memberi empat tumpuan utama iaitu pengunggulan program rakan muda, mengupayakan pertumbuhan belia, menangani keperluan golongan belia tidak berpersatuan dan memantapkan keupayaan Kementerian Belia dan Sukan.

Sebelas teras yang terkandung dalam pelan ini adalah seperti berikut:

- (i) Teras Pembangunan Ekonomi;
- (ii) Teras Pembangunan Sosial;
- (iii) Teras Program Rakan Muda;
- (iv) Teras Pembangunan Sumber Manusia;
- (v) Teras Sistem Penyampaian;
- (vi) Teras Peranan Media dan Komunikasi;
- (vii) Teras Peranan Pertubuhan Belia;
- (viii) Teras Pembangunan Belia tidak berpersatuan;
- (ix) Teras Pembangunan Kepimpinan;
- (x) Teras Penyelidikan dan Pembangunan;
- (xi) Teras Politik dan Integrasi Nasional.

Sebelas jawatankuasa khas bagi setiap teras telah pun ditubuh, telah pun dibentuk bertujuan bagi menyelaras, mengkaji dan memantau pelaksanaan aktiviti berdasarkan pelan tindakan teras masing-masing, termasuklah pelaksanaannya di peringkat akar umbi. Antara langkah-langkah yang telah dilaksanakan, khususnya di peringkat akar umbi adalah mewujudkan Penggerak Rakan Muda di kawasan Parlimen dan Dewan Undangan Negeri seperti mana yang dinyatakan di bawah Teras Program Rakan Muda.

Selain daripada itu, Tuan Yang di-Pertua, kementerian ini telah menubuhkan Institut Penyelidikan dan Pembangunan Belia Malaysia selaras dengan pelan tindakan yang dinyatakan di bawah Teras Penyelidikan dan Pembangunan.

**Dato' Haji Mat Yasir bin Haji Ikhsan:** Terima kasih, Tuan Yang di-Pertua dan terima kasih, Timbalan Menteri. Belia ini adalah kumpulan sasaran yang sangat penting. Pelan ini adalah sangat penting tetapi saya sebenarnya, Yang Berhormat bagi Sabak Bernam agak hairan, kenapa rancangan dan pelan kepada golongan sasaran yang sebegini

penting tidak dihebahkan, diberikan penerangan secara khusus kepada Ahli-ahli Yang Berhormat yang ingin turut sama membangunkan belia.

Antara kumpulan rakyat di kawasan Parlimen kita yang sangat penting ialah golongan belia. Mereka ini aktif dan agresif, Yang Berhormat. Oleh kerana itu, saya ingin bertanya satu sahaja, bila agaknya Ahli-ahli Yang Berhormat Parlimen ini hendak dipanggil untuk diberikan penerangan dan penjelasan secara khusus, supaya kita dapat memberikan, memainkan peranan yang aktif. Terima kasih.

**Datuk Ong Tee Keat:** Tuan Yang di-Pertua, saya ucapkan terima kasih kepada Yang Berhormat bagi Sabak Bernam tadi. Sesungguhnya sejak pelan yang dimaksudkan ini dilancarkan tahun sudah, walaupun ia masih belum lagi setahun jagung tetapi satu sesi taklimat sebenarnya telah pun diberikan kepada semua Ahli Parlimen beberapa ketika dahulu, walaupun ia bukan secara khusus tetapi ia juga mencakupi pelan ini. Tetapi kalaulah ada kemahuan atau pun ada permintaan daripada kalangan Ahli Parlimen supaya satu sesi khusus untuk pelan ini bolehlah kementerian mengaturnya supaya semua Ahli Parlimen atau pun wakil rakyat yang lain, termasuk juga ADUN kita, juga dapat maklumat yang mutakhir mengenainya, supaya ia dapat disebarkan secara berkesan di peringkat akar umbi.

**Dato' Mohd. Sarit bin Haji Yusoh:** Terima kasih, Tuan Yang di-Pertua. Terima kasih, Timbalan Menteri yang memberikan penjelasan tentang Pelan Tindakan Pembangunan Belia Nasional ini. Saya pun seperti Yang Berhormat bagi Sabak Bernam tadi. Saya dengar-dengar sahaja sebenarnya, sebab itu saya ambil keputusan untuk tanya soalan ini. Tetapi Tuan Yang di-Pertua, saya bimbang apa yang dirancangan oleh kementerian dengan Teras Pembangunan Ekonomi dan pelbagai teras tadi, apa yang berlaku di peringkat akar umbi tidak seperti apa yang Yang Berhormat Timbalan Menteri jelaskan.

Saya lihat sekarang ini kegiatan-kegiatan belia di peringkat daerah, di peringkat Parlimen, di peringkat akar umbi semakin lemah, semakin tidak bermaya. Ambil contoh, persatuan-persatuan belia, saya sedar persatuan-persatuan belia ini di bawah pendaftar organisasi, pendaftar pertubuhan tetapi saya kira kementerian harus memainkan peranan. Ada yang sudah mati, ada yang tidak bermesyuarat langsung, akaun tidak ada, kegiatan tidak ada dan saya lihat kegiatan-kegiatan yang dibuat oleh belia di kampung-kampung, di daerah-daerah tidak mendapat sokongan yang begitu kuat daripada pihak kementerian.

Saya ingat ada sedikit tidak keseimbangan ini, di antara apa yang dirancang oleh Menteri dan kementerian dengan apa yang berlaku sebenarnya di bawah. Saya ingat ini harus diperbaiki. Saya minta penjelasan, Tuan Yang di-Pertua.

**Datuk Ong Tee Keat:** Tuan Yang di-Pertua, saya ucapkan terima kasih kepada Yang Berhormat bagi Temerloh atas apa yang disebutkan tadi. Walaupun setakat ini kita sedia maklum bahawa masih lagi terdapat banyak kekangan terhadap pelaksanaan pelan pembangunan ini di peringkat akar umbi tetapi untuk makluman Dewan yang mulia ini, yang memantapkan pelaksanaan pelan pembangunan yang saya maksudkan maka timbullah konsep penggerak Rakan Muda dan kini 500 orang penggerak Rakan Muda telah pun dilantik semata-mata untuk menggiatkan program-program yang serasi dengan selera kaum belia di peringkat akar umbi. Walaupun mungkin ada di setengah-setengah tempat ada lagi yang masih samar-samar tentang pelaksanaannya tetapi saya yakin penuh bahawa dengan adanya penggerak-penggerak sedemikian rupa, kita berharap mereka ini akan dapat menyebarkan maklumat dari masa ke semasa di kalangan akar umbi.

Di samping itu, Tuan Yang di-Pertua, ingin juga saya menyentuh serba sedikit tentang apa yang disebutkan, apa yang dibangkitkan tadi berkaitan dengan kelesuan persatuan-persatuan belia yang tertentu, khususnya di peringkat akar umbi. Sebelum adanya pelan pembangunan ini, sesungguhnya terdapat satu pemberian peruntukan sebanyak RM3,000 untuk setiap persatuan belia yang dikenal pasti sebagai persatuan lesu ataupun kurang berupaya di peringkat akar umbi. Dan, setiap daerah adalah diberikan sebanyak RM36,000, dalam erti kata lain setiap daerah terdapat dua belas persatuan belia yang dikenal pasti sebagai lesu, di bantu.

Walaupun demikian, kita tetap memahami bahawa kekangan yang saya timbulkan tadi itu tetap wujud dan itulah sebabnya sekarang satu draf rang undang-undang yang dikenali sebagai rang undang-undang bagi Akta Pembangunan Belia tengah digaris dan tengah dibahas di kalangan badan-badan belia. Mudah-mudahan dengan adanya akta ini nanti bukan sahaja kerja pemantauan aktiviti-aktiviti badan-badan belia itu dapat dipantau secara berkesan, malahan kelemahan-kelemahan yang lain yang Yang Berhormat bangkitkan itu tadi juga dapat diatasi.

**Tuan Yang di-Pertua:** Orang muda sikit, Yang Berhormat bagi Tangga Batu.

**Tuan Haji Idris bin Haji Haron:** Terima kasih, Tuan Yang di-Pertua. Terima kasih, Timbalan Menteri kerana memberi peluang kepada saya untuk bertanya soalan yang begitu dekat dengan hati saya. Harapan saya kepada pihak kementerian supaya pelantikan 500 orang penggerak Rakan Muda itu tadi telah dikaji dengan terperinci supaya ia tidak bertindan dengan peranan dan tanggungjawab pengerusi-pengerusi majlis gabungan belia daerah-daerah, pengerusi-pengerusi majlis belia negeri-negeri, di mana mereka ini sebenarnya adalah antara penggerak yang benar-benar mengerakkan pertubuhan belia di peringkat negeri dan daerah pada ketika ini.

Yang Berhormat Timbalan Menteri, harapan saya penubuhan Pelan Tindakan Pembangunan Belia Nasional ini haruslah telah mengambil kira angka-angka seperti yang terdapat di tangan saya ini, jumlah persatuan di Malaysia yang aktif dari tahun 1949 hingga tahun 2002 dan dalam sektor belia mengikut kaum.

Kaum	Jumlah Pertubuhan	Peratus
Melayu	454	12.6%
India	361	18.7%
Lain-lain	14	6.6%
Tionghoa	24	0.3%

Yang Berhormat Timbalan Menteri, dari data yang saya bacakan tadi diperolehi daripada Jabatan Pendaftaran Pertubuhan, Kementerian Dalam Negeri, dan ini adalah satu fakta yang perlu diambil kira oleh pelan ini, di mana kaum Tionghoa amat kurang sekali melibatkan di dalam pembangunan pertubuhan-pertubuhan belia ini. Jadi, harapan saya pelan ini mengambil kira penglibatan kaum Tionghoa, memandangkan kaum Tionghoa juga adalah merupakan sebahagian daripada generasi muda yang bakal mewarisi negara di masa hadapan. Terima kasih, Yang Berhormat Menteri, sila komen.

**Datuk Ong Tee Keat:** Tuan Yang di-Pertua, sesungguhnya perangkaan itu tadi saya rasa mungkin saya kena jelaskan serba sedikit sebab apa yang disebutkan tadi adalah sekadar bilangan persatuan belia yang berdaftar tanpa mengambil kira sayap belia di bawah naungan persatuan-persatuan NGO, khususnya di kalangan masyarakat Tionghoa.

Untuk makluman Yang Berhormat bagi Tangga Batu, setakat ini sepintas lalu terdapat lebih kurang 5,000 persatuan NGO yang berasaskan kaum Tionghoa yang berdaftar di Malaysia, walaupun pendaftarannya dikelolakan oleh pendaftaran pertubuhan dan bukannya di bawah kementerian ini tetapi suka saya memaklumkan Yang Berhormat dan Dewan ini bahawa sayap belia yang dimaksudkan itu walaupun mereka ini tidak semestinya setanding, statusnya dengan persatuan-persatuan belia yang lain, umpamanya 4B atau *Young Malaysian Movement* atau Gerakan Belia Bersatu Malaysia, tetapi mereka tetap memainkan peranannya dengan menerusi pelbagai program-program yang banyaknya selari dengan dasar pembangunan belia kita. Ini yang saya kena jelaskan. Dan, kalaulah kita hanya mengambil statistik atau perangkaan itu tadi, maka biasanya ia mungkin mengelirukan. Ini yang pertama.

Yang keduanya, Yang Berhormat juga membangkitkan tentang kemungkinan adanya pertindihan tugas di antara penggerak Rakan Muda dengan pemimpin-pemimpin belia di peringkat akar umbi. Suka saya memaklumkan Yang Berhormat bahawa

sesungguhnya peranan mereka tidak bercanggah tetapi sebaliknya saling melengkapi. Sekian.

**Tuan Yang di-Pertua:** Ya, Yang Berhormat. Sudah memadai.

7. **Tuan Fong Kui Lun [Bukit Bintang]** minta Perdana Menteri menyatakan kekurangan, masalah dan kelemahan program Rancangan Malaysia Kelapan setelah berakhir tempoh tersebut yang gagal dilaksanakan dan apakah kedudukan program tersebut bila Rancangan Malaysia Kesembilan mula di rumus dan dilaksanakan.

**Menteri di Jabatan Perdana Menteri [Dato' Mustapa bin Mohamed]:** Tuan Yang di-Pertua, seperti yang sedia maklum, Rancangan Malaysia Kelapan cuma akan berakhir pada Disember 2005. Oleh itu adalah sukar untuk memaklumkan isu-isu masalah secara tepat tentang Rancangan Malaysia Kelapan. Walau bagaimanapun pihak EPU sedang meneliti dengan terperinci isu-isu masalah yang kita hadapi dalam RMK-8 untuk memandu kita merancang dengan lebih berkesan dalam Rancangan Malaysia Kesembilan.

Walaupun begitu, pada pandangan kerajaan kita telah mencapai beberapa matlamat yang telah disasarkan. Umpamanya dari segi kadar pertumbuhan, kalau mengikut Kajian Separuh Penggal sasaran kita 4.2%. Setakat ini kita mencapai 4.3% kadar pertumbuhan ekonomi dan dari segi pendapatan KNK per kapita telah meningkat kepada 16,987 berbanding dengan sasaran sebanyak 15,598. Seterusnya, kalau kita lihat daripada kadar kemiskinan, kita telah berjaya mengurangkan kepada 5.1% kemiskinan tegar kepada 1% sahaja pada penghujung tahun 2002. Jadi kita telah mencapai banyak kejayaan

Dari segi perbelanjaan pula, dalam RMK-8 kita ada 75,294 projek kesemuanya sekali, satu angka yang besar. Daripada jumlah tersebut 60.6% telah pun siap sepenuhnya, 30% adalah dalam perancangan. Ada beberapa projek yang kita menghadapi pelbagai masalah, ini adalah kerana berkaitan dengan kesukaran mendapat tapak projek yang sesuai, kegagalan kontraktor menyiapkan projek mengikut jadual yang ditetapkan, projek tidak mengikut spesifikasi dan juga kadang-kadang berlaku peningkatan kos yang ketara dalam beberapa projek. Ini adalah di antara beberapa masalah atau isu yang kita hadapi dan insya-Allah kita akan dapat mengatasinya dalam RMK-9 dan akan memastikan perancangan kita akan lebih mantap dan lebih teliti lagi. Terima kasih.

**Tuan Fong Kui Lun:** Terima kasih Tuan Yang di-Pertua. Soalan tambahan. Saya ingin bertanya Yang Berhormat Menteri, sejauh manakah perubahan telah dilakukan dalam pelan asal Rancangan Malaysia Kelapan bagi disesuaikan dengan keperluan dan kehendak semasa seperti dalam bajet tahunan; dan sepanjang tempoh Rancangan Malaysia Pertama hingga Rancangan Malaysia Kelapan kerajaan banyak memberi tumpuan kepada pembangunan fizikal negara dan kurang membangunkan kerohanian rakyat. Bolehkah Yang Berhormat Menteri menjelaskan bagaimanakah kerajaan menilai kekurangan ini. Terima kasih.

**Dato' Mustapa bin Mohamed:** Perancangan adalah satu proses yang dinamik. Ia diubahsuai dari masa ke semasa mengambil kira perkembangan di sekeliling kita termasuk dalam negara dan luar negara. Oleh itu setiap pelan itu diubahsuai mengikut keadaan semasa. Setiap pelan kita ada *mid-term review* ataupun kajian separuh penggal. Untuk RMK-8 sudah pun dikeluarkan *mid-term review* - kajian separuh penggal untuk mengambil kira perubahan-perubahan.

Dari sudut perbelanjaan umpamanya, peruntukan RMK-8 berjumlah RM110,000 juta dan dalam *mid-term review* naik kepada RM160,000 juta dan sekarang ini kita tambah lagi RM170,000 juta. Ini adalah peruntukan dalam RMK-8. Jadi satu pelan itu adalah merupakan proses yang dinamik dan kita mengambil kira perubahan-perubahan persekitaran dalaman dan juga luar negara.

Berkaitan aspek kerohanian, kerajaan memang peka terhadap perkara ini. Negara kita sudah pun melaksanakan beberapa projek infrastruktur yang besar, yang membolehkan kita meletakkan asas yang kukuh untuk kemajuan seterusnya di masa hadapan. Kita sudah ada satu lapangan terbang yang agak canggih, pelabuhan-pelabuhan dan jalan raya, memanglah dalam RMK-7 dan RMK-8 banyak tumpuan yang telah kita

berikan dalam tempoh 10 tahun yang lalu kepada pembangunan infrastruktur. Dalam RMK-9 kerajaan telah pun menetapkan bahawa pembangunan kerohanian modal insan yang ditekankan oleh Yang Amat Berhormat Perdana Menteri akan diberikan perhatian.

Dengan ini kita akan dapat menyaksikan perhatian yang lebih kepada aspek pelajaran, pendidikan, pengajian tinggi dan mungkin luar bandar untuk memastikan bahawa kemudahan-kemudahan infrastruktur fizikal yang telah disediakan itu dapat digunakan sebaik mungkin oleh rakyat. Kerajaan peka kepada aspek kerohanian modal insan ini, insya-Allah akan diberikan penekanan sewajarnya dalam RMK-9.

**8. Dato' Suhaili bin Abdul Rahman [Labuan]** minta Menteri Pengajian Tinggi menyatakan tindakan kementerian dalam membantu masalah IPTS milik bumiputera yang menghadapi masalah kekurangan pelajar hingga mengakibatkan kerugian besar kepada IPTS tersebut seterusnya akibatnya ada yang terpaksa gulung tikar.

**Setiausaha Parlimen Kementerian Pengajian Tinggi [Datuk Dr. Adham bin Baba]:** Tuan Yang di-Pertua, kementerian menyedari terdapat IPTS milik bumiputera yang menghadapi masalah kekurangan pelajar. Dengan saranan dalam Bajet 2005, Yang Amat Berhormat Perdana Menteri merangkap Menteri Kewangan menggalakkan IPTS membentuk perkongsian pintar dan bergabung untuk mewujudkan entiti pendidikan yang teguh dan terkemuka setanding dengan universiti ternama negara maju.

Pada masa ini kementerian sedang menyediakan strategi penggabungan IPTS yang dikenal pasti menghadapi masalah terutama yang kekurangan pelajar untuk dicadangkan bergabung di bawah satu konsortium bagi mengukuhkan kedudukan daya tahan dan daya saing ekonomi pengusaha-pengusaha IPTS.

Sehingga kini belum ada IPTS yang bercadang untuk bergabung walaupun kementerian menawarkan pemberian insentif kepada IPTS yang bergabung sebelum tahun 2006, iaitu pengecualian cukai duti setem dan pengecualian cukai keuntungan harta tanah. Antara lain daripada itu, IPTS tersebut juga mendapat insentif seperti berikut:-

- (i) IPTS yang bergabung dibenar memindahkan kursus pengajian bagi tujuan mewujudkan *niche-area* dengan izin, di kalangan ahli IPTS yang bergabung tanpa perlu memohon mendapatkan kelulusan baru bagi kursus yang telah diluluskan;
- (ii) IPTS yang bergabung dibenarkan berkongsi sumber seperti perpustakaan, bengkel dan tenaga pengajar bagi mengoptimumkan sumber; dan
- (iii) pelajar yang belajar di IPTS bergabung dibenarkan mengikuti mana-mana kursus di kalangan kumpulan ahli IPTS yang bergabung bagi tujuan pemindahan kredit.

Sekian, terima kasih.

**Tuan Yang di-Pertua:** Ya, Batu Pahat.

**Dr. Junaidy bin Abdul Wahab:** Terima kasih Tuan Yang di-Pertua. Berkenaan dengan penggabungan IPTS yakni merupakan salah satu cara atau pun langkah mengurangkan kerugian kepada IPTS-IPTS yang terlibat, adakah pihak kementerian sedar bahawa salah satu punca ataupun salah satu faktor yang boleh juga menyebabkan kerugian kepada IPTS-IPTS yang terlibat ialah berdasarkan kepada kursus-kursus yang ditawarkan; maksud saya kursus-kursus yang ditawarkan mungkin tidak bersesuaian dengan *demand* yang dikehendaki dalam negara kita? Saya minta pandangan daripada pihak kementerian.

**Datuk Dr. Adham bin Baba:** Terima kasih Yang Berhormat. Di antara sebab-sebab IPTS tidak mahu bergabung ialah:

- (i) kursus pengajian yang ditawarkan tidak sama dan juga bertindan antara satu sama lain;

- (ii) lokasi yang tidak berdekatan; dan
- (iii) tidak mahu menanggung hutang premis IPTS yang lain apabila digabungkan.

Sehingga kini terdapat 17 bidang kursus yang telah pun mencapai perakuan akreditasi. Daripada 17 bidang kursus kita mendapati 358 kursus yang telah di akreditasi oleh Lembaga Akreditasi Negara. Antara tujuan kita menggabungkan supaya tidak gagal ialah dengan mengadakan perbincangan dengan Ketua Eksekutif semua kategori IPTS dan telah pun dilakukan pada Disember 2004 di Semporna, Sabah dan IPTS di Semenanjung pada bulan Mac di Kuala Lumpur.

Di antara yang kita bantu ialah memberikan penerangan tentang insentif bergabung dari masa ke semasa, juga tentang masalah-masalah seperti kursus yang telah pun ditawarkan oleh banyak IPTS lain.

**9. Datuk Nur Jazlan bin Mohamad [Pulai]** minta Menteri Luar Negeri menyatakan apakah dasar Malaysia terhadap Kerajaan Iraq dan Afghanistan sekarang. Apakah sumbangan yang diberikan oleh Kerajaan Malaysia dalam usaha membangunkan semula kedua-dua negara ini.

**Setiausaha Parlimen Kementerian Luar Negeri [Dato' Zainal Abidin bin Osman]:** Tuan Yang di-Pertua, terima kasih Yang Berhormat bagi Pulai kerana mengemukakan soalan. Untuk makluman Ahli-ahli Dewan yang mulia ini, Kerajaan Malaysia mengalu-alukan pembentukan kerajaan sementara Iraq yang baru selepas pilihan raya negara tersebut pada 30 Januari 2005. Pilihan raya yang telah berlangsung hanyalah langkah permulaan dalam proses demokrasi Iraq. Langkah seterusnya adalah proses *referendum* pada 15 Oktober 2005 dan pilihan raya umum untuk memilih kerajaan baru pada penghujung Disember 2005.

Atas dasar prihatin, Kerajaan Malaysia telah menubuhkan Tabung Kemanusiaan Peperangan - Tabung Kemanusiaan Pembelaan Rakyat Iraq untuk meringankan kesengsaraan rakyat Iraq akibat peperangan. Kerajaan Malaysia telah menyumbangkan RM10 juta sebagai permulaan dana tabung tersebut. Sumbangan juga telah diterima daripada pelbagai pihak dan lapisan masyarakat dengan jumlah keseluruhan tabung sebanyak RM16.9 juta.

Beberapa program kemanusiaan membantu rakyat Iraq telah dan sedang dilaksanakan oleh Mercy Malaysia. Di samping sumbangan kewangan, Malaysia juga telah menganjurkan mesyuarat khas Asia Barat di Putrajaya pada 22 April 2004 dan menyuarakan pendapat dalam *International Ministerial Meeting On Iraq* di Sharm el-Sheik pada 23 November 2004.

Yang Amat Berhormat Perdana Menteri juga telah mengeluarkan kenyataan dan surat-surat mengenai isu Iraq yang tegas menyuarakan pandangan dan kebimbangan Malaysia mengenai isu Iraq tersebut. Kerajaan Malaysia sentiasa bersedia untuk menyumbangkan kepakaran dan sanggup bekerjasama dengan masyarakat antarabangsa untuk membangunkan semula negara Iraq. Langkah ini boleh diambil sebaik sahaja keadaan keselamatan di Iraq mengizinkan.

Tuan Yang di-Pertua, Malaysia turut mengalu-alukan kejayaan Afghanistan mengadakan pilihan raya Presiden secara aman pada 9 Oktober 2004 yang telah dimenangi oleh Hamid Karzai, pemimpin kerajaan sementara Afghanistan. Presiden Hamid Karzai telah dilantik secara rasmi sebagai Presiden Afghanistan pada 7 Disember 2004 untuk tempoh selama lima tahun.

Mengenai sumbangan kepada Afghanistan pada Oktober 2001, Malaysia telah menubuhkan Tabung Amanah Afghanistan untuk membangunkan semula negara tersebut dengan sumbangan permulaan sebanyak RM1.9 juta daripada Kerajaan Malaysia. Sejumlah RM2.967 juta berjaya dikutip untuk tabung tersebut.

Selain daripada sumbangan wang, sumbangan dalam bentuk penghantaran barang-barang seperti makanan, ubat-ubatan, khemah dan kain selimut juga telah dibuat

oleh pertubuhan badan bukan kerajaan. Sumbangan tersebut telah dihantar pada November 2001, Februari 2002 dan September 2002.

Selain daripada sumbangan ini, pada Disember 2001 Malaysia telah menghantar satu pasukan doktor tentera ke Chaman, Afghanistan untuk memberi perkhidmatan perubatan selama enam bulan. Bantuan pelaburan juga telah diberikan oleh Pemuda UMNO Malaysia dan Mercy Malaysia kepada Afghanistan. Kerajaan Malaysia bersedia memberi lebih banyak bantuan kepada Afghanistan untuk membangunkan semula negara tersebut. Sungguhpun demikian perlu ada keamanan yang berterusan di negara itu supaya memudahkan bantuan disalurkan ke negara tersebut.

**Tuan Yang di-Pertua:** Temerloh.

**Dato' Mohd. Sarit bin Haji Yusoh:** Terima kasih Tuan Yang di-Pertua. Saya ingin bertanya kepada Yang Berhormat Setiausaha Parlimen tentang peranan yang boleh dimainkan oleh pertubuhan-pertubuhan sukarela ini seperti Mercy dan lain-lain NGO's dalam pembangunan semula di Iraq dan Afghanistan, terutamanya. Kalau kita lihat Amerika dahulu, dia menghantar *Peace Corps* dan Jepun menghantar pertubuhan-pertubuhan seperti JICA dan sebagainya. Matlamat-matlamat mereka ini adalah untuk menjual barang-barang mereka. Objektif mereka adalah dari segi ekonomi. Saya kira di Iraq dan Afghanistan ini, pertubuhan-pertubuhan sukarela kita ini boleh memainkan peranan, mereka boleh pergi dahulu. Pergi dahulu, buat baik-baik, bantu mereka dan sebagainya; dan selepas itu kita boleh jual Proton Saga, kita boleh jual kelapa sawit dan kita boleh jual barang-barang elektrik kita.

Tetapi saya dimaklumkan bahawa pertubuhan-pertubuhan sukarela ini, masalahnya ialah kewangan dan tidak mendapat bantuan (*support*) yang sepenuhnya daripada kerajaan. Saya minta sangatlah supaya Kementerian Luar Negeri atau kerajaan menimbang dan meneliti. Saya kira pertubuhan-pertubuhan sukarela ini boleh memainkan peranan untuk membantu mengembangkan pengaruh ekonomi kita terutamanya di negara-negara seperti Iraq dan Afghanistan. Saya minta penjelasan.

**Dato' Zainal Abidin bin Osman:** Yang Berhormat bagi Temerloh, saya sangat bersetuju dengan saranan yang Yang Berhormat berikan tentang peranan NGO kita untuk membantu situasi di Iraq dan Afghanistan. Kita harap sektor swasta akan terus memberikan sumbangan sewajarnya kepada NGO kita ini, kerana seperti Yang Berhormat sedia maklum, mereka ingin menyampaikan sumbangan tersebut tetapi faktor kewangan sangat runcing. Di samping faktor kewangan, kita juga mempunyai masalah dari segi faktor keselamatan kerana di Iraq keadaannya masih belum selamat dan begitu juga di Afghanistan keadaan tidak begitu stabil.

Jadi, kita berharap kita dapat sumbangan daripada pihak swasta kepada NGO dan seterusnya NGO ini akan pergi ke Iraq dan Afghanistan dari masa ke semasa mengikut keadaan keselamatan yang mengizinkan.

*[Soalan No.10 - Yang Berhormat Datuk Ronald Kiandee (Beluran) tidak hadir]*

**11. Tuan Haji Fadillah bin Yusof [Petra Jaya]** minta Menteri Keselamatan Dalam Negeri menyatakan apakah status statistik kadar jenayah melibatkan pembunuhan di negara kita dan apakah puncanya jika statistik menunjukkan kenaikan serta langkah-langkah yang diambil bagi menanggapi jenayah ini.

**Timbalan Menteri Keselamatan Dalam Negeri [Tuan Chia Kwang Chye]:** Tuan Yang di-Pertua, statistik jenayah indeks bagi tahun 2004 mencatatkan sejumlah 565 kes bunuh sejak tahun lepas, manakala bagi tempoh Januari sehingga Februari 2005 atau tahun ini adalah sebanyak 76 kes telah dilaporkan. Jumlah ini menampakkan penurunan sebanyak 26 kes jika berbanding dengan tempoh yang sama bagi tahun 2004.

Tuan Yang di-Pertua, pihak Polis Diraja Malaysia telah melaksanakan langkah-langkah seperti berikut bagi tujuan membendung dan menangani jenayah yang melibatkan pembunuhan di negara ini:

- (i) mengambil tindakan pencegahan yang berterusan dengan bantuan masyarakat serta tindakan penyiasatan yang telus dan berkesan di mana mereka yang melakukan kesalahan akan dihadapkan ke muka pengadilan;
- (ii) mengenal pasti, memantau dan mengambil dan mengambil tindakan terutamanya terhadap jenayah bersindiket yang menjerus kepada kes jenayah kekerasan dan pembunuhan, ini termasuk mengambil tindakan berterusan terhadap sindiket-sindiket haram yang menjalankan kegiatan haram dan maksiat seperti perjudian, pelacuran penghasilan dan pengedaran VCD haram serta kegiatan pengedaran dadah;
- (iii) mengambil tindakan berterusan terhadap ahli-ahli kongsi gelap dan kumpulan-kumpulan samseng yang bertindak ganas terhadap masyarakat seperti melakukan ugutan jenayah penculikan dan kesalahan mencederakan orang;
- (iv) melaksanakan rondaan cegah jenayah yang berterusan di kawasan yang berkemungkinan berlakunya kegiatan jenayah;
- (v) mencegah kemasukan pendatang tanpa izin dan menangkap pendatang tanpa izin untuk dihantar balik; dan akhirnya
- (vi) mengadakan kempen dan ceramah bagi memupuk kesedaran tentang pentingnya masyarakat untuk mengambil langkah-langkah menjaga keselamatan diri, keluarga dan harta benda serta kesedaran supaya memberikan kerjasama kepada pihak berkuasa bagi membantu mencegah kegiatan jenayah.

Berdasarkan statistik jumlah kes bunuh yang telah dinyatakan tahun 2004 dan 2005 bagi tempoh Januari dan Februari menunjukkan jenayah yang melibatkan pembunuhan di negara ini adalah pada tahap yang tidak membimbangkan dan terkawal. Sekian, terima kasih.

**Puan Chong Eng:** Terima kasih, Tuan Yang di-Pertua. Baru-baru ini terdapat dua kes bunuh yang mangsanya adalah wanita - satu kes di Alor Setar, dan satu kes di Kuala Lumpur saya rasanya. Ini saya rasa adalah satu perkara yang bukan biasa kerana kes bunuh mangsanya selalunya adalah lelaki dan adakah ini menjadi satu trend di mana sekarang wanita pun sudah menjadi mangsa dalam kes bunuh dan adakah pihak polis telah mengenal pasti apakah motifnya di dalam kedua-dua kes ini? Terima kasih.

**Tuan Chia Kwang Chye:** Tuan Yang di-Pertua, mangsa-mangsa tidak mengikut trend di mana mangsa banyak yang ditujukan adalah wanita dan sebagainya. Walau bagaimanapun, kes-kes yang tersebut masih dalam siasatan dan kita akan mendapat maklumat dan apa jua tindakan yang sewajarnya akan diambil untuk menangani masalah ini supaya kadar jenayah dapat dikurangkan. Sekian, terima kasih.

**Tuan Yang di-Pertua:** Ahli-ahli Yang Berhormat saya akhiri urusan soalan lisan pada hari ini.

**[Masa untuk Pertanyaan-pertanyaan bagi Jawab Lisan telah tamat]**

## USUL

### **WAKTU MESYUARAT DAN URUSAN DIBEBASKAN DARIPADA PERATURAN MESYUARAT**

**Menteri di Jabatan Perdana Menteri [Dato' Seri Mohamed Nazri bin Abdul Aziz]:** Tuan Yang di-Pertua, Saya mohon mencadangkan:

“Bahawa mengikut Peraturan Mesyuarat 12(1) saya mohon mencadangkan bahawa mesyuarat pada hari ini tidak akan ditangguh sehingga pukul 6.30 petang dan selepas itu mesyuarat akan ditangguhkan sehingga pukul 10.00 pagi esok hari.”

**Menteri Perdagangan Dalam Negeri dan Hal Ehwal Pengguna [Datuk Mohd. Shafie bin Haji Apdal]:** Tuan Yang di-Pertua, saya mohon menyokong.

Usul dikemukakan bagi diputuskan; dan disetujui.

### **MENJUNJUNG KASIH TITAH UCAPAN SERI PADUKA BAGINDA YANG DIPERTUAN AGONG**

Aturan Urusan Mesyuarat dibaca bagi menyambung semula perbahasan yang ditangguhkan atas masalah:

“Bahawa suatu ucapan tidak sepertinya dipersembahkan kepada Seri Paduka Baginda Yang di-Pertuan Agong, demikian bunyinya;

Patik, Tuan Yang di-Pertua dan Ahli-ahli Dewan Rakyat Malaysia dalam Persidangan Parlimen, memohon ampun mempersembahkan suatu ucapan yang ikhlas daripada Majlis Dewan Rakyat mengucapkan berbilang-banyak syukur dan terima kasih kerana Titah Ucapan Tuanku semasa membuka Penggal Kedua Parlimen Yang Kesebelas.” *[24 Mac 2005]*

**11.06 pagi**

**Tuan Yang di-Pertua:** Yang Berhormat bagi Kuala Terengganu.

**Dato' Razali bin Ismail [Kuala Terengganu]:** Terima kasih, Tuan Yang di-Pertua. Saya mengambil kesempatan ini untuk menjunjung kasih dan menyokong Titah Seri Paduka Baginda dalam Mesyuarat Pertama Penggal Kedua Parlimen Kesebelas 21 Mac yang lalu.

Beberapa kata kunci yang penting yang menarik perhatian saya yang suka saya timbulkan dalam Dewan yang mulia ini ialah yang pertamanya berhubung dengan konsep Islam Hadhari dan pendekatan untuk memartabatkan bangsa melalui acara budi bahasa dan nilai murni seperti yang terkandung dalam teks ucapan baginda para yang keempat. Sesungguhnya masyarakat Islam Hadhari merupakan kelangsungan ucapan konsep yang telah sekian lama diperkenalkan, namun semakin terasing dan terabai di jiwa umat Islam.

Kerajaan di bawah kepimpinan Yang Amat Berhormat Perdana Menteri sekarang ini seharusnya menjadikan konsep Islam Hadhari dan berbudi bahasa ini bukan hanya sebagai satu retorik sahaja tetapi benar-benar di realisasikan dalam kehidupan bangsa dan berusaha untuk melengkapkan ungkapan tersebut sebagai landasan yang wajar ke arah pembentukan sebuah masyarakat Islam Hadhari yang boleh diteladani.

Ungkapan ini penting kerana hakikat yang genting yang dialami oleh umat Islam sedunia ekoran daripada peristiwa 11 September 2001 yang memberi kesan kuat kepada kuasa-kuasa Barat khasnya Amerika Syarikat untuk mengawal suara-suara dan kaedah perjuangan umat Islam yang bertentangan dengan kepentingan mereka.

Maka hakikat bahawa memang terdapat individu dan kelompok tertentu di kalangan umat Islam yang melampau dan menyeleweng. Sejarah telah mencatat satu kecacatan yang bukan kecil dalam lambaran kehidupan umat apabila konsep Islam Hadhari tidak ditafsirkan dengan telus dan tulus akibat daripada kelemahan dan ketidakfahaman umat Islam sendiri.

Telah berdekat penghayatan Islam dibuat secara permukaan serpihan akibatnya ia menyerlahkan ke serpihan yang nyata tanpa memperlihatkan wajah ilmu sebenar sebagai agama yang bertaraf sejagat yang memberi rahmat ke seluruh alam, rahmatan lil alamin, dengan izin, dan kerajaan sekarang harus memperjuangkan masyarakat Islam Hadhari kerana tujuan kita ialah untuk memajukan masyarakat Islam sebagai teras kepada masyarakat dunia. Masyarakat Islam masa kini adalah begitu rendah mutunya pencapaian sains dan teknologi kehidupan kebendaan organisasi dan institusi ke masyarakat teras pembangunan masyarakat Islam Hadhari adalah pada akidah, syariah dan akhlak yang perlu dipersetujui, yang telah dipersetujui umat muktabar dahulu dan sekarang.

Jika masyarakat Islam kita mempunyai akidah yang keliru mengamalkan syariah dan daif dan mengeksplicitkan akhlak yang rapuh maka yang kita capai bukan lagi yang masyarakat yang beradab dan bertamadun tetapi yang hilang kesopanan, kesusilaan meski pun pencapaian ekonomi dan teknologi kita tinggi, dan infrastruktur kehidupan kebendaan kita amat canggih tetapi ia tidak akan membawa keuntungan dalam jangka masa yang panjang. Dalam konteks ini promosi yang serius dan terancang harus dilakukan untuk memastikan seluruh rakyat daripada berbilang kaum dan bangsa benar-benar menghayati dan memahami konsep Islam Hadhari dalam usaha kita untuk kita serikan pencakar langit dengan kesyukuran wajah kemanusiaan seperti mana yang dinyatakan oleh Yang Amat Berhormat Perdana Menteri dalam puisinya 'Negaraku terbilang.'

Secara ringkasnya masyarakat Islam Hadhari adalah satu pendekatan di mana umat Islam perlu berada di atas landasan menuntut haknya sebagai bangsa besar, disegani serta sifat keupayaan yang tinggi dalam sebarang keadaan, sebarang masa dan sebarang tempat [*Membaca sepotong ungkapan dalam bahasa Arab*].

Wawasan masyarakat Islam Hadhari boleh menjadi satu wawasan agung untuk menyatupadukan lapisan setiap masyarakat untuk bekerjasama memperbaiki diri dan institusi yang dianggotai oleh atau yang dipimpin ke tahap yang lebih cemerlang. Maka inilah perkara yang penting masyarakat hadhari yang mahu dibangunkan ialah seperti pohon yang rendah berbuah lebat, memberi teduh dan buah kepada sesiapa yang menumpang di bawahnya, bukan seperti pohon yang juga rendah tetapi bunganya busuk walaupun menawan, buahnya lazat tetapi beracun. Masyarakat kita ini masih lagi muda dan kita mampu memperbaikinya dengan perancangan yang tuntas dan ke arah kita menuju dan mencipta kemajuan. Kita tidaklah seperti seekor kerbau tua yang tersepit badan yang sudah terlalu besar tanduk sudah terlalu panjang untuk melepaskan diri.

Perkara kedua yang menarik perhatian saya dan perlu ditimbulkan di sini ialah tentang usaha-usaha untuk membina identiti bangsa, jati diri bangsa dengan nilai budaya dan kehidupan yang berruarah tinggi. Ini adalah merupakan kata kunci yang harus diperjuangkan bersama, meletakkan identiti sebagai satu destinasi dalam kehidupan masyarakat. Bak kata pantun Melayu "tegak rumah kerana sendi, runtuh sendi rumah binasa, sendi bangsa ialah budi, runtuh budi runtuhlah bangsa". Di sini dalam proses kita membentuk bangsa yang berruarah dan berrmartabat tinggi kita harus mencerakinkan dasar-dasar kita bersandarkan kepada prinsip *whole person paradigm* dengan izin, yakni mencakupi aspek-aspek pembangunan fizikal, pembangunan jasad, pembangunan emosi, pembangunan pemikiran dan sekali gus juga pembangunan-pembangunan yang bersabit dengan kerohanian. Dalam konteks ini juga kita harus mengembangkan segala modal insan tetapi yang lebih penting daripada menggarap dan membangunkan insan itu ialah kita menyediakan modal budaya yang sebaik mungkin.

Perkara kedua yang ingin saya timbulkan dalam Dewan ini ialah tentang para 15 dan 17 yang mencakupi aspek penyertaan yang seimbang dalam ekonomi di kalangan kaum etnik dan wilayah dan perjuangan menurunkan kadar kemiskinan.

Tuan Yang di-Pertua, seluruh masyarakat kita hari ini berbicara tentang kedudukan dan status sosial ekonomi masyarakat bumiputera berbanding dengan masyarakat dengan

status ekonomi yang telah dicapai oleh masyarakat bukan bumiputera. Isu jurang sosial ekonomi diungkit dalam pelbagai platform dan forum. Dengan nada cemas ahli-ahli ekonomi kita menyatakan masalah *disparity* pendapatan semakin meluas dengan merujuk kepada *gini co-efficient scale* dengan izin. Meskipun pemilikan harga bumiputera telah meningkat kepada 19.3% pada tahun 1990 daripada 2.4% sewaktu DEB dimulakan tetapi sejak kemelesetan ekonomi tahun 1998 diikuti dengan persaingan sengit dalam era globalisasi prestasi *disparity* pendapatan bumiputera semakin meluas dan melebar. Status hari ini dikatakan seperti status pra DEB. Dalam konteks ini ada isu tertunggak yang memerlukan perhatian serius. Apakah modal pembangunan yang harus difikirkan sungguh-sungguh dalam kita merangka dan merancang strategi di bawah Rancangan Pembangunan ke 9.

DEB telah memanfaatkan model pembangunan dengan ekuiti. Model ini berjaya membawa kesan *jump start* yang baik kepada kedudukan ekonomi bumiputera. Tetapi dalam masa yang sama juga strategi ini telah gagal membangunkan daya saing, daya juang, daya tahan bumiputera lalu kita beralih kepada model yang dikatakan pembangunan dengan meritokrasi. Prinsipnya bagus untuk semua, namun bumiputera sering kali lemas dan terkodek-kodek dalam persaingan meritokrasi tanpa bantuan tongkat.

Banyak contoh untuk menunjukkan sindrom lemas dan terkodek-kodek ini di kalangan masyarakat bumiputera. Perlukah kita terus membangun dengan model *growth at all cost* dengan izin dengan harapan tempas pertumbuhan itu berlaku adil kepada semua tempat dan kepada semua kaum. Ataupun apakah kita perlu menggarap model *growth with meritocracy and equity co-exist* dengan izin. Apakah boleh kita guna pakai dalam masyarakat kita sekarang, pembangunan dengan meritokrasi dan sekali gus mengambil kira aspek-aspek ekuiti dalam pembangunan kita. Demi kesejahteraan dalam masyarakat yang berbilang kaum dan masyarakat yang majmuk ini kerajaan perlu membuat pertimbangan yang sewajarnya demi keutuhan bangsa dalam kita merangka Rancangan Malaysia yang akan datang.

Perkara seterusnya yang menarik perhatian saya ialah tentang para 19 iaitu usaha untuk menyegarkan wujudnya masyarakat dan ekonomi yang berasaskan kepada pengetahuan. Mutakhir ini kita digemparkan dengan sebilangan besar siswazah kita yang menghadapi masalah pengangguran. Ini ada kaitannya dengan masalah yang disebut sebagai sumber tenaga yang terabai di mana modal insan kita tidak digarap dengan sebaik mungkin untuk memberi sumbangan yang besar kepada pembangunan bangsa dan negara. Isu-isu semasa yang berkaitan dengan pembangunan sumber tenaga ini amat menarik perhatian semua orang. Ia harus ditangani sebaik mungkin, andai tidak ia akan membawa masalah-masalah besar dalam masyarakat dan barangkali boleh menggugat stabiliti kerana para intelektual kita yang bosan, menganggur, *the angry young generation* ini dengan izin boleh membawa padah kepada pembangunan ekonomi, pembangunan masyarakat dan pembangunan budaya kita.

Di sini saya suka menarik perhatian tentang beberapa hal yang ingin saya cadangkan kerana dalam konteks perubahan semasa dalam konteks pembangunan ekonomi yang berasaskan kepada pengetahuan dan dunia global yang secara berkesan telah menjumudkan faktor jarak dan ruang siswazah yang kita hasilkan sepatutnya bukan sahaja siswazah yang bukan sahaja boleh membekalkan tenaga kerja dalam sempadan *local* malah merentasi sempadan. Mampu menawarkan kepakaran dan perkhidmatan di dunia antarabangsa. Siswazah Melayu terutamanya mempunyai kerangka minda global, *global mind-set* dengan izin yang secara berkesan *marketable* iaitu laku sebagai *a global player* yang boleh diterima pakai dalam kedudukan yang berbeza-beza dalam dunia dengan iklim dan suasana yang berbeza pula. Maka dasar meritokrasi perlu dipantau agar ia dapat mendatangkan manfaat kepada anak bangsa bagi menghindari wabak sumber tenaga terabai berlaku secara berterusan.

Di sini ingin saya kemukakan beberapa cadangan untuk memastikan Kementerian Pelajaran khususnya Kementerian Pengajian Tinggi dan Kementerian Sumber Manusia untuk mengambil dan merangka beberapa strategi untuk kita berdepan dengan masalah pengangguran siswazah sekarang.

Pertama ialah melaksanakan program sekolah atau universiti ke kerjaya dengan jelas.

Yang kedua, merealisasikan matlamat nisbah 60:40 yakni sains 60% dan sastera 40% dalam konteks yang bersepadu.

Yang ketiga, mempertingkatkan program pendidikan mata pelajaran vokasional yakni latihan yang berasaskan industri dan yang bersifat 'vokademik' yakni vokasional dan akademik untuk pelajar-pelajar *cohort* berumur 17 sehingga 23 tahun.

Yang keempat, memastikan semua IPTA dan IPTS mendapat ranking pendidikan antarabangsa yang tinggi dengan melaksanakan program jaminan kualiti pendidikan tinggi di samping secara berkesan mengadakan penandaarasan dengan kerjasama ILO dengan izin *International Labour Organisation*.

Yang kelima, mewujudkan pusat maklumat siswazah di semua IPTA dan IPTS dengan aktif membuat aktiviti-aktiviti penyelidikan mengesan siswazah secara berkala. Malah statistik yang menyatakan 80,000 orang siswazah menganggur juga harus dipastikan kebenarannya sebab terdapat statistik daripada *Department of Statistic* yang menyatakan cuma terdapat kira-kira 22,000 orang sahaja siswazah yang menganggur. Di sini kajian-kajian dan pengesanan harus dibuat oleh IPTA dan IPTS. Keenam, bekerjasama di antara Institut Latihan Teknikal Awam Swasta dengan sektor industri yang menjadi pengguna sumber terlatih industri yang merupakan dan menjadikan mereka itu sebagai penaja.

Pihak swasta perlu merundingkan kandungan kurikulum yang sesuai bagi pelajar tajaan mereka.

Yang ketujuh, melaksanakan program penempatan guru siswazah sehingga 50% pada tahun 2010 di semua sekolah rendah. Ini untuk memastikan modal insan dan model budaya dapat dibangunkan dengan cara yang lebih wajar oleh guru-guru yang terlatih.

Yang kelapan, kursus yang ditawarkan oleh IPTA dan IPTS hendaklah berasaskan analisis keperluan tenaga kerja dalam semua jenis sektor di negara kita ini bukan hanya bersandarkan kepada keupayaan akademik di sesebuah IPTA dan IPTS.

Yang kesembilan, GLS harus menyediakan ruang-ruang untuk memberi latihan-latihan vokasional dan juga latihan-latihan yang berkaitan dengan kerjaya kepada siswazah-siswazah yang menganggur ini.

Kesepuluh, mengadakan perancangan yang tegas daripada menyediakan pekerja untuk sektor awam swasta kepada sektor keusahawanan, pertanian, perlombongan dan juga jangan lupa tentang *blue collar job forecast* dengan izin.

Yang kesebelas, sentiasa prihatin dengan dasar untuk mengeluarkan siswazah yang serba boleh dengan izin *capable specialist and capable journalist* ertinya mahir dari bidangnya yang khusus tetapi dalam masa yang sama dapat menyesuaikan dalam pelbagai keadaan.

*Competent* dalam bahasa kedua, mahir ICT, cergas interpersonalnya,...

[*Yang Berhormat Sabak Bernam bangun*]

**Dato' Razali bin Ismail:** Sekejap lagi. Berwatak, bermotivasi dan juga kurikulum dan ko-kurikulum, hal ehwal IPTA dan IPTS hendaklah berorientasikan kepada orientasi global *out look*. Mengasuh mereka membina dan memugar potensi pelajar-pelajar ini untuk menjadi dengan izin *the global player*. Silakan.

**Dato' Haji Mat Yasir bin Haji Ikhsan:** Terima kasih Tuan Yang di-Pertua dan Yang Berhormat bagi Kuala Terengganu. Saya hendak sedikit kembali mengenai peranan ataupun isu GLC ini. GLC ini banyak yang berjaya, malah banyak sektor korporat dan konglomerat berjaya atas usaha kerajaan kita menjadikan negara kita aman. Oleh kerana itu, saya berpendapat bahawa, GLC dan badan-badan korporat yang berjaya ini harus ada satu *social obligation*. Saya hendak ubah, bukan *social obligation*, *social responsibility* dari segi membantu pihak kerajaan khususnya dalam konteks pelajar-pelajar di IPT ini supaya mereka ini dibantu dari segi peruntukan kewangan ataupun pinjaman.

GLC ini, adalah sektor korporat ini yang berjaya termasuklah subsidi kerajaan negeri. Saya cadangkan supaya mereka ini mewujudkan satu bentuk bantuan kewangan sama ada dalam bentuk pinjaman ataupun seumpamanya. Selain daripada itu, mereka ini juga dipertanggungjawabkan akhirnya untuk membantu siswa siswi ini dalam kerjaya mereka. Mereka boleh memilih umpamanya siapa yang hendak ditaja. Saya sarankan daripada golongan keluarga miskin dan akhirnya mereka ini diambil bekerja di sektor di mana mereka terlibat.

**Dato' Razali bin Ismail:** Rakan saya, di sini saya suka memberi sokongan, seperti mana yang telah diberi pandangan oleh Yang Berhormat sebentar tadi bahawa GLC kita yang sudah pun hebat dan mempunyai potensi-potensi sumber kewangan yang begitu baik dan lumayan harus mengambil tanggungjawab sosial. Saya setuju ini supaya mereka memberi dan mengambil peluang-peluang terutama dan memberi latihan kepada siswazah kita dalam skop dan bidang yang diperlukan dalam pasaran semasa.

Selain daripada menaja mereka juga dalam masa yang sama juga harus menyediakan latihan-latihan dalam perkhidmatan, setidak-tidaknya memberi dan menawarkan pengalaman-pengalaman dalam dunia pekerjaan yang sesuai dan secocok dengan perkembangan dunia sekarang. Sebab GLC ini adalah terlibat dalam aktiviti-aktiviti global. Maka dalam usaha kita untuk melahirkan *a global player* itu adalah amat tepat sekali. GLC yang begitu banyak yang berada di negara kita ini, sanggup menerima tanggungjawab sosial, untuk membantu siswazah kita yang terkapai-kapai menghadapi masalah pengangguran ini.

Seterusnya Tuan Yang di-Pertua, saya ingin menarik perhatian berhubung dengan Para 31 dalam ucapan Baginda Yang di-Pertua Agong iaitu tentang laporan Kualiti Hidup Malaysia 2004 serta Indeks Alam Sekitar dan Keselamatan Awam menunjukkan *trend* menurun. Saya kira di sini perlu kita beri perhatian yang serius iaitu laporan kualiti hidup rakyat Malaysia ini. Saya ingin memberi cadangan dalam usaha kita mempertingkatkan kualiti hidup rakyat Malaysia, saya ingin mengemukakan dua cadangan: -

Pertamanya, supaya diwujudkan pendidikan sepanjang hayat menjadi satu dasar kerajaan untuk memastikan setiap modal insan dan juga modal budaya masyarakat kita ini dapat dipertanggungjawabkan. Dalam konteks ini saya cadangkan supaya satu suruhanjaya dapat diwujudkan untuk membantu usaha-usaha merealisasikan, pendidikan sepanjang hayat di bawah Jabatan Perdana Menteri dengan fungsinya, untuk memastikan penyelarasan dasar, program, projek, dan aktiviti sepanjang hayat oleh agensi dan Kerajaan Pusat, kerajaan negeri, majlis daerah, sektor swasta, badan-badan berkanun dan pertubuhan bukan kerajaan dapat diurus takbir dengan sebaik mungkin. Kerana pendidikan sepanjang hayat ini, akan membolehkan setiap modal insan kita dimanfaatkan ke tahap yang maksimum.

Seterusnya saya ingin mencadangkan supaya, budaya membaca di kalangan rakyat kita dapat dihayati. Membudayakan tabiat membaca dan segala tabiat terbaik dalam masyarakat berilmu, kerajaan hendaklah menggalakkan perkembangan perpustakaan yang sedia ada dan penubuhan perpustakaan baru khususnya perpustakaan di kampung-kampung, di masjid dan juga di pusat-pusat komuniti yang lain. Ini untuk membolehkan kesedaran tentang pendidikan sepanjang hayat dapat dinikmati dan beroperasi dengan sebaik mungkin agar tidak terabai proses pembangunan modal insan yang menjadi inspirasi dalam ucapan Duli Yang Maha Mulia Yang di-Pertua Agong baru-baru ini dan juga harapan negara buat masa ini.

Perkara yang kedua dan cadangan yang kedua yang ingin saya sebut di sini tentang indeks alam sekitar dan keselamatan awam yang menunjukkan *trend* menurun maka di sini ingin saya mencadangkan, supaya dapat diwujudkan satu bentuk pendidikan untuk pembangunan yang *sustainable* dengan izin, *education for sustainable development*, kerana gejala yang bakal dihadapi oleh seluruh negara di dunia ini ialah gejala penambahan penduduk yang sekian hari, sekian tahun semakin bertambah.

Tuan Yang di-Pertua, setakat ini jumlah penduduk dunia ialah kira-kira 6 billion umat manusia di dunia ini. Dengan pertambahan kira-kira 2.5% setahun membawa maksud dalam tempoh 30 tahun, jumlah penduduk dunia akan bertambah menjadi 12 billion. Bayangkan, kawasan tanah kita tidak akan bertambah tetapi jumlah penduduk akan

bertambah. Persaingan-persaingan sengit untuk merebut kawasan akan berlaku dan ini akan membawa banyak masalah-masalah dari segi persekitaran dan pencemaran alam. Selain daripada itu, masalah-masalah sosial, masalah-masalah ekonomi juga akan terjejas.

Oleh hal yang demikian, suka saya mencadangkan supaya, pendidikan untuk pembangunan yang lestari, *education for sustainable development* menjadi agenda negara kita terutamanya dilaksanakan secara bersepadu, oleh Kementerian Pelajaran, Kementerian Alam Sekitar dan juga kementerian-kementerian lain yang berkaitan.

Tuan Yang di-Pertua, dalam konteks ini juga saya ingin menarik perhatian supaya pendidikan yang berkaitan dengan *education for sustainable development* ini memberi penekanan kepada pertama, *population grows* dengan izin, pembangunan dan pertambahan penduduk. Mungkin penduduk kita sekarang ini tidak bertambah dengan begitu pesat tetapi harus diawasi kedatangan pendatang-pendatang asing ke tempat kita yang boleh menyebabkan pertambahan bilangan penduduk di negara kita.

Aspek kedua yang harus diberi tekanan, dalam pendidikan yang berasaskan kepada pembangunan lestari ini ialah tentang hak-hak kemanusiaan, *gender equity* dengan izin, selain daripada perbezaan-perbezaan budaya, hal-hal yang berkaitan dengan kesihatan, penyakit HIV dan AIDS, selain daripada pembangunan dan perubahan dengan izin, *rural transformation* dan juga *sustainable urbanization* ini harus juga dijadikan sebagai agenda dalam kurikulum, pendidikan pembangunan yang seimbang ini. Selain daripada itu ialah, fokus juga harus diberikan kepada aspek-aspek, ketaksamaan dengan izin, *disparity, inequality and community reduction* dengan izin, diberi penekanan yang serius dalam agenda pendidikan untuk pembangunan yang lestari untuk atau *education for sustainable development*. Sekian saya mohon menyokong. Terima kasih.

#### 11.29 pagi

**Datuk Haji Mohd. Said bin Yusof [Jasin]:** Assalamualaikum Warahmatullahi Wabarakatuh , Tuan Yang di-Pertua, terima kasih kerana memberi peluang kepada saya untuk turut serta bersama-sama untuk menyokong usul junjung kasih kerana titah ucapan Seri Paduka Baginda Yang di-Pertua Agong semasa membuka Penggal Kedua, Parlimen Kesebelas ini.

Tuan Yang di-Pertua, saya juga ingin mengucapkan tahniah kepada Yang Amat Berhormat Perdana Menteri dan barisan kabinet kerana telah berjaya mengendalikan urusan negara dengan begitu baik sekali sehinggakan negara yang kita sama-sama kita cintai ini, beroleh banyak kejayaan sepanjang tahun 2004.

Dalam tahun 2004, Tuan Yang di-Pertua, kita telah berjaya membawa negara kita menjadi satu *trading nation*. Perdagangan luar kita mencatat yang tertinggi yang pernah kita catat, iaitu sebanyak RM880 billion, yang dari segi eksport sahaja.

Kita telah berjaya mengeksport barangan kita sebanyak RM500 bilion lebih, yang meletakkan kita nombor 18 terbesar di dalam dunia mengalahkan negara-negara lain, lebih-lebih lagi 10 negara yang baru sahaja bergabung dengan *European Union* (EU).

Pengeluaran barangan kita mempunyai nilai tambah yang tinggi dan bertaraf dunia seperti barangan elektrik, barangan elektronik, tekstil berkualiti tinggi dan pakaian, perabot dan juga barang-barang asas kayu, petroleum dan juga barangan asas petroleum, kita juga pengeluar utama barang-barangan berasas minyak kelapa sawit serta barangan berasaskan getah. Saya yakin dan percaya kita boleh meningkatkan lagi jumlah perdagangan antarabangsa kita ini sekiranya kita membuat beberapa, dengan izin, *fine tuning* terhadap sistem perbankan negara kita.

Tuan Yang di-Pertua, kita dapati pada masa ini ramai pengusaha-pengusaha kecil kita di peringkat SME, susah mendapat sokongan modal. Dahulu kita wujudkan skim CGC. Bank-bank negara kita walaupun kita mengadakan skim CGC tetapi mereka masih lagi meminta kepada peminjam-peminjam *collateral*, dengan izin, ataupun jaminan-jaminan bentuk tanah dan harta. Oleh yang demikian, kerajaan terpaksa kerana hendak membantu pengusaha-pengusaha kecil SME kita ini, seperti yang telah diumumkan oleh Yang Amat Berhormat Perdana Menteri kita, kita akan terpaksa menubuhkan satu bank baru yang

dinamakan Bank SME, yang mana pengusaha-pengusaha kecil kita ini dapat mudah pinjaman, yang mana dengan adanya pinjaman ini dapat membesarkan perniagaan mereka, kilang mereka dan juga mengeluarkan lebih banyak barangan-barangan kita untuk dieksport.

Soalnya, mengapa jadi begini? Walhal kita lihat, apa sahaja yang diminta oleh bank-bank swasta ini, Bank Negara kita akhir-akhir ini menurut sahaja, malah *chargers* untuk perkhidmatan-perkhidmatan perbankan ini yang dahulu tidak pernah ada, sekarang sudah ada, apa sahaja. Dan, tiap-tiap tahun kita mendengar, Tuan Yang di-Pertua, bank-bank kita ini untung berbilion-bilion ringgit, tetapi kita hendak tanya di mana sosial *obligation*nya terhadap pedagang-pedagang kita yang kecil ini? Orang-orang meniaga kalau boleh hidup di dalam negara kita ini, peniaga-peniaga ini boleh hidup, bank pun boleh hidup. Kalau kita, peniaga-peniaga ini tidak boleh hidup, tidak boleh pinjam, bank pun tidak boleh meniaga, inilah yang menjadi masalah kita, Tuan Yang di-Pertua.

Berbalik kepada negara kita hari ini sebagai negara perdagangan taraf dunia ini, maka dalam masa yang singkat kita dapat membangunkan rangkaian pelabuhan dan pengangkutan terbaik di rantau ini, tetapi apa yang saya minta, Tuan Yang di-Pertua, janganlah kita hanya tumpu kepada pelabuhan-pelabuhan di peringkat federal sahaja. [Ketawa] Jangan hendak tumpukan hanya kepada Pelabuhan Klang, Johor sampai dua pelabuhan, Kuantan, Bintulu, pandang-pandanglah sedikit negeri lain-lain, pelabuhan-pelabuhan negeri ini termasuk Kuching, Sarawak, Tuan Yang di-Pertua. Dan, jangan lupa Melaka kerana dahulu di Melaka, Tuan Yang di-Pertua, pernah menjadi pusat perdagangan terbesar di rantau ini, 500 tahun dahulu.

**Seorang Ahli:** Sekarang tidak payah lagi.

**Datuk Haji Mohd. Said bin Yusof:** Sekarang hendak diberi pada orang lain, mana boleh. [Ketawa].

Kita minta, apabila kita membangunkan negara kita ini sebagai *trading nation*, kita minta semua negeri di dalam Malaysia ini mendapat manfaat sedikit sebanyak. Oleh demikian, saya minta Tuan Yang di-Pertua, saya sebagai seorang wakil Parlimen yang datang daripada negeri Melaka, saya berharap Kementerian Perdagangan, Kementerian Pengangkutan supaya mempercepatkanlah pulangan balik Lembaga Pelabuhan Melaka kepada Kerajaan Negeri Melaka. Dahulu pada tahun 90-an, oleh kerana ketika itu ramai di antara pemimpin kita di negeri Melaka tidak berapa faham tentang urusan pelabuhan ini, telah menyerahkan Lembaga Pelabuhan Melaka ke Pelabuhan Klang. Akhirnya, kita dapati bahawa lama-kelamaan Pelabuhan Melaka hari ini agak merosot sedikit. Oleh yang demikian, saya menyeru melalui Dewan yang mulia ini supaya Kementerian Pengangkutan menyerahkan balik Lembaga Pelabuhan Melaka kepada negeri Melaka supaya kita sama-sama dapat membangunkan balik pelabuhan-pelabuhan di sekitar Melaka.

Satu lagi Tuan Yang di-Pertua ialah berkenaan dengan Lapangan Terbang Batu Berendam. Ini saya sudah bercakap beberapa kali di tahun-tahun sudah, sehingga hari ini belum ada *action* daripada Kementerian Pengangkutan. Kita dapat dengar bahawa sudah lulus, sudah lulus, sudah lulus, sudah dua, tiga tahun masih dengan takuk yang lama. Jadi, kita berharap supaya Kementerian Pengangkutan percepatkanlah projek memanjangkan landasan lapangan terbang di Melaka ini supaya dapat *Boeing 737* mendarat di Melaka, yang boleh menggalakkan lagi kedatangan pelancong-pelancong kerana negeri Melaka, Tuan Yang di-Pertua, negerinya kecil, orang dia pun tidak ramai, yang ada kami hari ini ialah tugu-tugu lama, yang kita hendak jual kepada pelancong-pelancong. Tetapi hari ini kalau lapangan terbangnya kecil, Tuan Yang di-Pertua, kapal terbang kecil yang mendarat, orang datang tidak ramai, jadi, kasihan Tuan Yang di-Pertua, negeri yang mengharapkan pelancong ini. Kita berharap kalau boleh kerajaan membina memanjangkan lapangan terbang di Melaka supaya pelancong-pelancong dari negara-negara lain boleh datang ke Melaka.

**Dr. James Dawos Mamit:** [Bangun]

**Timbalan Yang di-Pertua [Datuk Lim Si Cheng]:** Yang Berhormat, Yang Berhormat bagi Mambong.

**Datuk Haji Mohd. Said bin Yusof:** Sila, pengerusi saya, Tuan Yang di-Pertua. [Ketawa]

**Dr. James Dawos Mamit:** Terima kasih, Tuan Yang di-Pertua dan terima kasih sahabat saya Yang Berhormat bagi Jaslin.

Orang Sarawak memang suka hendak melawat negeri Melaka tetapi kalau tidak ada lapangan kapal terbang yang agak besar dan agak panjang sudah tentu mereka hanya datang ke KLIA. Selepas itu mereka pergi ke Kuala Lumpur, bukannya ke negeri Melaka. Setuju atau tidak, Yang Berhormat, jika ada landasan kapal terbang yang besar, kerana orang Sarawak suka menggunakan *Boeing 737* dan terus pergi ke negeri Melaka, selepas itu kita buat *twinning* dengan Kuching. Terima kasih.

**Datuk Haji Mohd. Said bin Yusof:** Terima kasih, sahabat saya Yang Berhormat bagi Mambong kerana menyokong usaha kita, saya kira sekarang ini di Kuching ataupun di Sarawak lapangan terbangnya sudah besar. Jadi, dengan harapan kita yang kita mohon di Melaka ini supaya lapangan terbang kita dapat diperpanjang *737* boleh mendarat, insya-Allah bukan sahaja pelancong-pelancong dari Sarawak, Sabah ataupun pelbagai negara, seluruh dunia pun boleh datang ke Melaka untuk melawat destinasi-destinasi pelancongan di Melaka.

Tuan Yang di-Pertua, satu lagi yang saya hendak timbulkan di sini ialah masalah harga minyak dunia. Beberapa tahun yang dahulu harga minyak mentah di pasaran dunia ialah sekitar USD20 setong, sekarang sudah melebihi dua kali ganda menjadikan USD50 ke USD60 setong. Hari ini kita sudah kedengaran pada tahun-tahun yang mendatang harga minyak dunia akan lebih naik lagi. Malah ada satu laporan yang dibuat oleh pakar-pakar ekonomi, dijangkakan dalam masa yang singkat, dua, tiga tahun lagi harga minyak akan lebih naik lagi sehingga USD80 setong.

Oleh kerana kenaikan minyak ini, kerajaan terpaksa menubuhkan jawatankuasa Kabinet untuk mengkaji impak kenaikan harga petroleum di atas ekonomi negara. Kita bersyukur, kita dapat mengawal harga runcit petroleum kita yang agak termurah dalam rantau ini dan kerajaan terpaksa membelanjakan sehingga hari ini RM8 bilion untuk subsidi minyak. Untuk bulan Januari hingga Mac 2005 sahaja, kita telah membelanjakan RM788.9 juta. Soalnya sekarang sampai bilakah kita hendak adakan subsidi ini? Kalau harga minyak esok naik USD80 satu tong, berapa banyak duit kerajaan terpaksa dibelanjakan kepada subsidi ini? Dan, kita lihat oleh kerana harga subsidi kita ini rendah, tidak sampai satu ringgit hanya 97 sen sahaja *ex-pump* dan di negara jiran berharga RM1.75 sen, kita dapati banyak penyeludupan berlaku.

Nelayan yang diberi subsidi diesel pun tidak dapat harga sebagaimana di *ex-pump* terpaksa membayar lebih daripada RM 1 sehingga RM 1.30 kerana terlalu panjang rangkaian pemasarannya. Kesatuan nelayan di peringkat daerah hendak *service charge*, kesatuan nelayan di peringkat negeri hendak komisen, kesatuan nelayan di peringkat pusat pula hendak cari untung. Kalau dapat pula harga subsidi mereka akhir-akhir ini kita dengar di sebelah utara, mereka bukan mencari ikan, tetapi mengadakan *special compartments* di dalam bot ikan dia, dia pergi ke seberang sana dia, jual diesel. Lebih lumayan katanya daripada dia pergi menangkap ikan.

Dari segi pengusaha pam minyak pula, kalau dahulu dengan jualan secara langsung kepada pelanggan, pengusaha-pengusaha minyak hanya dapat komisen 3 sen tetapi oleh kerana pada hari ini, kalau dia menjual kepada pelanggan industri yang mana harga industri sekarang RM1.50, RM1.60 maka sebagai manusia biasa, walaupun ada undang-undang, walaupun peraturan sehinggakan diugut supaya kalau dijual kepada pelanggan industri lesen dia dicabut. Serupa juga seperti dadah. Kita kata hukum gantung menagih dadah atau mengedar dadah, dia mengedar juga.

Peniaga minyak serupa juga. Adakah dia hendak tunggu dekat stesen dengan komisen 3 sen seliter ataupun dia jual di luar dia dapat untung lebih daripada itu? Oleh yang demikian, itulah sebabnya kalau kita lihat, pada masa dahulu satu pam minyak dia hanya mampu menjual 200,000 liter sahaja diesel sebulan. Hari ini sudah meningkat kepada 500,000 liter sehinggakan 1 juta liter. Kementerian Perdagangan Dalam Negeri Hal Ehwal Pengguna pula terpaksa mewujudkan kuota kepada stesen-stesen minyak yang

akhirnya menyusahkan orang-orang yang menggunakan kereta-kereta diesel macam saya yang terpaksa pusing dua tiga stesen. Sini boleh beli 20 liter, sana boleh beli 20 liter. Hendak datang mesyuarat sini pun kena dua tiga stesen baru penuh tangki.

Apatah lagi masalah orang-orang kampung kita. Petani-petani kita yang menggunakan diesel untuk pam-pam air mereka di kebun, traktor-traktor dan kubota dia. Mereka hari ini, oleh kerana kuota yang dikenakan oleh Kementerian Perdagangan Dalam Negeri Hal Ehwal Pengguna mereka tidak dapat membeli minyak diesel melalui tong-tong kecil. Oleh yang demikian, saya berharap supaya kerajaan fikirkan balik. Kalau boleh mengikut pendapat saya, kita hapuskan subsidi ini, kerana dengan ada subsidi inilah membuatkan orang akan menyeludup diesel, kerana perbezaan harga antara ex-pump dan juga dijual di industri ini terlampau tinggi. Jawabnya mereka akan seludup, mereka akan mencari keuntungan lebih. Tetapi kalau kita hapuskan subsidi, lebih-lebih lagi kalau subsidi kita hapuskan, kita lihat bagaimana yang berlaku di Thailand.

Road tax dia tidak tinggi sebagaimana yang kereta-kereta diesel dekat Malaysia sampai tiga kali ganda. Kita kurangkan. Kalau tidak ada subsidi ini adalah lebih baik wang yang digunakan untuk subsidi ini kita naikkan kakitangan kerajaan punya gaji.

**Seorang Ahli:** Ahli Parlimen.

**Datuk Haji Mohd. Said bin Yusof:** Termasuklah Ahli Parlimen. Jadi ini yang kita minta supaya kerajaan fikirkan. Masalah sekarang kita tahu. Dunia sedang menghadapi masalah minyak. Dahulu kita telah memperkatakan bahawa dengan kemajuan kelapa sawit kita, kerajaan telah mengumumkan melalui akhbar media massa, bahawa kita sudah jumpa bio-diesel daripada kelapa sawit. Sekarang saya hendak tanya Kementerian Perladangan dan Komoditi, mana perginya bio-diesel ini? Adakah masih lagi di peringkat mana. Walhal di negara-negara maju pada hari ini, oleh kerana di Brazil banyak kacang soya, dia telah mula menggunakan bio-diesel campuran minyak kacang soya dengan diesel petroleum untuk menjalankan mesin-mesin ini.

Di Eropah dengan adanya minyak-minyak sayur-sayuran. Hari ini sudah mula di Eropah. Mereka telah mencampurkan bio-diesel daripada minyak-minyak sayur-sayuran ini dengan diesel petroleum untuk menjalankan mesin-mesin mereka. Itulah sebabnya pada hari ini kalau kita lihat Tuan Yang di-Pertua, kita lihat sekarang di Eropah, rata-rata orang memakai bio-diesel yang baru ini. Sehingga pada hari ini BMW yang terkenal dengan kereta mewah dan kereta kuasa tinggi pun sudah mula mengeluarkan kereta-kereta BMW menggunakan minyak bio-diesel ini yang mana telah terbukti dengan adanya bio-diesel dapat mengurangkan *excess* karbon sebanyak 80%. Baru-baru ini kita dapat berita daripada *Straits Times* mengatakan bahawa satu syarikat *bio-energy Britain D1 oil* bercadang untuk membangunkan satu ladang di Madagascar untuk mengeluarkan bahan baku bagi bio-dieselnnya. Bio-diesel yang dikeluarkan dengan *blending* minyak sayuran dengan diesel petroleum di mana boleh digunakan untuk menggantikan diesel biasa dan dapat mengurangkan karbon sebanyak 80%.

Di Madagascar ini syarikat *Britain*, menanam pokok 'jatropha' yang boleh ditanam di kawasan kering dan tanah yang tidak subur yang mana satu hektar boleh mengeluarkan 2.7 tan minyak yang bernilai USD350. Soalnya orang-orang lain sekarang tengah tanam benda-benda baru untuk mendapatkan bio-diesel, yang kita pada hari ini berlambak dengan minyak kelapa sawit kenapa tidak kita membangunkannya.

**Timbalan Yang di-Pertua [Datuk Lim Si Cheng]:** Yang Berhormat, banyak lagi?

**Datuk Haji Mohd. Said bin Yusof:** Banyak lagi Tuan Yang di-Pertua. Baru separuh.

**Timbalan Yang di-Pertua [Datuk Lim Si Cheng]:** Tidak apalah. Bila masa sampai, saya minta Yang Berhormat duduklah.

**Datuk Haji Mohd. Said bin Yusof:** Terima kasih Tuan Yang di-Pertua.

**Datuk Haji Mohamed bin Haji Aziz:** *[Bangun]*

**Datuk Haji Mohd. Said bin Yusof:** Ini abang saya hendak mencelah pula Tuan Yang di-Pertua.

**Timbalan Yang di-Pertua [Datuk Lim Si Cheng]:** Terpuang kepada Yang Berhormat.

**Datuk Haji Mohd. Said bin Yusof:** Silakan.

**Datuk Haji Mohamed bin Haji Aziz:** Terima kasih Tuan Yang di-Pertua dan terima kasih Yang Berhormat Jasin. Saya rasa beliau sedang mengutarakan satu perkara yang amat penting.

[Ketawa]

**Datuk Haji Mohamed bin Haji Aziz:** Saya harap pihak-pihak yang berkenaan yang ada kaitan dengan bagaimana dapat kita menghasilkan bio-diesel ini harus jangan bertindak besok lusa, hari ini juga. Bertindak dengan serta-merta untuk yang pertama seperti mana yang dinyatakan. Soal minyak kelapa sawit.

**Timbalan Yang di-Pertua [Datuk Lim Si Cheng]:** Yang Berhormat, apakah benda yang hendak ditanya?

**Datuk Haji Mohamed bin Haji Aziz:** Ini dalam pertanyaan Tuan Yang di-Pertua. [Ketawa] Dalam perjalanan saya ke Jasin untuk bertanya. Jangan bimbang, pertanyaan tetap akan saya kemukakan. Sudah lama pekebun-pekebun kecil, pekebun kelapa sawit di Sri Gading 80% tanamannya kelapa sawit, di Kulai juga Tuan Yang di-Pertua. Saya tahu Tuan Yang di-Pertua memang tahu juga.

**Timbalan Yang di-Pertua [Datuk Lim Si Cheng]:** Yang Berhormat hendak beri ucapan atau hendak minta penjelasan?

**Datuk Haji Mohamed bin Haji Aziz:** Hendak bertanya. Kalau minyak kelapa sawit wahai Jasin, boleh diterjemahkan dan dijadikan bio-diesel. Negara kita dan rakyat khususnya akan dapat menikmati kekayaan yang luar biasa dan sudah tentu harga kelapa sawit yang dijual oleh pekebun-pekebun kecil akan meningkat berkali-kali ganda. Ini satu keuntungan kepada negara dan rakyat, kenapa...ini saya hendak tanya kepada Jasin, kenapa dan mengapa satu peluang rezeki yang begini hebat yang boleh dipunyai oleh rakyat dan kita mempunyai minyak kelapa sawit yang melimpah-limpah kenapa dan mengapa perkara ini tidak dimajukan serta merta. Apa kelemahan-kelemahan yang berlaku? Saya berharap Yang Berhormat Jasin akan membuat penjelasan.

**Timbalan Yang di-Pertua [Datuk Lim Si Cheng]:** Yang Berhormat bagi Jasin boleh gulunglah.

**Tuan Haji Mohd. Said bin Yusof:** Terima kasih Yang Berhormat bagi Sri Gading.

**Timbalan Yang di-Pertua [Datuk Lim Si Cheng]:** Yang Berhormat bagi Jasin, boleh gulung ya.

**Tuan Haji Mohd. Said bin Yusof:** Tuan Yang di-Pertua, ya. Hendak jawab dahulu, Tuan Yang di-Pertua.

**Timbalan Yang di-Pertua [Datuk Lim Si Cheng]:** Sila gulung, masa tidak lama lagi.

**Tuan Haji Mohd. Said bin Yusof:** Tuan Yang di-Pertua, ini satu lagi. Orang kita di Malaysia ini selalunya apabila sudah terhantuk baru tengadah. Di Brazil sudah mencari daripada kacang soya bagaimana hendak campur dengan minyak diesel dijadikan *bio diesel*. Di Eropah sudah mencari minyak sayur-sayuran di campur dengan diesel petroleum menjadikan *bio diesel*. Ini yang kita dengar di Britain sanggup menanam pokok dekat Madagascar. Yang kita ini dilimpahi dengan kelapa sawit, apabila besok kita sudah kalah di peringkat permainan ini, barulah masa itu kita hendak buat.

Kalau *bio diesel* ini kita hendak keluarkan menggunakan belanja yang tinggi, ini kalau kerajaan mengeluarkan subsidi, saya setuju, Tuan Yang di-Pertua, supaya subsidi ini dapat kepada orang-orang kampung kita, dapat kepada orang ramai. Ini masalah yang kita hadapi.

Kita tengok pada hari ini, macam IPP untuk kita *generation of electricity*, dengan izin, Tuan Yang di-Pertua, kita gunakan minyak, kita menggunakan arang batu. Minyak kita

import, arang batu kita tidak ada, kita terpaksa import. Yang sedih bagi kita ada di antara orang-orang kita sudah ajukan kepada kerajaan melalui FELDA yang banyak ladang kelapa sawit dan banyak kilang. Orang kita menggunakan teknologi daripada Kanada dan juga negeri China pada hari ini, kita boleh menggunakan *biomass*, barang-barang terbuang daripada kilang kelapa sawit untuk *generate electricity*. Tetapi FELDA jawab apabila kita datang jumpa dia, dia kata dia pun juga hendak buat.

Kita tidak boleh bergantung kepada benda-benda luar ini. Diesel kita terpaksa import, arang batu kita terpaksa import. Kalau kita import besok oleh kerana sudah terlampau ramai orang gunakan arang baru, esok arang baru pula naik harga dan esok rakyat kita juga susah kerana kita terpaksa naikkan tarif *electricity* kita. Tetapi mengapa tidak kita gunakan *biomass* daripada kelapa sawit ini untuk kita *generate electricity* yang ada.

Saya minta FELDA kena tengok serius pada hari ini kerana pada hari ini, Tuan Yang di-Pertua, saya pun hairan FELDA ini. Akhir-akhir ini hendak berniaga makanan, D'Saji, itu yang dihebahkan. Itu yang dihebohkan, tubuh *company* D'Saji kerana hendak buat *catering*. Cukuplah, yang ini yang masalah peneroka kita tidak dapat diselesaikan, kegunaan kelapa sawit FELDA sebagai *the biggest in the world*, satu juta ekar. Sepatutnya buatlah *bio diesel* ini, *generate electricity* gunakan *biomass* ini, ini kita tumpukan kerana menyelamatkan wang negara. Ini pula hendak berniaga sebagai *caterer* pula, Tuan Yang di-Pertua.

Akhir sekali, Tuan Yang di-Pertua, ini sudah hendak penghujung. Akhir sekali saya hendak timbulkan masalah dadah ini, Tuan Yang di-Pertua. Jawapan yang sudah daripada Kementerian Keselamatan Dalam Negeri kurang menyenangkan hati saya, Tuan Yang di-Pertua. Hari ini kita sudah bercakap bahawa dadah menjadi "*number one enemy*" kepada negara kita tetapi cara kita menguruskan masalah ini macam kata biasa-biasa, sembang kedai kopi sahaja, tidak ada yang serius yang dapat kita tangani.

Tuan Yang di-Pertua, 28 pusat serenti, boleh muat 10,000 orang. Kita tengok data-data yang terakhir daripada penagih-penagih yang dipulihkan termasuk penagih-penagih baru lebih daripada 10,000 orang. Adakah kerja kita pada hari ini daripada 28 pusat serenti kita hendak tambah menjadi 56? Adakah ini di cita-cita? Jadi saya berharap pada hari ini kita kena duduk balik membincangkan soal dadah ini, PEMADAM kita padamkan, Tuan Yang di-Pertua. Apa yang telah dibuat oleh PEMADAM setakat hari ini? Saya tidak hendak jawab, Ahli Yang Berhormat sudah jawab. Kita kena kaji balik...

**Dato' Haji Mat Yasir bin Haji Ikhsan:** [Bangun]

**Tuan Haji Mohd. Said bin Yusof:** Ini minta maaf, Tuan Yang di-Pertua, sudah tinggal sedikit, sudah bagi signal.

**Dato' Haji Mat Yasir bin Haji Ikhsan:** Pasal PEMADAM hendak dipadamkan itu.

**Tuan Haji Mohd. Said bin Yusof:** Boleh ya?

**Dato' Haji Mat Yasir bin Haji Ikhsan:** Terima kasih Tuan Yang di-Pertua dan Yang Berhormat bagi Jasin. Ini PEMADAM disebut hendak dipadamkan, Tuan Yang di-Pertua, saya ingat ini kena tarik baliklah. Sebab yang penting itu ia "dibugarkan." Sekarang di semua peringkat, di peringkat kebangsaan atau peringkat negeri-negeri, PEMADAM sedang "membangarkan" balik ejen dadah ini. Oleh kerana itu kalau setujulah, kalau tidak setuju pun tidak apa, [Ketawa] tarik balik kenyataan itu. [Tepuk]

**Tuan Haji Mohd. Said bin Yusof:** Apa yang dimaksudkan oleh sahabat saya, Yang Berhormat bagi Sabak Bernam ini mungkin di Sabak Bernam dan Selangor tetapi di negeri lain, Tuan Yang di-Pertua, hanya dia datang setahun sekali jumpa wakil rakyat nak buat jamuan makan malam PEMADAM. Selepas itu jual meja, dapat, lepas itu dia hilang ghaib. Itu yang saya minta dipadamkan. Kalau hendak "dibugarkan" balik, kita hendak juga tengok program dia sekarang ini. Jangan sekadar dalam majlis sebagai Pengerusi PEMADAM Daerah, duduk meja hadapan dengan Ketua-ketua Menteri Besar, selepas itu hilang.

Tuan Yang di-Pertua, masalah dadah ini meruncingkan sekali. Yang menjadi masalah ialah masalah gam yang mana kebanyakan yang menghidu gam ini ialah anak-anak orang di luar bandar yang tidak ada duit ini, Tuan Yang di-Pertua. Hari itu jawapan daripada Setiausaha Parlimen masa soal jawab mengatakan kita baru hendak cari undang-undang, hendak tiru negeri-negeri lain. Itu sebab saya kata tadi, kerajaan kita ini selalu bila terhantuk baru tengadah.

Tuan Yang di-Pertua, di Singapura, oleh kerana hendak menjaga kebersihan, dia boleh mengadakan satu rang undang-undang mengharamkan *chewing gum* kerana dia tidak hendak kotor merata-rata di negeri dia, dia boleh haramkan *chewing gum*. Hari ini gam, Tuan Yang di-Pertua, kalau dahulu gam dijual di kedai basikal, gam dijual di kedai motosikal, malangnya di Jasin hari ini dan kawasan-kawasan di sekitar sebelah Melaka, kedai runcit pun sudah jual gam.

Oleh kerana tidak ada akta atau undang-undang untuk mengawal perkara ini, kedai-kedai runcit ini jual gam siap sekali dengan plastik.

**Datuk Haji Mohamad bin Haji Aziz:** [*Bangun*]

**Timbalan Yang di-Pertua [Datuk Lim Si Cheng]:** Yang Berhormat, masa cukup.

**Datuk Haji Mohamad bin Haji Aziz:** Tuan Yang di-Pertua, masalah musuh negara ini serius, kerana ia musuh negara nombor satu. Saya dahulu cerita soal dadah ini marah sangat. Marah, tidak ada siapa yang tidak marah. Tetapi sejak-sejak akhir ini apabila mendengar jawapan, apabila bercerita dengan kawan-kawan, saya sudah marah bercampur geli, Tuan Yang di-Pertua. Marah dan geli kerana bukan sahaja gam seperti mana Yang Berhormat bagi Jasin katakan tadi, ini sudah hendak mencium najis binatang, selepas itu seluar dalam. Seluar dalam itu saya tidak tahu dia tidak sebut seluar dalam lelaki ke, seluar dalam perempuan ke, seluar dalam siapa, [*Disampuk*] tidak tahu saya, seluar dalam.

Tuan Yang di-Pertua, kalau seluar dalam sudah jadi tempat hendak menghidu, hal ini membimbangkan. Kalau seluar dalam anak dara, "*alkulha*" jugalah. [*Ketawa*] Jadi, ini tidak tahu...

**Timbalan Yang di-Pertua [Datuk Lim Si Cheng]:** Yang Berhormat, Yang Berhormat bagi Sri Gading.

**Datuk Haji Mohamad bin Haji Aziz:** Ya?

**Timbalan Yang di-Pertua [Datuk Lim Si Cheng]:** Cukuplah.

**Datuk Haji Mohamad bin Haji Aziz:** Saya minta penjelasanlah.

**Timbalan Yang di-Pertua [Datuk Lim Si Cheng]:** Ya, ya, baik.

**Datuk Haji Mohamad bin Haji Aziz:** Tuan Yang di-Pertua, Yang Berhormat bagi Jasin dan Yang Berhormat bagi Sabak Bernam ini, dia pakar tentang dadah. Kita iktiraf dia.

**Timbalan Yang di-Pertua [Datuk Lim Si Cheng]:** Baik.

**Datuk Haji Mohamad bin Haji Aziz:** Terima kasih, ini soal dalam ini.

**Tuan Haji Mohd. Said bin Yusof:** Ini masalah gam ini kita lihat yang kena ini adalah budak-budak sekolah rendah, Tuan Yang di-Pertua dan apabila hidu gam boleh mengakibatkan sel-sel otak dia mati. Saya boleh tunjuk kalau Menteri datang ke Jasin, saya boleh tunjuk satu kampung yang pada hari ini yang mana tujuh orang sudah sah gila, Tuan Yang di-Pertua, disebabkan hidu gam. Tujuh orang! Tidak cukup dengan hidu gam, jangan kata seluar dalam, Yang Berhormat bagi Sri Gading, air kencing dia ditadahnya bukan dia minum selalu, dia peram satu malam. Dia peram satu malam, lepas itu baru dia teguk.

Tuan Yang di-Pertua, yang lebih menyedihkan, budak gila ini apabila dia teguk air kencing yang sudah bermalam dan hidu gam, dia boleh berlungeng.. Dia berlungeng, tidak pakai baju, dia boleh naik atas bumbung rumah dia yang beratap zink dengan cuaca panas yang semua tahu pada hari ini, bulan dua dan bulan tiga ini panas, dia boleh kaca mata hitam, duduk menyandar atas bumbung rumah dia yang beratap zink kerana kita lihat

bukan sahaja sel-sel otak dia sudah mati, sel kulit dia pun sudah mati dan dia tidak dapat rasakan kepanasan ini.

Ini berlaku berleluasa dan kalau kita tidak ambil tindakan yang cepat, Kementerian Dalam Negeri tidak ambil tindakan yang cepat, saya takut besok akhirnya isu gam ini akan menjadi seolah-olah *ethnic cleansing* kepada orang-orang di Jasin dan juga kawasan-kawasan lain.

**Tuan Haji Idris bin Haji Haron:** [Bangun]

**Datuk Haji Mohd. Said bin Yusof:** Dah cukup masa, Yang Berhormat ya?  
**Timbalan Yang di-Pertua [Datuk Lim Si Cheng]:** Cukup Yang Berhormat, baik.

**Datuk Haji Mohd. Said bin Yusof:** Satu lagi Tuan Yang di-Pertua, ini yang gam.....

**Dr. Tan Seng Giaw:** [Bangun]

**Datuk Haji Mohd. Said bin Yusof:** Doktor, apa hal? Kepong?

**Timbalan Yang di-Pertua [Datuk Lim Si Cheng]:** Kepong mohon berucap.

**Datuk Haji Mohd. Said bin Yusof:** Eh! duduk dulu, belum habis lagi. Satu lagi hal Tuan Yang di-Pertua, yang tadi kita cerita pasal mercun. Ini masalah sosial anak muda tadi, saya minta pihak kastam kerana di luar bandar pada hari ini berleluasa menjual arak-arak murahan – namanya kalau tidak silap saya yang saya dengar-dengar cakap anak muda ini 'Engkapi'. Saya pun tidak pernah dengar Tuan Yang di-Pertua – 'Engkapi' dan ia dijual berleluasa di kedai-kedai runcit, di kampung-kampung yang mana menjadi kesukaan anak-anak kita yang *race* motor ini – dia minum dulu, sudah mabuk baru dia *race* motor, yang membuatkan banyak kematian dan lebih mendukacitakan kita.

Kita pada hari ini hendak menghapuskan atau hendak mengurangkan *race* motor tapi akhir-akhir ini kita tidak tahu kementerian mana telah meluluskan pengeluar tayar motosikal yang khusus untuk *race* dan di peringkat kampung dipanggil 'tayar sotong'. Tayar sotong ini khusus untuk *race*. Mengapa kita keluarkan ini dan Kementerian Pengangkutan tiap-tiap tahun berbelanja berjuta-juta ringgit berkempen hendak mengurangkan kemalangan, tetapi dalam masa yang sama kita meluluskan kilang untuk mengeluarkan tayar sotong khusus untuk *racing* motosikal yang mana akan membahayakan penunggang-penunggang kita.

**Tuan Haji Idris bin Haji Haron:** [Bangun] [Bercakap tanpa pembesar suara]

**Datuk Haji Mohd. Said bin Yusof:** Ya Tangga Batu, apa hal? Hendak cakap? Okey, sila.

[Timbalan Yang di-Pertua (Datuk Dr. Yusof bin Yacob) **mempengerusikan Mesyuarat**]

**Tuan Haji Idris bin Haji Haron:** Terima kasih Tuan Yang di-Pertua, terima kasih Yang Berhormat bagi Jasin. Saya tertarik sedikit kepada tajuk yang sebelum ini iaitu berkenaan dengan gam. Pada 24 hari bulan yang lepas, pihak Kementerian Keselamatan Dalam Negeri ada memberikan jawapan tentang kajian yang telah dilaksanakan oleh Kementerian Kesihatan tentang bahaya gam dan petrol. Bolehkah Yang Berhormat bagi Jasin cadangkan supaya pihak Kementerian Kesihatan juga meneruskan kajian kesan psikologi dan fizikal terhadap *urine* (air kencing) ini, najis lembu dan apa juga termasuklah seluar dalam yang disebut oleh Yang Berhormat bagi Jasin tadi supaya laporan itu diserahkan kepada Kementerian Keselamatan Dalam Negeri supaya ketiga-tiga barang tadi boleh dijadikan bahan tegahan untuk dibawa, boleh dicadangkan? Terima kasih.

**Datuk Haji Mohd. Said bin Yusof:** Terima kasih Yang Berhormat bagi Tangga Batu. Ini yang menjadi masalah Tuan Yang di-Pertua, sedikit hendak buat kajian. Besok kita dalam Parlimen, oleh sebab *technical term very hard to explain*, kata orang Kelantan [Ketawa] *very hard to explain or technical term* memakan masa dua, tiga tahun lagi, anak-anak kita dekat kampung sudah banyak yang gila.

Jadi pada hari ini, yang nampak pada hari ini ialah gam. Kita kena buat sesuatu, minta maaf Tuan Yang di-Pertua, gurau-gurau juga, tetapi jangan sampai besok banyak antara orang kita sudah gila. Disebabkan gam ini, umur belasan tahun sudah gila, barulah kita hendak buat undang-undang untuk mencegah itu dan ini. Soal seluar dalam, soal itu, tidak payah hendak kaji kerana dia sudah terlampau gila disebabkan oleh otak. Otak dia sudah kena gam. Dadah yang paling murah sekarang, satu tin *made in Thailand* – RM2.90.

**Timbalan Yang di-Pertua [Datuk Dr. Yusof bin Yacob]:** Ya, gulung Yang Berhormat.

**Datuk Haji Mohd. Said bin Yusof:** Mengapa tidak kerajaan kita kawal? Satu lagi Tuan Yang di-Pertua...

**Timbalan Yang di-Pertua [Datuk Dr. Yusof bin Yacob]:** Cukuplah itu Yang Berhormat.

**Datuk Haji Mohd. Said bin Yusof:** Ya, saya juga hendak mengucapkan ribuan terima kasih dan tahniah kepada polis, ini mustahak. Kita hendak rakamkan dalam Dewan kerana hari ini sudah kita tengok, jenayah pun sudah kurang, apa semua, jadi kita ucapkan ribuan terima kasih dan tahniah kerana menyambut Hari Polis, hari Jumaat yang lepas. Walaupun demikian, saya hendak minta supaya polis, kerana sekarang ini di Jasin, tambahan penduduk yang begitu ramai, kita dapati bahawa kekurangan anggota polis di mana-mana sehinggakan pernah kedengaran pada hari ini negara memerlukan 21 ribu anggota polis. Kita minta JPA supaya meluluskan bilangan ini kerana dengan adanya bilangan polis meronda, mudah-mudahan masalah sosial ataupun masalah yang kita hadapi pada hari ini dapat kita kurangkan.

Tuan Yang di-Pertua, yang akhir sekali, saya hendak mengucapkan ribuan terima kasih kepada Kementerian Kesihatan kerana telah membuka Hospital Jasin yang selalu saya laungkan. 17 Mac hari itu, Hospital Jasin telah dibuka. Hari ini, 28 hari bulan – 11 hari. 11 hari dibuka, 11 orang sudah mati di hospital itu. *[Ketawa]*

**Timbalan Yang di-Pertua [Datuk Dr. Yusof bin Yacob]:** Tidak boleh pakai Yang Berhormat?

**Datuk Haji Mohd. Said bin Yusof:** *[Ketawa]* 11 hari dibuka, sudah boleh dipakai, 11 orang mati Tuan Yang di-Pertua, satu hari satu.

**Timbalan Yang di-Pertua [Datuk Dr. Yusof bin Yacob]:** Tetapi yang sihat lebih ramai Yang Berhormat ya?

**Datuk Haji Mohd. Said bin Yusof:** *[Ketawa]* Saya juga pernah menyuarakan tentang ambulans dulu. Saya pun hendak ucapkan ribuan terima kasih kerana dekat kawasan Jasin diberi enam ambulans baru atas jenama IVECO, saya pun tidak pernah dengar Tuan Yang di-Pertua.

**Timbalan Yang di-Pertua [Datuk Dr. Yusof bin Yacob]:** Ya, cukuplah, cukuplah Yang Berhormat, dia sudah faham.

**Datuk Haji Mohd. Said bin Yusof:** Sudah faham Datuk ya? Walaupun baru *disupply*, daripada enam – lima sudah rosak.

**Timbalan Yang di-Pertua [Datuk Dr. Yusof bin Yacob]:** Sabarlah.

**Datuk Haji Mohd. Said bin Yusof:** Lima sudah rosak, satu ambulans belanja RM300 ribu, kalau sudah lima, kita sudah rugi berapa? Jadi kita minta supaya Bahagian Perolehan, jangan hendak tangkap muat sahaja, ini untuk kegunaan kerajaan. Kita pun tidak pernah dengar jenama kenderaan ini apa. Hari ini sudah *supply*, lebih kurang baru tiga bulan, daripada enam ambulans yang *disupply* kepada Jasin, lima sudah rosak Tuan Yang di-Pertua.

**Timbalan Yang di-Pertua [Datuk Dr. Yusof bin Yacob]:** Ya, cukup Yang Berhormat ya.

**Datuk Haji Mohd. Said bin Yusof:** Oleh yang demikian, sekali lagi saya mengucapkan ribuan terima kasih kerana diberi peluang dan saya ingin menyokong. Terima kasih.

**Timbalan Yang di-Pertua [Datuk Dr. Yusof bin Yacob]:** Bintulu.

#### 12.07 tgh.

**Dato' Seri Tiong King Sing [Bintulu]:** Tuan Yang di-Pertua, terima kasih kerana memberi peluang untuk saya turut serta di dalam ucapan Menjunjung Kasih kepada Seri Paduka Baginda Yang di-Pertuan Agong.

Terlebih dahulu Bintulu menyokong penuh Titah Seri Paduka Baginda Yang di-Pertuan Agong dalam sesi pembukaan Dewan tempoh hari yang menginginkan mutu perkhidmatan awam dipertingkatkan.

Tuan Yang di-Pertua, negara kita telah mencapai kemerdekaan sejak 47 tahun yang lalu dan perubahan dari segi pembangunan amat ketara sekali. Namun demikian yang amat menyedihkan kita ialah mutu perkhidmatan awam iaitu sistem dan pentadbiran di negara kita masih lagi mengikut cara dan budaya kerja zaman 50-an atau 60-an yang lalu. Saya percaya Yang Amat Berhormat Perdana Menteri kita sekarang adalah seorang yang proaktif dan efisien terutama dalam semangat untuk meningkatkan mutu perkhidmatan awam.

Rata-rata sektor awam di negara kita sudah berubah menggunakan teknologi terkini terutamanya penggunaan komputer dan program (IT) dalam melaksanakan perkhidmatan namun tidak nampak lagi perubahan melainkan beberapa perkara sahaja. Jika dilihat masih terdapat lagi masalah misalnya dalam memproses permohonan. Dahulu kita menggunakan beberapa helai borang dan sekarang pula dengan hanya memasukkan data di dalam komputer, tetapi hasilnya sama juga dengan cara dahulu – lambat malah rumit.

**Tuan Jimmy Donald:** *[Bangun]*

**Timbalan Yang di-Pertua [Datuk Dr. Yusof bin Yacob]:** Ya, ada yang bangun Yang Berhormat.

**Dato' Seri Tiong King Sing:** Tidak apa, tidak apa, bagi saya habiskan dahulu, nanti saya tidak habis. Kadang-kadang kakitangan kerajaan sudah berjanji dengan orang awam tetapi jarang menepatinya. Contohnya, apabila berurusan, pegawai akan cakap, dapat siap dalam seminggu tetapi sampai seminggu, mereka kata sebulan lagi boleh siap. Akhirnya sebulan pun tidak siap lagi. Ada pula sesetengah kes sampai bertahun-tahun pun tidak jawab atau siap.

**Timbalan Yang di-Pertua [Datuk Dr. Yusof bin Yacob]:** Ya.

**Tuan Haji Idris bin Haji Haron:** *[Bangun]*

**Dato' Seri Tiong King Sing:** Ada juga apabila ditanya...

**Timbalan Yang di-Pertua [Datuk Dr. Yusof bin Yacob]:** Yang Berhormat.

**Dato' Seri Tiong King Sing:** ...tentang permohonan berkenaan...

**Timbalan Yang di-Pertua [Datuk Dr. Yusof bin Yacob]:** Yang Berhormat.

**Dato' Seri Tiong King Sing:** ...jawabannya dokumen ada..

**Tuan Jimmy Donald:** *[Bangun]*

**Timbalan Yang di-Pertua [Datuk Dr. Yusof bin Yacob]:** Tangga Batu bangun. Ada dua yang bangun.

**Dato' Seri Tiong King Sing:** Tidak apa, tidak apa. Tunggu saya habis dahulu.

**Dato' Raja Ahmad Zainuddin bin Raja Haji Omar:** Bila mahu habis?

**Dato' Seri Tiong King Sing:** Nanti masa tidak cukup. Jawapannya, dokumen atau permohonan berkenaan sudah hilang atau mengatakan tidak ada permohonan daripada rakyat. Kenapa perkara ini boleh berlaku dalam sistem kerajaan? Kenapa perkara sebegini boleh terjadi dan sepatutnya pegawai berkenaan menerangkan perkara sebenar tanpa perlu menyeksakan orang ramai.

Ini menunjukkan salah satu kelemahan pihak pentadbiran dan tidak ambil prihatin kepada rakyat. Adakah Ketua Setiausaha Negara atau pegawai tertinggi di sesebuah kementerian atau ketua jabatan merasai betapa susahnya rakyat untuk berurusan dengan agensi terbabit terutamanya rakyat dari luar bandar.

**Tuan Haji Idris bin Haji Haron:** *[Bangun]*

**Timbalan Yang di-Pertua [Datuk Dr. Yusof bin Yacob]:** Tangga Batu bangun.

**Dato' Seri Tiong King Sing:** Tidak apa, tidak apa. Nanti, nanti. Contohnya, rakyat di Bintulu dari Jelalong menggunakan bot laju 15 kuasa kuda yang memakan lebih tiga jam untuk sampai ke transit *point* Tubau dan naik pula bot ekspres dari Tubau ke Bandar Bintulu. Perjalanan ini mengambil masa tiga jam setengah dan kadangkala hampir sehari. Berapa kali mereka perlu turun naik untuk berurusan dengan pejabat kerajaan? Adakah rasa kesusahan rakyat apabila tiba pilihan raya rakyat mengatakan tidak guna memilih Barisan Nasional kerana Kerajaan Barisan Nasional yang diharapkan untuk membantu mereka tidak menunaikan janji, sedangkan perbuatan ini tadi dilakukan oleh sesetengah kakitangan dan pegawai kerajaan yang tidak bertanggungjawab.

Saya ingin bertanya kepada Yang Berhormat, apakah tindakan yang telah atau patut dibuat untuk menyelesaikan masalah ini.

**Dato' Raja Ahmad Zainuddin bin Raja Haji Omar:** *[Bangun]*

**Timbalan Yang di-Pertua [Datuk Dr. Yusof bin Yacob]:** Larut bangun Yang Berhormat.

**Dato' Raja Ahmad Zainuddin bin Raja Haji Omar:** Terima kasih sahabat saya Yang Berhormat bagi Bintulu. Syabas. Yang Berhormat Bintulu ini Tuan Yang di-Pertua, kasihan dahulu hampir-hampir lemas kerana hendak menyelamatkan mangsa-mangsa banjir. Inilah wakil rakyat contoh.

Jadi saya bersetuju dengan pandangan Yang Berhormat supaya tindakan ini perlu diambil segera kerana ini merupakan masalah spesifik yang perlu diambil tindakan segera oleh pihak kerajaan ke atas mereka yang bertanggungjawab kerana kita lihat kawasan Yang Berhormat dan mungkin di kawasan-kawasan Sabah dan Sarawak ini memang banyak masalah dari segi kemudahan asas dan sebagainya.

Jadi saya ingat Yang Berhormat teruskan supaya tindakan segera diambil, kalau boleh hari ini juga ke atas mereka yang bertanggungjawab supaya tidak menjadikan perkhidmatan kerajaan yang begitu baik pada hari ini disalahgunakan dan tercemar akibat hanya seorang dua sahaja kakitangan yang mungkin tidak tahu menjalankan tanggungjawab mereka. Yang Berhormat setuju atau tidak tentang perkara ini?

**Dato' Seri Tiong King Sing:** Memanglah saya bersetuju tetapi saya haraplah pegawai-pegawai kerajaan boleh lihat apa yang diberitahu tadi oleh Yang Berhormat dari Larut.

Tuan Yang di-Pertua, saya juga ingin mengambil kesempatan untuk menyentuh berkenaan dengan kekurangan doktor pakar dan jururawat di hospital kerajaan. Saya pernah mengemukakan persoalan ini beberapa kali dalam sesi Parlimen sebelum ini. Pihak Jabatan Perkhidmatan Awam dan Kementerian Kesihatan mengatakan mereka akan mengkaji dan masih dalam proses menyelesaikan. Ini memang biasalah selalu kita tanya mereka akan kata sedang dikaji. Namun, sampai hari ini sudah berapa tahun masih belum nampak masalah doktor pakar luar negeri ini diselesaikan.

Prosedur serta pelbagai kerana dalam jawatan perkhidmatan awam merumitkan pengambilan doktor pakar. Saya ingin bertanya adakah kekurangan doktor di hospital kerajaan ini berlaku juga di negara-negara maju yang lain? Apakah formula terbaik yang

digunakan untuk menawarkan perkhidmatan doktor pakar di hospital kerajaan? saya memohon Jabatan Perkhidmatan Awam ambil perhatian dan tindakan yang segera dalam hal ini. Apa salahnya kita membuat satu keputusan dan langkah yang paling senang untuk mengambil doktor pakar dari luar negeri tanpa melalui banyak proses. Saya juga ingin bertanya apakah sistem temu duga atau kelayakan untuk membolehkan doktor pakar berkhidmat dengan kerajaan kerana terdapat doktor pakar yang diambil tidak tahu bekerja.

Perkara ini pernah berlaku di Hospital Bintulu tiga tahun yang lalu di mana pakar bius tidak tahu hendak bagi berapa suntikan bius kepada pesakit dan bertanya kepada kakitangan yang lain. Bayangkan kalau dia bagi suntikan sembarangan, apa yang akan terjadi dan kenapa doktor sebegini boleh diambil bekerja juga. Kalau boleh saya cadangkan pegawai tinggi atau pegawai kerajaan terutama sekali pegawai dari Jabatan Perkhidmatan Awam apabila sakit janganlah diberi rawatan istimewa. Cubalah masukkan ke dalam wad biasa dirawat oleh doktor-doktor tadi. Biar mereka sedar bagaimana perasaan rakyat. Dengan cara ini barulah mereka sedar bahawa hidup dalam dunia ini nyawa hanya ada satu sahaja. Mungkin bini mereka boleh kahwin tiga atau sepuluh.

Satu perkara lagi ialah tentang tamat kontrak atau sambung kontrak doktor pakar dari luar negeri. Saya difahamkan kerja-kerja ini dibuat pada saat-saat akhir sehinggakan doktor ini tidak tahu mereka diberhentikan atau disambung semula. Kenapa kita tidak ada sistem pemantau? Jika mereka cemerlang kita boleh sambung kontrak sebelum tamat dua atau tiga bulan sebelum tamat. Ini menunjukkan Jabatan Perkhidmatan Awam tidak menjalankan tugas dengan betul.

Tuan Yang di-Pertua, adakah kita Kerajaan Barisan Nasional sedar yang rakyat mengangap periuk nasi bekerja dengan kerajaan selamat dan tidak akan dipecat walaupun prestasi kerja tidak baik. Saya juga agak hairan berhubungan dengan tindakan Jabatan Perkhidmatan Awam terhadap pegawai atau kakitangan disiplin kerja untuk mengambil tindakan kepada mereka mengambil masa bertahun-tahun. Kalau tidak pandai bekerja buang sahaja dan kita boleh bagi pampasan.

Kita tidak mahu simpan mereka yang tidak bekerja dan jadikan kerja di sektor awam sebegini tempat kebajikan seterusnya menjejaskan imej kerajaan. Kesilapan biasanya dibuat oleh pegawai terutama pegawai tertinggi tetapi tindakan tidak ada, cuma cakap kosong. Ini akan menambahkan lagi masalah serta mutu kerja mereka. Kenapa tidak buang sahaja macam proses di sektor swasta.

Satu masalah lagi ialah budaya kita terlalu bergantung kepada pegawai tinggi yang telah bersara wajib. Saya mencadangkan sepatutnya kita jangan menjadikan budaya ini kebiasaan kerana ramai lagi pegawai lain yang layak dan boleh bekerja. Kalau rekod perkhidmatan mereka cemerlang sebelum ini tidak salah kalau kita ambil mereka secara kontrak untuk beberapa tahun tetapi jangan pula yang tidak cemerlang pun kita ambil seperti pada masa sekarang.

Saya fikir budaya ini perlu diubah. Saya juga ingin mempersoalkan berkenaan dengan pelaksanaan sistem kenaikan pangkat seseorang kakitangan kerajaan yang saya nampak dan mendapat aduan yang agak pelik. Terdapat kaki tangan yang tidak *efficient* dan tidak pandai bekerja dapat naik pangkat dengan cepat sebab pandai bodek bos. Bos sudah menjadi suka dan terus *honeymoon* sama-sama tetapi pegawai yang buat kerja serta lebih *efficient* dan dia tidak pandai bodek bos jadi bos tidak suka maka susah pula untuk naik pangkat. Ini menunjukkan terdapat satu kroni dan boleh menjadikan pegawai-pegawai kerajaan jadi sistem huru-hara seterusnya menjejaskan motivasi kepada kakitangan yang benar-benar ingin kerja. Saya ingin bertanya kepada Yang Amat Berhormat Perdana Menteri dan Jabatan Perkhidmatan Awam, apakah tindakan untuk menyelesaikan isu kenaikan pangkat ini?

Tuan Yang di-Pertua, seterusnya pula saya ingin menyentuh berkenaan dengan kuasa yang ada pada menteri, kerajaan Barisan Nasional di negara kita. Kita dipilih oleh rakyat dan memberi kuasa kepada kita untuk membela dan mengubah nasib rakyat terutamanya dari segi membuat keputusan tentang pelaksanaan projek pembangunan dan pentadbiran di negara ini. Tetapi saya nampak kita sebagai wakil rakyat terutama sekali menteri tidak ada kuasa dan yang lebih berkuasa ialah pegawai tertinggi dalam sesebuah

kementerian, Ketua Setiausaha atau Ketua Jabatan dan pegawai sesebuah agensi kerajaan dalam membuat keputusan.

Terdapat apabila Yang Amat Berhormat Perdana Menteri atau Timbalan Perdana Menteri, Yang Berhormat Menteri serta Yang Berhormat Timbalan Menteri membuat keputusan pelaksanaan sesebuah projek atau polisi dan semuanya sudah boleh dilaksanakan tetapi tidak dapat dibuat ekoran pegawai-pegawai berkenaan tidak mengambil tindakan susulan ke atas keputusan itu atau tidak memberi komitmen dan kerjasama yang sepatutnya. Apabila sesuatu kesilapan berlaku sama ada berkaitan dengan pembangunan ataupun pentadbiran akhirnya orang politik khususnya wakil rakyat daripada Barisan Nasional akan dituduh. Rakyat akan marah kepada mereka ini jelas mencerminkan Yang Amat Berhormat Perdana Menteri, Yang Amat Berhormat Timbalan Perdana Menteri dan Yang Berhormat Menteri-Menteri dan keseluruhan kabinet adalah bertanggungjawab ke atas segala kesilapan yang timbul tetapi bukanlah pegawai-pegawai kerajaan.

Oleh itu Yang Berhormat Menteri perlu diberi kuasa sepenuhnya untuk membuat keputusan bukanlah oleh pegawai-pegawai kerajaan. *Responsibility must come with authority* dengan izin, sepatutnya kita orang politik terutama Menteri-menteri buat keputusan dalam apa-apa isu, pegawai-pegawai sepatutnya mengikut keputusan sahaja dan *implement* apa keputusan yang ada. Wakil rakyat yang dilantik oleh Yang Amat Berhormat Perdana Menteri menjadi Menteri atau Timbalan Menteri tentulah telah mendapat kepercayaan Yang Amat Berhormat Perdana Menteri untuk membenarkan jawatan itu maka kuasa melaksanakan pembangunan dan pentadbiran untuk negara ini perlu diberikan kepada mereka. Jika menteri tadi tidak dapat menunaikan tanggungjawab mereka dengan baik dan menyalahgunakan kuasa mereka sepatutnya mengundur diri dan beri peluang ini kepada orang lain. Ingatlah ramai dari kawan-kawan Barisan Nasional di Dewan yang mulia ini mampu bersedia untuk menggantikan mereka, contohnya macam Yang Berhormat daripada Seri Gading itu pun boleh...

**Beberapa ahli:** [Ketawa]

**Dato' Seri Tiong King Sing:** Tuan Yang di-Pertua, ya...dia ada tidur tadi tidak dengar.

**Beberapa ahli:** [Ketawa]

**Dato' Seri Tiong King Sing:** Tuan Yang di-Pertua, perancangan negara kita melalui EPU, Kementerian Kewangan dan Kementerian-kementerian lain di dalam membuat dasar untuk pembangunan negara. Seterusnya mereka akan membawa perancangan dan penilaian ini ke Dewan yang mulia ini untuk di bahas dan diluluskan. Tetapi sekarang selepas kelulusan daripada Dewan yang mulia ini, peruntukkan tadi tidak diberikan kepada kementerian-kementerian berkaitan. Semuanya diserahkan kepada Kementerian Kewangan. Ini menunjukkan ada satu kuasa *centralize* kita memohon kuasa ini *decentralize* kepada kementerian-kementerian yang lain. Sepatutnya apabila sudah diluluskan dalam dewan yang mulia ini, Kementerian Kewangan mesti menyiarkan peruntukan kepada kementerian-kementerian tersebut untuk menteri-menteri menjalankan tugas pelaksanaan projek yang telah diluluskan di dalam rancangan Malaysia. Contohnya baru-baru ini sebagaimana diumumkan dalam surat khabar oleh Menteri Kerja Raya beliau terpaksa menyamar kepada seorang bekas pegawai tertinggi di Kementerian Kewangan untuk meminta peruntukan dan kelulusan pelaksanaan projek pembangunan dalam rancangan Malaysia.

Kalau begini keadaannya ini ialah menunjukkan *double standard* dalam pentadbiran kerajaan. Ini menunjukkan Kementerian Kewangan tidak percaya kepada kementerian lain dan secara tidak langsung tidak percaya kepada menteri. Kalau Kementerian Kewangan tidak percaya kepada menteri, macam mana kita di Dewan yang mulia ini boleh percaya kepada Kementerian Kewangan. Kita mesti mahu sama-sama percaya dan bekerjasama barulah senang menjalankan tugas. Sedarkah Yang Amat Berhormat Perdana Menteri sistem yang kita gunakan sekarang amat mudah untuk memberi peluang kepada mana-mana pegawai di dalam mana-mana kementerian untuk menyeleweng. Kalau ada salah seorang pegawai yang gila kuasa ini, akan memberi

peluang kepada mereka untuk melakukan rasuah. Keadaan sebegini boleh menjejaskan pentadbiran dan pembangunan negara kita.

Dalam sistem kita sekarang juga belanjawan untuk Dewan yang mulia ini sepatutnya diuruskan oleh Dewan yang mulia sendiri tetapi kita sekarang terpaksa meminta dari peruntukan Kementerian Kewangan berkenaan. Kementerian mestilah faham Dewan yang mulia ini merupakan satu badan berkecuali bukan di bawah mana-mana kementerian. Saya harap semua orang boleh faham parlimen ini merupakan satu kuasa tertinggi dalam negara kita. Apakah ertinya perkataan yang mulia ini?

Oleh itu parlimen dan Ahli-ahli Parlimen mesti diberi penghormatan. Yang Amat Berhormat Perdana Menteri dan Yang Amat Berhormat Timbalan Perdana Menteri dan Yang Berhormat Menteri-menteri, Timbalan-timbalan Menteri dan Setiausaha-setiausaha Parlimen. Semua orang ini datang dari Parlimen. Apabila di luar parlimen janganlah lupa dari mana mereka datang ingatlah ahli-ahli parlimen dan jangan hanya hormat Speaker dan Timbalan Speaker semasa di bangunan Dewan dan apabila keluar dari Dewan lupa mereka, pandang sebelah mata pun tidak mahu. Saya harapkan semua menteri-menteri ini, Timbalan Menteri jangan lupa kalau ada apa-apa peruntukan ataupun bajet di minta di dewan yang mulia ini dan tahunan bajet atau rancangan kah, kalau tidak dapat diluluskan di Dewan ini, termasuklah ahli-ahli parlimen dan memanglah pegawai kerajaan dan kakitangan juga tidak dapat gaji...

**Datuk Haji Mohamad bin Haji Aziz [Sri Gading]:** *[Bangun]*

**Timbalan Yang di-Pertua [Datuk Dr. Yusof bin Yacob]:** Hendak bagi atau tidak, Yang Berhormat? Yang Berhormat bagi Sri Gading!

**Beberapa Ahli:** Bagilah, bagilah.

**Dato' Seri Tiong King Sing:** Bagi dia satu kali pula, tetapi cepatlah.

**Timbalan Yang di-Pertua [Datuk Dr. Yusof bin Yacob]:** Yang Berhormat bagi Seri Gading, sila.

**Datuk Haji Mohamad bin Haji Aziz:** Terima kasih, Tuan Yang di-Pertua, terima kasih, sahabat saya, Yang Berhormat bagi Bintulu. Saya mengikuti ucapan beliau yang dari awal hinggalah masa ini. Saya simpati dengan keadaan pegawai di Bintulu yang tidak menghormati orang ramai, surat tidak berjawab, kerja lambat dan sebagainya, tetapi yang saya nak bangun ini apabila dia sampai Ahli Parlimen pun sudah, kawan-kawan dia sendiri, tidak hormat Tuan Yang di-Pertua *[Disampuk]* *[Ketawa]* Yalah. Jadi, saya tidak berapa faham macam mana sebenarnya kedudukan itu. Jelaskan?

Saya memang hormat Tuan Yang di-Pertua, Timbalan Yang di-Pertua ini lagi saya hormat. *[Ketawa]* Jadi, saya minta Yang Berhormat bagi Bintulu menerangkan sedikit bagaimana, biar faham, biar kami faham. Yang Berhormat bagi Bintulu ini seorang yang amat hormat orang, dia suka orang hormat dia. Saya tidak mahu berucap, saya hanya minta penjelasan sahaja.

**Dato' Seri Tiong King Sing:** Saya ingat penjelasan ini kita bagi peluang kepada Menteri supaya dapat dijawab perkara ini. Boleh?

Contohnya, elaun Ahli-ahli Parlimen dan lain-lain, sekarang cek-cek perlu dikeluarkan dari Kementerian Kewangan. Adakah Kementerian Kewangan sedar bahawa prosedur yang ada sekarang tidak berapa sesuai? Sepatutnya peruntukan ini mesti diserahkan kepada Dewan yang mulia ini. Seperti yang saya katakan tadi, Dewan yang mulia ini sepatutnya adalah satu badan berkecuali dan mempunyai kuasa tertinggi yang terletak di bawah *Speaker* dan *House Committee*.

Jadi, merekalah sepatutnya berkuasa dan bertanggungjawab sebagaimana yang ternyata dalam Peraturan Mesyuarat 77(5) Dewan yang mulia ini, "*Jawatankuasa yang ditubuhkan oleh Dewan yang mulia ini berkuasa mengarah sesiapa orang termasuk pegawai-pegawai kerajaan di hadapannya dari semasa ke semasa*". Ini jelas membuktikan betapa penting dan tingginya kuasa Dewan yang mulia ini. Berilah penghormatan kepada Ahli-ahli Parlimen ini yang dipilih oleh rakyat.

Sepatutnya Kementerian Kewangan tidak perlu terlalu memantau pelaksanaan projek kerana tugas ini akan dilaksanakan oleh kementerian-kementerian terbabit dan laporan pelaksanaan projek pula akan dilaporkan kepada Kabinet. Dengan cara ini pelaksanaan projek dan pentadbiran akan menjadi lebih lancar apabila masing-masing ada bertanggungjawab. Kementerian Kewangan sepatutnya pula lebih memberi perhatian kepada tugas bagaimana cara untuk menambah pendapatan negara secara makro ekonomi, menarik lebih ramai pelabur dan meningkatkan pertumbuhan ekonomi, mempercayai pasaran saham dan lain-lain di negara kita.

Saya tahu sistem serta pendekatan ini telah lama diamalkan di negara kita, jadi saya menaruh kepercayaan penuh kepada Yang Amat Berhormat Perdana Menteri kita sekarang untuk mencari formula terbaik bagi memperbaiki semua ini. Dengan ini saya percaya Yang Amat Berhormat Perdana Menteri mampu mengubah semua ini seiring dengan aspirasi beliau ke arah negara Malaysia yang cemerlang, gemilang dan terbilang. Saya berharap apa yang saya bentangkan dalam Dewan yang mulia ini tidak berniat untuk membuat tuduhan terhadap sesiapa akan tetapi bertujuan untuk melihat sistem-sistem pentadbiran dalam kerajaan mesti dikaji dan tindakan perlu dilakukan untuk menjadi lebih efisien dan mesra rakyat. Saya yakin rakyat juga bersetuju dengan pendapat ini.

**Timbalan Yang di-Pertua [Datuk Dr. Yusof bin Yacob]:** Sudah habis Yang Berhormat?

**Dato' Seri Tiong King Sing:** Saya ingin ... *[Disampuk]* Lagi sikit, masalah mengenai diesel. Saya ingin menyentuh juga berkenaan isu kekurangan diesel di stesen-stesen minyak yang sudah berlarutan beberapa bulan yang lepas yang sehingga sekarang masih belum dapat diselesaikan lagi. Sekarang masalah kekurangan diesel ini bukan disebabkan negara kita kekurangan diesel tetapi disebabkan oleh penjualan diesel secara haram, paling serius di negeri Sarawak kemungkinan juga di Sabah. Saya fikir permintaan diesel di dua negeri ini adalah tinggi kerana banyak kenderaan menggunakan diesel, bukan sahaja kenderaan berat malahan juga kenderaan ringan.

Kita lihat perbezaan antara harga untuk kegunaan komersial dan industri amatlah besar. Sekarang harga komersial dan stesen minyak ialah 80 sen, manakala harga diesel untuk kegunaan industri pula lebih kurang RM1.70. Sedarkah pihak kementerian bahawa perbezaan hampir seratus peratus inilah yang sebenarnya menyebabkan kekurangan diesel di stesen-stesen minyak, akibat aktiviti penjualan diesel secara haram?

Saya ingin bertanya kepada Yang Berhormat Menteri dari Kementerian Perdagangan Dalam Negeri dan Hal Ehwal Pengguna, ke manakah perginya pegawai-pegawai Unit Penguatkuasaan yang menjalankan tugas untuk membanteras perkara ini? Untuk makluman, ada rakyat membuat aduan mengatakan ada sebahagian pegawai penguat kuasa yang terlibat dalam rasuah.

**Timbalan Yang di-Pertua [Datuk Dr. Yusof bin Yacob]:** Gulung, Yang Berhormat.

**Dato' Seri Tiong King Sing:** Contohnya, ada beberapa kali rakyat menelefon pihak penguat kuasa untuk mengadu ada stesen-stesen minyak yang menjalankan aktiviti-aktiviti ini, namun tidak nampak seorang pun pegawai penguat kuasa yang mengambil tindakan segera ke stesen minyak yang berkenaan. Apa yang terjadi, selepas penyeludup-penyeludup ini sudah lari barulah pihak penguat kuasa datang. Kenapa keadaan ini boleh berlaku?

Seterusnya, adakah pihak kementerian mempunyai statistik tentang penjualan diesel dari depot ke stesen-stesen minyak, begitu juga yang dijual kepada pengguna biasa? Apakah tindakan yang dibuat jika bekalan dari depot yang dihantar tidak sampai ke stesen-stesen minyak dan adakah kementerian membuat satu langkah dengan membatalkan terus lesen kepada stesen-stesen minyak yang terbabit? Oleh itu, apakah langkah-langkah yang sepatutnya diambil oleh pihak kementerian untuk mengatasi masalah penjualan haram ini dan sila kemukakan berapakah jumlah kes yang telah dibuat ke mahkamah setakat ini?

Saya berharap, Yang Berhormat Menteri Perdagangan Dalam Negeri dan Hal Ehwal Pengguna sedar kalau perkara ini tidak diselesaikan dengan segera maka rakyat akan marah kepada kepimpinan Barisan Nasional dan kepercayaan mereka kepada kita

akan hilang, malah perkara ini akan menjadi satu *political issue*. Saya berharap kalau boleh, Yang Berhormat Menteri juga akan turun padang, sama-sama untuk melihat sendiri dan menyasat keadaan ini. Dengan cara ini saya yakin negara kita akan dapat berkembang dengan lebih maju lagi. Saya, Yang Berhormat bagi Bintulu menyokong. Sekian, terima kasih.

**Timbalan Yang di-Pertua [Datuk Dr. Yusof bin Yacob]:** Yang Berhormat bagi Tanah Merah.

#### 12.40 tgh.

**Ir. Shaari bin Hassan [Tanah Merah]:** Bismillaahir Rahmaanir Rahiim. Assalamualaikum Warahmatullahi Wabarakatuh, Salam Sejahtera. Terima kasih saya ucapkan kepada Tuan Yang di-Pertua kerana memberi peluang kepada saya membahaskan usul titah ucapan Seri Paduka Baginda Yang di-Pertuan Agong. Saya juga ingin mengucapkan tahniah dan kepada Seri Paduka Baginda atas titah ucapan yang disampaikan pada 21 Mac 2005 sempena Pembukaan Penggal Kedua Parlimen Kesebelas. Perkara-perkara yang dititahkan oleh Seri Paduka Baginda adalah antaranya seperti peristiwa penting Tsunami, alam sekitar yang berlaku di dalam negara kita dan juga keprihatinan Kerajaan Seri Paduka Baginda terhadap dasar pembangunan negara, pertanian, sistem kewangan Islam, perkhidmatan awam negara, pembangunan, prasarana negara dan lain-lain lagi.

Saya juga ingin mengucapkan tahniah kepada Kerajaan Malaysia atas tindakan segera dan efisien membantu rakyat Malaysia khususnya semasa berlaku tsunami pada 26 Disember 2004. Saya mengambil kesempatan ini untuk merakamkan ucapan takziah dan simpati kepada keluarga-keluarga 86 mangsa yang terkorban dan keluarga yang mengalami kerosakan harta benda.

Tuan Yang di-Pertua, kerajaan begitu peka kepada apa yang berlaku dan secara pantas membantu mangsa yang terlibat sama ada bantuan kewangan, makanan, bantuan penempatan sementara, bantuan perubatan, dan lain-lain yang diperlukan oleh mangsa pada masa kejadian. Selain daripada itu, kerajaan turut membantu menyediakan penempatan baru kepada mereka yang kehilangan tempat tinggal dengan membina rumah-rumah mesra rakyat yang dilaksanakan oleh Syarikat Perumahan Negara Berhad (SPNB). Bantuan kepada nelayan dan petani terutamanya di sebelah pantai barat seperti Kuala Muda dan Langkawi juga diberi oleh kerajaan untuk membaiki bot-bot nelayan yang rosak dan memberi ganti rugi kepada petani-petani yang mana tanaman mereka musnah sama sekali akibat daripada kejadian tsunami.

Tuan Yang di-Pertua, selain daripada membantu rakyat Malaysia, kerajaan juga dengan cemerlang membantu negara-negara di rantau ini yang juga musnah akibat daripada Tsunami seperti Aceh, Sri Lanka dan lain-lain. Saya juga ingin mengambil kesempatan ini untuk merakamkan ucapan syabas dan tahniah dan terima kasih kepada rakyat Malaysia yang sudi menghulur derma dan sumbangan serta lain-lain bantuan yang diperlukan oleh mangsa sama ada dalam ataupun luar negara. Tidak lupa juga kita ucapkan syabas dan terima kasih kepada orang perseorangan dan badan-badan sukarela yang telah memberi sumbangan tenaga secara sukarela kepada mangsa-mangsa yang terlibat. Dengan kerjasama dan pertolongan yang diberikan oleh kerajaan, kita dapat merapatkan lagi hubungan dua hala antara negara-negara jiran seperti Indonesia dan lain-lain negara.

Tuan Yang di-Pertua, selain daripada kejadian Tsunami, kita juga menghadapi kejadian banjir yang berlaku di negeri-negeri terutamanya di pantai timur khususnya di negeri Kelantan pada sekitar 15 Disember 2004 juga. Ini merupakan bencana alam yang terburuk banjir bagi tempoh 15 tahun lepas. Banyak kerosakan harta benda, kemusnahan kawasan pertanian berlaku yang mengakibatkan penduduk pantai timur khususnya di Kelantan mempunyai masalah ataupun mengalami kerugian akibat daripada kejadian banjir.

Bencana ini pada kebiasaannya berlaku setiap tahun antara November hingga Januari. Seperti yang kita sedia maklum, banjir pada Disember 2004 adalah yang terburuk pernah berlaku di dalam negara kita. Oleh sebab pada masa yang hampir sama dengan

kejadian Tsunami berlaku, tumpuan kerajaan dan rakyat beralih kepada Tsunami dan isu banjir di pantai timur khususnya di negeri Kelantan juga ditenggelami oleh ombak Tsunami.

Tuan Yang di-Pertua, saya mengucapkan berbanyak terima kasih kepada Kerajaan Malaysia kerana dengan serta-merta mengumumkan...

**Timbalan Yang di-Pertua [Datuk Dr. Yusof bin Yacob]:** Jerai bangun Yang Berhormat. Kawasan dia ada kena Tsunami.

**Dato' Paduka Haji Badruddin bin Amiruddin:** Pasal ada *connection*.

**Ir. Shaari bin Hassan:** Sekejap saja, ya.

**Dato' Paduka Haji Badruddin bin Amiruddin:** Tsunami dengan ditelenggami. *[Ketawa]* Terima kasih Tuan Yang di-Pertua, terima kasih Tanah Merah, adakah Yang Berhormat bersetuju dengan pandangan saya, sudah banyak kali juga saya bercakap tetapi mungkin masyarakat tidak begitu prihatin dengan apa yang kita fikirkan. Kebanjiran ini berlaku kadang-kadang bukan disebabkan oleh kehendak alam tetapi disebabkan oleh kehendak manusia kerana mengingkari kehendak alam, manusia mencero bohi kehendak alam dan manusia merosaki alam-alam sekitar ini. Disebabkan oleh kerosakan dan ketidakprihatinan dan tidak kebertanggungjawaban, maka banjir-banjir ini berlaku.

Adakah Yang Berhormat bersetuju dengan saya supaya tindakan atau pun satu rang undang-undang yang cukup tegas digubal di dalam Dewan yang mulia ini supaya kita menyekat pencerobohan alam sekitar ini. Kadang-kadang manusia merogol alam sekitar sehinggakan sebuah bukit itu menjadi daratan. Jadi apakah Yang Berhormat bersetuju untuk menghentikan banjir-banjir kilat, banjir-banjir yang tak kilat ini, kerajaan atau manusia harus prihatin dengan kehendak alam dan juga kehendak Allah SWT.

**Ir. Shaari bin Hassan:** Terima Kasih sahabat saya Yang Berhormat bagi Jerai. Saya nampak soalan ataupun perkara yang ditimbulkan oleh sahabat saya tadi berkenaan dengan... mungkin kawasan semula jadi yang berada di sebelah hulu sungai yang mungkin telah di ceroboh ataupun telah ditebus guna oleh manusia ataupun kerajaan untuk membangunkan kawasan-kawasan berkenaan. Saya menyokonglah supaya kerajaan mewujudkan satu badan khas untuk menilai, memberi komen atau menguatkuasakan faktor-faktor alam semula jadi ini supaya tidak berlaku perkara-perkara yang tidak diingini kepada manusia ataupun penduduk di kawasan yang berkenaan. Saya akan sentuh berkenaan ini selepas ini.

Tuan Yang di-Pertua, saya mengucapkan berbanyak terima kasih kepada Kerajaan Malaysia kerana dengan serta-merta mengumumkan bantuan kepada keluarga yang terlibat dengan banjir di negeri-negeri di Pantai Timur sebanyak RM6 juta, yang mana RM2 juta bagi setiap negeri di Kelantan, Terengganu dan Pahang. Oleh sebab negeri Kelantan paling teruk terlibat dengan banjir lepas, maka peruntukan bantuan kewangan yang diluluskan tidak mencukupi untuk dibahagikan sebanyak RM500 kepada setiap keluarga sebagaimana yang telah diluluskan. Perkara ini masih belum selesai dan kerajaan perlulah mengambil perhatian serius untuk menyelesaikan perkara ini yang mana rakyat sedang tertanya-tanya bilakah bantuan ini akan diberikan sedangkan mangsa Tsunami sudah lama selesai diberi bantuan. Saya menyeru kepada kerajaan supaya perkara ini dapat diselesaikan secepat mungkin.

Tuan Yang di-Pertua, kerajaan melalui Kementerian Pertanian juga mengumumkan untuk memberi pampasan kepada kerosakan tanaman ataupun ternakan akibat daripada banjir lepas. Sehingga ke hari ini tidak nampak apa-apa bantuan yang diterima walaupun kejadian sudah melepasi tiga bulan. Saya menyeru kepada kementerian supaya mengambil sikap pro aktif untuk membantu mereka yang terlibat kerana rakyat sentiasa tertanya-tanya tentang perkara ini dan boleh menimbulkan masalah kepada rakyat dan juga wakil rakyat, amnya kepada kerajaan Malaysia.

Tuan Yang di-Pertua, oleh sebab kejadian banjir ini berlaku setiap tahun, saya mencadangkan kepada kerajaan supaya mengambil langkah-langkah untuk membina tambatan banjir di kawasan-kawasan yang sering ditelenggami air semasa banjir. Saya juga menyeru kepada Kerajaan Kelantan supaya mengawal secara serius pembalakan

yang tidak terkawal di negeri Kelantan yang sudah tentu boleh menambah buruk lagi banjir di negeri Kelantan untuk masa-masa hadapan.

Sebagaimana laporan akbar tempatan pada hari kita dapati perkara ini terbukti kerajaan negeri Kelantan tidak serius memikirkan kesan-kesan kepada alam sekitar dengan meluluskan kawasan-kawasan pembalakan seperti di Lojing, Gua Musang dan juga Blok Soko kawasan saya di Tanah Merah di mana pembalakan ini dilaksanakan secara tidak terkawal menyebabkan hakisan berlaku di kawasan tadahan hujan sebagaimana kata sahabat kita tadi kawasan yang sepatutnya dijaga dan menyebabkan lumpur-lumpur daripada hakisan ini mengalir ke dalam sungai yang berdekatan dan menyebabkan sungai cetek dan sebagai bukti semasa banjir pada tahun lepas membawa lumpur-lumpur dari hakisan ini ke dalam bandar Kota Bharu di mana kita lihat bandar tersebut ditenggelami oleh lumpur dan di antara yang terburuk dalam tempoh 20 tahun. Tahniah saya ucapkan kepada Kementerian Sumber Asli dan Alam Sekitar yang cekap membongkar kegiatan pembalakan ini.

**Timbalan Yang di-Pertua [Datuk Dr. Yusof bin Yacob]:** Yang Berhormat Tangga Batu bangun. Hendak beri laluan?

**Ir. Shaari bin Hassan:** Banyakkah atau sedikit? Sikit sahaja ya. Okey.

**Timbalan Yang di-Pertua [Datuk Dr. Yusof bin Yacob]:** Sila.

**Tuan Haji Idris bin Haji Haron:** Terima kasih Tuan Yang di-Pertua dan Yang Berhormat Tanah Merah. Saya rasa pelek jugalah oleh kerana negeri Kelantan ini tidak sunyi daripada masalah banjir pada setiap tahun dan dalam masa yang sama Kerajaan Negeri Kelantan seolah-olah tidak memandang isu ini sebagai suatu isu yang besar. Apabila Yang Berhormat Tanah Merah menyebut kegiatan pembalakan di negeri Kelantan ini tidak terkawal tetapi telah diluluskan oleh kerajaan negeri. Jadi, Yang Berhormat selaku wakil kepada rakyat di Tanah Merah, adakah Yang Berhormat menyuarakan suara rakyat ini ke peringkat kerajaan Negeri? Kalau sudah apakah tindakan ataupun reaksi kerajaan negeri terhadap suara yang dibangkitkan oleh Yang Berhormat?. Terima kasih Yang Berhormat bagi Tanah Merah.

**Ir. Shaari bin Hassan:** Terima kasih sahabat 'hambo' Yang Berhormat bagi Tangga Batu. *[Ketawa]* Saya selaku Wakil Rakyat sudah pasti menerima aduan-aduan secara langsung ataupun tidak langsung daripada rakyat kerana kerajaan negeri hari ini bukan sahaja mengambil balak-balak ini di kawasan hutan simpan, mereka juga mempunyai usaha untuk meluluskan kawasan-kawasan balak ini di kawasan yang berhampiran dengan kawasan penempatan penduduk dan ini sudah pasti mendapat tentangan daripada rakyat ataupun penduduk kawasan sekitar.

Pada tahun lepas saya menerima aduan daripada penduduk dan penduduk yang seramai lebih kurang 500 orang berarak untuk berpeket supaya perancangan supaya pihak kerajaan mengambil balak di kawasan yang berhampiran kawasan yang diduduki oleh rakyat hendak diluluskan kepada satu kontraktor balak. Oleh kerana bantahan daripada penduduk ini Kerajaan PAS dengan serta-merta membatalkan kelulusan yang telah diberikan.

Saya teruskan. Sebagaimana yang saya katakan tadi...

**Timbalan Yang di-Pertua [Datuk Dr. Yusof bin Yacob]:** Yang Berhormat Pasir Mas bangun Yang Berhormat. Hendak beri laluan?

**Ir. Shaari bin Hassan:** Saya tidak ada masa yang cukup, saya kena habiskan sebelum jam 1.00 tengah hari.

**Tuan Haji Ismail bin Noh:** Sedikit, sedikit sahaja.

**Timbalan Yang di-Pertua [Datuk Dr. Yusof bin Yacob]:** Dia tidak bagi Yang Berhormat.

**Ir. Shaari bin Hassan:** Sebelum pukul 1.00 saya kena habiskan.

**Tuan Haji Ismail bin Noh:** Saya minta sedikit sahaja.

**Ir. Shaari bin Hassan:** kerana saya tahu perkara ini amat penting.

**Timbalan Yang di-Pertua [Datuk Dr. Yusof bin Yacob]:** Yang Berhormat bagikah atau tidak? Dia tidak bagi Yang Berhormat.

**Ir. Shaari bin Hassan:** Kementerian begitu prihatin dengan mendedahkan kegiatan yang menceroboh alam sekitar yang boleh mengakibatkan kemusnahan yang besar kepada hutan di negeri Kelantan.

**Tuan Haji Ismail bin Noh:** *[Menyampuk]*

**Timbalan Yang di-Pertua [Datuk Dr. Yusof bin Yacob]:** Dia tidak bagi Yang Berhormat. Sila duduk.

**Tuan Haji Ismail bin Noh:** Bagilah sikit.

**Ir. Shaari bin Hassan:** Dengan itu kita dapat lihat rakyat semua dapat lihat hari ini bahawa satu gondolan bukit di kawasan Lojing telah dimusnahkan oleh pembalok ataupun mereka yang telah diluluskan lesen membalak di kawasan berkenaan.

**Tuan Haji Ismail bin Noh:** Kalau tak bagi...

**Timbalan Yang di-Pertua [Datuk Dr. Yusof bin Yacob]:** Yang Berhormat, dia tak bagi laluan.

**Ir. Shaari bin Hassan:** Kawasan ini terletak di kawasan setinggi 1500 meter daripada paras laut. Ini merupakan kawasan yang sejuk, kawasan peranginan, kawasan yang perlu dipelihara dan ini merupakan juga kawasan tadahan hujan yang sangat penting bagi negeri Kelantan. Sekiranya kawasan ini dimusnahkan sudah pasti kemusnahan yang besar akan berlaku kepada sistem pengairan sungai di negeri Kelantan dan ini menyebabkan rakyat Kelantan merana kerana mereka sudah pasti tidak mendapat bekalan air yang sempurna dan juga boleh mengakibatkan kejadian banjir seperti yang berlaku pada tahun 2004 lepas.

**Tuan Haji Ismail bin Noh:** *[Bangun]*

**Tuan Haji Idris bin Haji Haron:** *[Bangun]*

**Timbalan Yang di-Pertua [Datuk Dr. Yusof bin Yacob]:** Dua-dua bangun Yang Berhormat, hendak beri jalan? Dia tak bagi, Yang Berhormat. Sila duduk Yang Berhormat, dia tak bagi.

**Ir. Shaari bin Hassan:** Tuan Yang di-Pertua, di kawasan Sokor, Tanah Merah telah diluluskan oleh kerajaan Negeri sebagai kawasan lombong emas. Sabar dahulu kerana saya kena terangkan dahulu barulah saya beri laluan. Telah diberi kelulusan satu kawasan untuk lombong emas kepada 10 lesen atau pun kontraktor untuk melombong, tetapi apa yang didapati bukan lombong emas menjadi sasaran utama tetapi lombong balak, mungkin jolokan mengatakan lombong emas hijau. Yang menjadi kegiatan utama di kawasan ini ialah lombong balak. Lombong emas hanya beroperasi di tempat yang sedia ada sahaja iaitu seperti gambar yang kita tengok di dalam akhbar Utusan Malaysia pada hari ini.

Saya menyeru kepada kerajaan negeri Kelantan supaya membuat siasatan terhadap perkara ini dan mengambil tindakan tegas untuk memberhentikan perbuatan yang boleh merosakkan alam sekitar ini. Tambahan pula telah mengakibatkan kejadian banjir yang buruk di negeri Kelantan pada tahun lepas khususnya.

Tuan Yang di-Pertua, selain daripada itu saya ingin menyentuh mengenai Rancangan Malaysia Kesembilan. Rancangan Malaysia Kesembilan adalah merupakan rancangan pembangunan yang sangat penting pada permulaan abad ke 21 kerana negara kita juga akan mencapai wawasan negara maju bagi tahun 2020. Titah Seri Paduka Baginda juga menyeru supaya pembangunan diagih sama rata kepada seluruh negeri di Malaysia dan kita tahu Kelantan adalah satu negeri yang termundur di Semenanjung Malaysia, ketinggalan dalam arus pembangunan negara dari segi infrastruktur dan prasarana rakyat. Negeri Kelantan mempunyai sumber asas yang banyak.

**Tuan Haji Ismail bin Noh:** *[Bangun]*

**Tuan Haji Idris bin Haji Haron:** *[Bangun]*

**Timbalan Yang di-Pertua [Datuk Dr. Yusof bin Yacob]:** Yang Berhormat, ada dua orang Yang Berhormat yang bangun, hendak beri laluan?

**Ir. Shaari bin Hassan:** Saya tidak ada masa Tuan Yang di-Pertua, saya terpaksa teruskan kerana ramai lagi sahabat kita hendak bercakap.

**Timbalan Yang di-Pertua [Datuk Dr. Yusof bin Yacob]:** Dia tidak beri laluan Yang Berhormat. Sila duduk.

**Ir. Shaari bin Hassan:** Dan boleh diperkembangkan seperti bidang pertanian dan industri asas tani, makanan halal dan lain industri yang boleh meningkatkan taraf ekonomi serta memberi peluang pekerjaan kepada rakyat Kelantan yang mempunyai 95% daripada orang Melayu daripada 1.5 juta ringgit rakyat negeri Kelantan.

Tuan Yang di-Pertua, isu yang hangat diperkatakan sekarang ini seperti pembinaan LPT kenapa tidak diteruskan di negeri Kelantan? Itu persoalan, sedangkan kita tahu LPT ini boleh menjadi faktor pemangkin utama sebagai untuk membangunkan negeri Kelantan supaya jurang pembangunan dengan negeri-negeri di Pantai Barat dan sebagainya dapat dirapatkan. Dengan adanya jalinan hubungan lebu raya yang lengkap dan selesa serta menghubungkan Kelantan dengan ibu negara sudah pasti ramai pelabur akan menoleh ke Kelantan yang mempunyai tenaga pekerja dan industri yang dicadangkan di negeri Kelantan amat memberangsangkan.

Selain daripada itu, pasaran dan kemudahan pelabuhan di Pantai Barat dapat dihubungkan dalam jangka masa yang singkat dan barangan industri dari Kelantan dapat dieksport ke luar negara dengan cepat dan mudah. Di samping itu, peluang pekerjaan akan wujud dan ini akan mengurangkan penghijrahan rakyat khususnya tenaga muda ke negeri-negeri lain.

**Timbalan Yang di-Pertua [Datuk Dr. Yusof bin Yacob]:** Yang Berhormat Tanah Merah, hendak sambung atau hendak habiskan sekarang.

**Ir. Shaari bin Hassan:** Saya hendak sambung.

**Timbalan Yang di-Pertua [Datuk Dr. Yusof bin Yacob]:** Baiklah. Ahli-ahli Yang Berhormat, waktu sekarang jam 1.00 tengah hari. Dewan yang mulai ini ditangguhkan sehingga jam 2.30 petang.

***Mesyuarat ditempohkan pada pukul 1.00 petang.***

***Mesyuarat disambung semula pada pukul 2.30 petang.***

[Tuan Yang di-Pertua *mempengerusikan Mesyuarat*]

**Tuan Yang di-Pertua:** Ahli-ahli Yang Berhormat, mesyuarat disambung semula. Diminta Yang Berhormat Tanah Merah untuk menyambung ucapan.

**2.33 ptg.**

**Ir. Shaari bin Hassan [Tanah Merah]:** Terima kasih Tuan Yang di-Pertua. Saya juga menyokong dasar kerajaan pada Budget 2005 lepas, yang telah membuat keputusan untuk mengambil tindakan, untuk mengurangkan kesesakan jalan raya di Kuala Lumpur dengan mempertingkatkan kecekapan pengangkutan awam di Lembah Kelang, dan juga menyusun sistem pengangkutan awam di bawah satu badan sebagai peneraju kepada pengangkutan awam iaitu INSPAK iaitu Jawatankuasa Pemandu Integrasi dan Penyusunan Semula Sistem Pengangkutan Awam.

SPNB iaitu Syarikat Prasarana Negara Berhad juga diberi peranan untuk membangun prasarana pengangkutan awam, supaya kemudahan untuk pengguna pengangkutan awam diperlengkapkan lagi dari segi infrastruktur pengangkutan awam dan lain-lain kemudahan kepada pengguna. Apa yang kita lihat, pengangkutan bas dan LRT, telah disatukan daripada beberapa operator di Kuala Lumpur ini seperti Intrakota, City Liner Bus dan Star LRT, juga Putra LRT disatukan di bawah satu syarikat yang dinamakan Rapid

KL Sdn. Bhd, ataupun Rangkaian Pengangkutan Integrasi Deras Sdn. Bhd. Sistem satu tiket untuk semua perkhidmatan pengangkutan awam ini juga, disusun ataupun disatukan supaya perkhidmatan bersepadu dapat diwujudkan sebagaimana yang dimaklumkan oleh Setiausaha Parlimen Kementerian Kewangan pagi tadi.

Tuan Yang di-Pertua, saya yakin dengan penyusunan semula pengangkutan awam di Kuala Lumpur ini sudah pasti dapat mengurangkan kesesakan jalan raya di Kuala Lumpur ataupun di Lembah Kelang, dan dapat menggalakkan orang awam menggunakan pengangkutan awam khususnya di Bandaraya Kuala Lumpur yang mengikut statistiknya, pengguna pengangkutan awam telah berkurang daripada 34% pada tahun 1985 kepada 16% pada tahun 2004 lepas. Dan pengguna kenderaan persendirian pula telah meningkat daripada 47% pada tahun 1985 kepada 71% pada tahun 2004.

Saya percaya, setelah beroperasinya Rapid KL Sdn. Bhd. ini, pada November tahun 2004 lepas, kadar penggunaan pengangkutan awam telah dapat dipertingkatkan, dan kadar penggunaan kenderaan persendirian dapat dikurangkan dan ini dapat mengelak kesesakan di Bandaraya Kuala Lumpur.

**Tuan Lau Yeng Peng:** *[Bangun]*

**Ir. Shaari bin Hassan:** Saya mengesyorkan juga kepada Kerajaan Malaysia, supaya dapat menubuhkan Suruhanjaya Pengangkutan Negara sebagai agensi mengawal selia pengangkutan dan infrastruktur penting di dalam negara dan sekali gus dapat mempertingkatkan lagi rangkaian pengangkutan negara kita, iaitu seperti pengangkutan darat, pengangkutan udara dan laut serta memastikan infrastruktur jalan raya di negara kita ini berada dalam keadaan yang baik. Tuan Yang di-Pertua, Titah Seri Paduka Baginda juga menyentuh mengenai...

**Tuan Yang di-Pertua:** Yang Berhormat. Puchong.

**Ir. Shaari bin Hassan:** Sekejap ya.

**Tuan Lau Yeng Peng:** Terima kasih Tuan Yang di-Pertua dan juga terima kasih Yang Berhormat daripada Tanah Merah. Saya setuju dengan apa yang dicadangkan oleh Yang Berhormat daripada Tanah Merah, bahawa kerajaan ini mesti menyusun rancangan yang menyeluruh untuk mengurangkan kesesakan di jalan raya. Saya masih ingat, sekarang ini kerajaan melalui Proton dan juga Perodua kita menggalakkan ramai lagi orang Malaysia membeli kereta terutama di bandar. Dan ini telah menyebabkan atau sedikit-sebanyak telah menambahkan lagi jumlah kenderaan di dalam bandar seperti di Kuala Lumpur dan juga di Petaling Jaya. Dan juga saya rasa ada kempen untuk orang kata apa, *Car Pool* yang dulu, tapi pada pandangan saya itu satu kempen yang telah gagal. Apakah jaminan Yang Berhormat, yang sekarang RAPID ini dapat mengurangkan kesesakan ataupun masalah ini dan sekurang-kurangnya kadar kesesakan di Bandaraya di Kuala Lumpur ini. Apakah pandangan Yang Berhormat? Terima kasih.

**Ir. Shaari bin Hassan:** Terima kasih sahabat saya dari Puchong. Kita tahu bahawa ibu negara kita merupakan salah satu bandar raya yang sesak dengan kenderaan dan berbagai-bagai cara kerajaan kita telah pun mengambil pendekatan supaya kesesakan di jalan raya khususnya di Kuala Lumpur ini dapat dikurangkan. Makna, dengan pembinaan lebuh raya-lebuh raya tertentu, dan juga mempertingkatkan jalan-jalan sedia ada sudah pasti dapat mengimbangkan dengan pertambahan kenderaan di ibu kota.

Dan begitu juga dengan wujudnya sistem pengangkutan awam secara bersepadu, yang di bawah kelolaan Rapid KL Sdn. Bhd. ini, kita pasti satu langkah untuk menarik minat pengguna pengangkutan awam, supaya daripada kenderaan persendirian untuk pergi bekerja lebih baik menggunakan pengangkutan awam kerana kecekapan. Di mana kaedah yang diwujudkan oleh kerajaan ini untuk memberi lebih kecekapan, di mana dengan menjimatkan masa perjalanan ke tempat kerja, ataupun destinasi tertentu, ataupun masa menunggu iaitu daripada sebelum ini tidak tahu sejam ataupun dua jam kepada lima belas minit, yang telah ditetapkan di bawah perkhidmatan Rapid KL Sdn. Bhd. ini.

Saya percaya, dengan pendekatan yang dibuat oleh Rapid KL ini sudah pasti, kadar ataupun kadar pengguna pengangkutan awam di Kuala Lumpur ini bukannya menurun, akan meningkat dari masa ke semasa dan mencapai satu tahap yang boleh

dikatakan sesuai untuk mengurangkan kesesakan jalan raya. Dan sudah pasti, daripada tahap kecekapan yang tinggi, penggunaan pengangkutan awam ini sudah pasti pengguna kenderaan persendirian juga tertarik, dan sudah pasti dapat mengurangkan kenderaan di atas jalan raya terutamanya pada hari bekerja.

Saya rasa sudah menjawab soalan yang dikemukakan.

Tuan Yang di-Pertua, titah Seri Paduka Baginda juga menyentuh mengenai kemalangan jalan raya yang sering berlaku di negara ini di mana kadar kematian jalan raya pada tahun 2003 ialah 4.9 orang bagi setiap 10,000 kenderaan berdaftar.

Saya mengesyorkan kepada kerajaan melalui kementerian yang bertanggungjawab seperti Kementerian Kerja Raya mengambil tindakan yang serius dengan memperelokkan kawasan-kawasan kemalangan ataupun *black spot* dengan izin bagi Rancangan Malaysia Kesembilan supaya kadar kematian jalan raya dapat dikurangkan kepada dua kematian sebagaimana yang disyorkan bagi setiap 10,000 kenderaan berdaftar dapat dicapai pada tahun 2020 nanti, insya-Allah.

Tuan Yang di-Pertua, saya juga turut menyokong Program Latihan Khidmat Negara (PLKN) yang dianjurkan oleh kerajaan sejak tahun lepas dan melibatkan seramai 69,000 orang peserta dan meningkat kepada 85,000 peserta pada tahun 2005 dengan menggunakan kemudahan 71 kem sebagaimana yang dilaporkan dan saya yakin dengan usaha kerajaan untuk menerapkan nilai nasional dan jati diri kepada semua bangsa dalam negara kita ini, sudah pasti generasi yang bakal memimpin negara kita dan rakyat pada masa hadapan akan lebih cemerlang malah dapat bersaing dalam dunia global pada hari ini. "Kalau tidak dipecahkan royong, manakan dapat sagunya".

Dengan ini saya mengesyorkan kepada kerajaan supaya rakyat yang mencapai umur yang telah ditetapkan ini semuanya dapat diberi peluang untuk mengikuti latihan tersebut agar latihan ini dapat diberi kepada semua rakyat. Saya yakin dengan penyertaan semua generasi pelapis ini sudah tentu dapat melahirkan pewaris yang berkualiti untuk meneruskan kecemerlangan di dalam negara pada masa hadapan.

Tuan Yang di-Pertua, saya gulungkan ucapan saya. Apa yang kita lihat hari ini satu perkara yang penting berlaku yang mana kita dapat lihat satu pembongkaran tentang pembalakan di negeri Kelantan khususnya. Saya pasti hari ini rakyat terkejut, rakyat negeri Kelantan khususnya terkejut dengan laporan akhbar Utusan Malaysia yang daripada muka hadapan lagi yang menunjukkan kawasan hutan ataupun kawasan tadahan air di kawasan Gua Musang dan juga Tanah Merah telah di ceroboh dan mengakibatkan kejadian-kejadian seperti banjir dan sebagainya

**Tuan Haji Md. Alwi bin Che Ahmad [Ketereh]:** [Bangun]

**Tuan Haji Idris bin Haji Haron [Tangga Batu]:** [Bangun]

**Tuan Yang di-Pertua:** Yang Berhormat.

**Ir. Shaari bin Hassan:** Sila.

**Tuan Yang di-Pertua:** Yang mana satu.

**Tuan Haji Idris bin Haji Haron:** Tangga Batu.

**Ir. Shaari bin Hassan:** Tangga Batu dahulu.

**Tuan Haji Idris bin Haji Haron:** Dia bagi orang Tangga Batu, tidak bagi Ketereh.

Terima kasih Tuan Yang di-Pertua, terima kasih Yang Berhormat Tanah Merah. Sebenarnya saya ingin bertanyakan soalan ini di bahagian pagi tadi tetapi Yang Berhormat tidak membenarkan. Nampaknya bila Yang Berhormat sebut balik tentang kelulusan pembalakan di negeri Kelantan dan dilaksanakan secara tidak terkawal ini membuka ruang untuk saya bertanyakan satu soalan.

Yang Berhormat ada menyebut tentang emas hijau seperti warna bendera Kerajaan Negeri Kelantanlah dan apabila saya fahamkan yang emas hijau ini adalah merupakan kelulusan pembalakan yang diluluskan di peringkat jabatan apabila Kerajaan Negeri Kelantan meluluskan permohonan untuk melombong emas maka jadilah istilah

emas hijau. Emas hijau itu bukan emas berwarna kuning tetapi balak-balak yang dibawa keluar oleh peneroka-peneroka ini.

Yang Berhormat Tanah Merah, apa yang dapat saya lihat di sini adalah suatu kaedah yang biasanya disebut oleh pemimpin negeri Kelantan dan dituding jari kepada kerajaan kita iaitu matlamat menghalalkan cara ataupun dengan lain-lain perkataan pada hemat saya, Kerajaan Negeri Kelantan tidak menunjukkan ketelusan di dalam proses kelulusan apa juga projek yang melibatkan perlombongan ataupun pembalakan ini dan dengan lain perkataan dengan mudahnya ada kemungkinan elemen rasuah di kalangan Kerajaan Negeri Kelantan.

Adakah Yang Berhormat boleh ataupun mencadangkan supaya pihak BPR selaras dengan Pelan Integriti Nasional yang di sebut oleh Perdana Menteri kita untuk menyiasat skandal yang sedang berlaku di dalam Kerajaan Negeri Kelantan pada hari ini, silakan Yang Berhormat.

**Ir. Shaari bin Hassan:** Terima kasih sahabat saya daripada Tangga Batu,

**Tuan Yang di-Pertua:** Sila jawab dan terus gulung ya?

**Ir. Shaari bin Hassan:** Ini yang menjadi isu kepada kita yang mana kita tahu bahawa isu pembalakan ini merupakan satu-satu yang menarik perhatian kepada semua kepada seluruh negara kita dan sudah pasti Jabatan Perhutanan Malaysia mempunyai syarat-syarat tertentu di dalam kelulusan untuk membalak.

Kita tahu bahawa mungkin ada halangan bagi Kerajaan Negeri untuk meluluskan kawasan balak tetapi oleh kerana untuk menghalalkan cara mungkin berlakunya kebenaran ataupun kelulusan kepada pelesen-pelesen untuk melombong emas. Tetapi apa yang dilaporkan dalam akhbar pada hari ini kegiatan melombong emas ini tidak diberi keutamaan bahkan pembalakan merupakan aktiviti utama kepada kawasan-kawasan yang telah diluluskan.

Dari segi ini rakyat tertanya-tanya kenapa perkara ini berlaku dan siapakah yang mendapat untung daripada kelulusan yang diberi? Kita tahu bahawa rakyat Kelantan merasa kecewa dengan keadaan ini berlaku kerana yang menerima akibat daripada banjir dan hakisan kawasan berkenaan menyebabkan sungai menjadi cetek dan berlakunya paras air yang tinggi semasa banjir ialah rakyat keseluruhan. Saya cukup kesal dengan perkara ini berlaku dan kita lihat pada banjir yang lepas di negeri Kelantan khususnya kawasan saya di Tanah Merah cukup teruk bencana banjir berlaku mengakibatkan kerugian berjuta-juta ringgit.

**Tuan Haji Md. Alwi bin Che Ahmad:** [Bangun]

**Tuan Yang di-Pertua:** Yang Berhormat, Ketereh

**Ir. Shaari bin Hassan:** Ok, silakan Ketereh.

**Tuan Haji Md. Alwi bin Che Ahmad:** Terima kasih sahabat saya Tanah Merah. Saya sebenarnya tidak hendak bangun tetapi saya terpanggil kerana yang mengambil gambar itu ialah saya. Semalam saya bersama dengan beberapa pegawai dan wakil dari Kementerian Alam Sekitar, Yang Berhormat Tuan Sazmi bin Miah menaiki helikopter daripada Kuala Lumpur melalui Lojing dan terus ke Tanah Merah.

Apa yang berlaku ialah memang gambar itu hanya sekeping, sebenarnya ada banyak lagi, Utusan Malaysia hanya memilih gambar itu. Seluruh kawasan Lojing sebenarnya sekarang ini sudah, maaf cakaplah sudah jarang dan botak di seluruh kawasan Lojing dan yang di sebut oleh Yang Berhormat Tangga Batu sebagai emas hijau sebenarnya mereka mengikut undang-undang tetapi ada *loophole* dalam undang-undang kita

Undang-undang kita membenarkan tanah-tanah diagihkan untuk melombong dan di Kelantan banyak emas, maka diagihkan tanah ini kepada plot yang kecil-kecil antara 750 hektar hingga 1000 hektar diagihkan kepada kawan-kawan dan kroni-kroni mereka, kemudian mereka akan masuk alasannya untuk melombong tetapi sebenarnya mereka

tidak melombong. Dia tidak buat pun palung, apa yang mereka buat ialah mereka tebang balak kemudian bila habis dan ditinggalkan begitu sahaja.

Jabatan Perhutanan sekarang ini ada masalah dengan Kerajaan Negeri kerana Jabatan Perhutanan bila melihat keadaan macam ini Jabatan Perhutanan mahu supaya balak ini di tender terlebih dahulu baru melombong. Tetapi setakat ini sudah berpuluh syarikat, dalam kawasan Yang Berhormat Tanah Merah sahaja yang kita lihat semalam di Kampung Soko dan dua hingga tiga tempat yang lain lombongnya tiada tetapi kayu balaknya bertimbun-timbun.

Di Lojing, tuan-tuan boleh tengok, tuan-tuan boleh pergi. Kalau ada pemimpin PAS di sini, saya boleh tunjuk video *tape*. Saya ambil video *tape one hour* semalam untuk menunjukkan kepada rakyat Kelantan bahawa kerajaan Kelantan telah menyalahgunakan pengagihan balak ini dan telah tidak mengikut peraturan yang sepatutnya, sebab helikopter yang saya naik itu *is a bell helicopter*, dan saya tahulah rupanya helikopter *ride is not interesting...*, bukannya menyeronokkan, sebenarnya dia menakutkan.

Saya naik *heightnya* sampai 5000 kaki dan bukit yang sama tinggi dengan helikopter ketinggiannya itu semuanya sudah habis kayu balak. Sedangkan dalam peraturan membalak, tidak boleh menebang lebih daripada 3000 kali. Itu peraturan dalam perhutanan, tetapi mereka tidak peduli. Saya rasa tidak ada pengawasan, tidak ada pengawalan dan mungkin ini disengajakan. Itu sahaja, Yang Berhormat. Terima kasih.

**Ir. Shaari bin Hassan:** Terima kasih, sahabat saya dari Ketereh. Ini jelas bahawa sahabat kita dari Ketereh melihat sendiri walaupun saya tidak dapat mengikutinya bersama-sama beliau semalam, tetapi saya mengikutinya dari bawah kerana saya berada di Tanah Merah pada masa itu. Kita lihat, jelas bahawa satu kesilapan besar ataupun satu kesalahan besar telah dibuat oleh Kerajaan Negeri Kelantan. Kita tengok hari ini pun, mana wakil PAS ada di dalam Parlimen kerana isu ini adalah isu benar dan rakyat hari ini sudah sedar bahawa apa yang berlaku kepada Kerajaan Negeri Kelantan, kerana kita tahu bahawa kerajaan sudah mengalih tumpuan daripada membangun rakyat Kelantan, dia cuba untuk membangun ataupun untuk memperkuatkan pihak-pihak tertentu dan juga parti beliau. Yang Berhormat bagi Kuala Krai pun hendak bercakap, Tuan Yang di-Pertua.

**Tuan Yang di-Pertua:** Akhir sekali ya! Yang akhir.

**Tuan Mohamed Razali bin Che Mamat:** Terima kasih, Tuan Yang di-Pertua dan terima kasih kepada Yang Berhormat bagi Tanah Merah. Saya, petang kelmarin menghala ke Dewan dalam sidang kita pada hari ini, tetapi terserempak dengan ramai lori-lori balak yang tidak dapat berjalan. [*Ketawa*] Banyak, banyak lori-lori balak. Terima kasih.

**Dato' Paduka Haji Badruddin bin Amiruddin:** Hah! Banyak.

**Tuan Mohamed Razali bin Che Mamat:** Banyak lori-lori balak yang muatannya begitu tinggi sekali dan setengah itu tidak seperti balak kerana kecil-kecil dan kata orang Kelantan sekarang ini balak diukur dengan kopiah. Kalau sudah sama besar dengan kopiah, maka itu boleh ditebang. Apa yang menghairankan saya, apabila hendak berjalan, lorinya semua berhenti. Saya tanya-tanya, "*Kenapa berhenti?*" Dia kata, "*Tidak boleh lalu sebab polis tangkap. Apabila sudah jauh tengah malam, barulah boleh jalan hingga jam satu, dua.*". Adakah perkara ini betul, Yang Berhormat bagi Tanah Merah? Saya minta penjelasan.

**Ir. Shaari bin Hassan:** Terima kasih, sahabat saya Yang Berhormat bagi Kuala Krai. Kalau sahabat kita sudah lihat lori itu ramai, dia kata [*Ketawa*], lori ramai, bukan banyak, jadi itu jelas bahawa pengeluaran balak yang tidak terkawal dan malah dia tahu bahawa ada satu peninjauan daripada kerajaan ataupun pihak kementerian semalam, sudah pasti dia mengambil sikap untuk cepat-cepat keluarkan balak ini yang telah dipotong, kerana dia takut apabila berlakunya pemberhentian ataupun tahanan daripada pihak berkuasa, sudah pasti balak ini tidak dapat dikeluarkan.

**Tuan Yang di-Pertua:** Baik, Yang Berhormat, sila habiskan.

**Ir. Shaari bin Hassan:** Saya percaya bahawa kejadian seumpama ini, saya mengharapkan sangatlah Kerajaan Malaysia supaya melihat ataupun membuat siasatan

kepada apa yang berlaku di negeri Kelantan ini. Kita minta badan-badan tertentu, seperti Badan Pencegah Rasuah dan sebagainya supaya mengambil tindakan supaya gejala-gejala sebegini tidak berlaku lagi dan ini mengakibatkan rakyat Kelantan akan sengsara. Kita tahu bahawa negeri Kelantan ini satu negeri yang paling mundur, tetapi apabila berlakunya tindakan kerajaan yang begitu rakus untuk mengaut hasil-hasil bumi negeri ini, sudah pasti banyak lagi perkara buruk akan berlaku.

**Datuk Haji Mohamed bin Haji Aziz:** *[Bangun]*

**Ir. Shaari b Hassan:** Silakan.

**Tuan Yang di-Pertua:** Yang Berhormat hendak bagikah?

**Ir. Shaari b Hassan:** Silakan.

**Datuk Haji Mohamed bin Haji Aziz:** Terima kasih, Tuan Yang di-Pertua, terima kasih, Yang Berhormat bagi Tanah Merah. Boleh atau tidak Yang Berhormat bagi Tanah Merah simpulkan bahawa janji-janji kerajaan PAS hendak memajukan Kelantan hendak memakmurkan rakyat adalah pembohong. Yang maju, yang makmur ialah wakil-wakil rakyat PAS Kelantan. Cuba tolong...

**Ir. Shaari bin Hassan:** Ini perkara senang sekali kerana rakyat sudah faham. Pagi ini rakyat sudah terdedah dengan perkara ini, walhal sebelum ini pun rakyat tahu. Tetapi apabila sesuatu tindakan yang cekap oleh Kementerian Sumber Asli dan Alam Sekitar, yang mendedahkan perkara ini, sudah jelas bahawa perkara ini berlaku dan kenapa banjir pada tahun lepas berlaku begitu buruk sekali, sudah pasti disebabkan oleh kawasan tadahan hujan di sebelah Gua Musang dan juga Tanah Merah diceroboh dan menyebabkan perkara-perkara yang saya sebutkan tadi berlaku. Saya menyeru kepada rakyat Kelantan supaya mengambil berat isu yang telah ditimbulkan ini dan kita pasti rakyat akan menolak Kerajaan PAS Negeri Kelantan pada pilihan raya akan datang. Sekian, terima kasih, Tuan Yang di-Pertua, saya turut menyokong.

**Tuan Yang di-Pertua:** Baik, Yang Berhormat. Yang Berhormat bagi Subang.

## 2.55 ptg.

**Tan Sri Dato' K.S. Nijhar [Subang]:** Terima kasih, Tuan Yang di-Pertua kerana memberi saya peluang untuk berucap atas usul yang dibuat oleh Yang Berhormat bagi Dungun atas Titah Ucapan Sri Paduka Baginda Yang Dipertuan Agong ke-12. Sri Paduka Baginda Tuanku telah menyentuh beberapa isu terkini yang merupakan agenda penting dalam negara kini. Tuanku telah bertitah mengenai bencana ombak besar *Tsunami* yang telah melanda negara kita dan negara-negara jiran kita.

Keprihatinan Tuanku jelas menunjukkan kasih sayang seorang Raja terhadap rakyat Malaysia dan juga terhadap rakyat di negara Indonesia, Sri Lanka, Thailand dan lain-lain. Saya ingin mengambil kesempatan ini untuk mengucapkan setinggi-tinggi tahniah kepada para sukarelawan seperti MERCY Malaysia, Pemuda UMNO dan Barisan dan tidak lupa juga *Global Sikhs International* yang terletak di Bangsar, di tempat saya, yang telah berkhidmat siang dan malam menolong mangsa-mangsa bencana ini. Titah Tuanku juga jelas menunjukkan apakah hasrat serta keinginan Tuanku dalam Rancangan Malaysia Ke-9. Tuanku telah menyentuh secara keseluruhan isu-isu penting yang akan diberi perhatian serius dalam rancangan ini, seperti perindustrian pertanian, sistem perbankan Islam, perindustrian makanan halal, perindustrian pelancongan teknologi maklumat, *integrity social*, kecemerlangan dalam sukan dan banyak lagi.

Tuan Yang di-Pertua, jika kita imbas semula dasar-dasar yang disediakan oleh kerajaan pada Rancangan Malaysia Ke-8, kita dapati kerajaan telah mengambil kira kemajuan yang telah dicapai dengan menilai semula kedudukan semasa serta menimbang pelbagai cabaran yang akan dihadapi pada masa hadapan. Ciri-ciri tersebut adalah penting dalam memastikan pengagihan kekayaan dilaksanakan secara adil dan saksama. Dengan pengagihan yang sama rata inilah yang akan membawa kestabilan sosial dan politik negara. Ia juga amat penting dalam mencapai matlamat perpaduan negara. Di sini saya

ingin menyentuh beberapa perkara yang pada pendapat saya harus diberi perhatian yang khusus.

Tuan Yang di-Pertua, isu pertama yang saya ingin sentuh daripada ucapan Sri Paduka Baginda Tuanku ialah berkaitan dengan perindustrian. Pelan Induk Perindustrian ke-3 negara yang merangkumi tempoh tahun 2006 hingga 2020 jelas menunjukkan betapa seriusnya kerajaan dalam membangunkan sektor perindustrian negara. Pendekatan dan strategi yang diambil akan meningkatkan daya saing dalam industri ini. Perhatian yang diberi oleh kerajaan terhadap industri kecil dan sederhana juga amat dialu-alukan. Namun, saya berpendapat perhatian yang diberi kepada IKS ini adalah tidak mencukupi.

Perindustrian kecil dan sederhana di Malaysia telah lama wujud hasil usaha usahawan-usahawan dalam negara. Industri yang bermula sebagai *back yard* industri pada tahun 60an telah berkembang menjadi salah satu sumber pendapatan negara yang penting sekarang. Dalam negeri Selangor sahaja terdapat kira-kira 3000 kilang perindustrian seperti ini termasuk 1000 lebih di kawasan Parlimen Subang. Malah, usaha kerajaan menambahkan jumlah dana dalam Tabung Industri Kecil dan Sederhana II, sebanyak RM1.5 bilion kepada RM4.4 bilion dan penambahan jumlah dana dalam Tabung Usahawan Baru II sebanyak RM550 juta pada RM2 bilion dan juga akan penubuhan Bank Industri Kecil dan Sederhana tahun ini jelas menunjukkan kepentingan perusahaan tersebut.

Keperluan yang paling penting untuk kawasan-kawasan perindustrian kecil dan sederhana ini ialah kemudahan infrastruktur. Sebagai contoh, dua kawasan perusahaan penting dalam Parlimen Subang iaitu Kampung Baru Subang dan Kampung Baru Sungai Buluh menjana jumlah eksport melebihi RM1 bilion setahun. Namun keadaan infrastruktur serta kemudahan asas di sini adalah seperti di kawasan pedalaman atau kawasan setinggan dalam bandar.

Di sini saya ingin mencadangkan agar pihak kerajaan khususnya Kementerian Perumahan dan Kerajaan Tempatan mengambil lebih serius dalam menyediakan kemudahan-kemudahan asas ini. Satu unit khas harus ditubuhkan untuk mengkaji dan mengkoordinasikan rancangan dan pelaksanaan infrastruktur yang lebih sempurna dan teratur bagi industri-industri kecil dan sederhana ini khususnya di kampung-kampung baru.

Peruntukan daripada tabung dan Dana Tabung Industri Kecil dan Sederhana yang sebut tadi boleh digunakan dalam menyediakan infrastruktur tersebut. Saya percaya pertumbuhan ekonomi yang lebih pesat boleh dijana dengan kelebihan kemudahan ini.

Tuan Yang di-Pertua, seterusnya, isu yang saya ingin sentuh ialah mengenai agihan kekayaan yang seimbang dalam ekonomi negara di kalangan kaum minoriti. Seri Paduka Baginda Yang di-Pertuan Agong telah menyatakan tumpuan khusus harus diberikan kepada kaum-kaum minoriti dalam negara seperti untuk mencapai kejayaan. Ini adalah sejajar dengan prinsip ketujuh daripada sepuluh prinsip utama Islam Hadhari iaitu pembelaan hak kumpulan minoriti dan wanita. Sesungguhnya kenyataan ini jelas membuktikan hasrat kerajaan untuk membangunkan semua kaum dalam negara.

Walau bagaimanapun, adakah kerajaan benar-benar ingin melaksanakan dasar ini menjadi satu tanda tanya. Hakikatnya RMK8, satu rancangan untuk mewujudkan Dana Amanah Saham Nasional untuk diagihkan di kalangan bumiputera dan juga kumpulan minoriti lain yang belum menikmati faedah pembangunan telah ditetapkan. Sehingga ke hari ini rancangan tersebut tidak dilaksanakan. Ia telah menimbulkan banyak tanda tanya di kalangan masyarakat kaum minoriti termasuk masyarakat kaum minoriti India dalam negara ini.

Saya berpendapat sebuah institusi milik kerajaan seperti Permodalan Nasional Berhad perlu dibentuk bagi kaum-kaum minoriti seperti kaum peribumi Sabah dan Sarawak dan kaum minoriti India di mana mereka dapat meningkatkan pemilikan ekuiti mereka dalam jangka pelaksanaan RMK9. Malah peruntukan untuk pembelian saham-saham baru juga harus ditawarkan ke organisasi-organisasi koperatif dan badan-badan pertubuhan yang diberi mandat untuk memegang saham-saham berkenaan bagi pihak kaum minoriti.

Justeru itu penyertaan peniaga-peniaga kaum minoriti termasuk kaum India dalam ekonomi negara amatlah kurang. Ini kerana kebanyakan daripada peniaga-peniaga ini khususnya kaum minoriti India menghadapi kesukaran mendapatkan bantuan kewangan,

permit dan juga lesen perniagaan. Walaupun kerajaan telah menyatakan beberapa kali bahawa bantuan seumpama ini akan diberikan kepada kaum minoriti India bagi membangunkan perniagaan mereka, tidak ada langkah konkrit yang telah diambil sehingga sekarang.

Akibat daripada ketiadaan sokongan ini kebanyakan peniaga-peniaga ini tidak dapat berkembang dalam perniagaan mereka. Sebahagian daripada mereka terpaksa menutup perniagaan kerana sukar dapat pinjaman daripada bank-bank atau bantuan daripada agensi-agensi kerajaan. Hakikatnya kerajaan harus memainkan peranan dalam memberi pinjaman dalam memberi latihan, bantuan serta peluang perniagaan kepada golongan ini.

Tuan Yang di-Pertua, isu ketiga yang saya ingin bangkitkan daripada teks ucapan Seri Paduka Baginda Yang di-Pertuan Agong ialah mengenai kemiskinan dalam negara. Tuanku telah menyatakan dengan jelas perjuangan untuk menurunkan kemiskinan harus berterusan tanpa mengira kaum. Dalam konteks ini usaha kerajaan telah berterusan dalam memastikan objek pembasmian kemiskinan dapat dicapai. Justeru itu, strategi-strategi serta program-program telah diperkenalkan untuk membasmi kemiskinan.

Lantaran daripada itu pada tahun 2001 isu kemiskinan menjadi kompleks di mana isu kemiskinan terdiri daripada dua bentuk iaitu kemiskinan dan kemiskinan tegar yang terdapat di bandar dan luar bandar. Implikasi kemiskinan bandar telah mendorong kerajaan untuk mengkaji semula garis kemiskinan.

Pada tahun 2001, Jawatankuasa Kabinet mengenai kemiskinan bandar juga telah ditubuhkan untuk menangani isu tersebut. Unit Perancang Ekonomi telah diarahkan untuk mengkaji semula garis kemiskinan berlainan bagi masyarakat bandar dan masyarakat luar bandar. Dengan garis kemiskinan baru ini, saya pasti jumlah masyarakat miskin dalam bandar akan bertambah. Sebahagian besar masyarakat miskin di kawasan bandar adalah dari kawasan setingan dan daripada pangsapuri-pangsapuri kos rendah. Kebanyakan daripada mereka bekerja sebagai buruh kasar atau menjalankan perniagaan secara kecil-kecilan untuk menyara diri.

Untuk menangani kemiskinan bandar ini, program-program khas berunsur pengetahuan dan teknikal di bawah kerajaan dilaksanakan. Saya mengucapkan tahniah kepada pihak kerajaan kerana telah mengambil inisiatif-inisiatif dalam menangani masalah ini tetapi saya percaya pelaksanaan program ini akan dipertingkatkan sedikit. Di sini saya ingin menyentuh mengenai peluang-peluang perniagaan dan peningkatan produktiviti. Masyarakat miskin yang berniaga secara kecil-kecilan amatlah memerlukan bantuan kerajaan untuk maju ke hadapan.

Dalam aspek ini, kemahiran serta pengetahuan sahaja tidak mencukupi. Mereka harus dibantu dengan bantuan modal atau perniagaan. Salah satu contoh yang telah terbukti kejayaannya ialah Skim Pinjaman Mikro Kredit. Skim ini diumumkan oleh kerajaan pada tahun 2003. Ini merupakan satu skim yang amat penting dalam menjana pertumbuhan ekonomi di peringkat peniaga-peniaga kecil.

Dengan pengenalan skim pinjaman ini, banyak peniaga kecil telah dapat menggunakan wang tersebut untuk pusingan modal. Mereka yang diperkenalkan oleh kerajaan jelas telah memberi kesan positif kepada penjana ekonomi peringkat mikro. Ia juga telah menyumbang kepada pengurusan kemiskinan penduduk di bandar-bandar. Oleh itu saya ingin mencadangkan kepada kerajaan untuk mempertimbangkan semula peruntukan Skim Mikro Kredit ini dan meluaskan skim ini bagi golongan masyarakat ini.

Tuan Yang di-Pertua, isu keempat yang saya ingin sentuh ialah harapan kerajaan dalam meningkatkan prestasi serta kualiti penyampaian bagi sektor perkhidmatan awam negara. Saya amat berbangga dengan tindakan bernas kerajaan menyusun semula jentera pentadbiran dan penyampaian perkhidmatan awam. Kerajaan mengambil serius mengenai perkhidmatan yang diberi oleh perkhidmatan awam kepada rakyat seperti di pejabat imigresen, pejabat daerah, pihak berkuasa tempatan dan semua agensi kerajaan bagi berhubung terus dengan rakyat jelata.

Namun masalah masih wujud. Masalah utama yang sentiasa dibangkitkan oleh pengundi-pengundi saya di Parlimen Subang ialah setiap kali mereka pergi untuk urusan di

agensi-agensinya terbabit, mereka dihantar dari seorang pegawai ke seorang pegawai yang lain tanpa henti. Saya difahamkan oleh mereka cara yang paling cepat untuk menguruskan di pejabat-pejabat seperti ini ialah hanya anda kenal mana-mana pegawai dalam agensi-agensinya tersebut.

Masalah kedua adalah proses dokumentasi dan penguatkuasaan. Sebagai contoh sejak tahun 2002 sebuah surau di pinggiran Subang dalam Parlimen Subang belum lagi mendapat kelulusan Sijil Layak Menduduki walaupun sudah hampir 3 tahun sekarang. Inilah hakikat yang dialami oleh sebahagian PBT di negara ini.

Saya cadangkan agensi-agensinya kerajaan yang terlibat secara langsung dengan masyarakat harus mempunyai kebolehan berkomunikasi yang baik. Mereka harus mempunyai kemahiran mengendalikan masalah-masalah rakyat berbilang kaum dan usaha-usaha ini harus dilaksanakan secara berterusan untuk mencapai objektif sebuah perkhidmatan awam yang cekap dan berkesan.

Tuan Yang di-Pertua, selanjutnya saya ingin menyatakan rasa bangga saya kerana mempunyai kerajaan yang inginkan kecemerlangan kepada negara kita yang tercinta ini. Impian kerajaan untuk melihat negara Malaysia menjadi pusat kecemerlangan pendidikan serantau harus diberi perhatian yang amat serius.

Saya juga berharap institusi pengajian tinggi awam dan swasta berganding bahu menayakan impian ini. Kerajaan inginkan kecemerlangan ini malah bukan hanya sekadar mulut, kabinet baru yang telah dibentuk oleh Yang Amat Berhormat Perdana Menteri telah mengekshakan institusi pengajian tinggi di bawah kementeriannya sendiri, bahkan kerajaan juga telah memperkenalkan insentif-insentif yang menarik untuk membawa lebih banyak universiti luar negara menubuhkan cawangan-cawangan mereka di sini. Namun demikian, bagi mencapai impian yang murni ini, kita semua harus mempunyai pelan induk yang terperinci untuk menjalankan program ini.

Saya cadangkan kerajaan mengenal pasti sumber pelajar negara mana yang ingin kita beri perhatian. Selepas itu, jurusan dalam bidang manakah yang ingin kita promosi kepada pelajar-pelajar berkenaan, malah pelajar-pelajar Malaysia tajaan badan-badan kerajaan dan korporat harus belajar di dalam negara di sini, tidak payah kita hantar mereka ke luar negara. Selain itu, promosi-promosi seperti *road shows*, seperti yang dijalankan oleh MITI untuk membawa pelaburan di sini akan dijalankan, harus diatur dan dikendalikan secara agresif.

Tuan Yang di-Pertua, perkara yang keenam yang ingin saya sentuh ialah berkenaan dengan Laporan Kualiti Hidup Malaysia 2004. Ia jelas menunjukkan indeks kualiti hidup rakyat telah meningkat kepada 109.82 pada tahun 2002. Syabas kepada kerajaan kerana sentiasa berusaha dalam meningkatkan kualiti kehidupan rakyat Malaysia. Penerbitan Laporan Kualiti Hidup Malaysia merupakan satu pengukuran terbaru serta langkah yang canggih dalam membawa negara ke status negara membangun. Laporan ini bukan sahaja memberi kita data dari segi kuantitatif, tetapi dari segi kualitatif juga. Ia memberi kita gambaran sebenar dalam usaha kita untuk mencapai pembangunan secara menyeluruh dan seimbang.

Dalam laporan ini, dua indeks iaitu Indeks Alam Sekitar dan Indeks Keselamatan Awam menunjukkan penurunan, ia adalah sesuatu yang menyedihkan. Saya ingin menyentuh sedikit tentang kualiti alam sekitar. Saya mencadangkan kerajaan berusaha terus mendidik rakyat tentang memantau dan menguatkuasakan undang-undang yang sedia ada. Kempen-kempen kesedaran harus diperbanyakkan dalam mendidik rakyat Malaysia contohnya kerajaan harus menggalakkan secara agresif kepentingan menggunakan peralatan yang *environmental friendly* dan kerajaan juga harus menjadi kepimpinan melalui teladan, barulah rakyat jelata akan percaya dan akur kepada kehendak kerajaan.

Saya mencadangkan kerajaan juga memberi penekanan dalam soal penguatkuasaan. Agensi-agensinya kerajaan harus memainkan peranan yang proaktif dalam menangani isu ini. Mereka yang tidak bertanggungjawab dan yang telah melakukan kesalahan harus dibawa ke muka pengadilan.

**Tuan Haji Ismail bin Noh:** [Bangun]

**Tuan Yang di-Pertua:** Yang Berhormat...

**Tuan Haji Ismail bin Noh:** Terima kasih Tuan Yang di-Pertua, terima kasih Yang Berhormat bagi Subang. Bila saya mendengar ucapan dari Yang Berhormat bagi Subang, saya dapat menilai bagaimana tingginya pengalaman dan sekali gus budi bicara Yang Berhormat bagi Subang, saya berterima kasih. Bila saya bandingkan dengan yang bagi Tanah Merah tadi walaupun saya tidak berada di dalam Dewan, saya dapati bagaimana Yang Berhormat bagi Tanah Merah cari masa di waktu kami tidak ada. Waktu saya bangun, dia tidak bagi jalan. Waktu kami tidak ada, dia hentam kami.

Jadi Yang Berhormat bagi Subang menyatakan bahawa pembangunan yang menyeluruh. Saya nampak sekarang ini bahawa pembangunan di negara kita ini tidak kurang menyeluruh sebagaimana di Sabah dan Sarawak misalnya. Bagaimana kita tengok di Sabah sedangkan Yang Berhormat bagi Tanah Merah menyatakan bahawa negeri yang termundur Kelantan. Apabila saya dengar daripada Yang Berhormat dari Sabah dan Sarawak menampakkan bahawa di Sabah ini, usahkan ICT, jalan raya pun tidak ada lagi, usahkan ICT, api elektrik pun tidak ada. Di Kelantan, tidak timbul masalah ini – masalah prasarana dan jalan raya tidak timbul di negeri Kelantan. Yang timbulnya di Sabah dan Sarawak, tetapi bagaimana Yang Berhormat bagi Tanah Merah boleh pejam mata? Saya tidak nampak.

Yang Berhormat bagi Tanah Merah boleh bercakaplah di sini, tetapi saya rasa bahawa rakyat Kelantan bagi sepenggal sahaja kepada Yang Berhormat bagi Tanah Merah untuk menang, penggal yang kedua ini, boleh jadi *out* dari Parlimen. Oleh yang demikian, Tuan Yang di-Pertua saya menyokong ucapan tadi dan bagaimana pandangan Yang Berhormat bagi Subang tentang pembangunan yang tidak seimbang yang saya lihat ataupun tidak menyeluruh sekarang ini. Apa pandangan Yang Berhormat?

**Tuan Yang di-Pertua:** Ya, teruskan.

**Tan Sri Dato' K.S. Nijhar:** Terima kasih atas komen yang dibuat tadi. Tentang Ahli Yang Berhormat bagi Tanah Merah, saya ingat itu bukan salah Yang Berhormat bagi Tanah Merah. Kalau saya tidak lupa tadi, Yang Berhormat bagi Pasir Mas tidak masuk bila dia berbahas. [*Tepuk*] Kalau masuk, memang saya faham, dia boleh bagi peluang kepada Yang Berhormat. Tentang isu-isu lain yang dibangkitkan, harapan saya menteri berkenaan boleh jawab dengan baik. [*Tepuk*] Tuan Yang di-Pertua, saya teruskan.

Tadi saya sebutkan tentang kualiti hidup Malaysia. Sekali lagi saya meneruskan di sini, selain itu juga, kualiti hidup rakyat Malaysia harus mempunyai kebudayaan, penyelenggaraan atau *maintenance culture*. Kebudayaan ini harus diberi keutamaan dalam memperbaiki kualiti kehidupan rakyat Malaysia. Dalam konteks ini, saya mencadangkan kerajaan membawa satu perubahan besar di dalam minda setiap rakyat Malaysia. Persepsi bukan tanggungjawab terhadap kemudahan awam - harus disingkirkan sama sekali. Setiap warganegara harus sedar bahawa bumi Malaysia dan segala yang terkandung dalam bumi ini adalah tanggungjawab bersama.

Tuan Yang di-Pertua, isu-isu yang saya sentuh tadi adalah berdasarkan kepada matlamat kerajaan yang sedia ada, iaitu untuk mencapai kemajuan dan pembangunan menyeluruh, mapan dan seimbang. Saya percaya, sekiranya kerajaan menyediakan masyarakat Malaysia dengan pengetahuan serta sifat daya saing yang tinggi dan kesedaran sivik yang tinggi, era globalisasi dan liberalisasi ekonomi dunia akan kita kuasai.

Tuan Yang di-Pertua, dengan kata-kata ini saya menyokong usul yang dibuat oleh Yang Berhormat bagi Dungun. Sekian, terima kasih.

**Tuan Yang di-Pertua:** Yang Berhormat bagi Rasah.

**3.17 ptg.**

**Dato' Goh Siow Huat [Rasah]:** Terima kasih Tuan Yang di-Pertua, saya ucapkan terima kasih kerana dibenarkan membahaskan Usul Titah Ucapan Seri Paduka Baginda Yang di-Pertuan Agung dalam Parlimen Kesebelas ini.

Tuan Yang di-Pertua, kita berbangga kerana di Malaysia ada begitu banyak kenderaan perkhidmatan awam untuk orang ramai dan pelancong seperti perkhidmatan bas yang begitu canggih termasuk bas persiaran yang ada simbol *five stars* dan *first class*, dengan izin. Walaupun begitu, saya dapati masih lagi ada yang tidak cukup khususnya kemudahan bagi golongan yang cacat anggota kaki dan warga tua yang perlu duduk di kerusi roda.

Saya dapati di Amerika Syarikat, perkhidmatan bas awam di situ ada dipasang dengan satu auto mesin yang kecil. Apabila menekan butang yang disediakan pada bas itu, satu besi papan atau platform akan automatik turun untuk kerusi roda atau menaiki bas itu dengan selamat. Saya cadangkan kemudahan seperti ini perlu diadakan dengan segera di negara kita supaya orang-orang yang cacat anggota kaki atau warga usia emas yang kaki kurang kuat untuk berjalan boleh mendapat perkhidmatan yang terbaik dan dapat ke mana-mana dengan selesa dan selamat.

Tuan Yang di-Pertua, sejak dua tahun kebelakangan ini, didapati kes-kes jenayah khususnya kes bunuh yang begitu serius dan banyak berlaku di negara kita. Antara kes-kes yang baru berlaku adalah seperti pembunuhan seorang pemuda – jurutera MAS dan pembunuhan seorang pengusaha stesen minyak dan lain-lain lagi. Ada juga kes rompak dan bunuh – membunuh ahli keluarga dan kemudian bunuh diri akibat ancaman hidup dan sebagainya.

Kenapa kes-kes yang begitu kejam ini boleh dilakukan. Jika dikatakan pendidikan moral masyarakat kita berkurangan, saya rasa ini adalah tidak betul kerana mutu pendidikan negara kita sudah begitu meningkat. Saya ada dengar dari kawan-kawan saya bahawa barangkali punca kes-kes yang meningkat ini adalah disebabkan terlibatnya seseorang itu dalam penyalahgunaan dadah sehingga tingkah lakunya tidak dapat dikawal, hilang akal dan berani melakukan apa sahaja termasuk membunuh isteri dan anak-anaknya dengan kejam.

Oleh itu, untuk menangani masalah sosial yang serius ini yang penting sekali ialah kita perlu menghapuskan kegiatan dadah yang merupakan musuh utama negara kita. Baru-baru ini media surat khabar ada menyiarkan berita tentang pihak polis kita telah berjaya menumpaskan satu sindiket tempatan membuat dadah. Ini bermakna negara kita sudah ada tempat membuat dadah. Ini juga adalah satu sebabnya penagih-penagih yang sudah dipulihkan di pusat serenti apabila dibebaskan mereka begitu mudah memperolehi dadah dan menjadi penagih semula.

Oleh itu, semua lapisan masyarakat perlu berprihatin dalam berusaha kuat untuk menghapuskan ancaman dadah dengan habis-habisan. Walaupun pihak polis kita ada menjalankan tanggungjawab dengan tegas untuk menangani ancaman dadah dan membanteras kes-kes yang meningkat serius ini, kerjasama masyarakat dengan polis adalah amat penting. Orang ramai yang mengetahui sebarang maklumat yang penting perlu melaporkan kepada pihak polis dengan cepat. Bagi pihak polis pula jika ada sebarang maklumat atau laporan daripada orang ramai laporan ini hendaklah diteliti dan dianggap penting serta perlu ada tindakan segera.

Tuan Yang di-Pertua, kita adalah berbangga kerana di lapangan terbang KLIA memang ada perkhidmatan teksi KLIA untuk kemudahan orang ramai khususnya pelancong-pelancong asing. Dengan adanya kemudahan khas ini pasti memberi jaminan keselamatan kepada orang-orang asing yang datang ke negara kita. Tetapi apabila penumpang-penumpang yang turun dari kapal terbang dan keluar dari KLIA didapati telah ada ramai pemandu kereta sapu menunggu di pintu ketibaan lapangan terbang KLIA. Bagi orang-orang asing mereka tentu tidak tahu asal-usul pemandu-pemandu teksi itu sama ada teksi KLIA atau kereta sapu. Cuma apabila mereka telah naik kereta itu barulah mereka ketahui dan ini pasti menjadi satu ketakutan kepada mereka. Saya berpendapat perbuatan yang tidak baik ini boleh menjejaskan imej baik negara kita.

Oleh itu, saya cadangkan supaya Kementerian Pembangunan Usahawan dapat mengadakan satu tawaran khas kepada kereta-kereta sapu yang sedia ada beroperasi di KLIA untuk memohon menjadi teksi KLIA dan selepas tawaran ini jika didapati ada lagi mana-mana kereta sapu yang datang mesti perlu ambil tindakan yang sepatutnya supaya kes-kes ini tidak berlaku lagi.

Tuan Yang di-Pertua, saya amat mengalu-alukan langkah kerajaan yang berusaha kuat melalui Majlis Keselamatan Jalan Raya untuk mengatasi masalah kecelakaan jalan di negara kita kerana kecelakaan jalan di negara kita adalah masih serius dari sehari ke sehari walaupun banyak aktiviti-aktiviti keselamatan jalan raya dan kempen-kempen keselamatan jalan raya yang berfaedah telah dijalankan.

Di sini saya ingin menyampaikan beberapa pandangan tentang kecelakaan jalan di Dewan yang mulia ini. Setiap hari ada ramai orang menduduki ujian memandu *trailer* atau lori yang panjang untuk mendapatkan lesen memandu *trailer* supaya boleh dapat pekerjaan selaku pemandu lori dengan pendapatan yang lebih *attractive* atau lebih menarik. Sebaik sahaja mereka memperolehi lesen memandu *trailer* ini, mereka pun bekerja memandu kenderaan berat seperti lori *trailer* panjang, lori *tanker*, *low loader* dan sebagainya.

Saya telah dapat tahu dari Persatuan Lori bahawa kebanyakan kejadian kecelakaan jalan adalah berpunca daripada pemandu-pemandu baru yang kurang berpengalaman. Oleh kerana mereka tidak ada pengalaman cara pemanduan mereka adalah berbahaya dan banyak membuat kesilapan. Kadangkala mereka hendak *reverse* kenderaan pun tidak pandai dan ini telah mengakibatkan kecelakaan jalan berlaku. Saya telah difahamkan bahawa seseorang itu dibenarkan menduduki ujian memandu *trailer* selepas satu tahun memperolehi lesen E *full*. Saya rasa tempoh masa satu tahun ini adalah tidak cukup kerana memandu *trailer* adalah berlainan dengan memandu lori.

Oleh itu, saya mencadangkan kerajaan dapat mewajibkan pemandu yang baru dapat lesen memandu *trailer* perlu mempunyai pengalaman memandu sekurang-kurangnya dua tahun memandu lori biasa barulah dibenarkan memandu kenderaan berat iaitu lori *trailer*, lori *tanker* dan lori panjang.

Tuan Yang di-Pertua, saya juga dapati pemandu-pemandu *tanker* minyak di syarikat Shell, Esso, BP dan lain-lain amat mengutamakan kualiti pemandu. Jika didapati mana-mana pemandu yang memandu dengan bahaya mereka akan dipecat pada bila-bila masa. Ini adalah satu contoh yang amat baik dan kita tidak mahu kecelakaan jalan berlaku. Pemandu-pemandu kita mesti berhati-hati dan berhemah. Oleh itu, jika kita dapati ada mana-mana pemandu memandu dengan keadaan yang berbahaya pemandu itu sahaja patut dikenakan tindakan dan bukannya pihak pemilik kenderaan itu.

Tuan Yang di-Pertua, sejak bulan Februari 2005, banyak stesen minyak sentiasa tidak ada diesel dijual. Kenderaan-kenderaan yang menggunakan minyak diesel termasuk bas-bas persiaran memang menghadapi masalah ini. Apabila masuk ke stesen minyak dan diberitahu diesel sudah habis, kenderaan-kenderaan diesel ini perlu pusing dari stesen ke stesen untuk mendapatkan minyak diesel. Ini telah menjadi satu imej yang tidak baik kepada pelancong-pelancong luar negeri. Masalah ini masih berlaku dan perlu diselesaikan secepat yang mungkin.

Tuan Yang di-Pertua, saya amat mempersetujui langkah-langkah kerajaan untuk menjaga kesihatan rakyat di negara kita dan peraturan larangan jualan rokok kepada golongan yang berusia 18 tahun ke bawah adalah satu usaha yang amat baik.

Dalam peraturan ini peniaga-peniaga kedai kopi, gerai makanan, restoran, kedai runcit dan sebagainya adalah dilarang menjual bahan rokok kepada golongan yang berusia 18 tahun ke bawah. Di sini saya ingin memberi sedikit komen daripada peniaga-peniaga kita dan mereka berharap kerajaan dapat ambil perhatian beberapa perkara apabila penguatkuasaan dilaksanakan.

Yang pertama didapati kebanyakan golongan remaja hari ini yang berusia dari 16 tahun hingga 18 tahun mempunyai saiz badan yang besar dan matang dan susah hendak agak umur mereka.

Yang kedua, memang adalah satu kesusahan kepada peniaga-peniaga kerana tidak ada kuasa untuk meminta pembeli rokok menunjukkan kad pengenalan supaya dapat menyasat umur mereka. Keuntungan menjual rokok adalah amat tipis dan cuma beberapa sen sahaja dan merupakan satu perkhidmatan kaunter untuk kemudahan kepada orang-orang yang merokok. Adalah tidak adil jika penjual rokok dikenakan hukuman denda. Oleh itu saya ingin cadangkan di sini pembeli rokok yang berumur 18 tahun ke bawah juga patut dikenakan tindakan dan jika didapati peniaga betul-betul menjual kepada anak-anak yang

kecil seperti kanak-kanak sekolah, saya bersetujulah supaya tindakan undang-undang dikenakan kepada penjual-penjual rokok ini.

Tuan Yang di-Pertua, kita berbangga kerana ekonomi negara kita bertambah kukuh. Kadar pertumbuhan ekonomi bagi tahun 2004 telah melebihi sasaran 7%. Pembangunan negara kita adalah pesat dan kita memang memerlukan ramai tenaga buruh untuk pembangunan yang pesat ini. Saya amat bersetuju langkah kerajaan untuk memasukkan ramai tenaga buruh asing dari 7 buah negara yang berlainan untuk mengatasi masalah kekurangan tenaga buruh khususnya dalam bidang pembinaan dan perindustrian di negara ini. Saya cadangkan supaya kerajaan membawa masuk pekerja asing ini perlu mengikuti permintaan pasaran kita dan jangan lebih masuk daripada permintaan banyak. Saya juga amat bersetuju kerajaan ambil tindakan melalui operasi secara besar-besaran baru-baru ini untuk menghantar balik pekerja-pekerja asing yang datang tanpa izin. Pekerja-pekerja asing tanpa izin perlu dihantar balik dengan segera kerana banyak kes-kesnya yang tidak sihat ada berlaku oleh orang-orang ini.

Di sini saya percaya ada ramai kanak-kanak tempatan di negara kita bukannya semua adalah berpendidikan tinggi, dan bukannya semua adalah golongan profesional. Kita boleh memberi latihan dan galakkan kepada anak-anak tempatan ini supaya menjadi tenaga pekerja mahir dalam sektor pembinaan, perindustrian dan lain-lain. Saya dapati pendapatan pekerja yang terlatih di negara kita adalah tidak kurang bezanya jika dibandingkan dengan golongan yang berpendidikan tinggi yang sewajarnya. Sekiranya anak-anak tempatan kita mahir dalam mana-mana bidang ini juga boleh menjadi satu sumber pendapatan baik kepada mereka dan seterusnya dapat mengurangkan anak-anak tempatan bekerja selaku pekerja biasa ke luar negara seperti di USA dan negara-negara Eropah.

Oleh itu saya harap ibu bapa-ibu bapa kita jangan kecewa atau susah hati jika anak-anak mereka tidak berpelajaran tinggi. Contohnya negara kita juga perlu orang-orang selaku juruteknik, jurujual dan orang-orang yang pandai seni tukang pembinaan. Bagi sesuatu projek besar kita tidak boleh bergantung kepada golongan profesional seperti *engineer* sahaja. Kita juga perlukan tenaga pekerja yang berkemahiran, barulah sesuatu projek itu dapat disempurnakan.

Tuan Yang di-Pertua, oleh itu saya cadangkan Kementerian Sumber Manusia Malaysia dapat mengambil berat melahirkan lebih ramai generasi muda berkualiti dengan melatih mereka menjadi orang yang pandai dalam mana-mana bidang.

Tuan Yang di-Pertua, saya difahamkan mulai April 2005, rangkaian ASTRO akan ada satu siaran langsung dan siaran radio melalui *Channel 501* untuk menyiarkan program lumba kuda. Begitu ramai orang ada membuat komen takut masyarakat kita akan ambil program ini dengan tujuan untuk berjudi. Walaupun program ini perlu bayaran dan perlu pendaftaran tetapi aktiviti ini sepatutnya tidak perlu ada siaran langsung contohnya di Hong Kong. Walaupun program ini adalah begitu popular tetapi di situ pun tidak ada program siaran langsung. Jadi saya menyokong, sekian terima kasih.

**Tuan Yang di-Pertua:** Ya, Pasir Mas.

### 3.57 ptg.

**Tuan Haji Ismail bin Noh [Pasir Mas]:** Assalamualaikum Warahmatullahi Wabarakatuh. Yang saya hormati dan kasihi Tuan Yang di-Pertua dan semua sahabat-sahabat yang berada di dalam Dewan pada petang ini. Alhamdulillah, bersyukur saya ke hadrat Allah SWT, kerana dapat bersama-sama memperkatakan sedikit sebanyak sebagai tanda kasih saya dan bakti saya kepada Duli Yang Maha Mulia Yang di-Pertuan Agong yang telah menyampaikan ucapan pada minggu lepas. Dalam ucapan baginda banyak perkara yang disebut dan belum disebut pada tahun-tahun sebelum daripada ini. Sebagai *respond* ataupun sedikit sebanyak pandangan daripada rakyat biasa atau daripada saya kepada titah yang telah disampaikan oleh Baginda Yang di-Pertuan Agong, saya dapat melihat bahawa di sana ada beberapa perkara yang saya perlu kemukakan kepada Dewan ini untuk sama-sama kita lihat, kalau baik kita sama-sama ambil dan kalau tidak baik sama-sama kita tinggalkan begitu.

Sebelum daripada ini tidak disebutkan perkataan Islam Hadhari, dalam ucapan baginda baru-baru ini disebut Islam Hadhari sebagai suatu pendekatan yang bukan suatu mazhab dan aliran baru.

Saya tidak bercadang untuk membahaskan tentang istilah penggunaan Islam Hadhari itu dan dalam sesi yang lepas telah pun kita bincang dan telah pun kita bahas begitu panjang sama ada pembangkang setuju atau pun tidak setuju kerajaan akan terus melaksanakan apa yang kerajaan mahu

Tetapi bagi saya, kalau diulang balik sekalipun, kalimah Islam Hadhari ini memang tidak menepati bahasa Arab. Kalau tanya kepada siapa pun memang tidak menepati - apakah dia *mubtada khobar*, apakah dia *nasa' mensub* ataupun apakah dia *taqdim khobar 'alal mubtada*, itu dari segi nahunya. Yang keduanya, anak saya yang belajar di Universiti Malaya pernah menyebut, dia kata, "Ada pensyarah-pensyarah yang masuk Universiti Malaya mengatakan Islam Hadhari ini tidak lebih daripada pisang goreng dengan goreng pisang.

Barangkali tidak mengapalah, kita boleh terima tetapi kalau kita bawa dengan bahasa yang lain pula, apakah kita boleh terima apabila ada orang mengatakan bahawa "lembu Pak Mat" dengan "Pak Mat lembu"? Saya rasa tidak boleh terima. "Lembu Pak Mat" dengan "Pak Mat lembu" – Pak Mat lembu ertinya Pak Mat itu lembu, tetapi kalau "lembu Pak Mat" maknanya Pak Mat memiliki lembu, itu dari segi bahasanya. Biarlah, saya tidak hendak pertikaikan bahasa kerana masanya sudah berlalu. Sebagaimana yang saya katakan tadi, bila kerajaan hendak, dia buat juga cuma pandangan ramai, pandangan pembangkang.

Barangkali ada di sana kebaikan dan kebajikannya juga. Saya bawa satu potong ayat *Al-Quranul Karim*, [*Membacakan sepotong ayat Al-Quran*] di mana Allah *Subhanahu wataala* menyebut, "Orang-orang yang telah diberi oleh Allah *Subhanahu wataala* kuasa, Allah tempatkan mereka, Allah beri kuasa kepada mereka di atas muka bumi ini, [*Mengulangi membaca sebahagian ayat tadi*] syarat pertama, iaitu untuk mendirikan, menegak, mengajak, mendorong masyarakat supaya mereka mendirikan sembahyang".

Saya lihat sekarang ini, Tuan Yang di-Pertua, usaha-usaha ini tidak dilakukan oleh kerajaan. Kesedaran ini adalah kesedaran rakyat awam. Kita lihat di masjid-masjid, di madrasah-madrasah, di surau-surau, sebelum dari ini pun pada zaman Jepun, pada zaman Inggeris, orang tidak tinggal sembahyang Jumaat, orang kita tidak tinggal sembahyang, jarang sangat tinggal sembahyang waktu, tetapi bila kita tengok di perlumbaan Formula One, di *musabaqah sayyarah*, berapa ramai pemuda kita yang sebahagian besar daripadanya meninggalkan sembahyang. Begitu juga pertandingan bola.

Ertinya, di manakah yang kita katakan, [*Mengulangi membaca sebahagian ayat Quran yang dibacakan tadi*] sedangkan kita sudah meninggalkan suatu perkara yang paling besar, dan inilah asas pendidikan masyarakat sebenarnya, masyarakat Islam. Saya bercakap dalam konteks masyarakat Islam, kalau dulu, sebelum daripada ini, saya bercakap dalam konteks masyarakat lain. "*Iqaamatissolah*" – ini adalah suatu perkara yang paling besar sekali kerana itulah "*al-zakah*" duduk yang kedua. Bila solat dilaksanakan, dengan sendiri zakat dia akan keluarkan, dia akan mengeluarkan zakat. Tidak ada ayat *Al-Quranul Karim* yang mengatakan, "*Wa-aatawuzzakah*" dahulu dan kemudian baru "*iqaamatis solah*" - "*iqaamatis solah*" dulu. "*aqamus solah wa aatawuzzakah*", dipanggil ayat Quran yang serangkap. Maknanya, ayat ini bersekali, ayat sembahyang dengan ayat zakat sekali, tidak diasing-asingkan.

Tugas negara Islam, tugas Islam Hadhari ini dia...

**Dato' Raja Ahmad Zainuddin bin Raja Haji Omar:** [*Bangun*]

**Tuan Haji Ismail bin Noh:** Boleh, boleh, tidak mengapa.

**Dato' Raja Ahmad Zainuddin bin Raja Haji Omar:** Terima kasih Yang Berhormat. Saya terdengar tadi Yang Berhormat sebut pasal bola. Yang Berhormat, saya tidak tahu sama ada Yang Berhormat pergi menonton bola ataupun tidak. Perlawanan bola sepak yang dianjurkan oleh Persatuan Bola Sepak Malaysia, Yang Berhormat, diadakan selepas waktu isyak, mereka ada masa. Jadi semua stadium kebanyakannya, Yang

Berhormat, bukan sahaja main selepas isyak bahkan ada surau-surau. Jadi kalau Yang Berhormat tahu ada stadium yang tidak ada surau, sila beri tahu kecuali kalau Yang Berhormat tidak pernah pergi tengok permainan bolalah.

Saya pernah berada di negara Arab pada bulan puasa, Yang Berhormat dan selepas sembahyang Tarawih mereka main bola. Tidak timbul pun masalah, ini saya telah bertanya sendiri kepada orang-orang Arab. Jadi Yang Berhormat jangan marahlah kalau itu merupakan satu teguran kepada Yang Berhormat. Terima kasih.

**Tuan Haji Ismail bin Noh:** Tidak marah, saya tidak marah kepada Yang Berhormat bagi Larut kerana Yang Berhormat bercakap perlahan. Bolehlah, tidak marah. Betul tu, saya setuju ada *musollanya*, tetapi apa yang saya lihat, pasal biasanya tayangan ini disiarkan secara langsung melalui televisyen ... betul perlawanan bola bermula jam 8.00 malam ataupun 9.00 malam, tetapi sebahagian besar daripada pemuda-pemuda kita berada di stadium mulai jam 4.00 petang – jam 4.00 petang mereka sudah berada untuk mendapatkan tiket dan sebagainya. Apakah kita menjamin bahawa mereka melakukan solat, mereka sembahyang? Itu yang saya tekankan.

Kalau usaha ini sudah dilaksanakan, "*pabihawa ni'mah*". Kalau belum lagi diusahakan, mesti diusahakan bagaimana *musolla* yang sedia ada di stadium itu boleh diperbesarkan sedikit ataupun ada usaha-usaha, setidak-tidaknya melaungkan "solat, solat" sampai waktu sembahyang jam 4.30 petang, sembahyang dahulu dan sebagainya. Sama juga.

**Dato' Raja Ahmad Zainuddin bin Raja Haji Omar:** Terima kasih yang sama, terima kasih Yang Berhormat. Saya rasa masalah kita dengan *Allah Subhanahu wataala* ini adalah antara individu yang melaksanakannya, tidak ada jaminan mana-mana pihak mengatakan dia tidak sembahyang. Kalau dia sendiri hendak sembahyang, dia tidak beri tahu kepada orang lain, Yang Berhormat. Itu apa yang saya pelajari. Kalau itu satu teguran, Yang Berhormat jangan marahlah. Terima kasih.

**Tuan Haji Ismail bin Noh:** Ya, ya, bagus. Tetapi sebagai suatu tanggungjawab, sebagai suatu tanggungjawab negara Islam – Islam Hadhari, kita bercakap dalam konteks ini sekarang. Tadi saya sudah katakan pasal saya tidak hendak bahas dari segi istilah, saya tidak hendak bahas sekarang ini, saya sudah bincang dengan Yang Berhormat bagi Baling dalam sesi yang lepas. Biarlah saya terima untuk "*sallimna jaldan*" ..... Yang Berhormat Baling tidak adakah hari ini? [*Memerhati ke tempat duduk Yang Berhormat Baling*] [*Disampuk*] Tidak ada? Yang Berhormat Menteri pun tidak ada? Yang Berhormat bagi Pasir Puteh ada? [*Sambil menoleh ke belakang arah tempat duduk Yang Berhormat Pasir Puteh*] Ha, dia ada .... *sallimna jaldan* .....

**Dato' Paduka Haji Badruddin bin Amiruddin:** Apa khabar Yang Berhormat? Saya ada, saya ada Yang Berhormat. [*Ketawa*]

**Tuan Haji Ismail bin Noh:** ... untuk kita bincang. Maknanya, kewajipan kepada negara Islam Hadhari ini ia mesti mengambil tanggungjawab. Betul, terpulang kepada individu untuk melakukan benda ini dan hubungan dia dengan *Allah Subhanahu wataala* tetapi sebagai penguasanya kerana itulah ada penguat kuasa. JAWI tubuh penguat kuasa baru-baru ini untuk apa kalau tidak untuk ini! Kalau tidak, biar begitulah, dia hendak buat apa pun daripada awal malam sampai akhir malam, dia hendak buat apa pun, bagi dialah. Kita wujudkan penguat kuasa ini untuk buat pemantauan kerana kita bernegara dan negara kita ini menuju ke arah ..... apa yang disebutkan tadi ... saya bersetuju sebenarnya, saya bersetuju bahawa Malaysia dijadikan negara Islam. Tidak ada seorang pun yang tidak setuju, tanyalah siapa pun dia setuju, tetapi dalam waktu kita mengatakan Islam Hadhari, biar ada paradigmanya, biar ada perubahan.

Misalnya kita kata Bank Islam kita ubahkan daripada bank riba kepada proses Bank Islam; kita kata Universiti Islam, kita proseskan universiti daripada tidak memperkenalkan Islam kepada memperkenalkan Islam – kurikulumnya dan berbagai-bagai lagi. Begitu juga bila kita kata negara Islam ...

**Dato' Paduka Haji Badruddin bin Amiruddin:** *Assalamualaikum Ustaz.*

**Tuan Haji Ismail bin Noh:** Kira nak bagikah ini?

**Dato' Paduka Haji Badruddin bin Amiruldin:** Ya, minta jalan.

**Tuan Haji Ismail bin Noh:** Tolong, tolong, boleh, boleh.

**Dato' Paduka Haji Badruddin bin Amiruldin:** Boleh? Terima kasih Ustaz, mudah-mudahan Tuhan panjangkan umur, murahkan rezeki Yang Berhormat. Yang Berhormat, saya ucapkan terima kasih kepada Yang Berhormat kerana yang pertamanya Yang Berhormat mengakuri bahawa Bank Islam itu telah berjaya, Universiti Islam itu telah berjaya kerana pada satu ketika dahululah .... bukan Yang Berhormat, yang lain-lain mengatakan tidak akan berjaya apabila kerajaan mencadangkan mengadakan sistem perbankan Islam di negara kita ini. Begitu juga bila ada Universiti Islam, tetapi hari ini Universiti Islam Antarabangsa kita terkenal seantero dunia.

Yang Berhormat, Islam Hadhari ini baru diperkenalkan oleh Yang Amat Berhormat Perdana Menteri. Islam itu sudah biasa, yang kita dok amalkan cuma kita hendak memperkemas lagi *approach* kita menghadapi saingan dunia yang cuba hendak menghancurkan kekuatan Islam. Umat Islam kena jadi umat yang terpelajar.

Umat Islam jangan suka mengata-ngata di antara satu sama lain, macam ustaz dengan saya, kita tidak pernah mengata. Saya tidak pernah kata Pasir Mas tidak bagus, Pasir Mas pun tidak pernah kata Jerai tak bagus, kita sahabat. Kerana apa ustaz? Kerana kita umat Islam. Kita hendakkan, kalau kita umat Islam itu baik, itu yang dinamakan kita hendak membawa minda, pemikiran umat Islam dan juga rakyat di Malaysia ini yang bukan Islam memperakui dan menerima bahawa Islam itu adalah agama yang baik.

Jadi, saya hendak minta pandangan Yang Berhormat, adakah pihak PAS boleh juga bersama-sama dengan kerajaan, bersama-sama dengan UMNO, kita ayuh bersama-sama, dayung perahu ini untuk menuju menjayakan Islam Hadhari di Malaysia sebagai sebuah negara Islam. Wabillahi Taufik. *[Ketawa]*

[Timbalan Yang di-Pertua (Datuk Lim Si Cheng) *mempengerusikan Mesyuarat*]

**Tuan Haji Ismail bin Noh:** Terima kasih, terima kasih. Saya berdiri pada petang ini pun bersama sudah ni, saya berdiri bagi pandangan ini ertinya bersama. Bersama tidak bererti kita tidur sebantol. Kadang-kadang bersama ini tidur sebantol, kadang-kadang bersama makan sekali....

**Dato' Paduka Haji Badruddin bin Amiruldin:** Saya tidak berani tidur sebantol, ustaz. *[Ketawa]*

**Tuan Haji Ismail bin Noh:** Kadang-kadang bersama ini, kita bagi pandangan, kita bagi hujah. Hujah kita, kita berhujah dahulu. Apabila tubuh Bank Islam, wujudkan Bank Islam kita bagi pandangan, kita bagi cadangan. Allahyarham Profesor Zulkifli Mohammad di antara orang pertama bagi cadangan untuk mewujudkan Universiti Islam dengan tertubuhnya Kolej Islam di waktu itu. Dan, beliau juga mencadangkan supaya diwujudkan Bank Islam, ertinya kita sudah berganding untuk memberi pandangan-pandangan yang boleh membangun negara kita. Bukan erti PAS ini benci kepada negara, sebagaimana Yang Berhormat bagi Tanah Merah tadi hentam Kelantan. Marah kepada kerajaan Kelantan, sepatutnya dia tidak boleh beritahu di sini.

Kita sebagai anak Kelantan, sebagai anak jati Kelantan, kita tidak buka rahsia negeri kita. Bapa saya, bapa saya orang tidak berpelajaran, betul saya cerita ini. Dia tidak berpelajaran, belajar di pondok saja. Orang panggil, bolehlah tulis membaca sikit-sikit. Rumah tangga saya miskin, saya dibesarkan dari keluarga miskin, bapa saya tidak berpelajaran tetapi dia tidak cerita di kedai kopi rumah dia miskin. Dia ada maruah, dia mempunyai maruah, jati diri. Dia tidak keluar ke kedai kopi, dia kata, "Ah, saya hari ini hendak makan pun payah, nasi pun tiada, anak saya lapar." Itu, ini. Dia tidak cerita, walaupun dia dalam keadaan miskin.

Bagaimana kita wakil rakyat boleh bercakap tentang negeri kita miskin, orang Sabah tak cerita tentang negeri mereka miskin. Saya pergi di Sabah bukan satu kali, bukan dua kali, acap saya pergi di Sabah. Dan, saya tengok di Sabah lebih miskin daripada Kelantan. Tetapi orang Sabah tidak kata dia miskin, cuma dia kata tiada prasarana. Lain bahasanyakan? Sabah tidak mempunyai prasarana yang cukup, usahkan ICT, jalan raya pun tidak ada, dia kata, elektrik pun tidak ada. Bagaimana hendak guna ICT, hendak guna

telefon, hendak guna itu, hendak guna ini? Tetapi dia tidak kata Sabah termiskin? Bagaimana orang Kelantan boleh jual maruah negeri Kelantan di sini? Itu saya bagi amaran kepada wakil Tanah Merah sekejap tadi.

**Timbalan Yang di-Pertua [Datuk Lim Si Cheng]:** Yang Berhormat, Pasir Puteh.

**Dato' Haji Che Min bin Che Ahmad:** Terima kasih, Tuan Yang di-Pertua. Yang Berhormat bagi Pasir Mas, kalau Yang Berhormat bagi Pasir Mas belajar barangkali tinggi, terima atau tidak kaedahnya istilah '*Ummati Rahmah*'? Selisih pendapat, pandangan itu memberi rahmat, bukan '*Taffaruk*'. Saya lihat apabila Yang Berhormat bagi Tanah Merah bercakap, Yang Berhormat bagi Jerai bercakap, Yang Berhormat bagi Pasir Mas jawab balik, nampaknya bukan '*Ikhtilaf*', itu adalah '*Taffaruk*', erti berpecah pendapat, membawa kerugian.

Yang keduanya, Yang Berhormat bagi Tanah Merah sebut tadi, kalau saya ada pagi pun, saya bangun juga. Kita tidak mahu mengusik bencana alam kalau Yang Berhormat bagi Pasir Mas tahu, bencana alam berlaku kerana sebab tangan manusia. *Tsunami* berlaku sebab tangan manusia, Allah hendak turunkan satu bala, ia mesti ada sebab, sebab itu membalak secara yang tidak ikut peraturan adalah akan kena bala. Itu hari kita kena sudah, banjir lumpur, sekerat lutut, sampai ke dalam masjid. Itu *warning* Allah.

Maka, saya rasa setuju atau tidak Yang Berhormat bagi Pasir Mas, kita berhenti dahulu membalak ini, walaupun diberi lesen sudah, kalau dia tidak ikut peraturan, setuju atau tidak? Terima kasih.

**Tuan Haji Ismail bin Noh:** Terima kasih kepada sahabat saya daripada Pasir Puteh. Ada dua perkara yang disebut oleh Pasir Puteh. Pertama sekali istilah '*Ikhtilaf Ummati Rahmatu*', perbezaan pandangan. Tetapi saya tengok daripada Yang Berhormat bagi Tanah Merah bukan perbezaan pandangan, menghina. Berbeza pandangan dengan menghina lain. Ucapan daripada Yang Berhormat bagi Tanah Merah tadi, di waktu dia berucap, saya ada di sini, saya bangun tiga kali dia tidak benarkan. Khalayak boleh saksikan, bila saya tidak ada dan kawan-kawan saya tidak ada, dia ambil kesempatan, dia hentam sungguh, disokong oleh Ketereh, disokong oleh yang lain. Saya kata inilah wakil rakyat PAS tidak ada seorang, kami pergi sembahyang, pergi makan. Tidak nafikan bahawa tuan-tuan juga pergi sembahyang, pergi makan. Tetapi jangan ambil kesempatan itu hentam orang yang tidak ada di Dewan, itu dipanggil mengumpat. Biar kami ada di Dewan kemudian hentamlah, kami boleh jawab. Itu baru '*Adallah*', baru adil. Hentam kami tetapi kami tidak ada, bagaimana? Saya hendak jawab di tempat makan, nanti orang kata tidak siuman pula, saya tengah makan.

**Dato' Paduka Haji Badruddin bin Amiruldin:** Ustaz!

**Tuan Haji Ismail bin Noh:** Nanti satu lagi, hendak habiskan yang ini.

**Dato' Paduka Haji Badruddin bin Amiruldin:** Tidak bolehkah?

**Tuan Haji Ismail bin Noh:** Satu lagi. Dan, yang kedua, bencana alam yang berlaku. Kita tidak nafikan bahawa Kelantan bukan sahaja di waktu PAS memerintah, sebelum Jepun pun berlaku bencana alam. Hanya tiap-tiap tahun, kalau 'reti gete'. Ha! ini bahasa orang Kelantan Tolong reti 'gete'. Kelantan ini ia terdedah dengan angin monsun yang datang daripada Laut China, sama ada zaman PAS memerintah, zaman Inggeris memerintah, zaman Jepun memerintah, zaman Siam memerintah, tiap-tiap tahun berlaku kerana sudah memang takdir Allah S.W.T., sudah begitu sudah, "*Sunnahtullah Fil Alam*", Sunnah Allah di muka bumi Dia.

Di Kuala Lumpur ini, yang tidak ada balak, tidak ada apa-apa, banjir tiap-tiap hari, kelmarin dua, tiga hari banjir kilat. Di Kuala Lumpur ini segala-galanya ada, Tuan Yang di-Pertua, di Kuala Lumpur. Pakarnya ada, orang hebat-hebat duduk di Kuala Lumpur belaka, cerdik pandai duduk di Kuala Lumpur, banjir dua jam penuh bandar. Hendak kata macam mana?

Katalah Kelantan ini tidak ada orang bijak, tiada intelektual sana, tokangnya tidak baik, apanya tidak baik, sepuluh tahun sekali, dua puluh tahun sekali banjir. Dua puluh

tahun banjir baru ini, baru kena baru ini. Kuala Lumpur tiap-tiap kali banjir, tidak membalak pun. Satu. Yang kedua pulanya...

**Dato' Haji Che Min bin Che Ahmad:** [Bangun]

**Tuan Haji Ismail bin Noh:** Duduk dahulu, duduk Pasir Puteh

**Dato' Haji Che Min bin Che Ahmad:** Hendak betulkan sedikit saja. Fasal sedap tadi.

**Tuan Haji Ismail bin Noh:** Duduk dahulu, sebentar. Sementara itu duduk dahulu. Dikaitkan masalah pembalakan yang tidak terurus. Sebenarnya isu ini untuk menutup Selangor sebenarnya, orang tahu semua. Semua masyarakat tahu, cuma tidak berani hendak bercakap di sini sahaja. Kami wakil pembangkang yang boleh bercakap di sini. Hendak tutup hal Selangor, hendak tutup hal Pahang, hendak tutup negeri-negeri lain. Negeri-negeri lain curi balak, botak sudah bukit, Kedah hendak tutup, tutup cari isu, besar dalam surat khabar *Utusan Malaysia*.

Sebenarnya hendak tutup kes-kes, kita tahu belaka, kita mengaji. Saya mengaji, tuan-tuan, Yang Berhormat-Yang Berhormat mengaji dan pegawai-pegawai kita mengaji. Hendak menari depan orang buta bolehlah, hendak menari depan orang celik tidak boleh. Hendak tutup kes yang dia punya, kes di Selangor begitu hebat sekali, hampir-hampir menggagalkan pemerintahan negeri Selangor. Di Kedah yang kita dengar baru-baru ini, berbagai-bagai lagi, hendak tutup itu, bawa yang Kelantan. Yang Kelantan tidak besar sangat, kalaulah kesalahan ini berlaku, saya rasa BPR ada, BPR ada, Polis ada. Mereka hari-hari tengok fail Kelantan. Hendak tengok bagaimana pengurusan balak, pengurusan hutan, pengurusan itu, pengurusan ini, ada BPR, ada polis, ada kawalan, ada itu, kami parti pembangkang terdedah. Tok Guru Nik Aziz kata, kalaulah sesiapa sahaja yang melakukan kesalahan di negeri Kelantan, sila BPR masuk. Tok Guru Nik Aziz buka pintu. Tidak payah bincang di sini benda itu kalau betul. Kalau betul benda ini berlaku sungguh tidak mempunyai, tidak melalui prosedur pembalakan sebenar yang sah. Benda ini tidak boleh dikaitkan dengan bencana alam, kita tengok bila Allah S.W.T. hendak ajar dia, ataupun hendak cuba dia, ataupun hendak bala dia ataupun hendak apa dia.

Kadang-kadang orang sembahyang pun sakit, orang sembahyang pun kena lumpuh, bukan bererti Allah benci kepada dia. Tetapi hendak tengok setinggi mana kesabaran yang ada pada dia. Nabi Muhammad S.A.W., siapa lebih baik daripada Nabi Muhammad S.A.W., dalam pandangan kita, orang Islam, Nabi Muhammad sakit tidak sedarkan diri, apakah Allah benci pada dia? Tidak, Allah tidak benci pada dia.

**Timbalan Yang di-Pertua [Datuk Lim Si Cheng]:** Yang Berhormat, Pasir Puteh.

**Dato' Haji Che Min bin Che Ahmad:** Kita hendak sokong bukan hendak melawan, abang saya. Terima kasih, Tuan Yang di-Pertua, Yang Berhormat bagi Pasir Mas. Kita sikap pemikiran ada dua sahaja. Satunya *logical mind*, yang kedua ialah *emotional mind*.

*Logical mind*, bercakap mesti ada *research* (R&D). Dia mesti ada fakta. Tidak tepat akan disiasat, tetapi ada fakta. Tetapi orang yang *emotional mind* dia bercakap dia marah. Kalau kita kata kerajaan hendak buat Bank Islam, PAS bercakap 30 tahun dulu tidak boleh buat, sebab dia tukang bercakap. Tetapi yang membuat ialah UMNO, betul tak? UMNO – Barisan Nasional. Tepuklah sikit. Yang saya kata tadi banjir yang berlaku di Kelantan itu, memang tiap-tiap tahun bulan November dan Disember banjir, tetapi baru-baru ini bukan banjir sebarang banjir. Ia banjir lumpur masuk sampai ke dalam bandar Kota Bharu sekerat lutut sehingga berapa bulan untuk bersih. Banjir ini adalah kerana membalak tidak mengikut saluran dan tidak buat satu saluran. Dia hendak ambil untung cepat tidak buat parit, maka ia akan hanyut pergi dalam bandar Kota Bharu. Itulah ertinya *logical mind* yang saya sebut tadi. Minta maaf Yang Berhormat Pasir Mas, tekan itu hendak bersemangat sikit.

**Timbalan Yang di-Pertua [Datuk Lim Si Cheng]:** Yang Berhormat Pasir Mas boleh gulung.

**Tuan Haji Ismail bin Noh:** Baru hendak masuk baru mukadimah.

**Timbalan Yang di-Pertua [Datuk Lim Si Cheng]:** Sudah lama.

**Tuan Haji Ismail bin Noh:** Bagi saya setengah jam.

**Timbalan Yang di-Pertua [Datuk Lim Si Cheng]:** Memang sudah setengah jam.

**Tuan Haji Ismail bin Noh:** Sikit. Kalau saya hendak bincang masalah itu baik Tsumani. Tsunami itu berlaku kerana pembalakan ke? Bukan pembalakan. Tsunami itu berlaku apakah kerana perparitan tidak betul? Bukan kerana perparitan. Ini takdir mengatasi usaha kita. Kita sudah berusaha, tetapi inilah qada' dan qadar Allah SWT yang kita pelajari selama ini. Saya tinggalkan itu. Kemudian kita pergi lagi kepada, saya ada dua tiga *point* yang besar Tuan Yang di-Pertua.

Allah SWT bagi kepada kita dan negara umat Islam ini negara kaya, bahan galian cukup banyak, laluan antarabangsa, rakyatnya, tenaga buruhnya ramai, tetapi malangnya kita tidak mengambil kesempatan daripada tenaga buruh yang begitu ramai. Oleh kerana Singapura menawarkan tangga gaji dua kali ganda daripada di Malaysia kepada buruh, maka orang Kelantan yang cerdik pergi ke Singapura. Orang Kelantan tidak pilih gaji RM40 sebulan sehari tetapi dia pilih RM80 sehari. Dia pergi ke Singapura maka jangan marah rakyat Kelantan yang pergi ke Singapura, kerana dia tahu bahawa Singapura dapat menawarkan gaji dia dua kali ganda daripada gaji yang diberi oleh majikan-majikan mereka di Malaysia sendiri. Cuba kita di negara ini berfikir bagaimana untuk menyamai setidaknya kita boleh memberi ganjaran hampir sama dengan Singapura, pasti rakyat kita tidak akan ke Singapura.

Yang kedua, kalau kita jaga sungguh-sungguh rakyat kita di sini, maka rakyat kita tidak akan pergi jauh meninggalkan kampung halaman mereka. Tetapi oleh kerana kita tidak jaga, kita tidak mengambil kesempatan daripada mereka akhir sekali mereka lari dari negara kita dan mereka pergi membuat pembangunan di negara-negara jiran mereka. Kita tidak boleh memarahi mereka.

Yang ketiga, saya hendak sebutkan di sini iaitu kita selalu kaitkan kedatangan buruh asing ini dengan jenayah-jenayah besar. Perlu kerajaan mengambil suatu inisiatif, satu daya usaha kita di mana buruh-buruh dari Bangladesh dan Indonesia, sepatutnya Kerajaan Malaysia ini mensyaratkan ataupun mengutamakan buruh-buruh yang datang ke sini suami isteri. Kita jangan beri sangat masuk yang *person* yang seorang diri - bujang. Bangladesh ini wajahnya elok sedikit daripada kita orang Melayu, datang ke sini dengan membawa duit yang banyak. Makan benda-benda yang berzat, daging, sayur dan bervitamin, maka nafsu mereka pun tinggi. Dalam keadaan begitu dia melihat gadis kita terdedah.

**Dato' Paduka Haji Badruddin bin Amiruddin:** Yang Berhormat, assalamualaikum.

**Tuan Haji Ismail bin Noh:** Saya telah mempunyai masa. Gadis kita ini terdedah. Bila dalam keadaan begitu maka tidak ada pilihan lain. Waktu itu dia tidak berfikir sebagai insan sebagai manusia, tetapi berfikir sebagai haiwan mencari mangsa. Maka dia rogol, lepas rogol bunuh lepas bunuh bakar. Cuba kita bagi syarat dia ke sini secara berpasangan. Isterinya menjadi amah di rumah si polan dan dia bekerja sebagai buruh kasar dan malam dia tidur dengan isterinya, dapat melepaskan hawa nafsunya dengan isterinya dan pelbagai lagi. Tetapi kalau dia datang seorang dia hendak melepaskan hawa nafsunya di mana? Inilah yang saya kata bahawa kerajaan tidak tepat di dalam menyelesaikan masalah, tidak bersungguh-sungguh.

Kemudian buruh-buruh yang beragama Islam seminggu sekali kita hantar JAKIM untuk memberi kesedaran agama, tuan-tuan datang dari jauh untuk mencari rezeki yang halal. Bangladesh ini orang Islam begitu juga orang-orang Indonesia. Tak kan mereka tidak menerima pengajian Islam. Tetapi tidak ada usaha lepas sahaja mereka begitu. Dia hendak bunuh, dia hendak pukul, dia hendak jadi gengsterisme, dia hendak jadi itu hendak jadi ini - biar dia. Saya rasa tidak betul sebagai sesama Islam yang kita letakkan bahawa Islam Hadhari sebentar tadi. Oleh yang demikian, saya mencadangkan supaya kerajaan mengutamakan suami isteri yang hendak datang ke sini. Isterinya bekerja sebagai amah dan tidak dibenarkan duduk di rumah tuannya hanya sekadar jam 11.00 atau 12.00 malam balik bersama dengan suami maka selesai masalah. Banyak menyelesaikan masalah.

Yang keempat, kita melihat bahawa tenaga kita terbangun. Sewaktu saya belajar di Mesir, di Iraq dan Saudi Arabia, saya tengok orang-orang buta mereka diberi kursus Al-Quran. Baguslah sekarang ini kerajaan kita dengan J-QAF dan berbagai-bagai lagi, tetapi kita jangan tinggalkan orang-orang buta ini. Orang buta di negara kita ini [*bercakap dalam bahasa Arab*] - dalam bilangan yang ramai. Di Kelantan, Terengganu dan Johor ramai orang-orang buta, tetapi malangnya kita tidak beri kepada mereka pengajian al-Quran. Orang-orang buta ini di antara orang-orang yang kuat ingatan. Di Mesir misalnya imam-imam yang menjadi imam di masjid-masjid kerajaan terdiri daripada kalangan orang-orang buta. Pensyarah-pensyarah universiti ramai di kalangan orang-orang buta. Kita hanya ada seorang. Tetapi di tempat dia sebahagian besar daripada imam-imam buta ini diberi gaji tidak diberi gitar. Kita di sini beri gitar - ini silap. Kita beri gitar beri gendang. Minta sedekah secara terhormat. Kita pergi ke pasar-pasar raya misalnya ada dua tiga orang ada orang buta yang bergendang minta sedekah secara terhormat. Ini memalukan negara. Padahal orang-orang macam ini kalau kita kursuskan al-Quran kepada mereka, hafal al-Quran...

**Timbalan Yang di-Pertua [Datuk Lim Si Cheng]:** Yang Berhormat masa sudah cukup.

**Tuan Haji Ismail bin Noh:** ... barangkali kita boleh memanfaatkan mereka kepada negara kita. Tidak menjadi peminta-peminta sedekah menambahkan lagi dosa demi dosa yang akan ditanggung oleh negara di waktu itu. Itulah ucapan saya dalam keadaan yang kelam-kabut dan tergesa-gesa, tetapi itulah saya rasa di antara apa yang dapat saya sebutkan hari ini. Saya mengucapkan terima kasih kepada Tuan Yang di-Pertua dan terima kasih kepada sahabat-sahabat yang telah sama-sama memberi pandangan kepada saya. Sekian, terima kasih.

**Timbalan Yang di-Pertua [Datuk Lim Si Cheng]:** Yang Berhormat Arau.

**4.08 ptg.**

**Dato' Seri Diraja Syed Razlan ibni Syed Putra Jamalullail [Arau]:** Terima kasih Tuan Yang di-Pertua. Saya ingin membahaskan atas Titah Ucapan Seri Paduka Yang di-Pertuan Agung yang telah dibentangkan pada 21 Mac 2005 yang lalu.

Pada tahun ini sekali lagi pertanian telah disebut di dalam Titah Ucapan Baginda. Ini jelas menunjukkan betapa pentingnya sektor pertanian ini di dalam pembangunan negara. Sumber makanan adalah penting kepada negara tambahan sekali setelah populasi kita meningkat semakin lama. Maka sumber makanan akan tetap menjadi isu keselamatan kepada negara kita. Di dalam aspek ini kita perlu mengorak langkah menuju ke arah mengurangkan pergantungan kita kepada sumber makanan yang diimport. Ini untuk mengelakkan kita dari kemungkinan diugut oleh kuasa-kuasa luar yang boleh menggunakan sumber makanan sebagai senjata ekonomi.

Berbalik kepada petani-petani kita, secara amnya purata umur mereka menjadi semakin lanjut, kemungkinan ini disebabkan generasi muda kita merasakan bidang pertanian ini tidak mampu memberikan pulangan yang lumayan. Anggapan ini semestinya salah.

Tuan Yang di-Pertua, bidang pertanian mampu menjana pulangan yang lumayan jika kita mengamalkan teknik-teknik teknologi pertanian yang betul dan terkini. Justeru, ini akan meningkatkan kecekapan penghasilan produk pertanian dan meningkatkan daya saing barangan pertanian keluaran kita di pasaran serantau. Kita mesti mencipta minat di kalangan generasi muda untuk menerokai bidang ini. Di antara kaedah yang mungkin ialah dengan menggiatkan penggunaan media massa untuk menarik minat generasi muda ke bidang pertanian.

Kisah-kisah kejayaan di bidang ini juga boleh mempengaruhi masyarakat, begitu juga penglibatan positif pihak kerajaan dan sokongan dari bank-bank tempatan untuk..

**Dr. Tan Seng Giaw:** [*Bangun*]

**Timbalan Yang di-Pertua [Datuk Lim Si Cheng]:** Yang Berhormat bagi Kepong bangun.

**Dato' Seri Diraja Syed Razlan ibni Syed Putra Jamalullai:** [Ketawa] Silakan.

**Dr. Tan Seng Giaw:** Tuan Yang di-Pertua, penjelasan. Saya pun berminat dengan apa yang dibangkitkan oleh Yang Berhormat bagi Arau tadi mengenai pertanian moden, pertanian berkelompok. Adakah Yang Berhormat mencadangkan supaya kita adakan *genetic modified* food untuk menambahkan pengeluaran dan sebagainya. Kalau ada apakah kaedah yang kita hendak buat untuk mengadakan *genetic modified food*?

**Dato' Seri Diraja Syed Razlan ibni Syed Putra Jamalullai:** Tuan Yang di-Pertua, saya mengucapkan terima kasih kepada Yang Berhormat bagi Kepong. Sebenarnya saya memang tidak sokong tentang *Genetic modified food*.

**Dr. Tan Seng Giaw:** GMF

**Dato' Seri Diraja Syed Razlan ibni Syed Putra Jamalullai:** GMF, ya macam IMF juga. Memang saya tidak sokong itu dan kalau boleh kita elakkan daripada GMF ini. Boleh saya teruskan? Terima kasih.

**Timbalan Yang di-Pertua [Datuk Lim Si Cheng]:** Yang Berhormat tanya dia atau tanya saya?

**Dato' Seri Diraja Syed Razlan ibni Syed Putra Jamalullai:** Saya tanya kot, kot saya belum selesai lagi masalah dia ini. Kalau hendak *modify* pun mungkin saya hendak *modify* Yang Berhormat.

**Timbalan Yang di-Pertua [Datuk Lim Si Cheng]:** Kalau hendak *modify* pun, buat dua Dewanlah.

**Dato' Seri Diraja Syed Razlan ibni Syed Putra Jamalullai:** Tuan Yang di-Pertua, dalam erti kata yang lain seharusnya mewujudkan dengan izin *gentlemen farmers* yang mahir menggunakan komputer dan pelbagai kaedah pertanian moden untuk mencapai matlamat kita di dalam penghasilan sumber makanan. Industri perladangan juga telah melaksanakan peranan mereka dengan menyemarakkan sektor ini. Namun, amalan-amalan perladangan yang lama mesti ditinggalkan dan digantikan dengan kaedah baru untuk memenuhi permintaan pasaran di masa hadapan.

Begitu juga usaha-usaha pengembangan yang dijalankan 20 atau 30 tahun yang lalu oleh agensi-agensi kerajaan telah berjaya menepati golongan sasarannya sama ada petani, nelayan ataupun masyarakat desa. Ini keberkesananannya diragui. Kalau tidak, kita tidak akan mengalami kekosongan pada peringkat umur produktif di dalam sektor ini dan perikanan serta juga ketinggalan dalam maklumat teknologi dan teknik terbaru di dalam bidang pertanian. Ini menyedarkan kita betapa pentingnya perkhidmatan pengembangan untuk pembangunan negara terutamanya di dalam bidang pertanian.

Justeru itu, pengajian perkembangan mestilah ditingkatkan dan penekanan adalah untuk pembangunan dua hala, bukan hanya sehalu daripada atas ke bawah. Setiap agensi juga...

**Timbalan Yang di-Pertua [Datuk Lim Si Cheng]:** Yang Berhormat Arau, Yang Berhormat bagi Sabak Bernam bangun.

**Dato' Seri Diraja Syed Razlan ibni Syed Putra Jamalullai:** Silakan Yang Berhormat Sabak Bernam.

**Dato' Haji Mat Yasir bin Haji Ikhsan:** Terima kasih Tuan Yang di-Pertua dan Yang Berhormat bagi Arau. Apabila Yang Berhormat menyebut mengenai pertanian, saya sebenarnya dapat melihat petani-petani muda kita sekarang ramai yang berjaya dan daripada perusahaan mereka itu, mereka telah mendapat sumber pendapatan yang cukup baik. Apa pandangan Yang Berhormat, sekarang ini kita ramai siswazah yang menganggur? Siswazah ini maknanya orang yang pandai, orang yang berilmu. Kalau hendak diambil di Sabak Bernam ada dua orang *engineer* sebenarnya yang menanam jagung, pendapatan dia sebulan ialah RM5,000 ke atas. Apa pandangan Yang Berhormat

kalau siswazah menganggur yang ramai ini diberikan sedikit latihan dan selepas itu kita jadikan mereka usahawan tani. Apa pandangan Yang Berhormat?

**Dato' Seri Diraja Syed Razlan ibni Syed Putra Jamalullai:** Pandangan itu memang cukup baik. Tetapi idea ini bukanlah idea yang baru. Sudah lama kerajaan hulur tangan kepada siswazah-siswazah, graduan-graduan. Tetapi apabila sampai masanya sekejap sahaja. Lepas itu bungkus. Ini bukan hanya di Selangor, di Perlis pun sama juga tambah sekali di Kedah.

**Dato' Paduka Haji Badruddin bin Amiruldin:** Mahu penjelasan Yang Berhormat.

**Timbalan Yang di-Pertua [Datuk Lim Si Cheng]:** Yang Berhormat

**Dato' Seri Diraja Syed Razlan ibni Syed Putra Jamalullai:** Yang Berhormat, saya belum bagi lagi.

**Timbalan Yang di-Pertua [Datuk Lim Si Cheng]:** Habis itu

**Dato' Seri Diraja Syed Razlan ibni Syed Putra Jamalullai:** Saya belum lagi bagi laluan.

**Timbalan Yang di-Pertua [Datuk Lim Si Cheng]:** Yalah, Yang Berhormat belum bagi laluan, jangan cakap apa-apa.

**Dato' Paduka Haji Badruddin bin Amiruldin:** Penjelasan Yang Berhormat.

**Timbalan Yang di-Pertua [Datuk Lim Si Cheng]:** Bolehkah Yang Berhormat?

**Dato' Paduka Haji Badruddin bin Amiruldin:** Terima kasih Yang Berhormat bagi Arau. Saya bersetuju dengan pandangan Yang Berhormat bagi Sabak Bernam, Yang Berhormat pun bersetuju dengan pandangan Yang Berhormat bagi Sabak Bernam. Saya pun bersetuju dengan pandangan Yang Berhormat bagi Arau bahawa kita menuju ke arah memodenkan pertanian kita. Tetapi sampai masa kita Yang Berhormat Arau, adakah Yang Berhormat bersetuju dengan saya masih ada lagi anak-anak muda kita yang berjaya dalam bidang pendidikan yang *qualified*, yang walaupun mereka mengambil bidang pertanian, tetapi tidak mahu menjadi 'pak tani' kerana mereka beranggapan menjadi seorang 'pak tani' itu adalah lekeh, foman, tidak standard kerana dia universiti *graduate* dia mesti pakai *tie*, kot macam kita ini. Itu pandangan dia orang.

Jadi, bolehkah Yang Berhormat bersetuju atau tidak bersetuju kita kena *brain washkan* mereka ini dalam Rancangan Malaysia Ke-9 supaya *graduate-graduate* universiti ini balik ke kampung, balik ke desa melibatkan diri dalam bidang pertanian seperti Yang Berhormat cadangkan. Bersetuju Yang Berhormat?

**Dato' Seri Diraja Syed Razlan ibni Syed Putra Jamalullai:** Terima kasih Yang Berhormat bagi Jerai. Sebenarnya Tuan Yang di-Pertua, Yang Berhormat bagi Jerai sudah mengambil ucapan saya.

[Ketawa]

**Timbalan Yang di-Pertua [Datuk Lim Si Cheng]:** Berapa minit? Dua minit?

**Dato' Seri Diraja Syed Razlan ibni Syed Putra Jamalullai:** Dua minit. Terima kasih. Saya bersetujulah. Saya sambung balik Tuan Yang di-Pertua. Pengetahuan menjurus kepada pengumpulan maklumat dan maklumat yang tepat merupakan kuasa. Kita mestilah pandai memanfaatkan kuasa ini, jika tidak samalah seperti kita tidak membuat apa-apa penyelidikan. Berkaitan dengan penanaman padi pula, membekal petani-petani dengan benih padi yang terbaik dan berkemampuan penghasilan yang tinggi sahaja tidak akan banyak membantu bahkan pengetahuan dan amalan pengurusan kualiti tanah mesti diterapkan. Inilah asas sebenarnya untuk perkembangan pertanian. Jadual pengairan juga mesti dikemaskinikan. Pengurusan pengairan bukan hanya menyumbang kepada tumbesaran tanaman tetapi juga pengawalan rumpai.

Ini akan membantu kita mengurangkan penggunaan racun-racun rumpai yang boleh merosakkan persekitaran alam. Kilang-kilang padi BERNAS kebanyakannya melebihi usia 20 tahun. Kecekapan pengeluarannya diragui. Mampukah ia menangani keperluan untuk memproses padi seandainya kita berjaya meningkatkan penghasilan

petani-petani kita kepada 10 tan sehektar semusim. Kita juga mesti mencari jalan untuk mengembangkan program-program insurans untuk petani-petani dan nelayan-nelayan. Tragedi Tsunami cukup sebagai pengajaran kepada kita. Memandangkan sehingga kini masih terdapat nelayan-nelayan kita yang belum mampu turun ke laut kerana masalah modal untuk memperbaiki bot yang rosak.

Dengan kenaikan harga bahan petroleum dan bahan asas petroleum, baja-baja kimia juga mengalami kenaikan harga. Jadi inilah masanya kita meningkatkan kesuburan tanah supaya kita boleh mengurangkan penggunaan baja-baja kimia. Kita mesti menggalakkan penggunaan bahan-bahan organik tempatan yang berkualiti dan setanding atau melebihi piawaian antarabangsa serta mampu meningkatkan penghasilan.

Tuan Yang di-Pertua, kita semua menyokong saya percaya langkah kerajaan mengenakan duti yang tinggi ke atas bahan berasaskan tembakau untuk mengekang tabiat merokok. Ini kesan positifnya telah diperolehi. Kenaikan harga rokok telah mengurangkan permintaannya. Kuota penanam tembakau telah turun. Kita berharap penurunan permintaan ini disebabkan perokok-perokok telah insaf dan meninggalkan tabiat itu, bukan kerana perokok-perokok beralih kepada rokok seludup atau rokok daun nipah yang tidak dicukai.

**Tuan Haji Mohd. Said bin Yusof:** *[Bangun]*

**Timbalan Yang di-Pertua [Datuk Lim Si Cheng]:** Yang Berhormat, Yang Berhormat bagi Jasin bangun.

**Dato' Seri Diraja Syed Razlan ibni Syed Putra Jamalullail:** Jasin.

**Timbalan Yang di-Pertua [Datuk Lim Si Cheng]:** Dia yang merokok.

**Dato' Seri Diraja Syed Razlan ibni Syed Putra Jamalullail:** Sila, sila. *[Ketawa]*

**Tuan Haji Mohd. Said bin Yusof:** Terima kasih sahabat saya, Yang Berhormat bagi Arau. Saya tengok Yang Berhormat bagi Arau ini marah sangat kepada orang yang merokok. Janganlah hendak marah. Dahulu Yang Berhormat bagi Arau belajar Matematik, saya ini belajar Ilmu Hisab. *[Ketawa]*

Saya hendak tanya Yang Berhormat bagi Arau, adakah Yang Berhormat bagi Arau dapat tahu pada hari ini, walaupun dinaikkan harga rokok yang begitu tinggi, tetapi kuantiti rokok yang dikeluarkan di dalam negara ini tidak terjejas, malah pada hari ini perang harga rokok sedang berlaku. Pall Mall yang biasa dahulu RM6.50, sekarang sudah turun kepada RM4.50. Begitu juga dengan *company* yang lain. Jadi antara sedar atau tidak, Yang Berhormat bagi Arau, bahawa apa pun yang dibuat oleh kerajaan, orang berniaga tembakau ini dia mempunyai jalan bagaimana hendak menarik minat penagih-penagih rokok ini agar terus merokok dan kuantiti seperti yang saya katakan tadi, kuantiti tembakau dalam negara kita tidak turun akibat daripada kenaikan rokok. Sila Yang Berhormat bagi Arau.

**Dato' Seri Diraja Syed Razlan ibni Syed Putra Jamalullail:** Terima kasih Yang Berhormat bagi Jasin. Sebenarnya yang saya cakap ini oleh kerana saya kasihan kepada Yang Berhormat. Saya anggapkan Yang Berhormat ini sebagai sahabat saya. Walau bagaimanapun, yang jadi harga turun itu adalah bukan oleh kerana import bahan mentah ialah daripada luar negeri yang lebih murah daripada keluaran Malaysia. Kalau Yang Berhormat tunggu sebentar, baru nampak gambaran yang saya akan bagi.

Yang jelasnya penurunan kuota ini telah menjejaskan kehidupan penanam-penanam tembakau di negara kita. Sama ada kita sedar atau tidak terdapat 53,432 ahli keluarga yang terlibat di dalam industri yang bernilai RM160 juta setahun di dalam bidang industri tembakau ini. Kebiasaannya tembakau ditanam di atas tanah yang tidak subur, di mana susah untuk mendapatkan pulangan yang baik daripada tanaman lain. Kita mesti mengucapkan tahniah dan penghargaan kepada pihak Lembaga Tembakau Negara juga MARDI yang gigih memperkenalkan tanaman alternatif untuk penanam-penanam tembakau di dalam mengharungi kehidupan yang mencabar.

Di antara tanaman-tanaman alternatif yang dikaji sekarang untuk diimplementasikan ialah kenaf, jagung, padi dan insya-Allah, 'stevia', dan juga integrasi

tanaman dengan pemeliharaan kambing. Kebiasaannya kita selalu pandang ala negatif kepada tumbuhan tembakau ini kerana ramai diserang dengan kanser akibat penggunaan tembakau, ramai sudah hilang nyawa akibat penggunaan tembakau. Tetapi ada juga mengikut penyelidikan terbaru di mana tembakau digunakan untuk membuat antibiotik, vaksin dan lain-lain. Ada juga produk untuk mencegah rambut daripada luruh akibat *cancer treatment, chemotherapy*.

**Dato' Paduka Haji Badruddin bin Amiruldin:** Penjelasan.

**Dato' Seri Diraja Syed Razlan ibni Syed Putra Jamalullail:** Ya, sila Yang Berhormat bagi Jerai.

**Timbalan Yang di-Pertua [Datuk Lim Si Cheng]:** Yang Berhormat bagi Jerai, masa untuk Yang Berhormat bagi Arau tidak banyak lagi, tidak panjang lagi.

**Dato' Paduka Haji Badruddin bin Amiruldin:** Ini masalah hendak tolong orang tanam tembakau daripada menghisap dan daripada mengguna. Itu dua beza, Tuan Yang di-Pertua. Yang Yang Berhormat bagi Jasin menghisap dan Yang Berhormat bagi Arau mengguna dan saya paling tertarik hati apabila guna tembakau supaya rambut tidak gugur. *[Ketawa]* Adakah Yang Berhormat bagi Arau akan menggunakan tembakau untuk menambah balik rambut yang gugur? *[Ketawa]*

**Dato' Seri Diraja Syed Razlan ibni Syed Putra Jamalullail:** Terima kasih Yang Berhormat bagi Jerai. Kalau Yang Berhormat bagi Jerai dengar betul-betul, tadi saya kata mencegah rambut daripada luruh akibat *cancer treatment*, bukan hendak lumur sahaja atas kepala. *[Ketawa]* Jadi saya sambung balik.

Kita pun sudah buat penyelidikan di mana protein daripada tembakau yang nama, *fraction* satu dan dua boleh digunakan di dalam pembuatan krim tangan, syampu dan makanan protein bar, dengan izin. Daripada University of Central Florida, saintis-saintis sudah lama menggunakan *bio polymers* daripada *chloroplast* dari tembakau untuk membuat plastik mesra alam atau *bio degradable plastic*, dengan izin.

Tuan Yang di-Pertua, di dalam bidang sukan pula kita telah mengenal pasti bidang sukan yang mampu kita bersaing di peringkat antarabangsa kerana tidak bergantung kepada fizikal peserta untuk bertanding. Semestinya di dalam masa yang terdekat ini kita tidak mampu menjuarai Piala Dunia Ragbi. Di sebalik itu sukan ragbi adalah satu sukan yang mampu membina kepimpinan, keperibadian tinggi, semangat berpasukan dan bekerjasama semasa menghadapi tekanan. Dalam bahasa Inggeris, dengan izin, "*it is a game of character building*". Dengan ini saya menyeru pihak kerajaan menggiatkan promosi sukan ragbi terutama di sekolah-sekolah berasrama.

**Dato' Raja Ahmad Zainuddin bin Raja Haji Omar:** *[Bangun]*

**Timbalan Yang di-Pertua [Datuk Lim Si Cheng]:** Yang Berhormat, Yang Berhormat bagi Larut.

**Dato' Seri Diraja Syed Razlan ibni Syed Putra Jamalullail:** Eh, sukan ragbi? Silakan.

**Dato' Raja Ahmad Zainuddin bin Raja Haji Omar:** Baik, terima kasih Yang Berhormat, tahniah sebagai Presiden Ragbi Malaysia daripada kalangan kerabat diraja yang pertama dalam sejarah. Saya hendak tanya kepada Yang Berhormat satu perkara. Kenapa sukan ragbi di Malaysia ini terutamanya, tolak New Zealand, Australia dan beberapa negara yang lain yang begitu menarik perhatian, tetapi kenapa di Malaysia kurang daya tarikan? Adakah sebab orang yang mengambil bahagian itu kerana fizikalnya besar atau ada sebab-sebab lain yang menyebabkan kurangnya minat untuk masyarakat tempatan menonton dan tertarik dengan permainan ragbi ini. Jadi, mesti ada sebabnya. Tadi Yang Berhormat minta supaya dapat dipromosikan. Jadi bila hendak dipromosikan mesti ada sebab kurang tarikan. Saya tahu ragbi ini bagus, tambah pula kalau ia dapat digalakkan lagi di kalangan remaja kita kerana daya tarikannya kurang mungkin ada sebab kenapa permainan ini tidak begitu mendapat perhatian daripada masyarakat kita terutamanya. Terima kasih.

**Dato' Seri Diraja Syed Razlan ibni Syed Putra Jamalullail:** Terima kasih Yang Berhormat bagi Larut. Sukan ragbi ini orang putih, dengan izin, "*It's a barbaric game played by gentlemen. Soccer is just gentlemen game played by barbarian.*" [Ketawa] Mereka kata, bukan saya kata ini. Mungkin saya salah. Ini di England ini, saya orang Malaysia, lain. Walau bagaimanapun, sukan ragbi ini dimainkan di sesetengah sekolah pada peringkat rendah, menjadi sukan utama di sesetengah sekolah menengah dan dimainkan di semua institusi pengajian tinggi awam sebagai simbol lelaki berkepimpinan tinggi yang *macho* macam Yang Berhormat dan sayalah. [Disampuk] [Ketawa]

Sambutan itu kurang kerana saya rasa tidak ada kesinambungan selepas institut pengajian tinggi, ia berhenti, terencat di situ sahaja. Selain daripada itu, promosi dan sokongan daripada syarikat-syarikat terhenti di situ juga, habis. Cuma satu dua syarikat sahaja yang tampil ke hadapan untuk menyokong perlawanan-perlawanan ragbi. Bola sepak tetap ada di situ walaupun kita tidak jadi juara di South East Asia pun tidak apa, badminton pun macam itu juga. Ragbi macam mana pun tidak jadi.

**Tuan Haji Idris bin Haji Haron:** [Bangun]

**Timbalan Yang di-Pertua [Datuk Lim Si Cheng]:** Yang Berhormat, Tangga Batu.

**Dato' Seri Diraja Syed Razlan ibni Syed Putera Jamalullail:** Tangga Batu pula [Ketawa]

**Tuan Haji Idris bin Haji Haron:** Terima kasih Tuan Yang di-Pertua, terima kasih Yang Berhormat bagi Arau. Saya berminat kerana saya juga adalah Presiden Persatuan Ragbi Melaka.

**Dato' Seri Diraja Syed Razlan ibni Syed Putera Jamalullail:** Aik!...

**Tuan Haji Idris bin Haji Haron:** Dahulu saya main *scrum half* untuk *the state of Malacca* dua tahun. Jadi Yang Berhormat bagi Arau, mungkin salah satu dari sebab yang kita nampak adalah prasarana untuk sukan ragbi di negara kita ini tidak setanding atau tidak cukup kompetitif berbanding dengan negara-negara yang memberikan perhatian yang tinggi kepada sukan ragbi. Sebagai contoh, hari ini kalau kita lihat padang-padang ragbi di negeri-negeri adalah cuma padang-padang yang dulunya padang-padang majlis perbandaran dan terpaksa berkongsi dengan acara-acara sukan yang lain. Tetapi mungkin juga kalau stadium-stadium bola sepak kita ini, kita *equip*kan dengan keperluan ataupun perkara-perkara yang berkaitan dengan ragbi, ia sedikit sebanyak akan dapat mempertingkatkan lagi mutu sukan ragbi negara kita. Terima kasih Tuan Yang di-Pertua.

**Dato' Seri Diraja Syed Razlan ibni Syed Putera Jamalullail:** Terima kasih Yang Berhormat bagi Tangga Batu untuk menolong saya, membantu saya di dalam bidang sukan ragbi ini. Dengan itu, saya pun minta jasa baik - Federal Territory pun tidak ada menteri, Dewan Bandaraya, juga dari negeri-negeri lain di mana satu padang khusus untuk bermain ragbi diketepikan dan ini mungkin kita minta Majlis Sukan Negara dapat bagi sokongan dengan sepenuhnya.

Saya sambungkan – jurulatih berkualiti adalah penting untuk semua jenis sukan. Bagaimana kita hendak melahirkan ahli sukan yang berwibawa jika aspek kejurulatihan kita diabaikan. Perlukah jurulatih mempunyai diploma atau ijazah untuk kelayakan mereka? Pada peringkat sekolah rendah dan menengah, apakah yang kita harapkan? Apa yang kita perlu, adalah guru-guru sukan yang berdedikasi, bukan guru-guru yang mengajar pendidikan jasmani kerana terpaksa, tetapi guru-guru sukan yang berminat di dalam sukan.

Yang Berhormat bagi Lipis pada minggu yang lepas sudah sentuh atas tajuk anggota jurulatih daripada graduan-graduan menganggur dan saya sokong atas idea beliau. Saya ingin mencadangkan supaya Kementerian Pelajaran, Kementerian Pengajian Tinggi dan Kementerian Belia dan Sukan supaya ada satu formula untuk menyerap para graduan juga mereka yang keciciran sekolah selepas tingkatan lima tetapi berminat dalam bidang kejurulatihan sukan. Cuma, mereka mesti menjalani latihan yang diiktirafkan oleh kementerian.

Tuan Yang di-Pertua, seterusnya saya ingin menarik perhatian kepada sikap penyayang dan keprihatinan kita kepada penderitaan sesama insan. Kita sedia untuk membantu dengan pelbagai penganjuran untuk meringankan beban penderitaan mangsa-mangsa bencana alam di luar negara. Saya memuji sikap ini tetapi bagaimana pula keprihatinan kita untuk meningkatkan kemudahan kepada mereka di sekeliling kita yang kurang bernasib baik khasnya insan-insan istimewa di sekeliling kita.

Terdapat lebih kurang 96,000 insan istimewa yang setiap hari bersama-sama kita bergerak mencari rezeki. Setengah dari mereka boleh memandu tetapi berapa banyak kemudahan yang kita sediakan untuk melancarkan pergerakan mereka. Pernahkah industri kereta nasional kita mereka bentuk model yang bersesuaian untuk kehendak insan-insan istimewa ini memandangkan syarikat kereta nasional telah lama beroperasi dan sudah mengeluarkan beratus-ratus ribu kereta. Bagi insan-insan istimewa yang tidak memandu, adakah sistem pengangkutan awam kita mesra pengguna kepada mereka? Begitu juga bangunan-bangunan yang kita bina, adakah ia memberi keselesaan kepada mereka? Akta-akta berkaitan kemudahan untuk insan istimewa di dalam mereka bentuk bangunan awam ada memberi garis panduan tetapi adakah penguatkuasaannya setanding untuk memberikan keselesaan kepada insan-insan istimewa ini?

Tuan Yang di-Pertua, insan-insan istimewa ini tidak mengharapkan simpati dari kita tetapi mereka memerlukan kita memahami kehendak mereka dan usaha ikhlas kita untuk membantu mereka di dalam menjalani kehidupan mereka termasuk juga sekolah *special* untuk insan-insan istimewa yang dilengkapi dengan cukup alat dan guru yang terlatih khusus untuk sekolah ini.

Tuan Yang di-Pertua, saya ubah tajuk, adakah satu hari di mana kerajaan akan mengenakan cukai jalan kepada pengguna jalan raya di dalam harga petrol dan diesel? Ini akan menghapuskan aktiviti membuat *sticker* atau pelekat cukai jalan palsu dan semestinya adil kerana mereka yang banyak menggunakan petrol atau diesel akan membayar cukai jalan yang lebih – ini cuma satu cadangan sahaja.

Tuan Yang di-Pertua, sekarang pintu-pintu sempadan di Perlis dan Kedah ditutup pada jam sepuluh malam. Maka ramai yang tidak sempat hendak balik ke rumah mereka bila pintu sempadan ini tutup. Bila sudah tutup, mereka tidak boleh masuk balik ke Malaysia, nampaklah mereka melilau-lilau pukul 11.00 atau 12.00 malam di negeri jiran. Saya cukup kasihan mereka sebab itulah saya ingin mencadangkan bahawa pintu-pintu sempadan kita ini haruslah beroperasi 24 jam. Ini akan menggalakkan perdagangan dua hala di samping memastikan warga kita pulang ke Malaysia setelah tamat urusan dengan selamat. Tidak begitu Yang Berhormat bagi Jerai?

**Dato' Paduka Haji Badruddin bin Amiruldin:** Tuan Yang di-Pertua, saya tidak bersetuju fasal belah malam ini orang sudah tidak berniaga, orang berniaga hak lain. Hak siang ini berniaga betul. Jadi adakah Yang Berhormat menggalakkan perniagaan hak yang melilau-melilau itu ataupun menjalankan perniagaan dua hala? Yang mana satu Yang Berhormat hendak galakkan? *[Ketawa]* Penjelasan Yang Berhormat.

**Dato' Seri Diraja Syed Razlan ibni Syed Putera Jamalullail:** Tuan Yang di-Pertua, saya bukanlah hendak mempertingkatkan benda yang tidak elok. Cuma saya hendak buka pintu sempadan ini supaya mereka dapat balik, kesian dekat bini mereka itu. *[Ketawa]* Jadi, saya memang prihatin kepada perasaan kaum wanita ini terutama sekali isteri saya.

Tuan Yang di-Pertua, dengan itu saya mohon menyokong, terima kasih.

**Timbalan Yang di-Pertua [Datuk Dr. Yusof bin Yacob]:** Santubong.

#### 4.39 ptg.

**Datuk Haji Wan Junaidi bin Tuanku Jaafar [Santubong]:** Terima kasih Tuan Yang di-Pertua. Saya juga ingin bercakap sedikit dan menyokong usul terima kasih kepada Titah Ucapan Seri Paduka Baginda Yang di-Pertuan Agong semasa pembukaan persidangan Dewan baru-baru ini.

Tuan Yang di-Pertua, Malaysia tidak lagi boleh melihat diri sebagai negara yang sedang membangun bahkan kita mempunyai semua ciri yang telah membangun. Cabaran kerajaan sekarang ekoran dari itu akan menjadi lebih besar sekali. Mengurus dan mentadbir negara akan menjadi semakin kompleks dan sukar. Kita bukan lagi negara mundur tetapi negara yang maju dan dinamik. Masalah kita ialah bagaimana mengurus dan mempertahankan kejayaan. Bagaimana hendak mengisi kerangka prasarana yang moden dan indah.

Walaupun ucapan saya ini menjurus kepada apa yang pernah saya ketengahkan kepada Yang Amat Berhormat Perdana Menteri pada ketika beliau mengambil alih tampuk teraju kerajaan negara ini. Dalam perbahasan saya menyentuh keretakan dan kelemahan yang mulai ketara dalam masyarakat. Walau bagaimanapun, saya tidak mengenal pasti punca kelemahan dan keretakan yang saya hujahkan itu kerana saya yakin Yang Amat Berhormat dan pihak yang berwajib mempunyai kebijaksanaan dan pengalaman dan keprihatinan mengetahui semuanya ini.

Semenjak merdeka Tuan Yang di-Pertua, khususnya semenjak tahun 1970an kita banyak menumpu perhatian kepada pembangunan fizikal negara, prasarana dalam dan luar bandar, persekolahan, pendidikan, ekonomi dan bidang sosial, disokong oleh ekonomi negara yang semakin maju dan matang semenjak tahun 1984, pembangunan fizikal ini bertambah rancak. Hampir dua dekad sudah berlalu semua pihak dalam negara ini mulai menikmati kehidupan yang jauh lebih sempurna dengan gaya hidup yang lebih moden.

Tetapi malangnya, di sebalik kemewahan dan kesenangan ini, kelemahan dan kecelaan mula menular dalam masyarakat. Jenayah dan dadah semakin menjadi, rasuah, pecah amanah, curi, samun, rogol, lumba haram adalah indikasi bahawa undang-undang tidak lagi dihormati. Rogol, sumbang mahram, liwat, dan penganiayaan kepada kanak-kanak sering di laporkan dalam akhbar menunjukkan ketandusan moral semakin menyerlah. Berbohong, menipu, mungkir janji dan salah laku disiplin adalah amalan biasa.

Dalam masa yang sama jauh lebih ramai orang yang berserban, bertudung dan bersembahyang sekarang dari dahulu. Rumah ibadah Islam ataupun yang bukan Islam tumbuh bagai cendawan. Soalnya di manakah letak kelemahan struktur pendidikan, struktur ilmiah bimbingan sosial kita di negara ini. Media harian penuh dengan laporan bermacam-macam pancaroba seperti ibu bapa sanggup menganiaya anak-anak sendiri. Ada bapa, nenek, datuk, guru dan jurulatih tidak lagi dapat dipercayai menjaga keselamatan dan maruah anak gadis dan keluarganya.

Segelintir dari masyarakat sanggup berpeluk tubuh melihat orang-orang didera, dibelasah dan dibunuh daripada mengambil tindakan untuk menyelamatkan mangsa. Rakan-rakan khususnya lelaki tidak lagi boleh dipercayai untuk menjaga dan menyelamatkan rakan-rakan wanita yang lemah. Kalau kita lihat laporan pada 22 Mac 2005 melaporkan seorang kanak-kanak wanita bekerja duduk di asrama bersama rakan lelaki dan kena rogol oleh rakan-rakan yang sepatutnya menjaga keselamatan dan maruah. Tidak ubahlah seperti pagar makan padi.

Pengarah syarikat memeluk wang syarikat, peguam menggelapkan wang dan harta klien, jurutera melecehkan kerja dan berakhir dengan kemusnahan harta dan nyawa, akauntan menggolakkan laporan kewangan performer dan mengasaskan kejatuhan syarikat di bursa saham sehingga banyak menjadi syarikat FN4. Doktor dan jururawat memekik dan menengking apabila pesakit memohon bantuan dalam kesakitan. Penilai kuantiti menyeleweng harga projek untuk keuntungan kontraktor. Konsultan membuat pelan dan penilaian rambang kepada projek kerajaan hingga projek-projek boleh menjadi gagal. Kebocoran kertas peperiksaan berlaku hampir setiap tahun walaupun ada pemantauan hebat oleh Kementerian.

Dengan kata lain ada profesional, yang terpelajar tidak terdidik, yang mampu bersedia mengambil peluang kepada yang lemah dan perlu bantuan. Perkara-perkara ini telah memberi gambaran bahawa penipuan, pecah amanah adalah perkara biasa di kalangan masyarakat. Tuan Yang di-Pertua, sebagai pemimpin kita berasa sedih. Tindakan kerajaan begitu baik, rancangan kerajaan begitu teratur, bermacam-macam telah diilhamkan.

Sekarang Perdana Menteri baru mengambil alih dan pelbagai tindakan yang telah dibuat dan dirancang untuk memperbaiki kedudukan dan keadaan sedemikian. Tetapi malangnya masih ada juga di kalangan kita memberi gambaran yang salah dari segi bukan sahaja dasar perundangan, kata-kata dan tindak-tanduk kita kerana tindakan yang kurang tepat akan memberi gambaran yang kurang betul dan mungkin mengelirukan.

Dengan itu Tuan Yang di-Pertua, kita mesti mengambil tindakan yang khusus untuk memperbaiki keadaan ini supaya pembangunan fizikal ini boleh diisi dengan keharmonian hidup dan jiwa manusia yang baik. Bukan sahaja daripada segi agama tetapi juga daripada segi nilai. Kita kena bermula dari awal lagi khususnya di peringkat persekolahan. Peringkat kementerian sama ada pendidikan di peringkat tadika hinggalah ke peringkat universiti mestilah mengambil tindakan khusus.

Cadangan saya ialah supaya jangan dikhususkan anak-anak Islam hanya diajar agama Islam tetapi juga diajar ilmu kemasyarakatan sebagaimana yang diberi kepada anak-anak bangsa dan agama lain. Manakala anak-anak yang mempunyai agama mesti belajar agama dan menghalusi dan menghayati agama yang dianuti oleh mereka. Perkara ini patut dibimbing di peringkat sekolah-sekolah.

Pengajarannya tidak perlu secara formal tetapi boleh dibuat secara tidak formal sebagaimana yang saya selalu sebut walaupun lima minit dalam tiap-tiap kali guru datang masuk ke kelas untuk mengajar. Soalan moral, soalan kemasyarakatan, baik budi bahasa ini kepada murid-murid yang bakal diajarnya tidak kira apa mata pelajaran yang diajarkan mestilah dimulakan dengan pengajaran kemasyarakatan, moral dan kebaikan di dalam masyarakat.

Tuan Yang di-Pertua, masa tidak mengizinkan saya bercerita panjang lebar, ingin saya menyentuh beberapa perkara yang khusus. Banyak kita menyentuh sekarang iaitu soalan siswazah menganggur. Memang pada masa sekarang dilaporkan di dalam surat khabar dan media, ramai siswazah-siswazah yang menganggur hingga sekarang mencapai jumlah 80,000. Kerajaan ingin mengambil tindakan khusus dengan memberi pekerjaan-pekerjaan yang tertentu kepada mereka ini. Tindakan ini adalah baik tetapi kita perlu belajar daripada pengalaman-pengalaman negara lain. Umpamanya di Amerika telah mengambil tindakan yang khusus pada pertengahan tahun 90 an. Akhirnya berpuluh bilion duit Amerika hilang begitu sahaja dan pencapaian adalah tidak menepati sasaran yang dikehendaki.

Soal memberi pekerjaan kepada penganggur ini mestilah mempunyai struktur kajian yang terperinci. Adalah tidak mencukupi kalau sesiapa sahaja untuk mengatur siswazah ini untuk diberi pekerjaan kalau tidak melihat daripada bidang keusahawanan.

Sebagaimana yang disebut oleh Yang Berhormat daripada Arau tadi dan dicelah beberapa orang kawan, adalah amat penting sekali untuk memberi bimbingan kepada mereka ini, untuk mencari keusahawanan kerana tidak mungkin kerajaan boleh memberi pekerjaan kepada 80,000 penganggur tiap-tiap tahun.

Kalau tiap-tiap tahun ini kita mempunyai 40,000, tahun hadapan kita akan dapat lagi 40,000 penganggur dan di mana akhirnya kita akan menjurus. Adakah sumber kewangan kerajaan itu akan diguna untuk memberi pekerjaan yang mungkin tidak dapat memberi kepuasan kepada mereka ini? Kita mesti mengambil tindakan-tindakan yang lain untuk membimbing anak ini dan mereka ini dengan pendidikan ataupun latihan keusahawanan supaya mereka boleh keluar dan mengambil peluang yang ada tiap-tiap hari di negara ini, sebagaimana yang rakan-rakan tadi pernah menyebut, bahkan saya pernah melihat Tuan Yang di-Pertua, seseorang yang bekerja dengan kerajaan mendapat gaji RM1,500, tetapi dengan menjual gula-gula, dengan menjual kuaci-kuaci, benda-benda di kaki lima, dia boleh meraih pendapatan gaji RM3,000 hingga RM4,000 sebulan. Tetapi malangnya apa yang berlaku selepas itu ialah oleh kerana beliau tidak melaporkan pendapatan mereka ini kepada *income tax*, apabila hendak membeli rumah tidak dapat beli rumah. Sebab tidak dapat pinjaman dari pihak bank. Akhirnya dia akan meninggalkan usaha yang dia buat dan masuk ke dalam kerajaan dan dengan syarikat, mencari kerja dengan syarikat supaya mendapat *Form J*.

Jadi ini juga adalah satu bimbingan yang perlu dibuat kepada mereka yang diberi latihan keusahawanan supaya mengingatkan apabila mendapat satu pendapatan yang sedemikian, mestilah dilaporkan kepada pihak pemungut cukai supaya mendapat laporan balik dan mungkin mendapat *Form J* untuk memudahkan mereka.....

**Dato' Haji Mat Yasir bin Haji Ikhsan:** [*Bangun*]

**Timbalan Yang di-Pertua [Datuk Lim Si Cheng]:** Yang Berhormat, Sabak Bernam bangun.

**Datuk Haji Wan Junaidi bin Tuanku Jaafar:** .. meminjam dari pihak bank dan mungkin agensi-agensi yang tertentu untuk membeli rumah dan membuat *business* yang lebih besar daripada apa yang mereka usahakan. Sila Yang Berhormat.

**Dato' Haji Mat Yasir bin Haji Ikhsan:** Terima kasih Tuan Yang di-Pertua dan terima kasih Yang Berhormat Santubong. Saya sangat berminat dari segi latihan keusahawanan yang harus diberikan kepada siswazah kita. Adakah Yang Berhormat Santubong bersetuju dalam latihan siswazah ini di peringkat universiti dimasukkan unit keusahawanan itu dalam kurikulum ataupun *course of study* mereka, supaya apabila mereka keluar daripada universiti, maka ini sebagai suatu persediaan untuk mereka mencari kerjaya di peringkat masing-masing. Tidak seperti sekarang, umpamanya kita terpaksa menambah sampai beratus juta untuk memberikan mereka latihan tambahan. Ini bagi saya adalah satu pembaziran, apa pendapat Yang Berhormat Santubong? Terima kasih.

**Datuk Haji Wan Junaidi bin Tuanku Jaafar:** Terima kasih Yang Berhormat, saya selalu menyentuh persoalan yang dibangkitkan oleh Yang Berhormat di Dewan ini, tetapi malangnya ada tindakan-tindakan kerajaan tidak sampai ke penghujung itu hingga boleh mendapatkan hasil kepada mereka yang terlibat.

Saya bersetuju latihan-latihan dan motivasi perlu dibuat di peringkat sekolah dan di peringkat universiti kepada mereka ini. Latihan-latihan keusahawanan dan inovasi, kreativiti dalam soal keusahawanan mesti dilatih di peringkat universiti. Kepada mereka yang di dalam universiti sendiri, tidak kira apa profesion ataupun latihan yang diberikan kepada mereka ini, kerana akhirnya kerajaan tidak dapat memberi pekerjaan kepada semua graduan yang keluar daripada universiti, mereka ini terpaksa pergi mencari hidup mereka sendiri. Kalau hendak menjadi pemandu teksi, pemandu teksi yang terbijak, menjadi pemandu lori yang bijaksana, menjadi penjual ais kacang, penjual ais kacang yang pandai, menjual *beef burger* yang terbaik.

**Tuan Mohamad Shahrum bin Osman:** [*Bangun*]

**Datuk Haji Wan Junaidi bin Tuanku Jaafar:** Ray Kroc Yang Berhormat bermula dengan satu *stall beef burger* sekarang menjadi McDonald yang menawan seluruh dunia. Jadi kenapa pula kita tidak boleh buat yang apa Ray Kroc buat pada suatu ketika dahulu?

**Tuan Mohamad Shahrum bin Osman:** Yang Berhormat, Yang Berhormat Lipis.

**Datuk Haji Wan Junaidi bin Tuanku Jaafar:** Yang Berhormat, sila. Jangan panjang sangat.

**Tuan Mohamad Shahrum bin Osman:** Terima kasih, Tuan Yang di-Pertua dan terima kasih Tuan Yang di-Pertua daripada Santubong. Jadi sebenarnya keusahawanan bagi saya ialah satu budaya dan pada masa dahulu, kalau kita ingat pada zaman sejarah Melaka dahulu mereka mengatakan ada tercatat dalam buku sejarah, bahawa orang Melayu dan orang Malaysia ini memang adalah satu bangsa pedagang. Bagaimana pun kesan daripada penjajahan, Portugis, Belanda dan British telah mengubah minda orang Melayu menjadi satu bangsa yang bekerja.

Jadi kalau di sekolah, kalau tadi dikatakan unit keusahawanan itu berlaku di universiti, bersetuju atau tidak dengan saya Yang Berhormat kalau keusahawanan itu dijadikan satu budaya dari sekolah lagi bukan setakat motivasi, tetapi satu mata pelajaran dan ada praktiknya, kita meletakkan bahawa usahawan adalah seorang yang mulia kerana sekarang ini kalau kita melihat apabila kita sebut sahaja usahawan dan tokoh korporat, dia akan dikaitkan dengan unsur-unsur yang tidak sihat. Terima kasih.

**Datuk Haji Wan Junaidi bin Tuanku Jaafar:** Setuju Yang Berhormat. Memang penjajahan telah mengasingkan kita. Orang Cina jaga ekonomi, orang India jaga kebun, orang Melayu tangkap ikan ataupun tanam padi ataupun kerja dengan kerajaan. Kalau di Sarawak kita lihat orang Melayu disuruh bekerja dengan kerajaan, orang Iban dia jaga getah di dalam hutan dan orang Cina jaga kedai-kedai jual barang. Jadi semua kita di kelompok-kelompokkan dan akhirnya menjadi satu budaya kepada kita, saya setuju Melaka dahulu memang orang Melayu yang berdagang, jadi Melaka itu satu *entreport* yang begitu masyhur pada ketika itu.

Jadi saya bersetuju Yang Berhormat, tetapi membudayakan keusahawanan ini memakan masa yang panjang. Latihan yang orang-orang Cina dapat ialah begitu baik sekali apabila seseorang Cina itu mempunyai kedai dia sendiri dan dia bawa anaknya daripada dalam buaian lagi, dia bawa dalam kedai itu sehingga anak itu membesar dalam kedai itu dan akan melihat macam mana interaksi di antara ibu bapa dengan pembeli, rakan-rakan dan *businessnya*, ini jadi satu bimbingan yang informal kepada mereka ini yang kita tidak dapat. Kadang-kadang kita duduk rumah di sini dan tempat berdagang kita di sini, anak-anak kita hendak ikut pergi ke kedai kita larang, anak-anak kita pergi ke pejabat, kita larang, anak-anak kita hendak pergi *business* kita larang. Ini salah bimbingan Yang Berhormat, kita kena bawa anak-anak kita pergi ke tempat kita buat *business*, pergi ke tempat kedai kita bawa tempat *business* kita, bawa tempat pekerjaan kita tengok macam mana kita buat. Kalau dia kontraktor bawa dia ke tempat *site constructions*, supaya dia akan melihat sendiri apabila kita mahu cek kerajaan yang besar-besar bukan kita terima. Kita bawa dia melihat kerja yang teruk akan dapat cek yang besar. Itu adalah satu dorongan. Dan satu lagi membudayakan keusahawanan, itu yang kedua.

Yang ketiga, soalan siswazah yang menganggur ialah struktur gaji dan insentif. Tuan Yang di-Pertua, sekarang ini orang kalau sudah dapat ijazah dia semua hendak bekerja dalam pejabat, semua hendak pakai tie, semua hendak pakai kot sebagaimana Yang Berhormat daripada apa nama ini? Arau dan yang sebelah itu Jerai, Jerai, Jerai ada menyebut. Semua hendak pakai kot, hendak pakai indah-indah dan hendak duduk di dalam *air-cond*, tetapi sebabnya orang yang duduk dalam *air-cond* bukan sahaja selesa, tetapi gaji juga besar. Bahkan orang yang lebih teruk kerja di *construction site*, kerja mekanik, kerja lain lebih teruk lagi penakitnya, tetapi gajinya kecil, sepatutnya Yang Berhormat kita ubahkan daripada sini struktur gaji ini, insentif, kerajaan kena ambil langkah-langkah yang khusus supaya orang yang jadi mekanik, orang yang jadi kerja luar, digaji lebih besar daripada orang kerja dalam tempat-tempat hawa dingin dan elok-elok. Kalau dia duduk dalam pejabat gaji dengan peringkat pendidikan yang sama, kalau duduk dalam pejabat bagi gaji RM500, kalau dia keluar kerja yang sama, beri dia gaji RM1,000, saya yakin semua pergi ke luar.

Kita hanya memandang rendah pihak yang bekerja di luar dengan gaji yang kecil lagi. Kalau struktur ini kita ubahkan bermula dengan kerajaan, insya-Allah ia menjadi satu insentif supaya orang semua kerja di luar, jadi mungkin siswazah ini akan berminat, tahap-tahap dan kedudukan kepada pihak nelayan, pihak petani dan sesiapa sahaja yang terlibat dengan bekerja luar itu kita pertingkatkan, barulah Tuan Yang di-Pertua, kita boleh mendorongkan mereka ini bukan sahaja dari peringkat sekolah, tetapi apabila sampai ke peringkat bekerja.

Tuan Yang di-Pertua, saya menyebut pada soalan pertama yang keluar dalam Dewan ialah soalan pindaan undang-undang. Tuan Yang di-Pertua, saya sentuh sedikit soal undang-undang ini. Saya banyak melihat undang-undang Malaysia, di pejabat saya buku undang-undang memang panjang dua depa Yang Berhormat, dia punya rak.

Kadang-kadang saya buka satu-persatu buku ini, masih banyak undang-undang kita yang sudah lapuk, sudah tidak boleh dipakai lagi, sepatutnya dibuat perubahan. Jadi, undang-undang ini tidak boleh dibuang ke laut juga sebab kalau dibuang ke laut tidak akan ada undang-undang lagi, Tuan Yang di-Pertua, [*Disampuk*] undang-undang kena pakai juga. Sebelum undang-undang ini dibuang ke laut, kita kena buat undang-undang yang lebih moden, yang lebih setaraf dengan keadaan negara ini.

Tuan Yang di-Pertua, saya hendak sebut satu, dua perkara sahaja dalam perkara pindaan undang-undang ini.

**Timbalan Yang di-Pertua [Datuk Lim Si Cheng]:** Okay, Yang Berhormat ada sepuluh minit lagi.

**Datuk Haji Wan Junaidi bin Tuanku Jaafar:** Minta tolong jangan ganggu sayalah. Terima kasih, itu sahaja. Umpamanya, *Civil Law Act*, saya pernah sebut minta dipertimbangkan supaya undang-undang ini dipinda oleh sebab ia sudah tidak selaras lagi. Pindaan kepada *Civil Law Act* ini, kalau orang yang berumur 55 tahun, kalau mati, dia mati kucing, macam anjing, tidak boleh buat apa-apa lagi. Oleh sebab itu, kita kena pinda undang-undang ini, walaupun ia sudah meningkat seumur kita sampai 56 tahun untuk orang pencen, *Civil Law Act* masih *stuck* 55 tahun. Sepatutnya dibuat perubahan. Orang masih *productive* sampai lebih 60 tahun, sampai 70 tahun pun orang kita masih *productive*, lagi pun jangka hayat kita sudah meningkat, kenapa undang-undang ini masih umur 55 tahun? Jadi, kalau orang Malaysia mati di jalan raya umur 55 tahun, jangka tahun dia tidak boleh buat tuntutan lagi, tidak boleh buat tuntutan lagi.

Dahulu mungkin perkara ini dibuat betul oleh sebab kita hendak jaga insurans kita, hendak jaga kewangan kita, kita hendak jaga struktur *financial system* kita tetapi sekarang insurans ini sudah besar, kewangan kita sudah kukuh, kenapa pula masyarakat Malaysia tidak diberi keutamaan lagi, kenapa pula mesti memberi keutamaan kepada pihak kewangan seperti insurans dan *banking* ini? Kena lihat juga masyarakat Malaysia.

Tuan Yang di-Pertua, yang kedua, kalau kita lihat *Hire Purchase Act*, ada laporan dalam akhbar minggu lepas mengatakan kalau *Hire Purchase Act* ini tidak dipinda, selama itulah masalah-masalah *reposessors* yang berperangai macam *gangster* ini masih berlaku, selama itulah masih ramai anak-anak kita takut ditahan *gangster* di tepi jalan, dipukul *gangster*, isteri-isteri yang mengandung disuruh berhenti di tepi jalan, diambil kereta, ditinggal di sana sahaja, kereta diambil oleh pihak *reposessors*. Saya kata sepatutnya dipinda undang-undang ini, undang-undang ini sudah tidak boleh dipakai lagi.

England sudah tidak pakai semenjak tahun 70an undang-undang sedemikian. Di England kalau kita sudah bayar setengah daripada nilai harga barang yang kita beli itu menerusi *Hire Purchase system*, barang itu sudah tidak boleh ditarik balik lagi. Hak kepada bank ialah hanya membuat tuntutan kepada si peminjam bukan kepada harta itu lagi. Maknanya, dengan sendirinya kesemua *reposessors* itu *become jobless* selepas itu kerana undang-undang semacam di *England, Consumer Credit Act* di England mengatakan bahawa itu adalah *protected property*. *Protected property* tidak boleh *direpossess* lagi. Jadi, saya kata, kita patut *introduce* sistem yang sama dalam undang-undang kita dan *Hire Purchase Act* patut dipinda sekarang ini untuk memudahkan dan menghilangkan, melenyapkan semua *reposessors* ini supaya jangan lagi orang Malaysia ini dibuat macam budak-budak didera oleh pihak kewangan ini.

Dahulu macam itu juga, mungkin kita kena jaga pihak kewangan ini tetapi pihak kewangan ini sudah menjadi begitu besar sekarang. Dia sudah tidak kisah lagi, kerajaan pun dia tidak kisah. Kerajaan menyediakan peruntukan untuk diberi kepada golongan *business* tetapi mereka sudah tidak beri lagi, dia simpan sahaja duit tetapi sekarang kita hendak jaga juga. Jadi, masyarakat Malaysia juga yang terkena oleh sebab undang-undang yang kita tidak dibuat.

Adalah menjadi tugas dan tanggungjawab kita sebagai Ahli Parlimen mencadangkan perkara ini dan kerajaan mesti mengambil tindakan. Yang baik ialah supaya undang-undang ini dipinda secepat mungkin. Baru-baru ini, Yang Berhormat bagi Sri Gading menyebut mengenai anjing yang menggigit seorang budak sehingga dikenakan lebih seratus jahitan dan baru hari ini keluar satu lagi berita tentang seorang budak yang juga digigit anjing di bahagian sini, [*Menunjukkan ke bahagian dadanya*] Entah kena berapa puluh jahitan. Persoalannya, adakah undang-undang kita mencukupi? Datang seorang hamba Allah, hantar anjing lain kepada pihak polis mengatakan anjing inilah yang menggigit mangsa. Persoalannya, adakah undang-undang kita mencukupi dalam keadaan ini?

Saya cukup yakin undang-undang kita belum lagi mencukupi untuk menangani masalah yang kita lihat. Bukan persoalan anjing tetapi keadaan masyarakat tidak membenarkan lagi undang-undang ini diguna pakai, kita patut berubah dengan cepat. Kalau pihak kerajaan tidak dapat menubuhkan sebuah badan, tubuhkan badan dalam

Dewan ini, kita akan tubuh Dewan Ahli Parlimen untuk menyelidik undang-undang ini, untuk disarankan kepada pihak kerajaan, untuk dipinda oleh kerajaan.

Tuan Yang di-Pertua, saya ada sepuluh minit sebagaimana yang Tuan Yang di-Pertua sebut, saya hendak menyentuh satu perkara yang menjadi *topical* sekarang iaitu soal makanan halal. Tuan Yang di-Pertua, isu ini mencuit perasaan kebanyakan orang Islam. Saya sampai sekarang pun tidak tahu hendak makan benda-benda yang disaji dalam hotel, saya duduk di hotel. Sudah 15 tahun saya duduk di hotel, bila lihat makanan, benda macam itulah yang kita makan, seperti sosej, *beef burger*, *baked bean*, benda-benda macam itu yang kita makan, makanan ringan supaya badan dapatlah sihat sedikit. Kalau hendak makan nasi lemak dan nasi macam yang kita biasa makan, kadang-kadang dia banyak sangat minyak.

Dalam masa sekarang kita tidak tahu mana satu benda yang boleh dimakan ataupun tidak boleh dimakan. Jadi, orang Islam bukan sahaja terkena tetapi perasaan kita sudah terkena juga. Itu yang pertama. Yang kedua, Malaysia yang hendak mempelopori sendiri sebagai pengeluar makanan Islam antarabangsa, di mana letaknya kita? Siapa sahaja yang mengambil tindakan sedemikian adalah mensabotaj tindakan-tindakan kerajaan ini untuk memajukan negara ini sebagai negara pengeluar makanan Islam di dunia, khususnya ke negara Islam.

Tuan Yang di-Pertua, walaupun banyak orang yang mencadangkan, mengatakan semua makanan Islam hanya boleh dikeluarkan oleh orang Islam, saya belum boleh bersetuju kerana pada masa sekarang banyak pengeluar makanan yang mempunyai logo '*Halal*' yang bukan dipunyai oleh orang Islam dan mungkin berpuluh syarikat-syarikat ini akan terus mengeluarkan makanan sedemikian.

Saya mencadangkan supaya syarikat yang mengeluarkan makanan-makanan Islam ini mempunyai struktur pengurusan-pengurusan Islam, orang yang mempunyai kepakaran dari segi makanan dan mentadbirkan makanan Islam dari semua peringkat. Kalau daripada peringkat *management* atasannya, khususnya untuk pembeli, *purchasers* dalam syarikatnya supaya membeli benda-benda yang halal, benda-benda yang boleh dimakan, diguna pakai dan boleh diterima pakai oleh orang Islam.

Dan di peringkat pertengahan, mesti ada juga orang yang keluar dari Al-Azhar, yang keluar dari universiti-universiti Islam yang mempunyai kepakaran dalam bidang ini dan kita beri latihan kepada mereka dalam segi industri itu, kita serapkan ke dalam syarikat-syarikat yang mengeluarkan makanan-makanan Islam yang ada sekarang, kita paksa mereka menerima orang-orang ini bekerja supaya dengan adanya orang-orang ini di dalam syarikat-syarikat itu, mereka boleh bertanggungjawab kepada syarikat itu dan bertanggungjawab kepada masyarakat Islam di Malaysia, kepada masyarakat Islam antarabangsa untuk mengeluarkan produk Islam ...

**Dato Haji Che Min bin Che Ahmad:** [*Bangun*]

**Datuk Haji Wan Junaidi bin Tuanku Jaafar:** Minta duduk sekejap, Yang Berhormat.

**Timbalan Yang di-Pertua [Datuk Lim Si Cheng]:** Yang Berhormat, masa pun sudah tidak adalah, Yang Berhormat.

**Datuk Haji Wan Junaidi bin Tuanku Jaafar:** Dan, begitulah di peringkat *supervisory*, pada tiap-tiap peringkat ini mesti ada kepakaran Islam yang mencukupi dalam syarikat-syarikat sedemikian. Tuan Yang di-Pertua, saya pernah bekerjasama dengan Majlis Islam Brunei, apabila membeli ayam di Sarawak, sistem penyembelihan di Brunei tidak sama dengan di Malaysia. Di Malaysia kita terima kaedah '*stunning*', di Brunei dia tidak terima '*stunning*', dia tidak makan, kalau di '*stun*' binatang itu, dia tidak terima. Jadi, dia kena jaga sendiri, dalam itu dia jaga, selepas itu di *seal*, masuk dalam *refrigerated container*, di *seal*, kalau pecah bila sampai di Brunei, ia tidak pakai, *reject*. Dia jaga dari bawah sampai ke atas, daripada penyembelihan sampai ke *packing* dan *transportation*. Dalam keadaan sedemikian mutu pengurusan kenalah dipertingkatkan.

Yang Berhormat bagi Pasir Puteh, sila.

**Dato' Haji Che Min bin Che Ahmad:** Tuan Yang di-Pertua, abang saya daripada Santubong.

**Timbalan Yang di-Pertua [Datuk Lim Si Cheng]:** Minta penjelasan sebenarnya.

**Dato' Haji Che Min bin Che Ahmad:** Ya, minta penjelasan sedikit kerana menyentuh hal halal tadi. Saya rasa sudah sampai masanya kalau Malaysia hendak jadikan produk halal bertaraf dunia, dia mempunyai makmal sendiri, dia mesti mempunyai makmal sendiri, tidak boleh menumpang lagi. Sekarang ini kita masih lagi menumpang daripada UPM dan sebagainya. Tetapi kita ada satu jentera yang lengkap, saya tidak nafikan bahawa tenaga yang banyak tidak boleh mengelak daripada berlakunya penyelewengan.

Maka kita hendak supaya bagi semua syarikat, kalau Islam saya rasa saya setuju Yang Berhormat bagi Santubong kata, kita perlu yakin orang Islam boleh buat yang besar-besar ini. Tetapi syarikat-syarikat yang memiliki tanda halal tadi mesti ada orang Islam yang pakar, bukan sahaja pekerja tetapi yang pakar...

**Timbalan Yang di-Pertua [Datuk Lim Si Cheng]:** Yang Berhormat, Yang Berhormat, apakah soalan?

**Dato' Haji Che Min bin Che Ahmad [Pasir Puteh]:** Soalan saya ialah bersetuju atau tidak kalau kita menubuhkan satu makmal sendiri? Yang kedua, bersetuju atau tidak kalau kita kenakan denda kepada syarikat yang memegang tanda halal tadi yang menyeleweng, bukan sahaja diberi kepada syarikat itu tetapi anak-anak syarikat yang sekali gus digantung dan dikenakan hukuman yang setimpal. Setuju atau tidak? Terima kasih.

**Timbalan Yang di-Pertua [Datuk Lim Si Cheng]:** Yang Berhormat, masa cukup, Yang Berhormat.

**Datuk Haji Wan Junaidi bin Tuanku Jaafar:** Bersetuju Yang Berhormat. Saya hanya sampai boleh berkata setuju sahaja, tidak dapat ulas lagi kerana Tuan Yang di-Pertua kata sudah habis masa. Saya bersetuju dan saya memohon sebagai menggulung supaya kerajaan melihat perkara ini. Jangan serah bulat-bulat kepada mereka yang tidak tahu macam mana menghayati, menghormati dan menilai makanan Islam ini sebelum mereka diberi sijil Islam itu. Saya bersetuju ditubuhkan makmal oleh pihak kerajaan untuk menilai barang-barang itu, maka bolehlah diselidik dalam makmal ini dan mengetahui bahawa produk ini halal ataupun tidak halal.

Dengan itu Tuan Yang di-Pertua, saya menyokong.

## 5.12 ptg.

**Dr. Tan Seng Giaw [Kepong]:** Saya bangun untuk membahaskan usul ini dengan perasaan bercampur baur. Memang bercampur baur kerana ada tindakan kerajaan yang merupakan ke arah yang betul, ada yang merupakan tidak begitu sempurna, misalnya pelantikan seorang hakim wanita yang layak menjadi ketua hakim negara, itu memang satu ke arah yang betul dan usaha untuk memperimbangan bajet Institut Integriti Malaysia, Pelan Integriti Nasional, Korporat Malaysia, Dasar Sains dan Teknologi Kedua, Pelan Jalur Lebar Kebangsaan dan Dasar Sosial Negara mewujudkan harapan yang tinggi untuk rakyat.

[Timbalan Yang di-Pertua (Datuk Dr. Yusof bin Yacob) *mempengerusikan Mesyuarat*]

Pada 21 Mac, kita melihat Ketua Hakim Malaya, Datuk Siti Normah di dalam Dewan.

*"Membaca yang paling padan,  
Cekal yang dalam gawai,  
Neraca yang palingan,  
Bungkal yang piawai"*

Ya, ya, yang saya nampak itu daripada ...

**Timbalan Yang di-Pertua [Datuk Dr. Yusof bin Yacob]:** Apa Yang Berhormat, falsafahkah?

**Dr. Tan Seng Giaw:** Itu yang daripada Sri Gading itu, “*Yang merah itu saga, yang indah itu bahasa, yang si gading itu berjaga, yang ghairah itu luar biasa, di luar merah, di dalam pahit.*”

Sambil mengharapkan Ketua Hakim yang sangat adil, kita berkehendakkan kehakiman yang sungguh bebas, bersih dan efisien. Kehakiman seumpama ini adalah faktor yang peri mustahaknya untuk mewujudkan hak-hak asasi manusia. Setakat ini kerajaan bersikap samar-samar terhadap hak-hak asasi termasuk *Universal Declaration of Human Rights*, Pertubuhan Bangsa-Bangsa Bersatu.

Yang Amat Berhormat sedang mengurangkan defisit bajet dari 4.3% kepada 3.8% tahun ini ke arah bajet seimbang. Beliau mahu tonjolkan jenama Malaysia di antarabangsa sebagai sebuah negara korporat yang menekankan kualiti keselamatan, perkhidmatan dan *efficiency*. Jenama Malaysia mestilah meliputi komitmen dan untuk membuka dan meliberalkan pelbagai sektor termasuk perkhidmatan, percukaian, daya bersaing dan tenaga sektor swasta. Kita mesti menggalakkan tenaga sektor swasta.

Setakat ini inisiatif kerajaan adalah tidak mencukupi kerana kita boleh nampak pelaburan asing dan pelaburan tempatan adalah menurun. Walaupun jawapan daripada kerajaan ada menyekat tapi kita tahu hakikatnya sudah menurun dengan banyak.

Tuan Yang di-Pertua, tambatan ringgit kepada dolar Amerika selama enam setengah tahun memberi kesan yang baik pada mulanya, sekarang keadaan berubah. Banyak faktor termasuk defisit Amerika Syarikat sebesar 11 trilion oleh Amerika telah menyebabkan kemerosotan nilai dolar. Nilai ringgit adalah *under valued* dengan rizab negara hampir 70 bilion dolar Amerika dan kelebihan imbalan perdagangan selama 87 bulan kerana pelbagai faktor.

Pelaburan spekulatif wang panas bertambah dengan dunia yang penuh dengan pancaroba ada kemungkinan dunia akan ditimpa kemerosotan ekonomi secara besar-besaran. Apakah persiapan kerajaan untuk menangani tambatan ringgit ini? Mungkin kemerosotan dunia akan berlaku pada tahun 2007, 2008 atau 2009. Apakah persiapan pihak kerajaan untuk menangani masalah ini?

Gabenor Bank Negara, Tan Sri Dr. Zetty hendak mempertimbangkan prestasi ringgit terhadap satu bakul mata wang, *basket of currencies*. Apakah kaedah untuk mentaksirkan masa untuk memberhentikan tambatan ringgit tersebut dan digantikan dengan fleksibiliti kadar pertukaran yang lebih besar.

Tuan Yang di-Pertua, diesel memang menjadi masalah. Diesel adalah di subsidi oleh kerajaan dengan berbilion-bilion ringgit. Harga minyak dunia melambung kepada lebih 55 dolar Amerika se tong. Kenaikan harga diesel mencapai RM1.30 seliter pada awal tahun ini hanya RM0.95 seliter sahaja. Begitu para nelayan menderita, mereka meminta harga diesel diturunkan misalnya pada paras RM0.85 seliter mengizinkan bot zon B mengupah tenaga pekerja asing secara yang sah, memantau dan membendung orang tengah; dan mencegah penyeludupan diesel yang berlaku berleluasa.

Seri Paduka Baginda juga berpendapat bahawa kita tidak harus berpuas hati dengan usaha membanteras rasuah. Ada angka-angka yang diberi oleh pihak kerajaan dalam kes-kes rasuah yang dihadapkan di mahkamah, kita mestilah bekerjasama. Semualah, dari semua parti bekerjasama membantu kerajaan untuk menjayakan Pelan Integriti Nasional, Institut Integriti Malaysia dan Kod Tadbir Korporat Malaysia. Kerajaan haruslah menambah kakitangan terlatih BPR dan menjadikan badan itu betul-betul bebas seumpama ia cuma bertanggungjawab kepada Dewan Rakyat pada dewan ini sahaja.

Tuan Yang di-Pertua, Jabatan Kerja Raya (JKR) memantau Projek Hospital Temerloh (PHT), kontraktor utamanya ialah PHT Sendirian Berhad, PHTSB yang bertanggungjawab untuk reka bentuk, pembinaan, kelengkapan tauliah dan penyelenggaraan hospital itu. Satu projek *turnkey*, nombor kontraknya ialah JKR-IP-B-24-2002. Ia menelan belanja kira-kira RM500 juta. Pada 17 Mac tahun ini saya dan rakan-rakannya melawat hospital itu. Projek ini terletak di tanah keluasan 44 hektar di Kampung

Paya Luas, Mukim Perak Daerah Temerloh. PHTSB mempunyai tapak itu pada 8 Mac 2002 tetapi kerja telah bermula pada tahun 2001, beberapa bulan lebih awal.

Projek itu dijadualkan siap pada 7 September 2004 ia ditunda kepada 6 Disember 2004. Perakuan Siap Kerja *Certificate of Practical Completion (CPC)* diluluskan pada 15 Januari 2005 tanpa mengira peringkat kerja projek. Senarai kerja yang belum selesai tidak disediakan. THTSP adalah terdiri dari syarikat Permodalan Kebangsaan SPK dengan 40% saham 'Mokhtar Mohd Nassir MMN Bina' - 40% dan Aspirasi Sama - 20%. SPK dan MMN Bina adalah dalam senarai *Construction Industry Development Board (CIDB)*. Status Aspirasi Sama adalah kurang jelas. Kalau syarikat itu tidak disenaraikan di CIDB kita pun tidak tahu mengapa diluluskan juga.

Menurut peruntukan kontrak *Clause 8*, dengan izin Tuan Yang di-Pertua, *'of the conditions of contract, the contractor shall ensure that the quality of works as a whole must be maintained and that the works are carried out in conformity in every aspect with the requirements of the contract. The contractor shall engage full time on site during the whole duration of the contract adequate number of the professional engineers or other appropriate . professionals registered with the respective .. Boards in Malaysia and sub-professional staff to provide close supervision of the works at all times to ensure full compliance with the design and specification of the works'*.

Pada 31 Januari 2005 Puan Puteh Kamariah binti Mohamad menandatangani CPC sebagai Pengarah Projek seperti berikut:

"Menurut Klausula 40 syarat-syarat kontrak dan tertakluk kepada penyiapan apa-apa kerja yang belum disiapkan dan pembaikan apa-apa kecacatan ketidaksempurnaan, kesusutan atau apa-apa kerosakan lain apa jua pun seperti disenaraikan pada Lampiran A, sebagaimana yang dikehendaki di bawah Klausula 46 syarat-syarat kontrak dan yang mungkin terzahir dalam tempoh tanggungan kecacatan, maka adalah dengan ini diperakui bahawa seluruh kerja-kerja seperti yang tersebut di atas telah siap dengan memuaskan hati pada 14 Januari 2005, dan diambil milik pada 15 Januari 2005 dan dengan itu tempoh tanggungan kecacatan untuk kerja-kerja tersebut bermula pada 15 Januari 2005 dan akan berakhir pada 14 Januari 2007." Tuan Yang di-Pertua, isu-isu yang perlu diambil perhatian dengan sepenuhnya adalah termasuk:

Yang pertama, tarikh mula kerja projek Hospital Temerloh adalah beberapa bulan lebih awal daripada tarikh pemilikan tanah.

Yang kedua, projek ditunda kerana faktor-faktor yang kurang jelas termasuk kekaburan terhadap tindakan Jabatan Bomba.

Yang ketiga, THTSP telah ditawarkan kontrak ini dengan keadaan yang luar biasa, Aspirasi Sama tidak dimasukkan CIDB pun terima juga.

Yang keempat, di manakah senarai kerja yang belum siap? Di dalam CPC pun disebutkan sudah siap dengan puas hati pula.

Yang kelima, CPC telah diluluskan tanpa semua kerja disiapkan dengan memuaskan hati.

Yang keenam, proses penyiapan kerja kontrak dan penyediaan untuk penyerahan CPC telah menimbulkan kesangsian.

Yang ketujuh, kelemahan jadual format dan prosedur ujian dan tauliah.

Yang kelapan, ketidaksempurnaan dokumentasi projek, rancangan sumber manusia, subkontraktor, rekod dan akauntabiliti.

Yang kesembilan, THTSP tidak memandang berat ujian tauliah kerja mekanikal dan kejuruteraan.

Yang kesepuluh, kekurangan sistem pemantauan yang efektif untuk memantau lukisan status bagi pelbagai perkhidmatan.

Yang kesebelas, Sijil Layak Menduduki (CF) untuk loji pembersihan telah dibuat tanpa uji dan ditauliahkan. Apakah status Indah Water Consortium (IWK) untuk hal ini?

Yang keduabelas, rombongan projek ini melawat London, Rom, Venice dan Milan pada Julai 2004 untuk maksud pemindahan teknologi. Rombongan ini adalah terdiri dari Ketua Pengarah JKR, Puan Puteh Kamariah sebagai Pengarah Projek, Alan Tan sebagai Pengarah Projek THTSP dan isteri, Tuan TH Jurutera Sivil JKR dan Soo HN Juruukur Bahan JKR.

**Timbalan Yang di-Pertua [Datuk Dr. Yusof bin Yacob]:** Yang Berhormat, Yang Berhormat Arau bangun.

**Dato' Seri Diraja Syed Razlan ibni Syed Putra Jamalullail:** Terima kasih Yang Berhormat Kepong. "Tan" yang disebut oleh Yang Berhormat Kepong ini ada hubung kaitkah dengan Yang Berhormat?

**Dr. Tan Seng Giaw:** Tidak langsung Tuan Yang di-Pertua. Arau tidak perlu bimbang. Apakah hospital yang dikunjungi? Rombongan dihantar untuk pemindahan teknologi, tetapi hospital apakah yang dikunjungi? Dia pindah teknologi di Milan Fashion House. Apakah perbelanjaan yang ditanggung oleh pihak kerajaan? Berapa rombongan telah dihantar?

Yang ketigabelas, *Standby GenSet generator set* tidak ditauliahkan untuk beroperasi.

Yang keempatbelas, bahan-bahan binaan dalaman tidak mematuhi spesifikasi kontrak. *Crusher run* telah digunakan sebagai asas jalan menggantikan bahan *granite*.

Yang kelimabelas, pembinaan longkang jalan menggunakan *clay brick* bukan *reinforced concrete*.

Yang keenambelas, alat pencegahan kebakaran dengan *fixed carbon dioxide fire protection system* tidak dipasangkan.

Yang ketujuhbelas, tempat letak kereta telah dibina tanpa menurut kepada spesifikasi.

Yang kelapanbelas, peralatan perubatan masih belum dihantar atau dilengkapkan dengan sepenuhnya.

Yang kesembilanbelas, *Residual Current Device (RCD)*, ini penting terutama bagi orang pesakit jantung, RCD untuk peralatan elektrik belum dipasang. Mengapa THTSP mengecualikan RCD daripada kontraknya?

Yang keduapuluh, jalan telah dibina dengan batu kapur (*limestone*) bukan *granite* yang disebut di dalam kontrak.

Yang keduapuluh satu, *search suppressor for electrical system* tidak dipasang.

Yang keduapuluh dua, *Un-Interrupted Power Supply (UPS)* tidak dilengkapkan dengan sempurna.

Yang keduapuluh tiga, lorong pejalan kaki telah dibina tanpa mengikut spesifikasi.

Yang keduapuluh empat, adakah nilai hospital itu berbaloi dengan kira-kira RM500 juta yang dibelanjakan.

Yang keduapuluh lima, adakah pembinaan *helipad* mematuhi spesifikasi. Banyak lagi Tuan Yang di-Pertua, masalah-masalah yang timbul.

Yang Amat Berhormat Perdana Menteri telah mengarah BPR supaya menjalankan tugas tanpa takut dan tanpa memihak. Kerja ini bukan boleh dibuat dalam sehari dua dan BPR tidak duduk diam, tetapi sebaliknya terus menjalankan tugas mereka. Memang dalam masa yang sama kita terpaksa berdepan dengan pelbagai persepsi. Tuan Yang di-Pertua, saya sudah maklumkan kepada BPR. Jangan takut dengan sesiapa, siasatan mesti diteruskan dan saya tidak akan masuk campur hujahnya Yang Amat Berhormat Perdana Menteri pada 22 Mac tahun ini.

Saya berharap Yang Amat Berhormat dapat menambahkan kakitangan terlatih BPR dan membuat badan itu betul-betul bebas seperti hanya bertanggungjawab kepada Dewan sahaja. Yang Berhormat Menteri Kerja Raya menggalakkan orang ramai melawat

Hospital Temerloh yang begitu cantik. Saya diberitahu di dalam Dewan dua atau tiga hari yang lepas oleh Yang Berhormat Menteri Kerja Raya hospital ini sudah diserahkan kepada Kementerian Kesihatan. Saya berharap Yang Berhormat menjadikan hospital itu cantik dari semua aspek.

Bukan pada zahir sahaja, pada zahir dan batinnya. Itu tiap-tiap Hari Raya Ramadan kita sebut, zahir dan batin. Begitu juga dengan Yang Berhormat Menteri Kesihatan pada 20 Mac 2005, menunjukkan hasratnya hendak melengkapkan 124 buah hospital kerajaan di negara ini dengan kelengkapan yang paling moden, *state of art*. Oleh itu beliau dapat membantu Yang Berhormat Menteri Kerja Raya menyasat dengan sedalam-dalamnya pelbagai kerja yang tidak mematuhi kontrak di PHD.

**Datuk Haji Mohamad bin Haji Aziz:** *[Bangun]*

**Timbalan Yang di-Pertua [Datuk Dr. Yusof bin Yacob]:** Sri Gading bangun. Yang Berhormat.

**Dr. Tan Seng Giaw:** Yang Merah atau yang berbahasa?

**Datuk Haji Mohamed bin Haji:** Yang merah itu saga, yang lorek itu kendi, yang indah itu bahasa, yang molek itu budi. Saya hendak tanya tentang zahir batin, Kepong. Apakah Kepong melahirkan segala apa yang disebutkan tadi, zahir ataupun batin?

**Dr. Tan Seng Giaw:** Kedua-duanya seperti di sini. *[Menunjukkan kertas kerja]* RCD -Rajah untuk memasang RCD. Misalnya PHDSP tidak memasukkan RCD ini, RCD ini penting kalau kita sakit jantung dan dipasangkan dengan alat-alat elektrik dan sebagainya kelengkapan itu. Kalau tidak ada RCD, ada kelebihan arus memang...

**Timbalan Yang di-Pertua [Datuk Dr. Yusof bin Yacob]:** Yang Berhormat, Tuan Yang di-Pertua ada di hadapan.

**Beberapa Ahli:** *[Ketawa]*

**Dr. Tan Seng Giaw:** Ya. Alat RCD ini adalah penting untuk menyelamatkan para pesakit yang memakai alat-alat elektrik daripada arus yang lebih terutamanya para pesakit jantung. Pada 17 Mac tahun ini, wakil PHDSB memberitahu saya di hospital itu bahawa pihaknya telah memesan 160 unit RCD dengan kosnya RM800 seunit. Ada yang mengatakan, saya ada nampak bahawa syarikat itu tidak menyimpan, tidak membeli pun, tidak memesan pun RCD di bilik suis (*switch room*). Yang diperlukan ialah lebih 300 unit dengan harga RM1200 seunit.

Doktor dan jururawat tidak semestinya juru elektrik, *technician* belaka. Mereka tidak biasa dengan bilik suis dan tidak tahu akan RCD. PHDSB tidak mahu memasang RCD dan *wiring* bukan disediakan bagi berbuat demikian. Jika hendak dilengkapkan dengan RCD kemudian, maka sesetengah struktur dinding dan sebagainya terpaksa diruntuhkan dan *wiring* ditambah untuk alat itu. Begitu juga dengan hospital di Johor – Hospital Sultan Ismail itu, begitu juga. Yang Berhormat Menteri Kerja Raya ada menyebutkan manusialah yang menyebabkan alat-alat penghawa dingin dibiarkan dengan begitu sahaja. Dengan demikian kulat membiak. Walau bagaimanapun ada banyak perkara di situ yang dia tidak sebutkan.

RCD tidak dipasang dengan sempurna. Saya berharap semua orang dari Johor mengambil perhatian termasuk Tanjung Piai mengambil perhatian. Alat-alat elektrik di Hospital Sultan Ismail itu tidak dipasang dengan sempurna. Tidak mengikut kontrak tetapi saya tidak dengar orang dari Johor mengambil perhatian. Sri Gading dia diam sahaja. Baik masuk ke kolej pekak dan bisu. *[Ketawa]*

**Beberapa Ahli Pembangkang:** *[Bersorak]*

**Timbalan Yang di-Pertua [Datuk Dr. Yusof bin Yacob]:** Yang Berhormat cakap dengan saya.

**Dr. Tan Seng Giaw:** Ya. Tuan Yang di-Pertua sebenarnya saya ambil masa yang cukup dan saya berharap beberapa inisiatif telah diambil oleh pihak Yang Amat Berhormat lebih satu tahun yang lepas untuk mencegah rasuah untuk memodenkan pertanian dan Yang Berhormat Arau pun mempertikaikan tadi untuk mempertingkatkan penyampaian

daripada jabatan-jabatan kerajaan dan sebagainya. Saya berharap beliau dapat menjayakan. Kita mesti memberi kerjasama kepada Yang Amat Berhormat untuk berbuat demikian.

Cekal cekap orang, cuba lepas naik makan epal Fuji ,

Ungkap genap menahan cuba, emas baik menahan uji..

Tap tibau terbang di hujung dahannya ...

**Timbalan Yang di-Pertua [Datuk Dr. Yusof bin Yacob]:** Yang Berhormat hendak habiskah itu?

**Dr. Tan Seng Giaw:** Ya, hendak habis.

Tap tibau terbang di hujung dahannya, sia-sia pasang perangkap dengan butanya, kerbau dipegang dengan tali hidungnya, manusia pegang pada katanya.

Sekian, terima kasih.

**Timbalan Yang di-Pertua [Datuk Dr. Yusof bin Yacob]:** Penampang.

**5.38 ptg.**

**Tuan Donald Peter Mojuntin [Penampang]:** Terima kasih Tuan Yang di-Pertua atas kesempatan yang diberikan untuk mengambil bahagian dalam perbahasan. Terlebih dahulu saya menjunjung kasih ke atas titah ucapan diraja Duli Yang Maha Mulia Sri Paduka Baginda Yang di-Pertuan Agong.

Tuan Yang di-Pertua, saya amat tertarik dengan titah ucapan diraja atas tumpuan khusus Tuanku kepada pembangunan di Sabah dan Sarawak serta ketidakseimbangan yang wujud di antara bumiputera di Semenanjung dan bumiputera di Sabah dan Sarawak.

Yang lebih memberangsangkan lagi adalah kenyataan di mana Tuanku membuat jaminan bahawa kerajaan akan terus mempergiatkan usaha untuk membangunkan masyarakat perdagangan dan perindustrian bumiputera. Ini akan dilaksanakan dengan tumpuan kepada program pembangunan vendor dan pengukuhan jaringan bagi memperluaskan lagi penyertaan bumiputera sebagai pembekal kepada syarikat berkaitan kerajaan dan syarikat multinasional. Ini menunjukkan kerajaan kita yang dipimpin oleh Yang Amat Berhormat Dato Seri Abdullah Ahmad Badawi amat peka kepada situasi yang sedia wujud dan amat serius dalam menangani perkara ini.

Tuan Yang di-Pertua, sebagai rakyat Malaysia kami di Sabah amat gembira dan bangga dengan kejayaan Petronas bukan sahaja di negara kita, malah di seluruh dunia. Rakyat Sabah juga sedar dan bersyukur atas penemuan 5 telaga minyak dan gas di perairan dalam di Pantai Barat Sabah iaitu di Gemunsut, Palikai, Kakab, Senangin dan Sepat serta satu lagi di Laut Sulawesi pada tahun 2004. Apabila penemuan-penemuan ini disahkan, ini bermakna lebih kurang 50% rizab minyak dan gas negara akan berada di Sabah sekurang-kurangnya untuk tempoh 30 tahun akan datang. Walaupun begitu, rakyat Malaysia di Sabah amat sedih dan kecewa Petronas mengaut hasil yang lumayan dari penemuan telaga-telaga di Sabah tetapi selain dari pembayaran 5% *royalty* dan penganugerahan biasiswa, apakah lagi cara Petronas membantu untuk membangun negeri Sabah.

Tuan Yang di-Pertua, jangan salah sangka, sumbangan-sumbangan yang sedia wujud amat dihargai oleh rakyat Sabah tetapi persoalannya ialah adakah ini memadai jika kita ambil kira fakta keperluan dan kedudukan Sabah di skala ekonomi negara serta keperluan kemajuan dan pembangunan rakyat Malaysia di Sabah.

Tuan Yang di-Pertua, dalam masa empat dekad yang lalu Sabah memperoleh pertumbuhan ekonomi yang cukup memuaskan. Ini disebabkan terutamanya oleh sektor komersial pertanian seperti kelapa sawit, koko dan perikanan dan industri pembalakan. Akan tetapi untuk dekad yang akan datang momentum ini tidak akan dapat dikekalkan disebabkan oleh kemerosotan industri pembalakan dan sektor pertanian serta perikanan yang sudah sampai tahap yang matang atau dengan izin, *maturity stage*. Malah kini pertumbuhan ekonomi Sabah sudah mula tersekat dan berkurangan mengakibatkan sektor

swasta terpaksa mengambil langkah untuk memperkukuhkan keadaannya sendiri atau *consolidate position* dan Kerajaan Negeri Sabah pula mengurangkan perbelanjaan pembangunannya disebabkan hasil atau *revenue* yang tidak mencukupi.

Selain daripada usaha memperkukuhkan industri pembalakan dan menambah nilai komersial pertanian, perikanan, pelancongan dan mempertingkatkan sektor sosioekonomi adalah perlu dan mustahak bagi Kerajaan Negeri Sabah untuk mencari sumber-sumber pertumbuhan yang baru.

Tuan Yang di-Pertua, industri gas dan minyak itulah sumber pertumbuhan alternatif yang paling sesuai dan *viable* bagi negeri Sabah tetapi pada masa kini impak sebenar industri minyak dan gas di Sabah amat kecil sekali. Ini adalah kerana penglibatan Sabah dalam bahagian *upstream industry* ini adalah, dengan izin, *negligible*. Tambahan pula penglibatan di bahagian hiliran atau *downstream* hanya merangkumi jualan runcit atau *retailing*, pengangkutan dan perkhidmatan. Sabah sebenarnya mengimport hampir semua produk petroleunya dari Semenanjung yang kemudiannya dijual secara runcit di stesen minyak dan *service center*.

Komponen *upstream* semuanya dilaksanakan oleh Petronas sebagai pemain utama dengan syarikat-syarikat seperti Shell, Esso, Murphy, Talisman dan sebagainya yang memainkan peranan yang subsidiari walaupun penting. Industri ini telah melalui pertumbuhan yang kukuh semenjak dua dekad yang lalu dan oleh itu ia adalah komponen yang amat penting kepada pembangunan ekonomi Sabah. Sebagai contoh pada tahun 2002, jumlah eksport produk petroleum adalah RM3.237 bilion dan import pula berjumlah RM1.1 bilion. Akan tetapi eksport produk petroleum iaitu termasuk petroleum mentah dan methanol dilaksanakan secara eksklusif di Wilayah Persekutuan Labuan, saya ulang, di Wilayah Persekutuan Labuan.

Manakala import pula iaitu termasuk gasolin, diesel, bahan bakar jet, pelincir dan produk petroleum yang khusus dilaksanakan di Kota Kinabalu, Sandakan dan Tawau iaitu di *mainland* Sabah. Kerana inilah ada kemungkinan bahawa KDNK negeri Sabah, dengan izin, *is artificially inflated* sekurang-kurangnya di antara 10% hingga 12%. Tidak menghairankan juga bahawa kos pengangkutan kapal laut ke *mainland* Sabah amatlah tinggi kerana Sabah tidak mempunyai *volume* produk yang mencukupi untuk dihantar ke luar negeri.

Petronas boleh membantu Sabah dengan membangunkan industri *anchor* seperti *gas processing facility*, dengan izin, *GTL plan*, fasiliti petrokimia atau *methanol plant* di *mainland* Sabah.

**Datuk Haji Mohamad bin Haji Aziz:** [*Bangun*]

**Timbalan Yang di-Pertua [Datuk Dr. Yusof bin Yacob]:** Sri Gading bangun.

**Tuan Donald Peter Mojuntin:** Silakan.

**Datuk Haji Mohamad bin Haji Aziz:** Terima kasih Tuan Yang di-Pertua, terima kasih sahabat saya. Cerita orang Sabah dan Sarawak dibezakan dengan Semenanjung ini adalah cerita yang sering kali kita dengar. Sampai masanyalah saya ingat, Tuan Yang di-Pertua, perkara yang tidak seimbang ini diperbetulkan. Umpamanya, saya pergi ke Sabah dan Sarawak, tugas Ahli Parlimen Sabah dan Sarawak ini saya tengok empat kali ganda lebih berat daripada Ahli Parlimen di Semenanjung. Ini saya cakap ikhlas. Saya rasa elau mereka ini kena naik empat kali ganda jugalah. [*Disampuk*]

Peruntukan pun kena naik. Ini kalau hendakkan keadilan sedangkan Sabah dan Sarawak memberikan sumbangan dari segi wakil yang hadir di Parlimen ini lebih daripada 50 orang, satu sumbangan yang besar daripada Sabah dan Sarawak dalam Barisan Nasional. Saya berfikir begini, Tuan Yang di-Pertua, bukan soal saya hendak menekan mana-mana pihak tetapi tentulah orang-orang Sabah dan Sarawak payah hendak memperjuangkan diri mereka. Kita sokong moral daripada Semenanjung.

Saya haraplah pemimpin-pemimpin kita menyedari perkara ini. Saya insaf betul, Tuan Yang di-Pertua, dari kereta pergi ke bot, dari bot naik kereta, selepas naik kereta naik ke bot lagi, selepas naik bot naik kereta, selepas itu menyeberang lagi, jalan kaki lagi dan

belanja yang dikeluarkan oleh Ahli-ahli Parlimen daripada Sabah dan Sarawak ini, beribu-ribu ringgit dalam satu perjumpaan daripada wang kocek sendiri. Saya insaf, Tuan Yang di-Pertua. Kalau bolehlah dipertimbangkan perkara ini.

**Timbalan Yang di-Pertua [Datuk Dr. Yusof bin Yacob]:** Termasuk Sipitanglah, Yang Berhormat.

**Datuk Haji Mohamad bin Haji Aziz:** Presiden MCA kita pun ada, saya ingat dia pun simpatilah. Dia pun orang baik, Tuan Yang di-Pertua. Presiden MCA ini orang baik. Ini pandangan sayalah, apa komen Yang Berhormat? Jemput.

**Tuan Donald Peter Mojuntin:** Terima kasih Yang Berhormat bagi Sri Gading, terima kasih Tuan Yang di-Pertua. Saya rasa saya setuju 101% dengan Yang Berhormat bagi Sri Gading. Ketidakseimbangan itu wujud dan harapan besar saya adalah saya tidak memfokuskan perbahasan di Parlimen ini tentang kekurangan di Sabah sahaja tetapi bertumpu kepada perkara global atau perkara nasional. Terima kasih Yang Berhormat bagi Sri Gading. Saya teruskan, Tuan Yang di-Pertua.

Pewujudan fasiliti-fasiliti atau plant tersebut akan memanfaatkan negeri Sabah seperti berikut:

- (i) la akan mendefinisikan ekonomi dengan pengeluaran produk yang mempunyai *demand* yang tinggi. Ini akan membantu kestabilan ekonomi kerana Sabah akan mendapat bergantung kepada lebih produk lagi jika harga produk tradisional jatuh seperti harga koko pada tahun 70-an.
- (ii) la tentu akan meningkatkan peluang pekerjaan. Sebagai contoh, satu fasiliti pemprosesan gas (GTL) dapat memberi pekerjaan secara langsung kepada sebanyak lebih daripada 400 orang.
- (iii) la akan membawa peluang untuk meningkatkan *income generation*, dengan izin, negeri Sabah. Sebagai contoh, satu kajian yang dilaksanakan oleh Kementerian Pembangunan Industri Sabah dalam menganggarkan fasiliti pemprosesan gas, GTL *plant* akan meningkatkan *income generation* lebih sebanyak RM13.7 juta setahun untuk pekerjaan secara langsung. Ini bukan sahaja akan menyumbang kepada peningkatan taraf hidup pekerja. Malah negeri Sabah akan menambahkan pendapatan dari *foreign exchange* yang akan memantapkan kedudukan ekonomi melalui imbangan pembayaran atau *balance of payment* yang lebih kukuh.
- (iv) la akan mewujudkan peluang untuk mempertingkatkan sektor pembuatan dan industri negeri Sabah yang kini terlalu *primary based* dan mempunyai pertumbuhan yang agak lembap. Fasiliti-fasiliti tersebut akan meningkatkan sumbangan sektor pembuatan kepada ekonomi negeri sekurang-kurangnya 3% hingga 4%. Ini seumpama sumbangan sekurang-kurangnya 100 SME yang masing-masing menyumbang pengeluaran tambah nilai atau *valued added production* sebanyak RM8.19 juta setahun masing-masing.
- (v) la akan meningkatkan tahap dan kualiti sektor pembuatan di Sabah. Ini adalah kerana sektor gas adalah sektor yang lebih terbangun dengan penggunaan tahap teknologi yang tinggi, sumber manusia yang lebih mahir dan kapital yang tinggi.

- (vi) Ia akan membantu untuk membangun dan mendidik pengusaha bumiputera dengan memberi peluang kepada mereka untuk menawar perkhidmatan kemahiran dan produk mereka kepada industri ini.
- (vii) Ia bukan sahaja meningkatkan kadar pembangunan ekonomi negeri malah meningkatkan penyertaan rakyat tempatan dalam kedua-dua komponen *upstream* dan *downstream* industri minyak dan gas.
- (viii) Pewujudan fasiliti-fasiliti tersebut akan membantu negeri Sabah atas usahanya bergerak ke arah ekonomi tambah nilai.
- (ix) Industri seumpama ini akan tentu menjadi *anchor* kepada SME-SME yang sedang kian membangun di Sabah. SME-SME ini akan membekal keperluan projek ini dan di sebaliknya projek ini akan membekal kepada *specialized market*.
- (x) Kesan *spill over* pembangunan yang dicadangkan ini akan dirasai secara positif dalam lain-lain sektor seperti pengangkutan, komersial, kejuruteraan, insurans, *banking*, perumahan dan sebagainya.
- (xi) Tambahan pula perwujudan plant atau fasiliti yang disebutkan tadi juga akan menempatkan Sabah sebagai laluan perkapalan yang strategik dan penting iaitu sesuatu yang genting yang diperlukan untuk membangun dan menggiatkan lagi sektor pembuatan di negeri Sabah.

Tuan Yang di-Pertua, kemungkinan pihak yang tertentu akan memberi alasan bahawa pembangunan plant atau fasiliti yang dimaksudkan adalah tidak *commercially viable*, dengan izin untuk dilaksanakan oleh Petronas. Akan tetapi, tidak dapat dinafikan bahawa negeri Sabah telah menyumbang terhadap pertumbuhan Petronas dan tidak boleh dinafikan bahawa Sabah perlu memulihkan keadaan ekonominya. Apa yang tidak *commercially viable* kini akan menjadi demikian dalam jangka masa panjang, dengan izin, it *cannot be all about the profit margin all of the time*.

Perwujudan Kompleks Gas Petronas telah memanfaatkan ekonomi di Bintulu dan Petrol Chemical Plant telah lama dibangunkan di Miri. Ini telah banyak membantu ekonomi di Sarawak sebagai satu daripada tiga negeri pengeluar minyak dan gas di negara ini. Satu lagi negeri pengeluar minyak dan gas iaitu Terengganu mempunyai 13 Petrol Chemical Plant di Kerteh. Bagaimana pula di negeri-negeri bukan pengeluar minyak dan gas seperti Melaka yang mempunyai loji penapis atau *refinery*? Seperti Kedah yang mempunyai *methanol* dan *petrol chemical plant*? Seperti Pahang dengan Plant Petrol Kimianya, semua ini adalah untuk kebaikan negeri-negeri tersebut tetapi kenapa pula sesuatu yang sama tidak dapat dilaksanakan di Sabah? Kenapa pula Sabah dipinggirkan? Tidak hairanlah situasi ini menimbulkan perasaan negeri Sabah seolah-olah *we are short changed*, dengan izin, [*Disampuk*] dianaktirikan, terima kasih Yang Berhormat bagi Dungun.

Apa yang dilaksanakan di Labuan bukan hasil kepada negeri Sabah, itu adalah hasil Wilayah Persekutuan. Yang ada di Sabah hanyalah terminal gas yang membekalkan 150 juta kaki padu gas sehari untuk kegunaan sektor tenaga iaitu sebanyak 33.07 juta kaki padu gas sehari dan 0.07 juta kaki padu gas sehari dalam sektor industri. Lagipun, harga gas yang ditawarkan oleh Petronas adalah harga *consumer* dengan izin, dan tidak kompetitif untuk syarikat-syarikat yang ingin mewujudkan *Liquidified Natural Gas* (LNG) atau NGV Mini Plant di Sabah – satu industri yang amat berpotensi dalam pengeluaran sumber tenaga yang efisien, murah dan *environment friendly*.

Petronas mempunyai obligasi moral dan sosial untuk membuat sesuatu yang kukuh, bermakna dan ikhlas dalam menangani bagaimana ia dapat membantu pembangunan ekonomi di Sabah. Royalti 5% terbukti tidak dapat dipertikaikan lagi. Oleh itu, perwujudan fasiliti-fasiliti tersebut oleh Petronas di mainland Sabah akan menunjukkan

*good faith* kepada rakyat Malaysia di Sabah dan lebih penting dari itu, akan memberi negeri Sabah sesuatu yang amat genting dan perlu kepada kemantapan ekonominya.

Tuan Yang di-Pertua, mengikut Jabatan Perdana Menteri dalam jawapan bertulis kepada Ahli Parlimen Tuaran pada 6 Oktober 2004, Sabah merupakan negeri yang mempunyai kadar kemiskinan yang tertinggi iaitu 16% berbanding dengan kadar kemiskinan seluruh negara iaitu 5.1%.

**Tuan Jimmy Donald:** [Bangun]

**Timbalan Yang di-Pertua [Datuk Dr. Yusof bin Yacob]:** Sri Aman bangun Yang Berhormat.

**Tuan Donald Peter Mojuntin:** Sri Aman? Terima kasih.

**Tuan Jimmy Donald:** Terima kasih. Jadi saya telah mendengar ratapan Yang Berhormat tentang ketidakadaan pertolongan sumbangan Petronas kepada ekonomi Sabah. Tetapi macam manakah pertolongan Petronas kepada usahawan-usahawan yang kecil, yang hendak berniaga dalam *oil and gas industry*, apa pandangan Yang Berhormat tentang sumbangan Petronas dalam perkara itu?

**Tuan Donald Peter Mojuntin:** Terima kasih Yang Berhormat bagi Sri Aman. Saya sebagai seorang anak watan Sabah tahu di Sabah, saya tidak tahu di Sarawak Yang Berhormat, tetapi di Sabah kebanyakan peniaga kecil ataupun syarikat-syarikat kecil kita tidak dapat peluang dalam mengambil bahagian industri minyak dan gas ini. Adapun barangkali 5% begitu. Kebanyakan kontrak-kontrak Petronas di negeri Sabah dikendalikan oleh syarikat-syarikat dari luar Sabah dan termasuklah dari Sarawak sendiri. Terima kasih atas soalan Yang Berhormat.

Seperti mana yang saya katakan tadi, kadar kemiskinan di Sabah adalah dianggarkan sebanyak 16% berbanding dengan kadar kemiskinan seluruh negara iaitu 5.1%. Ini..

**Tuan Wilfred Madius Tangau:** [Bangun]

**Timbalan Yang di-Pertua [Datuk Dr. Yusof bin Yacob]:** Rakan Tuaran bangun.

**Tuan Donald Peter Mojuntin:** Silakan.

**Tuan Wilfred Madius Tangau:** Terima kasih Tuan Yang di-Pertua, terima kasih Yang Berhormat bagi Penampang. Yang kita orang Sabah ini, balik-balik merintih dalam semua sektor termasuk Petronas sedangkan kita ini sudah menandatangani Perjanjian Petronas 5% tidak boleh dipersoalkan lagi. Pada pendapat Yang Berhormat dan menurut kajian Yang Berhormat, apakah sebenarnya sebab-sebab pihak Petronas dan kerajaan ini tidak mempertimbangkan untuk memulakan industri di negeri Sabah selain daripada alasan yang dikatakan tidak *viable* tadi. Selain daripada itu, apakah sebenarnya, adakah ini disebabkan oleh kerana anak-anak Sabah sendiri pun tidak terlibat dalam proses membuat keputusan dalam Petronas yang kita ini tidak diwakili dalam syarikat-syarikat ini termasuklah anak syarikat. Apakah ada sebab-sebab lain? Silakan, terima kasih.

**Tuan Donald Peter Mojuntin:** Terima kasih Yang Berhormat sahabat saya dari Tuaran. Saya rasa satu daripada sebabnya yang saya perkatakan tadi Petronas berkata untuk menubuhkan fasiliti seperti yang dimaksudkan di Sabah adalah tidak komersial dan *viable*. Satu lagi sebab yang diberikan kepada saya adalah kita tidak mengeluarkan volume yang cukup pada masa yang saya tanya pada tahun lepas. Tetapi itu tidak menjadi alasan lagi sebab kemungkinan Sabah akan menjadi pengeluar minyak dan gas yang terbesar di negara ini seperti negeri Sarawak.

Bukan itu sahaja Yang Berhormat bagi Tuaran, kita di Sabah juga bukan dikenali sebagai *stakeholders* atau *recognize*, dengan izin, sebagai stakeholder daripada Petronas. Semua tender di Sabah terpaksa diajukan atau dimajukan atau dihantar ke Miri. Ada kalanya mengambil dokumen tender itu, kita terpaksa ke Miri untuk mengambilnya sedangkan Sabah sendiri adalah satu daripada tiga pengeluar minyak dan gas di Malaysia ini. Tetapi sebab-sebab yang lain Yang Berhormat bagi Tuaran, saya pun tidak tahu. Itulah sebab-sebab saya membawa isu ini ke perbahasan pada hari ini. Ada yang tidak

boleh tunggu saya menghabiskan perbincangan ini, jadi saya teruskanlah Tuan Yang di-Pertua.

Saya ulangi lagi, kita berterima kasih atas keazaman kerajaan untuk mempertingkatkan usaha membawa kemajuan kepada rakyat Sabah dengan pelbagai program dan peruntukan tertentu. Akan tetapi usaha itu akan tersekat oleh siling, Rancangan Malaysia Kesembilan yang 30% kurang berbanding dengan siling RMK-8 jika nilai semasa diambil kira dan dengan kewujudan *delivery system* yang tidak efisien. Oleh itu Tuan Yang di-Pertua, amat memadailah dan tepat pada masanya syarikat berkaitan kerajaan dan multinasional seperti Petronas membantu hasrat Kerajaan Persekutuan untuk membangunkan negeri Sabah.

Tuan Yang di-Pertua, saya ingin mengambil kesempatan ini untuk mengucapkan ribuan terima kasih kepada semua Ahli-Ahli Yang Berhormat termasuklah Dato' Seri Menteri – Yang Berhormat bagi Padang Rengas, Yang Berhormat bagi Sri Gading atas simpati dan perasaan ikhlas mereka terhadap kedudukan Sabah yang ketinggalan dari segi pembangunan dan atas sokongan mereka, supaya peruntukan berlebihan disalurkan ke negeri Sabah.

Dengan kata-kata demikian, saya dengan rendah hati mohon menyokong Usul Menjunjung Kasih ke atas Titah Diraja Duli Yang Maha Mulia Seri Paduka Baginda.

**Timbalan Yang di-Pertua [Datuk Dr. Yusof bin Yacob]:** Mambong.

#### 6.00 ptg.

**Dr. James Dawos Mamit [Mambong]:** Terima kasih Tuan Yang di-Pertua kerana memberi peluang kepada saya untuk mengambil bahagian menjunjung kasih di atas Titah Diraja. Seri Paduka Baginda di dalam titahnya pada 21 Mac menyuarakan kebimbangannya terhadap kualiti alam sekitar terkini di negara kita dalam mana indeks kualiti alam sekitar yang semakin menurun. Tuanku memaklumkan kepada kita bahawa penurunan indeks alam sekitar disebabkan pencemaran udara dan air. Sememangnya kekhawatiran baginda Tuanku adalah satu realiti yang benar-benar berlaku sekarang atas beberapa sebab iaitu:-

- (i) Pembangunan di negara kita lebih-lebih lagi di kawasan-kawasan bandar tidak mengikut prinsip-prinsip pembangunan lestari ataupun *sustainable development* dengan izin;
- (ii) sistem pengurusan alam sekitar yang tidak bersepadu dan tanggungjawab di antara agensi-agensi berkaitan tidak begitu jelas dan kadangkala bercanggah;
- (iii) sikap pemaju yang mengutamakan untuk memperoleh keuntungan dengan cepat dan justeru itu tidak mematuhi perundangan, arahan dan garis panduan kerajaan; dan oleh itu selalu *cut corners* dengan izin, seboleh-bolehnya;
- (iv) sifat tidak ambil peduli rakyat; dan
- (v) kekurangan laporan pihak media yang berbentuk kesedaran atau *educational*. Kebanyakannya laporan sensasi media ialah jika pencemaran atau kerosakan alam sekitar sudah berlaku.

Sesungguhnya penjagaan alam sekitar adalah tanggungjawab semua lapisan masyarakat bukan tanggungjawab kerajaan semata-mata. Sumbangan kita walaupun sedikit dapat membantu penyelenggaraan kualiti alam sekitar yang sihat.

Oleh itu saya ingin menyentuh pembangunan lestari. Pengawasan kualiti alam sekitar diperlu dan diwajibkan apabila kita melaksanakan aktiviti yang menukarkan bentuk ataupun landskap sesuatu kawasan seperti pembinaan rumah kita sendiri ataupun

mendirikan sesebuah kilang. Pembinaan rumah dan kilang sudah tentu mengakibatkan aktiviti meluaskan tapak, menebang pokok dan merata tanah.

Dalam pada itu kita haruslah memastikan agar alam sekitar tidak rosak teruk dengan memastikan langkah-langkah pencegahan atau *mitigation* dengan izin dijalankan. Tuan Yang di-Pertua, di dalam pembangunan lestari, prinsip utamanya ialah kawalan kualiti alam sekitar serta pemeliharaan kepelbagaian biologi. Bagi memastikan pembangunan lestari berlaku sistem pengurusan alam sekitar harus wujud dan ianya harus berkesan dan praktik yang senang dilaksanakan.

Di negara kita, sistem pengurusan memang sudah lama wujud sejak perundangan Akta Kualiti Alam Sekeliling ataupun *Environmental Quality Act* iaitu EQA digubal pada tahun 1974. Namun elemen dan faktor alam sekitar sentiasa berubah mengikut arus pembangunan tetapi sistem pengurusan dan prosedur pula tidak diubah atau dipinda, sentiasa statik sahaja.

**Datuk Haji Mohamad bin Haji Aziz:** [*Bangun*]

**Dr. James Dawos Mamit:** Mengapa tidak menyemak semula sistem pengurusan jika kita tahu ia tidak berkesan.

**Timbalan Yang di-Pertua [Datuk Dr. Yusof bin Yacob]:** Ya, Sri Gading bangun.

**Dr. James Dawos Mamit:** Ya, Sri Gading. Terima kasih.

**Datuk Haji Mohamad bin Haji Aziz:** Terima kasih Ahli Berhormat bagi Mambong dan terima kasih Tuan Yang di-Pertua. Kita ini kadangkala teori bukan main hebat, Tuan Yang di-Pertua. Kadang-kadang kita ghairah sangat buat undang-undang, buat peraturan. Kadang-kadang peraturan-peraturan yang kita buat itu menyusahkan kita. Ambil contoh.... ini, Menteri Kementerian Perumahan dan Kerajaan Tempatan pun ada. Mungkin beliau bersetuju dengan saya, mungkinlah. Tetapi kalau tidak bersetuju pun tidak apa. Ambil contoh tentang penebangan pokok. Kalau Tuan Yang di-Pertua ada sebidang tanah 15 ekar dan hendak buat taman perumahan, apakah Tuan Yang di-Pertua tidak perlu potong pokok? Kita kena potong pokok.

Pengalaman saya....keluarga saya memajukan 22 ekar untuk membuat perumahan, pokok kena tebanglah kerana macam mana dia hendak atur rumah di mana, jalan di mana, parit di mana, *reserve* TNB di mana, surau di mana, macam mana? Dia kena potonglah pokok. Kalau kita kata potong pokok itu salah, tidak ada orang hendak buat taman perumahan. Tuan Yang di-Pertua.

**Timbalan Yang di-Pertua [Datuk Dr. Yusof bin Yacob]:** Ya.

**Datuk Haji Mohamad bin Haji Aziz:** Tidak ada orang... tidak beranilah. Kalau kata potong pokok salah, tidak ada orang hendak buat perumahan. Tidak akan kita hendak buat di celah-celah pokok.

**Timbalan Yang di-Pertua [Datuk Dr. Yusof bin Yacob]:** Yang Berhormat, Mambong Yang Berhormat.

**Datuk Haji Mohamad bin Haji Aziz:** Ya, ya. Mambong ini pakar, Tuan Yang di-Pertua. Boleh saya persoalkan ini kepadanya? Apabila kita sudah tebang, rumah sudah siap, kita tanam pokok, tumbuh pokok, hijauhah balik. Apa masalahnya?

Kita bimbang peraturan-peraturan ini esok mengikat kita. Saya bersetujulah menjaga alam sekitar ini untuk anak cucu dan untuk kita sekarang ini. Anak cucu apa benda? Belum tahu lagi. Ini, soal kita sekarang ini. Kadang-kadang kita jadi Pak Pandirhah, Tuan Yang di-Pertua. Pak Pandir, fahamkah Mambong? Terima kasih.

**Dr. James Dawos Mamit:** Terima kasih Yang Berhormat Abang Sri Gading. Memang, jika kita hendak membina rumah, kalau ada pokok di tapak ataupun di kawasan itu kita tebanglah. Tetapi yang penting kita haruslah ingat selepas kita tebang.... selepas kita mendirikan rumah tersebut, maka kita boleh tanam lagi pokok yang sama, hijau lagi kawatan tetapi yang penting adalah, kalau kita tebang pokok itu jenisnya hanya terdapat di situ, itu dinamakan endemik, maka saya rasa kita harus tinggalkan pokok itu dahulu. Kalau jenis yang sama ada di Gunung Jerai, ada di Larut, kita tebanglah. Tidak ada salah kita

tebang pokok itu kerana spesies itu bukan endemik. Ini daripada segi pemeliharaan kepelbagaian biologi.

**Dato' Paduka Haji Badruddin bin Amiruldin:** [Bangun]

**Dr. James Dawos Mamit:** Aik, Jerai juga mahu tanya. Silakan Jerai.

**Timbalan Yang di-Pertua [Datuk Dr. Yusof bin Yacob]:** Jerai, Mambong bagi jalan.

**Dato' Paduka Haji Badruddin bin Amiruldin:** Terima kasih.

**Seorang Ahli:** Pasal sebut Jerai.

**Dato' Paduka Haji Badruddin bin Amiruldin:** Terima kasih Mambong. Mambong ini pakar *backbencher* dalam alam sekitar. Saya hendak tanya Mambong.....

**Dato' Seri Diraja Syed Razlan ibni Syed Putra Jamalullail:** Tengok Tuan Yang di-Pertua.

**Dato' Paduka Haji Badruddin bin Amiruldin:** Saya hendak tanya Mambong dan Tuan Yang di-Pertua, kalaulah manusia ini tidak ikut peraturan. Dia tebang pokok, dia tebang itu tebang ini, dia kacau alam sana kacau alam sini, secara bodohlah saya hendak tanya Mambong, apa akan jadi pada dunia. Itu satu soalan yang Mambong kena jawab betul-betul hari ini.

**Dato' Seri Diraja Syed Razlan ibni Syed Putra Jamalullail:** [Ketawa]

**Dato' Paduka Haji Badruddin bin Amiruldin:** Pasal pokok pun makhluk dia ada nyawa. Dia boleh bersembang, Tuan Yang di-Pertua. Sebab itu bila kita tanam pokok petang-petang bila kita pencen dok pi siram pokok kita bersembang dengan pokok. Bilalah hang hendak berbuah lagi durian, woi. Sudah lima tahun aku tanam, buah tidak keluar, bunga tidak keluar, aku tetak hang baru hang tau. Pokok terkejut hendak kena tetak, tahun depan dia berbuah. Ini orang dok cerita pada saya.

**Dato' Seri Diraja Syed Razlan ibni Syed Putra Jamalullail:** Pakar pertanian.

**Dato' Paduka Haji Badruddin bin Amiruldin:** Ini pakar pertanian Arau sebelah saya habaq.

**Beberapa Ahli:** [Ketawa]

**Dato' Paduka Haji Badruddin bin Amiruldin:** Arau selalu dok bersembang dengan pokoklah. [Ketawa] Pokok jati banyak di Perlis, dok bersembang dengan pokok jatilah. Jadi saya hendak tanya Mambong, kalaulah manusia tidak mahu ikut peraturan, tidak mahu ikut undang-undang, hendak ikut perasaan, hendak ikut keuntungan tebang pokok dan sebagainya, akhirnya apa akan jadi pada dunia kita ini. Terima kasih Mambong.

**Dr. James Dawos Mamit:** Terima kasih Yang Berhormat Jerai, kalaulah semua pokok ditebang di Malaysia hari ini, 10 tahun akan datang kita akan dapat pokok dan spesies yang sama. Yang penting adalah bagaimanakah kita tebang pokok itu, sama ada kita tebang pokok dan semua pokok meluaskan satu kawasan dan meratakan tapak itu, yang penting meratakan tapak itu. Kalau kita meratakan tapak itu ini bermakna kita sudah buang tanah di atas, *humus* yang amat penting untuk tumbuh pokok kembali. Tetapi kalau kita tebang pokok dan meratakan tanah di situ, maka kita hanya ada *parent material* di bawah. Ini pokok tidak dapat tumbuh lagi sehinggalah ada humus di atas, di mana pokok boleh tumbuh kembali. Di negara-negara lain kalau dia tebang...

**Tuan Jimmy Donald [Sri Aman]:** [Bangun]

**Timbalan Yang di-Pertua [Datuk Dr. Yusof bin Yacob]:** Ya, Sri Aman, berminat juga, Sri Aman.

**Dr. James Dawos Mamit:** Nanti ya. Negara-negara lain seperti negara tropika, hujan banyak memang senang untuk pokok tumbuh kembali, tetapi negara seperti negara di kawasan Sahara, negara *temperate* ini kurang hujan. Kalau dia tebang pokok memang susah pokok hendak tumbuh, itulah sebabnya Bangsa-Bangsa Bersatu ada satu

konvensyen yang dinamakan *Decertification Convention*. Konvensyen ini tidak menggalakkan penebangan pokok di sebelah kawasan-kawasan Afrika, kawasan Sahara kerana setiap hari kawasan pasir di Afrika dan di Sahara ini bertambah sebab hujan kurang, jadi pokok tidak tumbuh, di situ memang tidak boleh tebang pokok. Di negara *temperate* mereka tanam pokok, tetapi lambat tumbuh kerana kurang hujan. Ya, Sri Aman sila.

**Seorang Ahli:** Kalau pokok tidak ada?

**Dr. James Dawos Mamit:** Kalau pokok tidak ada, ini bermakna bahawa udara yang kita hidu setiap hari mengandungi karbon dioksida, kerana kita yang mengeluarkan karbon dioksida, tidak ada pokok menyerap karbon dioksida, maka matilah kita, dunia kiamat. Yang membuatkan dunia kiamat ialah kerana kita mencemarkan udara dan air. Akhirnya kita akan mati. Ya, Sri Aman.

**Tuan Jimmy Donald:** Terima kasih Yang Berhormat dari Mambong bercakap tentang pokok, setahun sekali kalau saya tidak silap kita ada *Forest Tree Day*, di mana kita semua di Malaysia, kita jadi orang gila menanam pokok dan yang anehnya apabila kita menanam pokok, kita menanam pokok di tepi-tepi jalan raya dan apabila pokok ini besar nanti orang yang memandu kereta tidak nampak kereta yang datang dari hadapan mereka kerana selekoh itu sudah penuh oleh pokok-pokok.

Sebenarnya apabila JKR membuat jalan raya mereka tidak mahu perkara seperti itu terjadi. Jadi apakah saranan Yang Berhormat yang pakar tentang *environment* kepada menteri-menteri kita. Yang satu kata, tidak usah menanam pokok di selekoh-selekoh di tepi-tepi jalan raya, dan yang satu kata tanam di semua tepi jalan raya. 10,000 kah, atau RM1 jutakah kadang-kadang *target* kita pada *World Forest Tree Day* ini?

**Dr. James Dawos Mamit:** Terima kasih kawan daripada Sri Aman. Kalau kita tanam pokok kita mesti mahu merancang jenis pokok yang kita harus tanam dan tapak di mana kita boleh menanam jenis yang sesuai. Kita tidak boleh menanam pokok meranti di tempat di mana pokok meranti tidak boleh tumbuh. Ini dinamakan *species site classification*, iaitu jenisnya dan tapak yang sesuai. Jadi isu yang disebutkan oleh Yang Berhormat Sri Aman tadi ialah berkenaan dengan tanam pokok di selekoh jalan. Kalau pokok besar, dia sudah tumbuh tinggi maka saya rasa kita boleh nampak kenderaan yang datang daripada arah sebelah kita, tetapi kalau kita tanam bunga ataupun *shrub* dengan izin, maka daun dia yang bertimbun-timbun kita tidak boleh nampak kenderaan lain, kerana ketinggian mata kita sama dengan daun-daun bunga tersebut. Jadi inilah masalah sama ada kita hendak tanam pokok ataupun tanam bunga, kalau kita tanam pokok lebih baik jabatan perhutanan mencari pokok yang sudah besar sedikit dan pindah dekat situ untuk di tanam. Ini tidak akan menghalang pemandangan kita.

**Datuk Ismail Sabri bin Yaakob:** [Bangun]

**Timbalan Yang di-Pertua [Datuk Dr. Yusof bin Yacob]:** Bera bangun Yang Berhormat, belakang itu.

**Dr. James Dawos Mamit:** Bera lagi bangun, okey Bera.

**Datuk Ismail Sabri bin Yaakob:** Terima kasih Tuan Yang di-Pertua dan terima kasih Yang Berhormat Mambong. Saya hendak tanya dari segi pandangan Yang Berhormat.

Yang banyak bercakap tentang pemeliharaan alam sekitar adalah negara-negara Barat, yang mana mereka telah banyak melakukan kerosakan hutan di negara mereka sendiri. Mereka juga bertanggungjawab dari segi penipisan dan lapisan ozon dan sebagainya. Mereka jadi maju apabila mereka sendiri menebang hutan-hutan mereka untuk pembangunan dan sebagainya. Tetapi masalah mereka dipindahkan kepada kita, apabila kita dibebankan dengan berbagai-bagai undang-undang, berbagai-bagai perjanjian dan sebagainya kononnya untuk memelihara alam sekitar. Akibatnya kita disekat daripada memajukan kawasan pelancongan, menebang hutan-hutan untuk dijadikan pendapatan kepada negara kita dan sebagainya. Jadi apakah pandangan Yang Berhormat, adakah kita terlalu terikut-ikut dengan pandangan Barat ini yang semata-mata untuk menyelamatkan dan menyelesaikan masalah yang telah mereka timbulkan dahulu akibat pembangunan mereka?. Terima kasih.

**Dr. James Dawos Mamit:** Terima kasih Yang Berhormat daripada Bera. Sebenarnya kita menjaga alam sekitar ini daripada segi keperluan kita sendiri bukan hendak terikut-ikut cara Barat. Memang benar Barat sudah menebang hutan-hutan asli mereka dan sekarang mereka sudah mendirikan banyak kilang pembuatan yang mengeluarkan asap di udara ataupun di *atmosphere*. Ini menyebabkan kekurangan lapisan atau kerosakan lapisan ozon di North Pole dan juga di South Pole yang mungkin menyebabkan sinar dan cahaya matahari tembus ke dunia ini dan membuat kepanasan di dunia ini. Tetapi PBB atau United Nations telah pun mewujudkan satu protocol yang dinamakan Kyoto Protocol. Dalam Kyoto Protocol ini merata-rata negara di dunia ini memang mahukan negara yang sudah maju dan negara yang di mana banyak kilang pembuatan ini untuk mengurangkan pengeluaran asap ke udara.

Oleh yang demikian, di dalam *Kyoto Protocol*, negara-negara yang sudah maju di mana hutan-hutan mereka sudah pun ditebang, sudah habis hutan-hutan asli, mesti mengurangkan pengeluaran asap sebanyak lima peratus daripada tahun 2008 hingga ke tahun 2012. Ini bermakna di negara-negara maju, berjuta-juta rakyat mereka akan kehilangan kerja kerana banyak kilang akan ditutup. Oleh itu mereka pun mahu kita ikut. Itulah sebabnya di dalam Protokol ini mereka pun menyebut bahawa semua negara mestilah mengikut peraturan tahap pengeluaran asap pada tahap tahun 1990. Jadi semua negara akan mengurangkan pengeluaran asap ataupun *greenhouse gases* yang dikeluarkan kepada tahap tahun 1990.

Ini adalah satu politik yang harus dan terus dibincangkan di dalam Kyoto Protokol sekarang dan mereka juga mahu mengenakan dan menetapkan satu kaedah yang dinamakan *Carbon Development Mechanism* di mana negara-negara maju boleh menjual *carbon* ataupun asap yang mereka keluarkan kepada negara-negara yang kurang maju supaya kita ini tidak menebang pokok di negara kita, tetapi mereka bayar bukan dengan harga yang begitu tinggi, mungkin dengan satu kadar yang mencukupi. Ini juga satu perbincangan yang masih berjalan di peringkat antarabangsa mengenai *Kyoto Protocol*.

Tuan Yang di-Pertua, saya teruskan ...

**Timbalan Yang di-Pertua [Datuk Dr. Yusof bin Yacob]:** Yang Berhormat, Yang Berhormat bagi Kuala Terengganu bangun.

**Dr James Dawos Mamit:** Yang Berhormat bagi Kuala Terengganu, okay.

**Dato' Razali bin Ismail:** Baik, terima kasih Tuan Yang di-Pertua. Saya hendak tanya Yang Berhormat yang ahli dalam bidang alam sekitar, apakah maknanya apabila negara besar seperti Amerika tidak mematuhi kepada Protokol Kyoto ini sedangkan mereka ini adalah merupakan penganjur utama kepada masalah-masalah yang berbangkit berhubung dengan alam sekitar. Jadi, apa maknanya, seolah-olah mereka mahukan negara-negara yang kecil itu sahaja yang menerima pakai Protokol Kyoto ini. Saya rasa ini tidak berapa adil sedangkan mereka telah membangunkan negara mereka dengan begitu hebat sekali. Negara kita dengan hutan belantara yang ada itu seolah-olah dijadikan sebagai *carbon sink*, dengan izin, berlaku di kawasan kita untuk menyelamatkan negara mereka yang telah menimbulkan sengsara dan akibat kepada masalah *environment* ini. Apa pendapat Yang Berhormat?

**Dr. James Dawos Mamit:** Terima kasih Yang Berhormat bagi Kuala Terengganu. Itulah peliknya Amerika Syarikat yang mengamalkan *double standard*. Mereka tidak mahu menandatangani dan *meratify Kyoto Protocol*. Ini bermakna badan dunia dan anggota-anggota *Kyoto Protocol* tidak dapat menghukum mereka apabila mereka mengeluarkan asap dengan lebih banyak ke udara. Kalaulah asap ini tidak boleh berjalan, ini baiklah untuk kita kerana asap itu akan hanya berada di Amerika Syarikat. Tetapi asap boleh bergerak, dia tidak mengenali sempadan dan bergerak ke mana-mana sahaja. Jadi kitalah, hutan kitalah yang menyerap karbon dioksida ini dari Amerika Syarikat.

Kalaulah negara yang tidak menandatangani setiap protokol ataupun konvensyen, negara lain tidak dapat mengambil tindakan untuk menghukum negara tersebut. Sebagai contoh, pengimportan bahan industri ataupun sisa industri dari Taiwan. Taiwan bukannya ahli kepada *Basel Convention*, jadi kita tidak boleh menghukum Taiwan dalam perkara ini.

Oleh sebab itulah bahan ataupun sisa-sisa industri masih berada di Simpang Renggam di Johor kerana kita tidak dapat mengambil tindakan terhadap negara Taiwan.

Tuan Yang di-Pertua, saya teruskan dengan menyentuh tentang penilaian kesan terhadap alam sekitar (*environmental impact assessment*) ataupun EIA, dengan izin. Ia dianggapkan satu alat bagi perancangan dan pengurusan projek pembangunan dan diterima pakai sebagai salah satu kaedah untuk kepastian pencapaian pembangunan lestari di peringkat antarabangsa. EIA diwajibkan sejak tahun 1987 apabila perundangan kecil yang bernama Perintah Kualiti Alam Sekeliling (Penilaian Kesan Terhadap Alam Sekitar) (Aktiviti-aktiviti Yang Ditetapkan) atau (*Environmental Quality*) (*Environmental Impact Assessment*) (*Prescribed Activities*) Order.

Perintah EIA yang diguna pakai kini memang banyak kelemahan. Di antaranya ialah aktiviti-aktiviti yang ditetapkan dalam perintah ini di mana EIA diperlukan dan diwajibkan, disekat dengan saiz kawasan minimum tanpa mengambil kira fasa pembangunan. Jika saiz kawasan kecil daripada saiz minimum walaupun sedikit, maka EIA tidak wajib. Perintah EIA dengan mengurangkan saiz kawasan yang dimajukan, di mana pembangunan sengaja dilakukan dalam kaedah berfasa, pembangunan fasa pertama, kedua dan seterusnya kurang daripada keluasan minimum yang diwajibkan oleh EIA di kawasan projek yang sama. Inilah yang berlaku di projek pembangunan perumahan di kawasan Bukit Cahaya Alam di Shah Alam, di mana 1,200 ekar kawasan perumahan dibahagikan kepada kawasan-kawasan kecil bawah daripada saiz minimum keperluan EIA walhal EIA wajib dijalankan ke atas projek seluas sekurang-kurangnya 50 hektar.

**Timbalan Yang di-Pertua [Datuk Dr. Yusof bin Yacob]:** Yang Berhormat bagi Tuaran bangunan, Yang Berhormat. Yang Berhormat ada tiga minit lebih kurang.

**Dr. James Dawos Mamit:** Silakan Yang Berhormat bagi Tuaran.

**Tuan Wilfred Madius Tangau:** Terima kasih Yang Berhormat. Adakah Yang Berhormat bercadang mengatakan bahawa EIA ini adalah tidak efektif atau undang-undang yang sedia ada tidak efektif dalam persoalan EIA untuk menangani masalah alam sekitar ini. Terima kasih.

**Dr. James Dawos Mamit:** Undang-undang yang ada sekarang, Yang Berhormat bagi Tuaran, tidak efektif bagi menangani masalah-masalah alam sekitar kerana kalau ada saiz minimum, pemaju dengan sengaja mengurangkan saiz. Fasa pertama dia membangunkan kurang dari saiz minimum, fasa kedua pun begitu juga dan fasa ketiga begitu juga. Jadi, EIA memang tidak berkesan dalam hal ini.

Oleh yang demikian, siapakah yang bersalah? Pemaju ataupun perundangan kita yang tidak diubah mengikut zaman? Bagaimanakah Jabatan Alam Sekitar boleh menguatkuasakan perintah EIA jika keluasan pembangunan di bawah saiz minimum projek tersebut? Tambahan lagi bidang kuasa penguatkuasaan Jabatan Alam Sekitar hanya timbul apabila laporan EIA sudah diluluskan – saiz minimum 50 hektar, 20 hektar ataupun 5 hektar sama sahaja kesan impaknya terhadap alam sekitar di kawasan yang sensitif.

Oleh itu siapakah yang pakar dan layak menetapkan saiz minimum kawasan untuk sesuatu projek? Untuk ini saya menyarankan agar saiz minimum harus tidak ditetapkan. EIA haruslah ditentukan oleh seorang menteri yang bertanggungjawab ke atas perancangan dan kawasan yang kecil yang tidak memerlukan EIA, sistem permit haruslah diwujudkan.

**Timbalan Yang di-Pertua [Datuk Dr. Yusof bin Yacob]:** Cukuplah Yang Berhormat. Masa Yang Berhormat sudah habis.

**Dr. James Dawos Mamit:** Sudah habis? Boleh sambung besok?

**Timbalan Yang di-Pertua [Datuk Dr. Yusof bin Yacob]:** Tidak bolehlah, bagi peluang orang lain. [Ketawa]

**Dr. James Dawos Mamit:** Tadi 20 minit sahaja Tuan Yang di-Pertua.

**Seorang Ahli:** Setengah jam Yang Berhormat.

**Dr. James Dawos Mamit:** Terima kasih.

---

**Timbalan Yang di-Pertua [Datuk Dr. Yusof bin Yacob]:** Cukuplah Yang Berhormat. Waktu sekarang ialah jam 6.30 petang. Dewan yang mulia ini ditangguhkan sehingga jam 10.00 pagi esok. Dewan ditangguhkan.

***Dewan ditangguhkan pada pukul 6.30 petang.***